

剡源集

戴表元

文碩閣

wenshuoge.com

目录

关于我们	3
提要	5
目录	6
原序	10
自序	11
卷一	12
卷二	21
卷三	29
卷四	37
卷五	45
卷六	52
卷七	57
卷八	66
卷九	73
卷十	81
卷十一	89
卷十二	96
卷十三	102
卷十四	111
卷十五	122
卷十六	128
卷十七	135
卷十八	139
卷十九	150
卷二十	158
卷二十一	165
卷二十二	172
卷二十三	179
卷二十四	185
卷二十五	193
卷二十六	200
卷二十七	206
卷二十八	220
卷二十九	232
卷三十元	251

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

钦定四库全书 集部五

剡源集 别集类四【元】

提要

【臣】等谨案剡源集三十卷元戴表元撰表元字帅初一字曾伯庆元奉化人宋咸淳中登进士乙科除建康教授迁临安又迁行户部掌故国子主簿皆以兵乱不就元大德中以荐信州教授调婺州移疾归再以修撰博士荐不起终於家事蹟具元史儒学传表元所着剡源集明初上於史馆宋濂曾序而刻之凡二十八卷其板久佚此本乃嘉靖间四明周仪得其旧目广为蒐辑厘为三十卷表元後裔洵复梓行之王士禎居易録称海寧刻剡源集四卷乃黄宗羲所选録非完书也表元少从王应麟舒岳祥游学问渊源具有授受顾嗣立元诗选小传称宋季文章气萎薶而词骯骯帅初慨然以振起斯文为已任其学博而肆其文清深雅洁化朽腐为神奇间事摹画而隅角不露尤自秘重不妄许与至元大德间东南之士以文章大家名重一时帅初一人而已又引宋濂之言曰濂尝学文於黄文献公公於宋季词章之士乐道之而不已者惟剡源集先生为然云云於元人之中推之独至今观其诗文信嗣立所论不诬也乾隆四十六年六月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

目录

钦定四库全书 集部五

剡源文集目录 别集类四【元】

卷一

记

卷二

记

卷三

记

卷四

记

卷五

记

卷六

记

卷七

序

卷八

序

卷九

序

卷十

序

卷十一

序

卷十二

序

卷十三

序

卷十四

序

卷十五

墓志

卷十六

墓志

卷十七

墓表

墓碣

卷十八

题

卷十九

题

卷二十

跋

铭

箴

赞

述

碑

卷二十一

赋

卷二十二

史论

卷二十三

杂着

祭文

卷二十四

书啓

疏

传

劄子

说

谕

卷二十五

讲义

卷二十六

讲义

卷二十七

古诗五言

排律

卷二十八

古诗七言

卷二十九

律诗五言

律诗七言

卷三十

律诗七言

絶句五言【杂体附】

絶句七言

原序

剡源文集原序

濂尝学文於黄文献公公於宋季词章之士乐道之而弗已者惟剡源戴先生为然濂因日购先生之文絶不能以多致会有诏纂修元史命濂总裁其事事有阙遗者遂以上闻遣使访於郡国窃以谓先生著作有关於胜国宜多乃属使者入鄞徧求之鄞先生乡国庶几有得之者曾未几何果以剡源文集二十八卷来上濂始获而览焉因而作曰辞章至於宋季其敝甚矣公卿大夫视应用为急俳偕以为体偶俚以为奇腴然自负其名高稍上之则穿凿经义櫟括声律孳孳为华世取宠之具又稍上之標掠前修语録佐以方言累十百而弗休且曰我将以明道奚文之为又稍上之骋宏博则精粗杂揉而略绳墨慕古奥则删去语助之辞而不可以句顾欲矫敝而其敝尤滋私自念词章在世如日月之丽乎天虽疾风暴雨动作无时将不能蔽蚀其精明独怪夫当时之士奚为乏一人障其狂澜耶复念豪杰之士何代云无区区所见孤陋故鲜能知之非诚然也及览先生之作新而不刊清而不露如青峦出云姿态横逸而连翩弗断如通川萦纡十步九折而无直泻怒奔之失呜呼此非近於所谓豪杰之士耶盖先生七岁即知攻文咸淳中入太学以三舍法升内舍生既而试礼部第十人登进士乙科调教授建康府又迁临安教授行户部掌故皆不就会宋亡为元执政者荐之起为信州教授先生年已六十一矣寻迁婺州以疾辞後六年终於家初先生既擢第悯宋季词章之陋即濯然自异久之四方人士争相师法故至元大德间东南文章大家皆归先生无异词先生之没仅六十年已罕有知其名若字者殊可哀也濂在史局既命彙入儒学传中及司业成均复将録其剡源集者归以示诸人而先生之乡有夏君阅者来为国子学正方与先生之孙资先谋刻於梓夏君遂以题词为请且谓知先生之深者惟黄文献公公既不可作子幸无让於是忘其僭踰而为序之如此呜呼丰城之劒荆山之玉纵埋没泉壤为已久神光上贯於霄汉者终弗能掩也其先生之文之谓乎先生讳表元字帅初一字曾伯庆元奉化州人洪武四年秋八月望日金华後学宋濂谨序

自序

剡源文集自序

先生姓戴氏名表元字帅初一字曾伯其世谱可知者六代祖居奉化县小方门三传而徙坊鄞又再传而徙剡源之榆林先生生淳佑甲辰五岁知读书六岁知为诗七岁知习古文十五始学词赋十七试郡校连优补守六经谕即厌去游杭作书言时政激摩公卿大人无所避杭学每岁贡士得三百员试礼部中者十人入太学谓之类申二十六岁已巳用类申入太学明年庚午试中太学秋举岁终校外舍生试优升内舍辛未春试南省中第十名五月对策中乙科赐进士及第授迪功郎昇学教授癸酉冬起昇及乙亥春以故归旧庐改杭学教授辞不就既而以恩转文林郎都督掾行户部掌故国子主簿会兵变走避邻郡及丁丑岁兵定归鄞至是三十四岁矣家素贫毁刼之余衣食殆绝乃始专意读书授徒卖文以活老稚鄞居度亦不可久遂买榆林之地而庐焉如是垂三十年执政者知而怜之荐授一儒学官因起教授信州噫老矣大德丙午归自信州时体气益衰而婚嫁渐已毕即以家事属诸子使自力业以治养具然性好山水每杖策东游西眺不十里近才数百步不求甚劳意倦辄止忘怀委分自号曰剡源先生因以名其集或称质野翁充安老人云

卷一

钦定四库全书

剡源文集卷一元 戴表元 撰记

仁壽殿记【代阮侯】

庆元路奉化县学仁壽殿成县尹丁济以书谄於同知总管府事阮麟翁曰愿有所述麟翁曰尝学诗而窃闻诗之说曰天下之生未有无本者也万物本乎天为之子者本乎父母而民本乎君是三者仁之至也而有报物莫壽乎天天之壽不待物愿之而壽也然而孰不愿之若人子之壽其父母则苟可以愿者无不至矣此报之道也昔者周之始兴其诗有七月周之极盛其诗有鳧鷖既醉周至於文武成康而仁其民至矣其民如天如父母以怀之怀之不已则咏歌之咏歌之不已则相与持酒醪饮食具乐舞设祝嘏以壽之此人之情亦报之道也然独至於鹿鸣四牡皇皇者华棠棣伐木之燕乐天保之归美则疑若君私仁其臣臣私壽其君而民无所与久而知之则鹿鸣诸诗之所燕乐者即周之亲贤中外诸臣所托命以仁其民者也天保之归美则诸臣采诸其民而献之即其平时持酒醪饮食具乐舞设祝嘏而欲以寿其君者也噫乎休哉洪惟皇元继宋御宇奄有诸夏橐弓偃钺而天下戢其威纘征缓狱而天下颂其平惟兹海邦远在数千里外慈仁所加无间轩陛故诏书每下斥鹵之氓岩穴之叟投缙植耒驩喜出听诚可谓千载一时太平混合之嘉会而麟翁及济适於此时分受国邑何荣如之始麟翁佐治宣城济实为附属迨麟翁之来复相际接诚嘉其廉明肃给之材而出之岂弟乐易庶几乎知古诸侯之职而无愧於诸侯之所称说今又因斯民休养之余力不烦寸符尺箠而斯宫鼎成以彰尊君报本之意麟翁安敢不发扬而褒侈之乎若夫作为一代声歌以追继风雅使天子仁声令闻无疆无极则学馆诸生必有美其事者麟翁愿窃有俟焉至元壬辰秋七月望

奉化州学兴筑记

古之齐民一名为儒则其人所以自待与官府所以待之皆异至於学校虽有常居而发政出师养老习射献馘听狱之类无不在焉然方其盛也有优礼以乞其一言俗之既衰乃或欲毁之而杜其议政俗之益衰上下始专守夫子遗言以为法故有庙以严鬼神而有学以明礼乐吾奉化犹为县也庙学栋宇几为兵废襄赍丁公济来为尹兴之县既升为州相距不十年而垣藩不修卫防旷空荆芜被之蹊隧生焉某郡王公某来为守悒然叹曰兹非吾职乎即与同寮议兴之计其役赋板?均丈仞章逢乐输胥徒驩从累旬百堵齐立於是增绘象施蔽帷鼓篋之堂嵩呼之殿风雩之亭童衿之舍缺完仆兴罅补茅塞闾游有禁观眺有节偃憩有适瞻展有敬重局穹屏修衢清浸于于相仍云行星辉噫乎美哉州之耆老遂相与燕乐而谋勒文以颂公之贤着公之惠余自韶龀实尝从父兄居游庠序间见魁儒钜公无虑百数皆修衣冠隆阔阅岁时燕毛序坐谈古今久近文献亦或雌黄当世人物孩穉辈立听不倦归必充然有得以余之愚至今犹能缕缕记忆本末如昨日也每课试县大夫亲命题第赏格慈爱教督如

子弟及以事相见酬答如客于时风淳气厚上下情义周洽与前所称古俗殊为未远顾孑然眉颜亦复苍皓犹幸及身为贤侯之氓狎见庙学之兴而咏歌德化之成良可自庆因为摭实纪载如右而并缀所闻见一二以励吾党亦务谨重修飭以称官府见厚之意云大德五年岁在辛丑冬十一月望

和靖书院记

越会稽五云乡之石帆里故侍讲侍郎和靖先生尹肃公之墓在焉肃公洛人以学行名节为程门高弟间关载道而南盖晚年遂寓居越死又葬越越人慕而祠之也宜元贞丙申冬部使者曹南完顏公贞按越有诣门下而言曰越虽山州而多儒先故实属时兴文郡国有名贤者许即祠建塾徽朱文公以莅仕严戴处士王右军以隐居皆自教典有如肃公生依死藏於越乃祠而不塾非阙欤前使者河南狄公尝草创筹度不果就惟公图公闻之兴曰岂不在我即属其事学官学官以闻於提举学事以谕於郡若宣慰使以上於省府报下如请先是议易地於龙瑞宫之傍以为址黄冠师世业也不便曹南公与郡侯鸿和尔通议躬往相视而得今卜北山寒南日铸东樵风迳而西石帆石帆之陰即肃公之墓冈溪萦环墟聚绵密越之名迹秦皇酒瓮射的玉笥阳明洞天之属一一在目咸曰蔚乎佳哉议既定里士林发藻泊弟震以地之比近者欣然相成其在民产犹有所碍则郡侯通议公捐俸金厚价买之而址始完乃以大德丁酉季春起工讫明年戊戌仲秋日才五百有奇锄荒起废而成祭室讲堂藏修之庐庖湢之舍凡为楹一百有六十祭器昔无所有而新冶铜陶土鬲竹木制之者为事九十四通塾之址及田土之隶於塾者为亩二伯其役之速而民不病其劳其费之鉅而士不知所出塾成扁之曰和靖书院而相与伐石愿记其始末余惟天下之事虽有皆知其尽善者必人与时相值而始能成古之人贤有道德可师於乡则死而祭於其社在礼谓之乐祖又凡始立学必求其国之故而祭之以为先圣先师国无其故然後不得已合於邻肃公之贤其在越也谓之当祭於社谓之当为儒祖苟立学而求其故谓之当为国之先师此事之甚善者也然积之久而无人为之有为之矣而不能成迨至於今始值曹南公以材御史高选持节而来实廉劲知大体郡侯通议公亦由闽部使者移守至郡寬明有慈爱官师偕孚材良劝趋於是郡之贤士大夫皆出而佐谋赞力而终始经营办治者郡学正王君庭槐是为北岳右丞公谋孙皆非偶然之故也君子嘉其事之成而为越人喜也曰是不可以无记是为记若夫肃公言行出处本末之详不特越人知之天下学者皆能言之此不着其年八月望日前进士剡源戴表元记

美化书院记

美化书院以处之缙云美化乡得名旧矣当江南初创时宗正寺主簿陈公大猷以名大夫太傅乔公行简以材宰相相与竭力鼓动绚饰穹碑钜榜隆栋宏址美化虽在缙云穷山中一日而名字闻於天下脍炙於缙绅韦布之口然书院立未百年兵毁及之悉化而为蒿莱烬砾问其本末则已无有道之者元贞二年秋九月四明陈君天益始披纓绶来为山长於是事属平定前莅是官者薄其地迂廩瘠往往托故不至礼殿六楹孤立风雨中肖象弗建奠谒靡寄饗粮祭器若其他供养居止之须种种匱乏君曰是欲谁诿耶即易瓦补塞修甃漏设素王之容倡先贤祠屹门阙翼庙廉秩豆筮诸事既以略备乃率先置养士田十五亩继而询荒核耗

经理而得田及诸儒所助通一顷六十四亩由是春秋之祭费取焉朔望之膳具取焉师长职员之稍给取焉月有书季有考雍雍于于云兴谷应岩居之叟涂行之子嗟呼叹以为不图荒凉契濶矣而复有歌舞雩观矍相之圃之感也惟讲书之堂以役重未就大德元年冬十二月廉副使贝降公僉事完顏公临其地嘉前事之有绪而欲雄其成也以属邑主淮安翟侯翟起望族年方壮有材识尤致意学校事人劝趋之遂增台门新宫垣至明年十月而堂竟成完顏实始大书美化书院额亦书其堂曰美化堂於戏美化之於縉云縉云之於处视秦汉郡县乡遂之所隶属地不加大也处有学縉云有学美化复有书院视周人之序而庠庠而塾学不加多也而君子论古常若有余验今常若不足要非皆人事之咎势或有所待焉周法取人用乡举里选秦汉以兵以赏以吏至择经术生犹多本齐鲁法之益衰始有科举今此事且止士庶几返本趋实而令宰如翟侯师儒如陈君适皆能效职於下知体要急名教如两使者能大宣其道於上将见人人闲散党正不暇书家家毛伏儒林不胜传礼俗匝於寰区王风荡乎无垠而美化为之兆矣遂相率砉石聘文愿着兴作之始以贻永久余不得辞因次第而为之记

稼轩书院兴造记

广信为江闽二浙往来之交异时中原贤士大夫南徙多侨居焉济南辛侯幼安居址阙地最胜洪内翰所为记稼轩者也当其时广信衣冠文献之聚既名闻四方而徽国朱文公诸贤实来稼轩相从游甚厚於是鷺湖东兴象麓西起学者隐然视是邦为洙泗阙里矣然稼轩之居未久芜废辛氏亦不能有之辛巳岁太守会稽唐侯震因豪民之讼阅籍则其址为官地明年乃议创筑精舍以居生徒才成夫子燕居及道学儒先祠而唐侯去其冬番禺李侯雷初至遂始竟堂寝斋廉门台诸役成而扁其额曰广信书院甲戌岁春也书院成之二十五年是为大德二年戊戌官改广信书院额还曰稼轩而栋宇颓敝已甚又五年北谯朱侯霁至展谒见之作而曰兹复谁诿乎即属山长新安赵君然明极力经理初书院之为广信也计屋不啻二百楹浮瓦铺缀不支风雨及整顿完损迄成坚厦讲庐斋房储仓膳庖会朋之序休客之次通明之牖备礼之器於昔所有必补凡今所无必具植都门缭周墙甃文迺余尝以暇过赵君冈峦回环榆柳掩鬱长湖宝带横其前重关华表翼其後心甚羨之问水堰曰是中可种万头鱼今以蓄泄水处也问松台曰是稼轩遗迹旧植栢千株今增之成林也问桑圃官池曰是稼轩所耕钓今表而出之也问湖上门曰是旧涂自西循湖南东来今始复也问新井曰是旧凿今得诸涯莽中修浚而汲之非新井也问地广袤若何曰是西北旷土皆稼轩故物为营卒所侵吾请於官得复而万户府又约束之使无扰也问土役多寡财计赢缩若何曰吾力何以及之此赖郡侯捐俸倡助而诸人相与成之也问余役尚几何曰吾所欲就何有极使不以满去将专祠辛侯别置小学作一亭名倚晴以眺灵山诸峯一亭名鱼乐以俯西池一亭名荡鸥以复湖心之旧也嗟夫人尝言有才不得位及有位何尝见其才顾其志何如耳一精舍之在广信於事未系轻重识者以是覘风化厚薄吏治贤否自唐李二侯去又废几何年而仅遇今朱侯其间岂皆无位而不为乎若赵君以一癯儒领空塾能成贤守意兴重役其才志弥不可及谨为摭实登载本末於石以劝来者

银峯义塾记

银峯义塾者饶德兴余文夫氏之所筑也银峯饶之胜处余望族文夫雅士居望族得胜处不私以为游观憩舍而藏书辟馆欲与同志好学者共之诚哉其可以谓之义矣初文夫之先有以长者称於乡尝求聚远楼诗於苏学士文忠文忠褒赠之其後有朝散公又得赵丞相忠定题其居之岁寒溪累传而至曾祖乡贡公遂用所学教其子遂昌尹以进士科为通儒名大夫是为思斋先生思斋及游新安朱晦翁之门居家注感兴诗及蔡氏三问解与夫性理诸书悉行於世思斋之子聚斋公仍以进士业贡於乡而值举罢不得尽试文夫濡染家教自其妙龄如龙马驹未调而知步如器车材不削而成轨性复高爽不动於势利进取兢兢然惟恐坠思斋基构是惧而银峰之塾兴焉塾既兴不远重江复岭介友人橐底以谒文於余余惟文夫之兴是役也有二其一曰尊祖以知本其二曰广教以美俗知本义也广教亦义也而余之所期於文夫则不止於是按塾之名起於礼记礼记曰古之教者家有塾党有庠术有序国有学四者疑皆有师教之而古者学无专官师无常员窃意惟国学有司徒乐正宗伯之属庠序则党正遂大夫等官自为之而塾者二十五家为闾而父老之不仕者坐於门侧之室为左右师以时督其子弟是之谓塾德兴於饶为多士文夫归而益以义致其老成而贤者礼之於家休之以车舆几席导之以书策琴瑟兴其少壮而材者纳之以介撰之祝习之以笙匏俎豆使德闻流畅情文周该将有魁奇英博之士弹冠束带轻身千里外慕义而至而况银峰苏赵之风声润泽未远於耳目间乎余虽老落成之余尚能为文夫赋之至大三年岁在庚戌孟夏哉生明婺州路儒学教授剡源戴表元记

洛阳独乐书堂记

司马温文正公居洛阳以道德文章功业为中原纯儒名臣当昇平之时享谦静之福所与游如文潞公邵尧夫二程夫子苏子瞻之徒又皆一时天下妙选而其独乐园者蕞然在诸豪贵间几不可比数人以公故亦屡喜游之窃计洛阳虽名区去之千百年欲复求时遇其人似不可再得公没未几何事果有不可言凡昔之王侯将相华榱绣户文轩畅毂弦歌锺鼓衣冠玉帛相与动心荡目以为承衍之娱者举一转而荒榛茂草独其山川犹存不过寒螿野兔之往来吊劳穷寂而已而行人过客樵夫里老下及儿童妇女道及洛阳故实则诵司马公之德不衰夫一司马公生而状貌无以逾人虽为相居位之日浅被服清苦无异穷书生不知何以能得人之叹慕若是然耶大德丙午岁余遇卫君用於信州幕府君用洛阳人问其故曰洛阳之事则既然矣抑独乐园亦不得为司马物吾图之百端幸而仅有之顾吾家自高曾大父以来世世知读司马公之书且知慕公之为人今驱驰北南髮渐种种洛阳之俗犹为近朴欲以其地为祠塾仍榜曰独乐以存先贤之化又他日更有余力则买田赋粟以供诸生之稍食庶里中後生小子可以共学於戯兹非司马公之遗风休泽所以覃被其後人者乎士大夫患无志不患无位君用清勤谨恪知体用敦雅实是真能学司马公者後有道龙门嵩少而来言独乐之役将见堂庑告成深衣释菜重席养老使洛中之人长者兴慈幼者知孝雍雍于于复还盛时旧观皆君用之赐也因书以为记

溧水州中正堂记

中山溧水之望也溧水自为县时官治常面之以临民出政其气势清严秀重与人情相称愜

县志以为贤宰史侯弥巩之所规构有正堂琴堂兰堂诸目相去八九十年仍之以兵革栋宇毁废县亦升改为州乃稍别筑听事退食之居而倥偬久不能备大德六年秋九月知州汝南郭侯敬始樽浮费乘余力创後堂四十楹然後会寮有容休劳有次展远有眺思深有憇且复置元幕於宾营左挺公廩於吏舍右戒石之隙?之古槐门台之表飞以丽譙至於秦淮一河油油洋洋与山趋迎絶为州境佳处则新亭俯焉耄倪士庶来游来观惊嗟叹惜夸未尝有侯因民之乐既率长佐举酒乐之总衆役之最题其堂曰中正堂曰吾为吾州求无慙吾中山且不忘史侯旧名也噫今人居一官揽其土之美惧不饜不惧不能称作事未分寸务求掩前人而专之若郭侯之顾名思义希贤励志宛然有古君子风度非可以世俗论史侯四明人於余为乡先生其家世父兄踵台辅能自立不附丽卒以学行政业着称於时郭侯治溧水廉而知体慈而守法盖与史侯异代同道盍斲石为州民纪之俾勿坏

当涂户曹掾续题名记

士大夫居今时而能轻旦暮之忧以为千载之计可以谓之难乎曰难也贡举盛而人不崇世官一介之贱初脱畎亩就禄州县间视簿书期会非素习其志拘而力穷虽有多能鲜有所作为持之仅三年幸不以罪斥辄相顾有满色又暇责其余哉惟户曹在诸掾中职最优责最轻意欲最易於上通有才者居焉往往擅一府政凡始调於吏部率愿得之夫其若是宜可以行志而乐於名高之人乘其少事又置之若不屑然曰吾不过为岁月回翔而已嗟夫食焉而无愧事焉而求有成自古圣贤犹难之今也不谓吾不堪其官反谓官不足充吾才寧非欺乎上饶杨性叔敏愿而文方盛年已能崛然取天子科第为当涂户曹之次益以余力大治其学六年而後至官至则廉声飈驰谏议川决前後部使者郡太守惊其能属委丛叠君昼坐议舍理案牍夜归繙读书传其说以为世之言儒者必摈吏习吏者必违儒将融偏揉异以适於世用是既蜕去州县之拘劳而复无乐於名高之累其择术审而用心宏待已尊而期泽物也急卓乎有可称已垂去以故事当题名而旧石久已溢顾瞻慨叹惧愈久愈失其传乃为续立石而遣使徵记於余余闻物之久莫如石先秦以来古文奇字载於石者必传然徒以久而不以贤古之贤而能传传而久者则不赖於石是故以石而传人不若以人而传石也性叔既身勉之且推此以励後之人使宦学於斯者皆能内不慚於心外不慚於政上不慚於君下不慚於民近不慚於朋友远不慚於简书虽微此石千载而下固将闻其风而慕焉而况有以诏之乎性叔名应桂今石盖自授君代者施君有政起书云

奉川驿记

浙江东行数百里将穷而为海也其州曰明州明州之海益东而南行数十里江之支流亦穷而山兴焉其为县曰奉化奉化苞山根江而掖海其形望於明州虽最高而土壤峭瘠津涂阻艰行者病之凡西人之舍水而欲东与东人之辞陆而欲西至者皆失其便故滨浙之涂通置船官骑廐而奉化无有余考地志奉化在秦汉前盖介於百粤瓯闽之交当先王统一盛时政役之所不加王人使客之所罕至其馆置疏濶非意故略之势有不可得而设也然近世事繁难槩於古前为县者尝屡创驿随作随废会有聘问发召期集之事节传猝至则寓诸民庐喧隘扰杂客主交愧焉今令襄贲丁侯济之来喟然叹曰是不可久且每至而烦民吾何安焉迺

相土度材得废址之在官者成屋之尝规为驿者於民?之东崇拓而增营之风雨蒿莱之场尘煤萤磷之区忽焉而垣合具轩寝立先是主簿李君大用实倡其画及是二丞王君泽白君龙志同议谐功用大集计屋之楹至於百有五十计功至於百八计日至於七十而官与民俱不知其劳起事於季秋庚戌讫功於仲冬巳未驿成因其故名名之曰奉川曰吾以存国俗名其堂曰德星曰吾以宾贤德噫嘻美哉於是县人乐侯之成嘉侯之勤者相与过余而谋曰兹事子不可以无记余惟侯之可纪者衆以余之为民於兹邑自侯下车见其当兵毁之余日夜与其同僚弥完缺败振理颓废昔之撤墙夷竈而逋亡者今皆归寻其庐有居处之乐而侯之所兴筑若庙学亭治赋鹺之局祭社之坛蔽狱之户诸如此类何可枚数而专美一驿乎哉顾侯之通明廉爱无一役不矜乎民凡以图久安而除其数害有古循良吏之风则吾父兄弟宜不可泯灭不着夫纪当世贤大夫之功行而推考其里俗山川风土之盛衰兴废此儒者之职也余不敢辞遂以为记

三江盐場兴造记

古之君子先民之劳而後逸其躬故虽不急於崇繕修美居处至於政成力暇因人情而兴公役贤者亦有取焉越三江盐场官舍岁久废坏前任事者谩不屑意元贞十年场之长官改陞司令爵在七品而大梁曹侯自公府高选实来为之盐法繁壅户额等第不可均民无完心侯至核枵实酌强耗推籍土业高下宜增而增宜缩而缩不旬月逋流还归盗贩清息昔之焦熬憔悴晨旰器器而莫之给者一鞭不施谈笑辨集官吏坐曹而相庆父老拥灶而交贺於是锄荒剗污鳩坚蒐良於听事故址新宴游憩息之室以人人计者三十有奇使客有归节将迎也僚史有聚協官守也输纳有藏谨赋计也临蒞有容严发召也观眺有娱宣惫勤也总室之大有堂因旧而扁之曰清安嗟乎今人之材有悉其聪明敏决仅周於簿书箠楚而不暇乎他营若古之运甕者亦有风神高旷视吏事不足浼我而寄托於耳目心体偃仰之乐若挂笏西山之为者此其道皆有所缺若侯之精粗不遗清恪兼至进尽奉职之能退全养志之适後之不威而政足以成物劳之不私而仁足以芘後盖非謏儒健吏所可窥识人繇三江来颇能谈侯隆寒溽暑躬造场亭家抚户谕餽粮不属至自备 糜以济其饥乏秋赋足置公堂上坐饮赏赐之人人得其驩其亏赋者拱手跪膝使之自悔余闻近民吏有父母之亲师保之教寧非是耶侯名实字秀实前历江西行中书省掾和州经历皆有政绩可纪通文学其材方乡用於时官且满士民感咽填诉持其车不听去而相率来请於前进士剡源戴表元愿书其事於石以着永远不忘侯德且劝後之为是官者遂不辞而为之记大德三年岁在己亥春正月望日记

临池亭记

临池亭者山陰右军祠塾之别筑也祠塾始自部使者东平王公侯按郡乘所载兰亭旧迹以全氏庐为之官为置塾长聚生徒讲学其中及是十年而东楚汤君屋实来既大出义理之学教塾徒余暇巡行邱壑周视垣宇慨焉有兴弊饰陋之意廼先修右军祠增绘象设龕几凡所以展奉严事之具必与礼称地迫山麓遇风雨湍决则水流堂间为甃石渠以疏其余有好事者蓄石本兰亭序甚善幸见与因并刻诸诗暨传文之类分置两壁塾事几略振矣惟墨池之在江南往往而有此正永和修禊处反阙不具遂捐俸倡率诸生又亟谋於时僚之贤而文者

东平彭郎中荣祖若右军之远孙易简润之等志谐力均爰相爰凿於是就面势之宜得池於塾西而翼之以兹亭亭成伐石请志其事余惟古之名人能以其所长行世不废者未有不始於勤劳而成於有以自重今右军书擅天下学士大夫极力模楷之幸且有得莫不修然内畅以为清修妙解虽连城之富三公之贵有不与易而是邦之山川形势前後名驰势驱计不知凡几何车辙马迹独右军遗事令人追慕不已良必有激摩动荡於翰墨之外此临池之所以为美也汤君年方富尊贤好古能行其家学居职不以营升斗苟岁月为事志於兴文美俗又方谋增置田租以完教养其事可书者未艾云大德五年岁在辛丑仲夏既望戴表元谨记

寒光亭记

寒光亭在溧阳州西五十里梁城湖上亭之下为寺曰白龙岁月湮漫不知兴创之所由始宋元丰间重修塔记称父老相传已七百载则沿而至今可知其久也东闽浙西淮襄宦客游人之所必至至必有歌诗咏叹以发寒光之美无虚览者张安国赵南仲吴毅父雄词健墨最为人所推重而栋宇垂废不足以相映发州有进士汤君以文辞为之徼施於江湖之往来值一二名公卿喜之亭得改立如此十年又废大德辛丑春进士君之诸孙实来相游寻顾瞻徘徊则昔之华櫓画檻惟荒榛存焉喟然曰兹亭之兴吾祖固有力今安得隳其勤倾貲庀工亭又加筑既又捐田白龙以为修葺之助功完事具寺僧乃为进士君置祠而来徵记於余人尝言江南佳山川造物者靳畀於人而惟僧佛者可以得而居之是盖不然人之获如此意者孰加於王侯将相彼其占形胜营园池斥台榭徒欲乐於其身有余丐及於宾游僮伎僧佛之乐常愿与人同之故人之从之材者不吝於言仁者不吝於财无怪也此非惟有数而用心之公私广狭吾徒有愧焉者多矣岂止於系一亭之兴废而已哉进士君诸孙曰德裕曰佑孙寺僧曰祖慧余剡源戴表元十年丙午季秋二十六日记

耿氏时思亭记

郛耿子都之先墓在泰山东汶水上子都既出仕游四方而心悬悬不能忘也一日以谕余曰吾家繇高曾以来忧於兵顾兆域虽存而榛芜莽然樵刍往来盖尝与宗党谋筑一亭以为展省之地而名曰时思子幸为我记之何如余惟子都之不忘其亲而思之於义既得而於名既称而其礼不可以不知也人子之於亲苟欲尽其情何有纪极先王每为之节使弱者可及而强者不能过如死之戚如狂如迷如逃亡无所归比既葬而虞而卒哭而祥而禫遂返服复寝而哀散矣至於葬也所以掩藏而安之而不敢修不敢易且不敢瀆而祭也然此犹论其近亲愈远者祧愈严服愈降者讳愈略故无见於目者无想於心先王惧其然於忌日也以为终身之丧而春秋时祀如见之於斋君子之不忘其亲而思之其慎诸此而几矣抑余於子都有思其大者焉耿故大宗而郛齐鲁儒府也耿自得姓以至子都凡几世世凡几兵兵而得完者几家完而得衣冠登仕籍者几人同枝而独荣气必有所鍾同源而独清流必有所渫子都於此时时而思之为人子则思孝为人臣则思忠为人长则思慈他日功成名遂行高爵尊怀章而归故乡下车而入里门父兄子弟燕毛庆饮姻游隣旧牲牢迎劳然後除道拜塚燎茨告恩虎羊蹲前冠劒立後使士大夫往来山东而道兹亭之下者瞻阡名而致肃读题表而太息将见儒林荣之乡评称之曰噫嘻耿氏门幸哉有後如此不亦美乎子都爽然而觉欣然而谕曰

吾虽初愿不至於是是子之言不敢辞因书以为记

乔木亭记

乔木亭在清河张君燕居之东张君望清河籍西秦其先世忠烈王尝以功开国於循而邸於杭子孙五世而所居邸之坊至今称清河焉余儿童游杭见清河之张方盛往来轩从驹盖填拥岁时会合鸣钟鼙笙丝磬筑相讌乐飞楼叠榭东西跨构累累然无闲壤岂惟清河虽它贵族盖莫不然如此不数十年重来杭覩宫室衣冠皆非旧物他族亦皆湮微播徙殆尽而惟清河之张犹存余尝登所谓乔木亭而喜之风烟蔽遮林樾清湊美乎哉其可以庶几古之故国乔木者乎主人对余而叹曰嗟乎吾乔木乎是亭者几不为吾有吾幸而复得之吾生於忠烈之家自吾之先未尝无尺寸之禄当其时出而逸游入而恬居耳目之於靡曼妖冶心体之於芬华安燕固未尝知有乔木之乐也自吾食贫不免於寒暑饥渴之患吾之处世不待勸而休涉事不待困而悔日夜谋所以居吾躬者百方欲复畴昔之髣髴不可得时时无以寄吾足骋吾心则瞰好风景佳时取古圣贤之遗言就乔木之傍而讽之其初不过物与意会久而觉其境之可以舒吾忧也为之徘徊为之偃息为之流连不忍舍去故倦则倚乔木而憇闷则扣乔木而歌沐则曦髮於乔木之风卧则曲肱於乔木之陰行止坐卧起居动静无一事不与乔木相尔汝盖吾昔也无求於乔木而今者知乔木之不可一日与吾踈也吾是以必复而有之余闻其言益惊喜昔人有欲存谢公宅者云爱召公者爱其甘棠有文靖之德而不能芘数亩之宅李卫公爱平泉草木至自作记戒子孙夫勲名世禄之家自不能保其存而使子孙存之子孙又不能存而使他人存之今清河忠烈王诸孙乃自能以力学好修存其先业至於皆仆而独完几弃而复振不惟无愧於後而反若有光於前真美乎哉於是张君止叹而作洗酌而谢曰非君吾亦不自知吾美之至此也盍书其词於吾亭以自劝且亦劝後之人

紫芝亭记

集贤直学士赵君之隐居在德清龙洞山之阳大德庚子岁秋月紫芝生其游亭侧山翁里老驪传奔覩惊未尝有集贤君既喜而以名其亭而来谗於剡源戴表元曰愿有以志之何如余惟天地山川雨露之所生草木之华实一一皆有益於人惟芝之为物疑若世外无用之宝可以为祥瑞颂咏而不系於朝暮之所采撷寒暑之所服袞又芝为种不一色亦异产往陶隐君葛雅川之徒皆尝以载之图籙登之药餌然富贵而好者力求有不能即获获之而疑者辄不敢服则名字徒存不过以备异闻资广记而已紫在其类中差可致服之可不必疑其即之郁而柔藏之忍而坚近於有德君子故自秦汉间隐逸如商山四老翁歌之以为高唐士大夫如元鲁山字之以为贤而今集贤君名之以为瑞盖异世而同赏不相谋而相協也虽然余於集贤君有所赞焉集贤本承平故家以英才俊气清识雅艺为世所不舍入仪馆阁出坐方岳五转而来摄领东南之庠校天下士被其欸唾者嘘为祥风饮其膏沐者润为荣河顾何所不可得乃方披栈枿发蒙翳求一丘一壑如将老焉是当其方隐而不拒於出也迹未尝不似商山翁既出而不难於隐也道未尝不若元鲁山且其实不伤羸华不病器名生於无用而爱缘於不切人之役之劳固多而天下之逸之暇亦不少则夫是芝之生岂非亦如娱其幽羈而慰其晚暮乎哉集贤尝语余龙洞奇甚山逆溪回遡而上者二十里古之至人所居土为之不爨暴

物为之不疵疴窃意山之绵络附丽灵根异蘖如是芝者尚衆旦夕从君游取龙洞泉荡涤肠胃尘垢然後庶几一遇道家所称胡麻石髓之类仍用餐芝法杂链之遂成二老优游往来永无饥渴聊以燕乐聊以引逸不亦可乎其岁冬十二月朔日记

剡源文集卷一

卷二

<集部,别集类,金至元,剡源文集>

钦定四库全书

剡源文集卷二 元 戴表元 撰记

遗安堂记

辛卯之春余遇濠阳马德昌於松江之上於时浙西水德昌以台僚衔命发粟赈饥所至州县吏负弩矢郊迎先驱候官簪涂廐师秣骑德昌巾褐坐治事声华藉甚余深叹羨以为大丈夫如用於世固当如此矣一日少闲愀然谓余曰吾无乐於是吾家故农夫聚族濠阳世世以耕田读书为乐无肯去乡井者至今大木累十围累累然马氏族葬处也自吾先大夫常遇一隐君子教之曰子异日必不免仕吾见世人仕者多贪子能不贪而有以及物即甚善先大夫异其不凡也既而果不免一出为州典籤寻弃归享上壽浮沉以终先大夫性本廉在官以事活百千人亦如其所云既归筑一堂用龐德公语名之以遗安曰我不免於隐君子之言若吾子孙自当如我志也洎吾之身与吾昆弟则皆不得如先大夫之言浮家南来驱驰霜露冲冒暑潦所乐能几何孰与吾濠阳田里间岁时豚酒相徵逐临流坐树歌呼散步之为快哉且先大夫遗吾以安吾廉吾勤吾慈吾俭吾不敢慚吾先庶几不辱先大夫之力至於吾心其何以安乎余闻之为之肃襟正容三抑气然後敢复语夫德昌之所以贤与其先大夫之贤岂非古所谓君子人哉盖自井法废而士始不安於耕居畎亩者不谈说游宦则迫於赋税征战周衰已然矧於今日吾见草野书生朝乘高轩而暮耻其故居不可旋马行遇父兄时常所往来有厌然之色语以龐德公事不可入於心况又使闻禹稷伊吕之风哉今吾德昌家世儒学潜光朴质蓄止不泄至於贤父子再世始闻於时如蛰震遇啓隐璞遭识声明润泽宜有不得而蔽者而方谦冲掩抑欲寻龐德公隐语求安田里岂不高哉虽然德公之道狭矣古之君子不皆以不仕然後为安而德公鄙朴过当规规计较於人已祸福之间其达才胜於当时愚者而已然自其子侄如士元辈已不用其语若德昌父子之道可以仕可以不仕者也德昌年方盛仕方始当世决未见舍他日功成而归杖行几坐洋洋乎以诗书礼让益厉其家又以化其乡人使濠阳之俗农於郊者见其逊耕而敬饁也儒於庠者见其睦婣可书而秀孝可举也当是时马氏之道其及物为何如而视龐氏为何如哉夫及物广者天之报之亦广然则马氏之安非人遗之天亦遗之矣德昌曰不敢知不敢知抑或然者先大夫之庆也子并为我记之

秀野堂记

宣之北为淮其土气雄深旷宽故其人恟力勤而趋本南为浙其土气清妍沃潏故其人开朗多闻而好礼宣人介而中居随其性之所欲而迁焉其南漪湖盘涵宣傍数州而宣占什七宣之镇山曰麻姑山其上游冈林蔽遮云物喷吐隆隆然自成一岛屿而岸湖之州地偏势隔不立廐置非富贾贵官之所趋走淮浙之气两无所入靖康中武德贡大夫官蒲城始来居湖

之阳凡二百年而大夫之子孙皆以文学荐举显闻於时有名松者与余同咸淳太学其父漕贡公吉德君子也与其族连蔓接居衣冠栋宇岁增日益几无虚壤德佑之敝旧物罄尽而最西一堂与附园诸亭独完焉兹非昔人所谓瑞室者耶乃葺而自居取大苏公独乐诗名之以秀野而新筑先世所卜以茆诸子又别馆以储美书延硕师致嘉客於是居者如趋万石之庭游者如造郑庄之门余丙申岁亦尝道南漪登秀野之堂而觴咏於其中名台美植曲栏文甃一一如意而麻姑之支峰离羣偃行与湖相须驻伏堂背亩种之田曲尺之流萦紆回环信乎其为秀而野也越三年公来请记余惟人性之感於清妍沃潯而开朗者近於秀感於雄深旷寬而惓惓者近於野二者可相兼而不可以相胜昔者仲尼忧秀而不实亦不以野而胜文为美今夫南漪之在穹壤间不知几千百年始得贡大夫居之大夫又二百年始得公父子文学而显至於废兴絶续之际天又瑞其所居以开之是皆有数然公方敦飭其家清修笃守徐行俭取若恐伤先世二百年忠厚之积是不独为淮浙偏气所胜而能兼有其美贡氏南漪之泽吾见其未可涯也遂为推述大略并地乘世本书之庶几後人知作堂之始

清华堂记

奉化万竹董氏以衣冠文雅为吾州甲族其枝叶散布江浙间者为名卿材大夫不一而万竹故家独守恬素轻进取有处士之风焉余尝过而爱之有彦受者於子弟愿甚而台寧海俞出也余与俞世旧尤爱之於是彦受将筑读书之堂於所居之东而成请名於余余取文选语名之清华而告之曰子亦知夫水与木乎水之滔滔而来若是之清而不污者岂非崇冈激之巨石梗之疏治之不已而致然乎林木之苍然其蔚蔼蓊郁於春阳时雨若是之可悦者岂非以前日之凝冬沍寒郁薄之久而能坚其华乎是不难喻也今子之质甚良而资甚裕良则不烦裕则不劳不烦不劳则不知所苦而懈於学吾固愿子激梗之以崇冈巨石郁薄之以凝冬沍寒使清者益踈而深华者益成而坚不亦可乎且子之宗不为不清且华矣亢宗之难不如承宗之易进趋之有余不如恬素之不及子之智似亦足以知之矣以关西之风节而有德祖河东之名德而有子厚非不爽然起於人意顾去其初则甚远故不愿子之似之也彦受继自今问安视膳之暇督耕治事之隙游歌於此台之上不惟其清华是逸而以其已得者日取古圣贤之言洗濯培壅候异时学成而材立交广而名畅然後不得已而用则用於世为高流不得已而处则处於家为隆栋余之所爱於彦受庸有既耶

质野堂记

剡源先生幼而器居长而浪游老而羈栖独常常以为异时傥得余闲营一区之宅於山林间则将名之曰质野以遂吾志自为斯言憧憧然往来於心者五十年而不能成也盖方其盛时川浮惊流陆走峻坂鲸鲵满前狼虺怖後窃自思吾惟学文干禄以至危於道路使但为寻常人何患无容足之地而安哉及失势而奔逃扶携老弱经涉险阻见所过穷村鄙人篱垣修洁鸡犬驩睦又未尝不起卜邻结社之羨乃大德丙午之孟冬归自上饶於是筋骸倦衰世念益薄而眼前子息各已长大生平婚嫁渐就清简发橐中装舟车薪米佣赁杂费之余尚留三千缗以为陆贾分金则不给以为萧何买田则难多且专议兴筑伐材於近冈聚土於後麓役工以券而使之自食烦邻於暇而量予之直不三月质野堂成以次充安阁迢巍亭缩轩雪镜诸

役仍旧名而增新构前後左右凡一百三十六楹溪山面势烟云情貌无不欣合桑麻径术禾麦行伍无不周密客有在傍叹曰先生之志则少遂矣抑欲以质野自晦而未忘於名也何居先生曰子不观於山川草木虫鱼之为物乎物之居於世未有无名者也草木虫鱼之可资於用也黄帝名之山川之着也禹名之惟羽毛有识之属能以声自名其名者然後人亦因其名而名之以余之区区持衰穷之身托於山川羣於草木虫鱼羽毛之属以为居游顾五十年欲成一质野堂不能得而今也晚暮幸得成之而得自名之而何不可乐而复何讥乎客闻而愈笑先生亦笑因复自名为质野翁以记其辞於质野堂云

爱莲堂记

物之无情莫如草木然至其发於形动於气而随人之顺逆以为祲祥妖孽昭然有不可掩亦犹人之一身其行事和平乐易耶则遇其境无非芝兰玉树乖刺齟齬耶则遇其境无非蓬茨荆棘昔者子思之中庸言善不善之先知以为见乎蓍龟动乎四体而商书之陈天命谓之賁若草木皆其证也相台唐伯荣所居钱塘东之圃有池焉植莲其中岁己亥孟秋既望其莲生一茎双葩圃人以瑞告钱塘好事者则既绘为图画以相传夸说交游士大夫则且将作为歌诗以相称诩讚美伯荣伯荣於是取周元公语名其并池之堂曰爱莲而属前进士剡源戴表元曰盍有记初伯荣盛年怀牒而南尝仕矣驰驱未几何有浩然之志乃移其材谋之可办於疏烦剗剧者经营池台位置花石费不伤烦清不苦寂值佳风晴日体中欣畅即扶藤而游班荆而休自有道者窥其微固以为不减千户侯乐至是双莲生若造物嘉其安恬而设幻以娱之者伯荣曰吾则何敢居之或者吾唐氏之先世遗泽郁积盘薄之久而将发其祥乎盖当是时伯荣之伯氏在海盐通守叔氏在南昌试宰皆秩满将至而伯荣之子居安适用中朝官荐通籍翰苑一门内外前後朱紫岁时会集左羔右鴈荣名贵禄殆与是花相须而至是诚可为传夸讚美者也然有一焉莲之德元公以配君子君子者之居於世以孝友为根株贞恪为附蒂材敏为条蔓词章学问为枝叶花藻能是矣视浮名外物之去来如暄凉荣悴之制於天培覆壽夭之存於人者吾所不愿而要其定焉彼亦不能违也伯荣兄弟居家有睦行莅官有能绩蓄奇书致名士彬彬然兴於文学是能备君子之德而知所以居其祥矣故为之记

广心堂记

鄞剡之交有坞曰滙溪其傍之山层盘陟矗悍急而无停坡其水春冲激泻纡绕不知几折而始达於滙独近乎儒者祥卿之居则襟灵发舒瞻眺展耸祥卿遂题堂之榜曰广心意以为其地当二邑之中势若至此而稍广者衆皆奇之余独晚而知之盖山将止也当其地之中皆为心有百里数十里才一止而为心者有不能数十里即止而为心者亦有十里五里止之少而为心者心之广狭视其势之偏全若水则惟山之趋山止而止山行而行山全而全山偏而偏今夫滙溪是当鄞剡数十百里之中为山之适止势之适全心之适广而兹堂又当滙溪之中为止之又止全之又全广之又广者也而祥卿岂偶然得而居之哉余试与祥卿登堂而饮饮酣而歌歌懽而游望其东之诸峯想像唐贤皮日休陆龟蒙跻攀唱咏之迹班班具在至花台月榭无复存者其西之穹林窈洞则从刘罍夫妇晋孙承公兄弟所从登仙避世之道烟云蔽遮不可物色其南之荒关断栈巖啼鸟噪固当江左王谢家衣冠丝竹之窟穴而其北之陰嵐

海气喷薄杳霭犹庶几齐鲁间安期生鸱夷子皮之徒不死而浮游其处方当诸公功名盛时形神炎炎朝驰暮奔去人何远而惟高怀絶识之士挥而却之如弃涕唾想其灵台太宇池融渊净略无丝毫畦畛边幅传不云乎得其大体为大人得其小体为小人夫人之所具耳目口鼻肢体皆同而大小如此相远者岂亦以其心耶吾观祥卿天资潇洒门不辍客轩骑惟多心乃快愜而遇荒岁不进产待穷交不改爱自盛年怀儒官之牒不求调授子一经不废业行藏去就动有古大人长者度量是真能为溪山佳主人对之两无慙色矣故为之记

居清堂记

自余归榆林交游益离有故人子单允涵来辄密穷坐移日客情萧然时时取架上书相与据炉隐几席筮萑薪屨屨岸接?而哦之以为乐一日得东汉仲长统传至欲卜居清旷之说欣然会心允涵曰若旷吾则不能抑愿得清者居焉其庶乎因归而名其庐曰居清之堂盖允涵家世儒窈自先君子以觚槩为资积俸钱馈粟之入稍归山中增畜广室闾师里胥已从而指目其後故但有慕乎清以为饮食取给而不求丰余起居取适而不至纵逸浮沉以玩世优游以毕齿而不翹志愿足矣噫嘻嗟夫如允涵之谋与仲长公之所叹羨大略自无以相远诚或偶而得之岂不甚幸而人事容有不应当然者夫既以其身得脱於官府之劳朝市之役又假山林田宅沟池畦苑之饶足以养富舟车僮役浮游钓弋之具足以养佚羔豚鱼果酒醪肴膳之珍足以养欲庭闱无恙妻孥恬适诗书道德谈咏之交足以养素则是王侯卿相所无之安而神仙栖遯之流所不能兼有之乐而人世何以容之且夫清之为道尤难於言鸡鸣而起令耳目口体百为与物营营然交鬬回念清夜之所存有能持而澄之虽尘埃满头泥淖没膝吾视之如玉雪不然名利一不酬其心言动无以资诸人纵复朝餐沆瀣暮饮沧浪肠胃间祇益秽浊可丑耳故仲长公风裁虽高当其往来辗转青徐并冀之郊谈王说伯何所不有晚诣邺台不免参预曹公父子机事尘劳如此所谓平林高台弹琴讽诗之趣度不过梦想及之而已然遗言洒落初不失为佳士今吾允涵居有图史之娱出无简书之忧闭门奉养仰力於农圃登山游眺杂坐於渔牧为之不止将天机日深世累日远而犹惧不足於清何耶天惟清故能藏光景神变化海惟清故能容蛟龙兴宝藏古之君子至清如伯夷方能与人无怨其次黄叔度陈太丘诸人近於无威而物畏不言而教行又其次方至仲长公辈俟他日闲暇别为允涵言之

陈氏不碍云山堂记

余异时闻越中士大夫名其居之堂有不碍云山之号者心诚歆赏之以为山川信佳亦必有佳主人而後当之余安能如王谢诸人遂命车开道径往而从游其间乎癸巳之秋会上虞陈孔晨於鄞与之言则堂孔晨物也在上虞之雪岑青山白云庵之傍闻其名益佳余所居剡源诸山与上虞相犬牙孔晨虽贫而高爽好事喜客约孔晨岁时间意到辄访之孔晨慨然曰噫此吾先君子南墅翁之所名也盖先君少而?居倚?有南山於?中瞻眺为最胜尝曰是若造物驱设以乐我者吾既取以名吾墅矣倘幸而营一堂以居因其面势名之以不碍云山为宜当是时天下名卿以权柄意气得士如江东二吴赵信公李制置曾伯皆尝聘翁入幕则皆致资合力成翁之志台阁以文字知名如木石先生尤端明故参预姚君希得则各书四大字愿揭翁堂顔以为之扁江湖骚人过客戴复古翁宾阳高髯之徒则落堂之成往来题诗几壁以相

讚庆然堂虽落成翁未尝即居之凡再上襄再度岭辛勤三十年堂虽大成而翁倦游老矣甲戌之事遂不可言又一年上虞毁独此堂者岿然榛栎中吾兄弟不能寂而居也於是乎有雪岑之筑雪岑在村郊空旷间名之以不碍云山为尤宜故姚扁吾存之尤扁吾弟存之虽非先翁之居而先翁之意也始余忻然奇孔晨我辈土耳其及狎闻孔晨言徘徊重有感焉夫物之资於人可以相娱而不可以相胜功名富贵之人一日而无所为则其心不乐日无以预乎烟云邱壑之事而其力尝足以兼之层台叠馆翠比朱连土石疲乎锹凿林垣夺乎绮縠以至禽虫草木之情震摇於歌钟舆隶之役而皆失其素故虽云山在前目不得舒心不暇领则物有以碍之也今夫越中固侯王之窟宅而山川之领袖前乎此时自非以文章气业相求谁复有过上虞而问南墅翁之居者岁月几时陵移谷迁彼雄豪什百千万於我者忽焉不知踪迹之所在而陈氏云山故存求之南山则不碍於南山求之雪岑则不碍於雪岑不惟阅废兴通喧寂空之而愈存散之而皆足而一门父子兄弟前苞後映东揽西裘若云山独於陈氏有情者佳哉佳哉南墅翁於余前後輩余在金陵适尝识翁须眉雪白颧頰丹润每侍坐留饮必至夜分目光炯然谈天下事数千百言不倦略无老人衰飒之气孔晨兄弟真能从容酿酒作雪岑佳主人令余忘醉歌以附於父党翁高吾家复古之後南墅翁闻之亦当为云山助喜矣

水心云意楼记

淳安胡天放尝为余言黄滩之美也曰黄滩南於淳安之治二十里所背崇岭面双溪岩林涧壑之所萦盘风烟鱼鸟之所凑泊自曾大父岳阳公以上世居之岳阳公既贵而徙居邑之西塘大父桐川公继贵莫之有易也然时时念念不忘黄滩焉迨今西塘之庐且四世当承平时人情以游宦为乐虽西塘闐闐中不得久处而暇数数远顾黄滩乎还来名宦事息邑墟於兵庐毁於火吾将返吾初而隐焉丁丑之春既披荆伐翳架楼十余楹於黄滩之上取杜子美语名之曰水心云意而子为我记之余闻而叹曰嗟乎贤哉胡君之归黄滩信美矣而何以有取於水与云乎夫水无心人之习於动者得之以为心云无意人之习於静者得之以为意及乎渊停坎蓄风起雨作动者未尝不静静者未尝无动而二者卒不自知其然也今吾与天放以其藐然之身三十年行乎世故之江河而生物之息日夜更起而嘘之陷深而莫辞险数而不悟故方其盛时视人间之可歆艶爱悦者莫如名第官爵车马挥诃於门途僮妓笑歌於馆榭清人之突未黔邸吏之驾已秣使西塘之人咨嗟仰望以为不及虽比邻鸡犬草木亦有功名富贵之色此如水之方波云之初旋虽欲不动而不可得矣泊夫心疲意倦而当休也则畎亩荣於禄食徒步安於驺御禽虫之歌吟不俭於钟鼓之考击邱原之陟降不烦於箠楚之奔走子朝出而游於黄滩黄滩之渔者将与子分矶而坐黄滩之牧者将与子同川而饮暮归而休乎兹楼黄滩之寸妍尺媚将纵横自献於几席之下此如暝云归山冬潦返宅虽欲不静亦不可得也天放归而属好事者用王维卢鸿例图黄滩以见寄天放善为诗凡与天放游者登於兹楼多所咏述而黄滩滨溪有一老石盘陀可爱岳阳公屡屡为之赋诗而未及刻也余忧患之余比天放尤早衰决已无复四方之事旦夕按图髣髴或因而起兴得附题於诸君登楼之什又不鄙而托名刻石之末则幸矣

困学斋记

丁亥之春余识鲜于伯几於杭方是时伯几以材选为三司史掾意气雄豪每晨出则载笔牍与其长廷争是非一语不合辄飘飘然欲置章绶去渔猎山泽间而後为快轩骑所过父老环聚指目曰此我鲜于公也及日晏归焚香弄翰取数千百年古鼎彝器陈诸阶除搜抉断文废欵若明日急有所须而为之者门无?宾至则相对吟讽松竹之间或命觴径醉醉极作放歌怪字亦有足悦余虽齷齪骤见伯几如此真以为世外奇崛不凡人也别去五年复来名字黯然而无闻问之云伯几比来懒不耐事闭门谢客方营一室名曰困学之斋将收放心而求寡过焉余闻之叹曰嘻乎世有如伯几之材而待困学者乎然如其言自不失为奇士诸葛孔明高节不仕诸侯一出成鼎足之业其终身本志乃云抱耒躬耕作南阳田舍翁耳嵇康人中龙不以三公易冶鍛之乐彼其雍容揖让进退翛然岂无学人所为哉今吾伯几推而进诸嵇葛之俦固所未逊其屈折就此殆似为世故所困耳夫困道尚多伯几不困於嗜欲不困於荣辱得丧之故踰於常人何止万万就其所好虽贤而未免於累者而愈轻之使如纪渚子之木鸡亢桑畏垒之说岂不为学之愈成哉於是知伯几者皆曰子之言於伯几为宜盍以为困学之记是为记

清容斋记

鄞袁生养直既规寝旁为读书之斋而榜之曰清容曰吾慕东郭顺子之为人而云耳其所从游之贤者台刘君正仲父为友复於伯夷柳下惠清和之说以为之铭而书来剡源愿有记夫东郭顺子载於庄周其事他无所从质然如其言则天下有道之士也若夫孟子之於夷惠也余尝疑之夫子曰伯夷叔齐不念旧恶怨是用希人而至於无怨其和孰加焉彼子子然轻一夫之死以与八百诸侯之伐君者异论在周人以为矫在商人未尝不谓之当然也而孟子则曰衣冠不正望望然去之由其道者将入於隘夫无怨者固教人隘也哉柳下惠曰直道而事人焉往而不三黜枉道而事人何必去父母之邦夫子称之曰行中虑言中伦世有言行中伦虑而为不恭之和者乎盖夫子没而学者传其旧闻微异矣今夫袁生生於万石之家而躬寒素之操处未弱冠之年而志丈夫之事日取古圣贤之言味之而学其道而求其清焉已乃有所不慊於语而容人是图是何生之所闻於道者过耶道未有清而不能容亦未有不能容而得清者也天之苍然日月星辰系焉四时行焉百物成焉江河之泓百里一浸而明者可鉴毛髮其为清而容也大矣生归而益治其学惧不能清焉苟为能清端居而家巷睦徐行而州里逊又益治而清之不止滯者尽清者安三年而与之亲者不见喜怒之色焉十年而与之疏者不见臧否之迹焉夫子曰一日克已复礼天下归仁焉凡生所学於古圣贤人之道与其所言举无间然矣何羨於东郭子者而滯然学之哉若余之愚偶幸窃闻之而未迨学也且将求人之未暇其何足以进生乎以生之勤也姑次第其词以附於刘君之末

养心斋记

史文靖公之孙曰景文其居第在东湖之上间亦往来州城与余相从数数相善也景文宰相家而余癯然书生声焰不相敌然每过余倾意气与语有移刻不厌倦及见余披繙简编涂窜铅墨喜而从旁叹羨若以为不可及昔魏公子之於侯生陰将军之於井大春风度不亦若是然哉尝辟一燕居之斋名之曰养心而求记於余曰吾观世之人好役其材与智者何其愚乎

吾年非高力非弱然而能厌之愿归而少休焉将求为子之学者与之朝游夕居读书以寡过教子以供老吾志足矣余谦谢久之则复之曰贤哉景文亦知景文之先所以居东湖者乎盖夫东湖穷海之僻壤而会稽下邑之荒聚也其始不过为农樵渔牧之居君之高曾择澳而潜焉老者知慈少者兴孝其俗几少变而善矣无几时而弦歌鸣焉衣冠翔焉而东湖为文物之区矣又无几时而高车驷马之所奔驱朱门甲第之所照映驺官仆从填塞往来笙钟歌舞喧咽拥沸而东湖之富丽通於名都会府矣夫物气过泄者则当少息人文太盛者则将反本今之东湖亦可以少还其初乎景文归而力践其言使山川草木复得涵淳蕴实以自致於君且余闻之采色养目目昏郑卫养耳耳聾滋味服御养口体体衰惟以学问养心者无忧而常安无欲而常贵景文归而规其名益思其义乎哉景文曰唯唯遂书之以记

学古斋记

三吴之州莫大於杭其地山穠水妍其人机慧踈秀而清明其俗通商美宦安娱乐而多驱驰通衢广陌行如附车轮而与之上下坐如闻江潮澎湃之声窃意虽有董仲舒扬子云难於攻苦寂寞而守其渊深之思焉州域之西南余友人西秦张仲实居之入其门庭除静修草树深鬱俨然山人处士之宅先是巴西邓善之与仲实兄弟交分一室共居而题其扁曰学古斋相与读书玩义理於其中如此十年而善之以艺选召且由此而进为於时仲实曰我则不能吾家有垂白之二亲贫无以奉鱼菡重使之疲劳道途则夺其便且吾非矫名者万一常调得一郡博士给数斛米充养具亦足矣何用是纷纷为哉於是学古斋仲实独居而有之余闻仲实子之安恬惛憊言真而志俭既过他人远甚抑学古实难子之道将何先今且由子之学於是斋者言之子早起而盥沐巾栉焚香而振册则冠服鼎彝简编字画非古也饥食而渴饮寒裘而暑葛与夫宾客祭祀之交接其礼文物制度非古也广而推之出而与宗族姻戚朋友言入而仰以燕其亲俯以帅其妻孥臧获一举足一出口而步趋唯诺之节非古也益广而推之事之非古者何限而子何以安之虽然若此之类犹欲以古其外必不可已则又当古其中乎故曰学古实难始余之少也有意於是功名患难四十余年头白志荒而茫然无成今之来杭尚赖比邻於仲实而学之仲实曰有是哉子之言吾将佩服之且以谗善之俾无忘吾斋云

爱日斋记

吾党之士有吕复初以门功世禄望於越至复初之身而修然为清儒余尝与之交而贤之一日属余以其所谓爱日斋者曰吾甚爱扬雄氏之言爱日也其书两举之其一以为学其一以为孝也吾学既不屑为今人犹幸而及事垂白之亲而吾孝不能为古人则吾病焉故取以名吾斋以励吾志子知我者幸而为之记余闻其言益贤之夫复初之云云岂非笃学力行修谨博习君子人哉然余自读书涉事以来平生交游不可胜数自非甚鬬茸无志操谁不能为复初斯言者顾久而皆怠或虽不怠而勤所不当为疲心竭力而反?其心於不肖者往往而是故君子之学也将以为孝而其孝也不可以无学今夫口之於肥鲜体之於轻燠耳之於韶美而心志之於欢畅此人之志愿而仁人孝子之不敢不极於其亲者也然而学道者有不得而愿焉彼以其身享簞瓢如羊豕被鹑縕如狐貉安烦习苦则听其命而奈之何俾其亲而甘之故有穷日之力皇皇然欲荣其身朝登金张之堂暮投卫霍之第以从事於禄养者此譁於名

者之爱日也鸡鸣而起操锥刀之术日昃而不得休至秉烛以继之曰吾不为是则饘粥不充而甘旨且缺此贪於利者之爱日也之二人者欲孝矣而病於不学盖有欲学者又或病於不孝呻吟占毕以为勤组纂藻绘以为工虽贤者不废则有资之而陵节躐等者焉方其惜陰童韶请益觚槩则已心高志扬有驰里门名诸父之气此骄於学而爱日者也学问以去蔽而有专精一经之士慕敝帷篝火之名习持书漂麦之事忘饥渴迷昼夜神痴气耗而其亲之容顏命令有不暇伺察焉此愚於学而爱日者也复初生於三公之家长於万石之族今动心忍性皆已不有其有清修而静处详视而顺听於前四者之事可以保其必无闻所居北海坂坂上有便田躬耕有善书家藏先大夫手构南堂一区湖峰萦环仰有烟林云月风岚晴雨之翫俯有鱼鳬鸥鴈蒲荷菰稻之适越之姻?多良儒而太夫人礼法家复初出而与其徒清谈雅歌商确今古尽文章翰墨之乐而披斓斑之衣侍寬闲之燕日喧轩輿时节觴膳极庭闈顏色之奉是自古夏游渊寥之不能兼者可以不出户限而得之贤哉复初亦无有顷刻慊然於心者乎复初曰是则吾何以当之抑子之言於爱日为有助前之可惧吾将以为戒後之可乐吾将以为劝遂书以为记

谦益斋记

天下之善惟其不免於私之为者常人之所易容而君子之所必察然亦有心知其然而名义之责不可加则举而归之於天何者吉凶祸福是非善恶至於天而庶几乎各有所止矣故曰人无所不至惟天不容伪余尝怪今世士大夫位卑而气高身微而欲广於力之所及为志之所得施一切无所辞让而独姝姝其容訾訾其辞倾已以行悦於人曰将为谦以求益是果以谦而益者乎哉是岂非穿窬之行垄断之道而天地鬼神之所忌疾者乎哉昔者伯益之书盖言之曰满招损谦受益时乃天道既而推之至诚以为人能至诚而物无不动既而文王周公以来以其系辞而着之於易既而孔氏之徒以其说之大略而发之於中庸既而儒者礼法之家以其道世守之至於春秋秦汉之初而犹以为教故赵文子之早慧也而其父忍於折委笄张子房之未相知也而其师安於坐而受履魏公子张廷尉之贵也而其客敢於使之执轡结袜是皆诚心为之以损抑分量之有余而增益其不足非独如是而止吾想其时齿於庠而贵者犹有坐於贱者之下而不慚也行於途而壮者犹有代其老者之负任而不以为德也射於乡而能者犹有授其不能者之爵而不倨也於乎是岂非天道之当然而容可以伪为之哉长乐林敬与温然好礼知义君子也紫阳方先生既名其读书之斋曰谦益而重之以训辞而敬与复以谒文於余余於先生之已言者不能赞也举所闻於天道以证之因以为之记

剡源文集卷二

卷三

钦定四库全书

剡源文集卷三 元 戴表元 撰记

清峙轩记

余尝爱东晋人善清言谈之使人翛翛然有高世想及出而预人家国事辄不能尽酬其怀然议者终以前意不相异同曰是固有命乙巳春遇高安李所瞻於冰溪之上相与剧谈此事为之太息既而谗其居有读书之轩名清峙问非东晋王茂弘以称庾公者乎则大笑夫庾之得於人不薄矣起世家不出门致公辅联贵姻据要权而身兼名贤之日一日进用少迟则九州四海以为鬻子不见夫山乎山之崑崙上摩青苍下蟠无垠然必能出云雨吐光景兴草木藏虎豹游仙真人始异而神之世称瑞曰景星凤凰景星凤凰不得数见也见则其时良其国昌庾公之清峙人望其为山为景星凤凰可也庾公其能然乎若吾所瞻恣睢於诗书之林颉颃於风宪之府徐行而廉取精思而静持幅巾布衣起乘传车以柱後惠文弹治道强侯悍将不少震挠公休吏退焚香闭合吴吟洛咏作仙人处士亦无愧怍此其规模器量雍容蕴藉岂与夫退不忘进进不能退往来於功名得丧之岐者同年而语哉虽然晋人犹能清言人物如庾公清峙犹可观也更後百十年清言日微以至於隋唐科举兴名检废士长驱疾驰不暇峙矣吾与所瞻生於百世之下百世之上事无庸深议所瞻之乡有三刘先生清风高节过庾公远甚暇日约所瞻登石龟峰絶岭踞畏垒临沧浪诵冰玉堂之歌庐山高之篇以为乐以附於古人班荆倾盖之赠可不可乎所瞻曰唯唯因以为记

容膝轩记

始余读书则尝想像古人居处服食动作百物之态以质诸书中之所言合者以喜不合者存而求之合然後已出而语於人人曰如子言则当席地而坐汗竹简科斗书编韦而读之而後可又益求不止则夫是栋宇衣冠饮饌者将皆不合而子岂不为怪民哉余曰孟子之论友也先论世而学礼者道古昔称先王岂曰吾具耳目口鼻四体俨然但当为今人也而已乎自为此说与世之人落落不相同之日亦已久矣而终未悔会稽孙君凝字德夫筑别室於寝之东偏聚古圣贤人之书以学於其中命之曰容膝余闻其名而思之盖闻古之君子所以居其躬也劳矣虽一欠伸一俛仰而不得肆也其拘之有次而勤之有业聚之有分而息之有时凡其得专席安车凭几杖而休者惟老而贵若为师者为然余人则否而士非其世家若秀孝有闻於上则何能脱乎沾体涂足之劳而近於册书琴瑟之事若今之士职未离於子弟而享父兄之安身为匹夫而兼封君之奉不贤者在所不论贤者亦不过饱食放言於礼法之外故夫昔之有容膝之云者体已若少倨然非三代学士之所得行也又尝下之而论则昔之抱膝而啸者今之道家导引之似也昔之膝行而谢者今之礼家匍匐之似也其云容膝乃近於今浮屠家趺坐而儒家反以为非礼者也於戏以三代学士之不得行而今得行之以吾人所笑以为非而或以为是是可不思其然哉然余窃尝闻之古之学者左图右书国初以来士大夫好

事家往往犹能置图画於壁牖间暇日宾游者至即与之左窥右索以徵古事之所由起故谈笑动作皆有本末孙君家世诗书多闻而嗜学今方弃轩裳薄城市而为山人处士之事望其居清气蔚然传不云乎礼失则求诸野他日余也力作之隙踵门而来俯身而请悦幸惠然教之君曰吾固愿闻於子者也盍书之以附於吾说之後轩成之明年剡源戴表元记

余轩记

郢程士安佐浙东元帅府於明公退不忍弃其余日读书以明理畦所居轩外余地种蔬以给食而问轩名於余余名之曰余轩士安逡巡而笑曰吾之问子义止於是乎余为详言士安之起居出处所以资於余者以告之人之居世必有事焉以劳其心思而役其筋骸古之君子自孩童以上粪除趋走弦歌舞蹈弓矢羽翮之类及诸贱事无不娴熟故平居多劳而少疾一旦驱之临烦处剧则亦无趑趄畏懦之色者余於身也齐民之伦莫贵於士为士而不识其事贵焉与凡民何异岂独不异仕而廩之则反以为贼不仕而侪之则反以为蠹山林韦褐之徒足未尝履官府而忧人之忧急人之急魁然负廊庙之望者余於识也以医药者不习则杀人以没溺者不习则杀身政之祸福危於医险於泅而人之习之益鲜羣居豢养不知衣食之所自来况复余事今以一人耳目之聪明坐於五流四民之上而指挥布置纵横左右人人不失其所欲者余於政也谷容洵湖容谷渎容湖海容渎闻閤隘夫扶背嚙齿出横逆以挟人至於大人长者之前如飘风然盖有有道之士以容一世之人而未足观其胸次休休焉若可以容天地万物者余於量也才支一时智周终身是能及其所知而止惟德无所止尧舜垂文章为永世法禹之水功稷之农劳仲尼之儒道衣被长育且累千百年天之助之人之味之亦累千百年不絕者余於德也士安生於齐鲁诸生之宅里衣冠翰墨今为许洛通才盛年方出游大藩府於学何所不该於用何所不给铅槩俎豆间事不可不问而悉也抑此五余者其毋忽忘乎哉士安唯唯因书以为记

省轩记

大名王麟伯官萧山三年秩满当北归留行过余於吴见谗以其所居之省轩而求言以为记余惟麟伯自其少时则既知诵习於圣贤人之书长而能游则及接识天下之名卿贤大夫游倦而仕则又能行其所知而无愧於百里之民是其平生本末种种皆非流辈所及顾方兢兢然愿内自省焉岂非厌时材俗誉为不足喜而求庶几有见於道乎哉抑余区区之愚虽不足以助麟伯姑尝试为麟伯诵其所闻而麟伯亦尝试为余聽之盖余居山知天台华顶三十六峰之险且艰而山中之往来而行者未尝病也问行之人则山之萦纡屈曲低昂起伏嵌洼偃突虽陰暝霾晦而一能识其处他日其人与羣儿戏平陆白昼蹶焉又尝行大川凌震泽浮杨子见舟人驾扁舟於溟茫汹涌吞天浴日之涛目无留瞻而手无停操人人为之震眩失措而已方夷然不自以为劳及乎篙休载输放意酣卧而漏生其中此省与不省之说也今夫吾人以其邈然之身行乎世故之风波而历乎人情之险阻功名利禄之诱嘘之於外妻子饥渴之迫驱之於後此虽欲省且不得暇而颠迷陷溺之忧何由而免故古之人居则必有盘盂几杖之铭以省於视动则必有珩璜琚琼之节以省於聽纳履也必有絢以省於步饮酒也必有禁以省其量御省於騫立省於佩交际也省於辞令侍命也省於容色斋戒也省於盼饜寢息也

省於梦寐此犹曰平居暇日常情恐惧云耳古之学道之士称能省其身莫如曾子曾子垂没啓手足自谓能全而归之而小人姑息之爱方见慚於执烛之童子蘧伯玉能悔四十九年之非行年六十而六十化而能自儆戒其高年卓识无一毫衰颓昏惫之气则其精力刚强时从可知也麟伯之齿方少於余余也蓬蒿之资俘获之器身不待恭而卑语不待简而讷而麟伯居处参养声实皆厚於余以余之犹不敢惰也而麟伯安得泰然无虞乎惟各不至於白昼平陆之蹶篙休载输而漏其舟者幸甚於是麟伯谓余之言慤俾书而刻诸省轩之石

清茂轩记

剡源在云山与四明洞天相为犬牙异时避世幽栖之士盖多有之而故家荒芜遗牒散落余尝恨之久矣独所谓大雷山者尝为唐贤谢遗尘所居其名著於骚人墨客之赋咏踪迹宜可考见然剡源有两大雷东西相望百里皆在万山之中人迹罕到之处余亦无从深核其何以也两大雷之下皆有石门铁壁平立湍流贯之因而谓之门而在东之门适去吾家不远余既未为农时时以贱事往来其间门傍有龙祠间随父老祷谒水旱颇爱其土狭不枯山穷不悍云泉蔽深竹树翳密私以为谢公之居庶其在此访历其聚则梯高以飞宇夷凹以展圃青檐垳垣断续隐见讴謡之声忽出林莽嘻乎异哉有毛氏子震卿秀整而业文其庐独当溪山偃薄之会盖毛氏自曾高以来世称寛厚长者至乃父始以词赋荐名於乡而上诸天官於是招延宾客储蓄异书辟一轩於燕居之左名之曰清茂余每过之酌泉而歌席陰而坐为之徘徊忘去殆不独以其居也尝即轩中所见问之子知子之轩之名之所从始乎夫斯泉之水清矣泄而達之可以至海有不失今之为清者乎亦有未至百十里而止者乎斯林之木茂矣望之蔚然可悦迨而致其材有中为九筵之室者乎亦有取而为鸡豚之栅猿狙之栈者乎是不可得而知也今吾子之居於此土幸而无四方之事力农以美藏量材而慎出一匕之餐必劳而後食一武之地必视而後蹈吾见祖父隱於农耕而子孙资之以爲達人者矣未有既爲達人而子孙得返於农耕者也何者其先之善抑鬱於陇亩之间百年蓄之故一日发舒而不以为暴及其贵盛服饰鲜华輿御美倩耻於素所僻陋而求迁之已散之朴一决而不可复收势无足怪吾视子之志与年皆不可及顾方閭閻愿静若有所耽於势禄之外而余亦倦游駸寻老矣其获免於前之云云者哉震卿闻之洒然而喻曰幸甚然必书之以警来者遂书以为记

恕轩记

东平程侯士誉为通守於吾州和以承长如兄礼以接士如宾恕以恤民如子严以驭吏如隶而独於奸魁侠徒譁党贪类疾之如仇每临廷发政心平气爽春阳容煦而一得其人则研穷鍛击不贷丝髮逸者门禽稽者窟考由是平时世家根连为恶之胄收踪改业一国称快而不得志者亦狙伏而伺暇日余尝过其退公之居见室顔之扁曰恕轩余请之曰得无意有所抑若古人佩琴服韦之比乎夫恕之为名也约而其道甚广儒者盖难言之而人情之刚柔缓急与夫处世之拘通行事之寛猛尤不容以一概其至大要则尝苦於利害喜戚之不能相知一不相知连床隔於楚越同气疎於途人而况持三尺之法以临一州之民勢邈而分悬情深而貌峻而欲兴其所利除其所害就其所喜违其所戚憂憂乎难哉故善治民者尝先於以身推之曰吾之未来兹邦也因居於家吾为长於家而患承我者之不吾和也故推之以和其长吾

为士於乡而惧接我者之不吾礼也故推之以礼其士吾之居?见吾之隣有为民穷而无所告而有司不之恤吾非之故推之以慈其民吾之居位见爵官贵将幸有权而为吏控持以暴其民而不能馭也吾嗤之故推之以严其吏至於奸魁侠徒譁党贪类天道之所不容公法之所必诛自吾有知识则心诚嫉之推之他人其谁谓之不然故於文如心为怨人之所欲和所欲礼所欲慈所欲严者皆吾如其心而欲之人之所嫉吾亦如其心而嫉之察之於身验之於事习之於家行之於国盖无往而非怨也且虎狼不遯羔犊不育蓬莠不除禾黍不兴奸魁侠徒譁党贪类不清良民不寧为长吏者惟能於此有所不怨然後能行真恕故曰仁者必有勇又曰惟仁者能恶人尧舜之罪四凶周公之惩荆舒刑管蔡仲尼之诛少正卯其为怨也弘矣而於政何所伤於侯之意何所当抑而余复何所赞其辞乎於是候闻之翛然而喜肃然而兴曰美乎子为善言人情者其遂为我记之

苍翠楼记

宛陵多名山人以李太白所爱游常常夸谈之然而其州多平冈浅陆城居者初未尝得山而玩焉出郭西七里至王敬叔之居则宛陵之山四面集於其门近者盘旋远者鳞臻而敬叔之居自其先君子所植古梅老桂修松茂竹陰森蓊翳俨然几如云门石洞有一楼横戕其巔尤与山称敬叔既取太白诗语名之曰苍翠楼而从余索文以为记余惟天下之物凡其不能忘情於荣辱成败者往往须名而行名荣而荣名辱而辱名成而成名败而败然其得之也必各顾其分故季氏强大夫也不得越境而有东蒙孙叔敖贤相也仅敢取寝丘之陋封惟夫高旷奇逸之人无求於时不拘於物彼山林草野烟霞泉石之具又非人情之所争物论之所禁故可以多收横取而不较若今苍翠楼之托於太白是已方太白之来宛陵出於一时飘忽神驰气跨不可测识而宛陵在江东古为衣冠玉帛往来骈集之地想其名王贵卿车辙马迹处处而有今千百年後乃知太白独常游之甚者虽非太白所常游者亦欲扳挽其平生辞藻而及之呜呼是岂不以其人耶余观敬叔天资明爽不耐羈束时时幅巾野服潇散尘外居家资产不能致百金而常好客置酒酒酣与其兄弟高歌朗吟下笔皆无俗子气韵似此辈流固当为太白所许颇恨生晚不及识其先君子而规模踪迹家风井井已略可以得之矣

充安阁记

剡源翁居不能二十楹界其中之後垂蔽之以为阁冬舒其帘夏達其牖温凉晦明时阖辟之以趋便焉人皆不堪其隘且劳而翁居之弥安家无浹晨之储兼金之值而有书一车悉取而陈诸阁之四旁坐阅而卧讽之左右纵横充然无不满之处因命之曰充安尝叹曰昔周元公有言君子以道充为富身安为贵我不敢希其人而希其言可乎然虽名之久而犹疑之一日忽悟而笑曰吾所以疑於元公之言岂不以富贵为美物而不敢居哉夫闻其名犹疑之而遇其实将如之何是故不可以无学也今夫余也固剡山之窶人也而昔之当仕者亦余也有仕有不仕而余一也昔尝见有乘车而行於途者其不乘车者相与羨之他日逢大官於途则其乘车者先俯然下之岂不以其尤嵬嵬哉等第而充之人之相羨无有纪极而山林道学之士非而讪之曰是俱不足为吾道者若是者亦高矣又有遗世忘物之士笑其为高者曰彼自为彼吾何以存於口而非讪之为我与之俱行於途如壮夫之观优不怒不悦如饱人见婴儿之

珍其饼餌不咽亦不睡也然则余今之窶为何所失於余乎余行四方而不知田畴稼穡之事今始力而为之而筋骸已疲不可勉强顾吾居之左右前後无非农者而余安得偃然独辞其劳呻吟伛偻一年而知其候二年而通其业三年而寒暑燥湿欲与之俱化每至释耰解笠之暇入休乎充安意挟一册而披之见古之高人胜士如鵾夷子皮张子房之徒辛苦兵革之中晚暮脱乎不测之险遗其千金相印几无所适欲如余之徜徉乡井栖伏原圃翛然为无名布衣而不可得也见申屠蟠司马德操辈遁於丧乱全於贫约若可以无预人事而身居名贤之目其风采为四方人士之所走集欲如余之交疎党弃指议不及伸眉纵足於是非臧否之外而不可得也见皇甫士安王仲淹幸可以充默自容而何用着书以取名於时见诸葛公房乔丞相起畎亩而腾风云叹其忠劳以没而惜其子孙遂捐家世耕渔之旧以轻其身而余於是阁心无远驰业不他慕时勤而作遇倦而息屈伸偃仰以舒吾体周旋涉历以散吾目环堵之内方丈之小而山海衆物之藏具焉宗庙百官之美寓焉古今九州万里之交聚焉当其气快体适何有乎王公之尊何睹乎宇宙之广何慕乎千百世之下名余为何人哉而况乎人间区区饥寒得丧荣辱之怀何足以空言言以是为充安於元公之言可乎不可乎且吾阁吾名而又何疑可不可於他人耶言毕诸儿置书执笔请曰翁今之言大於韦弦不可以无识也岂惟翁自命之其有所教矣遂书於阁之壁

松风阁记

山陰王德玉之居在州城之东隅因台池之秀林丘之胜横俯之以为阁而名之以松风既乃以谗於余曰於子何如余惟山林风物耳目情态之殊樵夫野客能深知之而不足以为乐江湖市朝涉於世者忽然得之足以为乐而不能以深知若余者庶几知而乐之而德玉庶几聽之今夫松风者其初发於陰岩撼乎陵丘当夫天地闭塞万物枯槁乌栖兽藏路无往来沙石为之飞走林谷震而惊恐则是风也冲撞叫呼触者容伤当者肤摧非夫坚全而不蠹静密而自重者鲜不挠焉若是者特适遇其怒耳及乎委蛇而休优游而行春和气明人禽熙恬山光野声相为清妍则是风也徘徊乎卷阿周流乎平林昂者为舞偃者为笑虽培塿丛薄之间可以畅意自乐而况於翹翹者乎若是者又适遇其喜矣乃若骄霖欲收稚暑方壮潜居愁沾幽伏畏喘千金之子环堵之夫鬱鬱不得免焉飒然微凉幕举襟啓开牖而视之则苍云扶疎清如屋纖尘不摇百窍犹默而翛翛漻漻已爽焉若游清冷之渊而餐沆瀣之浆矣当此之时可以投壶雅歌可以抱膝长啸可以偃息可以笑傲若是者可谓乐之极遇之至而世言松风者庶几乎得之矣今夫德玉居有纷华喧嚣之厌出有功名进趋之耻清修而强学虚心而敏事视人间之得丧休戚荣辱喜惧岂有以异於寒暑之变顾吾所以坚忍自持逍遥内得小失意而不迁大获愿而能止亦有以遇於适然之遇爽焉之乐者乎古之君子三揖而进一辞而退弹琴着书食蔬饮水以为荣於轩綬甘於鼎俎者用此道也德玉肄习之暇登斯阁也想斯名也必有洒然於中者矣德玉曰是吾乐也抑吾愿与客同之遂以为记

拂云阁记

贫溪道士卢明仲既创筑玉清观於所居庐峰之山中即其上游架一阁焉以栖心放目而取於物之至清而至高者榜之以拂云而徵记於余余异之曰噫有是哉夫云发於微茫散於冥

蒙而反於虛空來不知始去不知終其無定止若是而欲取之以為清以為高蓋人之強名其然而然而云豈其然乎且吾居於山頗知云請為明仲彷彿言之而明仲亦彷彿為我聽之蓋余之昔也嘗健游倦歸而迷其鄉望望然千步數百步之外以為云皆在墟市井落而云無有焉又千步數百步之外而望之以為云在林薄崖谷夫自墟市井落累進而至林薄崖谷其取於云弥近矣就而即之云終不得而有何也云固與人相得而遂欲記而取之則不可也人之求有見於道亦猶是也彼道游而忘歸迷鄉而不知求者姑置勿論幸能歸而求之其初焉不至以為在言語章句求之言語章句而無之則以為在名物度数求之名物度数而無之則以為在居處動息求之言語章句則墟市井落之類也求之名物度数則郊陌藩籬之類也求之居處動息則林薄崖谷之類也人之求道而能擺落言語章句超脫名物度数一取之居處動息用力也精而見功也敏賢於常流何止万万抑豈居處動息明仲登斯閣也澄觀反視凝思靜察一窗戶開闔一几榻縱橫一巾幕張弛無非道者豈惟一云一泉石俯仰一草木卷舒一禽虫語默無非道者然就而求道種種何不可得是雖君家計然之智不得而推莊周之辯不得而悟而余也當復為何言乎明仲居山林久泊然於世無奔競意性篤孝養一母老矣慮清清西廬峰下對之若不忍晷刻離去當世所尊尚清高有道之士非君輩其誰

潛窩記

剡源之徒陳生養直題其居曰潛窩客有疑之而言於剡源翁曰陳生年方強氣方開而遽從事於潛也何居他日間暇以問生生日彼客者安知吾潛哉吾之潛有三吾之幼小為子弟於家懼倫類之不通而踈於禮而愿潛於學長涉世亂懼忧辱之切其身而愿潛於名益長而老且及之無以傳永遠也而愿潛於德為窩而揭焉朝出而履其外吾思之介介夕歸而寢其中吾忧之冲冲起居食息凡惟是三潛不敢置而何有於客之云云哉始翁以避地西來幸與生家交故旧謁館憇止於時見生鴈行間步驟峭楚既而隨諸兒受書稟業知見日聳然私心不過以翰墨事相待行藏离合忽然不知光景之變化迨茲聞拒客語為之爽焉自失蓋翁之於潛亦習之五十年而犹恐不至者也乃以其意作詩三章歌之以廣生一歌曰生誠潛於學兮寧惓惓以行其朴兮毋曉曉以為覺兮再歌曰生誠潛於名兮春華之英英兮須風霜以成兮三歌曰生誠潛於德兮薄取以厚吾宅兮抑貸而不获姑耨而食兮歌畢因書於窩之右方以為記至大己酉季冬既望

壽樂行窩記

始余兒童時受論語至仁智樂壽之章而疑之有老先生教余云人惟無物以累其心則壽樂生余時愛其言簡而終不解蓋自涉事以來行世故苦樂榮辱四十年然後知其言妙於理也今夫人之居世雖強弱勞逸不同而年壽之量大約皆可期以百歲富至於萬金貴至於卿相與夫陋巷一瓢之貧賤充其所求亦各有以自樂然得於天者或失之於人得於人者或失之於天故山林虛曠矯世之徒為莊周列御寇之學者寧不愿久生富貴以為高其說曰人壽則多辱南面之樂不如泥塗之无忧而市朝沉溺之士至於服金丹信方士以庶几長年不死幸而苟存又不過馳騁貨財聲伎狗馬宮室之區區以肥耳目之慾余以為似是之類殆皆過也

惟无物於心者则不然其中休休乎如山之无不容而造次颠沛不可得而迁也其外油油乎如水之聽其所趋崎岖百折而亦莫之碍也由是其心虽不期於壽与乐而二物自至虽不必辞之以为高而二物不能为吾累此仁智之道也古睦邵德芳少壮与余游太学同业选礼官仕铨曹同年尝被檄考两浙进士同寮当是时意气轩轩殊自喜既而隔絕不相知余穷居海涯而德芳离其本乡侨居松江五湖岛岐幽迴之处邂逅客游见之苍顏白髭无复故态与之坐连日咨嗟抑鬱可怜之语一不出於口问其居之志曰吾家睦也有先人之故庐尝并西筑堂曰寻乐并堂为亭三前二後一可以休息可以远眺今居松江未之能乐也而不敢忘姑彷彿其大致为一堂一亭以寄吾思而将榜之为壽乐行窝子以为何如余喜德芳之德有成行乎世故苦乐荣辱随其居而安之而无所累与余之心合也书前说以告之因以为行窝记

芷屋记

乡友范龙友字云仲尝以芷屋名其居而从余请文以为记余尝问之云仲屋凡数楹种芷若何云仲曰吾嫠人未遑於是姑有托於骚而云尔余闻其言窃有感焉盖余少而喜骚私念其居近市嚣隘故尝思为楚人飘荡浅说之辞冀援以自广既而思其所服食思其所佩褰思其好乐思其寄托独恨与屈大夫同生江南而骚中草木名字往往不能通解岂由湘浙风气土俗不同而然耶久之得一官游楚日与楚人博物通文字者往还举而问之其茫茫不知去吾浙人无几耳余然後始大悟夫学骚人无庸以名物为主亦聊取其志而已然方是时不免为科举利禄之役既以不资之身争得失於千万人喧呼之场冲风露冒暑潦跋涉一二千里水陆以干斗升之粟此何足与语屈大夫之风哉迺来形顏悴枯气质变化异时只言片语所探掇於骚以为娛者油然触心不知百忧之集则闻云仲之言岂不亦有不期而同者乎虽然云仲之言云仲之志余所嘉而慕也而名不可以无当也余近所居山麓旁多闲壤颇欲规数十百弓之地为一药畦聚衆芳而环蒔之四时攀玩葩条搜摘根实以遗老寄穷於其间因念楚物如江蓠杜衡?茝宿莽蘭兰蕙菌之俦犹可以类取惟芷之在骚是不一族曰辟芷曰白芷曰白?曰芳香曰药盖皆芷也然则是物宜江南最多有而最不易识云仲诚有之则幸以见饒以补山中之缺顾芷不难致而余畦成未有期恐亦与云仲之屋相类耳云仲笑曰姑记之

拟晋山房记

集贤学士河东李公士弘以好书名天下稍暇则取晋右军纵笔拟为之所居山房之窗壁几格砚席诸供具花物皆奕奕有晋气由是以拟晋题其顏而介所从游以徵言於余余始闻而疑之以为集贤公之居切迹中朝既以文学为直侍从出又为贤二千石摧强扶良拯饥约兴废坠去之既久而能使其民咏思之不忘是於材何所不具於古人何所不可至而专取晋人书名以自拟何耶噫嘻嗟夫天之生斯人与之以聪明艺能必将使之有为以用於世而人之耳目手足筋骸精力苟不时时役动劳苦之以发散其昏滯则血气不行而痰疾生焉故古之君子生而无不精於贱事及闲居偃息投壶也以习於射歌诗也以肄於舞以至干戈羽翥琴瑟箏数之类无所不学书刀简牋虽非如後世之妍毫媚墨亦往往求通其说而尽其用一旦倅然起之临戎出政则亦不至有恇怯齟齬之态秦汉以来此俗犹在党锢兴而士始以清虚为高视人间事一切糠粃之若不足为者晋氏遂东风尘迷目始真无所用力而各独以其书

传右军在当时辈流中传最甚虽书之工亦缘其人冲怀妙识嘉谋静操有以相挟而为之耳岂惟右军令他人皆如王敦郗超等辈千载之下望其遗迹将弃唾不暇又岂置齿牙哉今吾集贤公生於兴盛之朝而据乎逸为之会其起鹄举其止豹隐万万不当以丘壑自局翰墨一事未之能忘盖优哉游哉聊以寄意偃仰为适而已而谓可以窥公之杜德机乎於是知公者翕然而同辞以为余之期公与公之可用於世诚不但若是而止请书以慰公而且为公勉焉

剡源文集卷三

卷四

<集部,别集类,金至元,剡源文集>

钦定四库全书

剡源文集卷四 元 戴表元 撰记

陶庄记

古之言隐者谓其材可以仕而时不用志不屑就而去放於山林陇亩之间然後已无所愧而人有闻焉故仲尼以礼乐称野人而史官评大夫之材曰登高能赋苟使为野人而无礼乐登高而不能赋徒庐栖谷饮蛩蛩然氓耳何隐为余尝与番易吴熙载纵论此事为之三叹既而熙载出其所居陶庄诸诗读之盖陶庄者在番易西山下涧泉萦萦林樾蓊焉自其初不过庄之旁有业农而氏陶者以为场圃癸卯冬熙载由钱塘归望而乐之屋其?洼以为居游之墅因而疏?流之波以为池蒔秀蔚之丛以为苑而横一楼以操琴其额曰清音楼之北为室藏书册砚笔壶觞之属曰集雅中为堂深沉旷廓曰燕超之西为斋陈三代以来石碑铜器而继泊古今书法名画曰玩古东为轩临泉曰观鱼北陵虚为二亭曰看云驭风门之南为迳曰五柳桥曰双桧而总其墅之名曰陶庄熙载既为其名与其诗番易又多故家遗儒人人皆能诗日相饮集唱酬以为欢由是陶庄日闻於人而熙载方盛年强仕以词章器业行名当涂凡四迁而来通守吾州陶庄虽佳不得安而居也嗟夫若熙载者岂非余所谓其材可以仕可以隐而内无愧於已外可闻於人也乎哉虽然熙载之於陶庄今诚未得居也熙载志虽不屑而方用於时者也熙载驱驰四方北居庸南崑仑东溟渤西岷峨风霜道路之危若犹未厌今而为诗宜有太史氏登歌以弦明堂笙清庙俟他日功成名就洁身来归问园池花木固无恙徐与番易诸老或过客如余辈婆娑笑咏以偿陶庄隐居之乐尚未晚也

董可伯隐居记

世之为高者多托隐於山林山林之去人甚近贫贱而居之则累於身富贵而居之则累於名是二者皆非所以安也於是又有逃踪絶俗之士求超然於事物之表以为安而终不免於累心者也异焉故也友人董可伯之居在连山万竹冈之阳余尝过而熟之熟而知其说盖其居之左右前後一以竹为藩屏傍寝规小轩间植荷花则名之曰深净小东豁一亭老梅交加则名之曰青白折而少西筑凌空之斋曰点易折而益西瞰瀟山之池曰蒙泉经营位置间远回僻若无丝髮与世事相接者而可伯资性从容言动详重懒未尝废江湖交冗不至忘客主礼遇好风良时幅巾野服或班荆共酌或临流杂咏优游偃仰有称情之安而兼及物之乐及乎觞休席散庭静幕举浮云在空流水绕磴或焚香凝伫或展卷遐想人间爱憎喜怒休戚之感是非荣辱得丧之役亦不能入也持是而隐於山林可谓心迹俱超而身名无累矣虽然可伯学易者也易之书本不专为隐设也夫子老学易而环辙行道终其身韩伯休学易因言以立教王仲淹学易传业以赞化大之於政治小之於风俗殆无往非易也得易而不善用者是

京房虞翻郭璞可伯其择於斯乎

玉林记

学仙者贵溪桂君之居名玉林客有异之以问於余余惟玉林之得名於理不可知而就余之所可知请略为客言之而客略为余聽之盖天下之物未有生而即贵者也生而贵者莫如玉而玉与石固同类也玉与石同类而贵於石犹为仙者与人同居同游而人不知也今人之言仙也过高以为仙当在云霄风日之外不饮食而无饥渴不葛裘而无寒暑不车而驰不舟而游以至寝处巡历服用玩好之属一一俱当穷奢极靡兼王侯将相所无之豢养而後为贵且乐而玉林之说兴焉假令如是亦不足怪而其心茆茆然方将与俗物相胜负而何以异於人而为仙乎至德之世沉珠於渊藏金於山此犹未免於顾惜论吾党之士少知道者视璆琳琅玕之过目真能使之如泥沙瓦砾不以挂意而况於仙人则又何说故古之杂书图画所载仙人踪迹皆蓬头垢面敝衣恶食尘埃市井腥臊秽腐一无杂色而处处超然而於玉林乎何拘抑玉之最近而多称蓝田荆山蓝田荆山之玉信多矣当卞和氏时不知者几以石废世又久无和如之何不胥而为石也尝有餐玉者求玉於蓝田至辄多得玉既给用所弃余皆光明莹润无非玉者後人躡其迹从故处求之絕不得一玉是知一玉也遇之得其人则为玉遇之不得其人则为石吁嗟乎玉林乎其果又在有有无无之间乎桂君年甚妙质纯而气清其所师承模楷高流名辈与余厚善客往而问涂焉去玉林不远矣

戴隐记

越之为州当东南水陆之冲轻舟迅飞劲骑疾奔可以朝荆吴暮齐晋异时干名逐利者家金张而人陶顿不翅也而江湖之士有游观之好者於山慕云门禹穴於水夸监湖若耶又往往多在荒墟僻坞人烟散朗之处而戴山附州城之东偏虽越人未尝有知而游者问山之所以得名盖昔者越王句践常於此采戴焉既而王内史逸少居之既而为戒珠寺则越人虽有游者而亦以忘其戴山久矣有儒者王廷吉家於其山之阳而名读书之斋曰戴隐余闻而异之又他日过之则戴山者去其家尚半里然郊原旷空旁无蔽遮自其家望之适如承尘负屐凡山中之云烟卉木花鸟陰晴寒暑昏旦百物之变揽之如屏帷之饰几席之玩是诚可以逃喧嚣遗荣辱而隐焉而廷吉於越中为故家清门自其先文昌公以进士第一人起家子孙累叶轻轩裳而重名节薄田园而厚文墨故如廷吉之年华器干皆非可以无用於世而方谦谦然慕为山人处士之事宜乎数千年之遗懽坠赏日千万人过之而不顾者一日闭门而能居有之也呜呼乐哉虽然廷吉之乐必有以养之也夫隐之至者无名而戴山之为廷吉隐亦将几为廷吉而显也余自丁丑岁三至越其始至也儒者吾见其矫然如楚两龚之介而立也其再至也吾见其愜然如东方曼倩之通而峭也其三至也吾见其薰然如柳士师之和而守也若是者盖皆隐也廷吉其归而益求之古之学道之士能不以外物动摇其灵台者顾其中尝休休焉居处玩悦之具是养其耳目支体而已矣不可恃也廷吉曰愿受教因书於其斋以为记

冰谷记

天地之间得气之最先流动有形而最多者莫如水水之动於气形其自有而无者为云自无而有者为霜为雪为霰至於为冰极矣而皆水矣然水之动而为云人见之以为常而其为霜雪也必感於其时而变变之过者爲霰人之遇之必怵然以惊有之多而必厌苦惟夫冰人之遇之而不惊有之多而不厌苦当其时之宜有而适无则国无以为礼而史官书之以为阙且其为物生於气之本无而不浮寄於形之自有而不滯清而不伤坚而不剝明至於可监而能深沉以藏纳严至於使人慄切凜栗而潜阳内敷以发物可以蠲烦热可以爽滋味可以却污秽可以消疾厉盖天地之精祥而气形之先觉者也东昌徐仲彬卜隐居於嵇陵有园池之胜台馆之适取太白诗语名之曰冰谷而问其说於余余剡人也自未识仲彬时闻里人窈人有居兵冲而为军士误俘其孥请於官且再几不可得仲彬为公府掾一日署牒如其类尽放出之赞戎於嫠也赤子无辜已入死籍而力争得活者千万计余闻其事每为之哽咽及与仲彬游见其门庭洁修襟宇潇洒虽閤僮骑厮亦无苞苴脂膏之相鸡鸣而起从人问民疾苦事功书於册不行不止余谓仲彬之才猷德量其清严坚明而不浮滯行事可以及人人喜之不惊不厌苦而用舍关於世之有无皆庶几乎吾之所取於冰者由此道也他日益出而发祥於时流泽於民名扬誉洽疏淪澡雪而归濯纓於冰谷之泉曦髮於冰谷之林挹冰谷之沆瀣以为茗浆发冰谷之清冷以为醪醴嵇陵之居游名流胜士有如太白者闻冰谷之风而来则与之清谈雅歌懽游乐饮以终日岂不出处无愧而身名两适也哉仲彬曰吾愿也因书其语於冰谷之壁

文溪记

明之北四十里而近有溪曰文溪郡志以为山水掩映碧而成文之名也学佛者本畅师爱之卜隣而居久而情谊声迹与溪相驯人之自远外慕师而来者亦号师为文溪焉余尝诘之是溪之初本无即名之者也而不害其为溪自夫人以文名之而爱始生爱生则人不能忘而是名且将为溪累而溪又以累子何如师曰吾何以知名累之有无乎哉吾以一身寄於空虚混混乎与衆幻俱驰与羣有俱休顾不可无食也而撷於溪之毛不可无饮也而掬於溪之泉暇则杖溪云而游喜则藉溪石而謡吾取於溪若是足矣而何知夫溪之为我我之为溪乎而何者为名何者为累乎且吾久之殆将忘我岂惟忘溪又将忘人而人与溪之自不相忘则吾又何容知乎南望骠骑出疆张将军意子中书郎齐芳之所隐西背阊峯吴侍中泽故居在焉北引達蓬土人相传秦始皇常登此山谓可以達蓬莱而东眺瀚海方士徐福之徒所谓跨溟蒙泛烟涛求仙采药而不返者也俯仰二千年是溪之左右前後汲汲而趋者非以全身则欲适志当其盛强恨不疾鞭而先秉烛而乐今其遗存几何庸詎知陵谷犹未变迁之间而吾区区者乃独得而专之专之复几何而能不为衆人之所晦是岂不可为慨然而思廓然而悟乎而吾与子皆可以忘言矣於是余聆其说喜师道之将成而离於名远於累不久也又嘉其言之足以達其意亦如是溪之不期於文而文也遂摭而述之以为记

西村记

古之達人以宇宙为乡关江湖为室庐云物为躯骸丘壑为心胸故有离形独立逃喧长游彼其去於人情远矣而礼法之士訾之曰人之能免於禽兽之患者以有羣也羣而能安安而能

久者以有居也而可一日违哉之二说交相攻彼陋此为拘此骇彼为孤虽有所辨无以决其是非惟仁人君子之论则不然於其安而不迁而有怀土之戒於其往而不返而有首丘之劝故自周公仲尼以来虽以怨如屈原荡如相如勇如项籍流离颠倒志气百折而父兄桑梓之念终不能以相忘而况循循然者乎东平乐君廷玉清材美资仕江南二十年江南之士民爱而怀之慕而亲之廷玉亦谙其土风而喜其政之易敷也欲去之不能余尝间行过其居见其居扁书所谓西村者而异之廷玉曰嘻吾东平先君子之所庐也吾家自昌国君有籍齐赵间子孙屡徙而东平之西村自亳而东三世矣其镇有三山之秀且崇其浸有泗汶二水之委流其聚有陂池场圃馆榭之胜其业有耕蚕钓弋芰荷榆枣瓜蓏之入其俗有宗姻隣党岁时伏腊游眺讌歌之娱自吾来南此事遂废每好风佳辰未尝不矍然触以遐慨也故吾以名其居庶几时时见吾西村焉余惟廷玉之去西村而仕也将以行志仕而不忘西村也所以存本其出处去就合於仁人君子时中之义而无拘孤一偏之失推是道也知其心无所负他日虽寄千里托社稷可也於是知廷玉者谓余之言慤而期廷玉也远请书以为西村记

秋山记

宣之为州州之居人多因山以为胜而鳌峯亘州之东南於山为稍高嵇法师之居所谓秋山在焉元贞乙未岁之六月法师与余相遇於钱塘西湖之上常道其胜而不得详也曰子姑以意为我记之余谢唯唯越再月余来宣乃始得登鳌峰而访秋山之居则凡州之胜溪山城堞楼台阡陌郊?风物之状无不轩揭呈露一一趋集於檻席之下余为之咨嗟笑詫以为兹山固造物者故为设之以供高人逸士之所栖玩法师曰不然吾与子皆适值其逢耳盖夫鳌峰者虽高於诸山而当春夏之时纷华蔽遮尘嚣往来吾居之所欲揽取以为玩说者虽有智力无所得施迨至於秋而气之暄者爽然而清物之壅者豁然以流故非分之娱难致之美不谋而获无约而赴又夫秋之为言收也天地之间取数过赢者有时而收焉吾宣州盛时声驰势奔家公户卿山之幸而附於其旁高者风台天榭卑者锦林绣谷兵争以来忽焉而化为风烟返为丘墟异时衣冠钟鼓之区但见寒萤野磷幽虫过鸟相与窥游聽承於荆榛草莽而已故夫彼之滯於实有者既尽而後吾之寄於虚无者始完虽千变万化而要其终焉吾岂患失吾秋山者乎於是余闻其言中心愴然亦若有所遗失嵇氏世有仙种而是时陵阳琴高诸仙翁之迹往往而在法师方以道术名行见重於时倘可以求其人乎

中枝山葬记

剡源中枝山之葬起我先考府君以至元甲申季冬十有七日兑穴震向又明年丙戌伯考府君卒以仲冬二十八日祔葬先考府君墓右旁山为穴五後壁三用鬼尚右最右穴葬伯考府君穴居中又次虚穴为左遂稍前左右各虚穴一外曲角如员形内皆甃结砖椁仍实土以待他日右男左妇而祔焉余家初絶贫来榆林又日浅又连岁遭大丧然不敢不即葬盖幸既有中枝山而家世居丧不用俚俗礼无缁黄滥费乡隣姻友奠賻所入咸可取资以故仅仅得以成葬又古礼土葬踰月陰阳家放其意葬在百日者不问凶杀故自初丧即极力治葬具无他营以及於事又江南山稠水迫难用中原昭穆为穴穴多者惟以砖椁隔分左右中枝之祔穴不先甃结则後不可动每见世人有余资多买田而不蓄山蓄山又不可用於葬比居丧不惜

资财以供杂祀广会以沽儿童妇女之称誉久之心移力倦不暇能葬而昏巫谬史拘忌祸福之说缘之而人有三年五年十年不得葬葬又卤莽知後有当祔而不豫为穴至於临时穿凿崩损惊伤先人之肌骸为可恨也故为记以戒吾子孙毋怠

丹泉墓记

葛翁炼丹泉处处有之人或疑焉余以为神仙家奇诡变化之迹何所不有而独疑於丹泉之是非不益隘乎而儒者遂谓世上并无神仙则又过矣世之言神仙者主於长生不死就能长生不死而其人无益於世则是天地之贼造化之蠹何足以为贵嗟夫世不必言无神仙假令必不可无必自有一种忠孝人为之余闻葛翁当英雄蠭起之秋而能不慕高官厚爵姑取荒远一微潦求丹砂以便鍛链又所以经营辛苦专欲为人开迷除患而无丝毫沈酣豢养之慾此其天资去流俗人远甚虽不成丹得仙何疑番易银阜之丹泉亦相传为葛翁所汲里人叶士心葬母於其旁而结庐焉如将终身既而部使者嘉其行拔以为左史士心清通谨恪与物无竞自其长其朋其游其所知一一俱以孝廉称之於是各为丹泉之歌若文以发士心之微非所谓孝子不匮永锡尔类者耶余惟士心方为世用以不可虚之器逢不可失之时为控弦拟弹砺斲规割不当遽以方外服食之说自蔽他日功成业就辞禄而归寻隐居之初服竟扬名之终志螭龟表前翁仲植後使轩车驷马取道於银阜之下者瞻题目竦诵辞心肃曰於乎哀哉叶母夫人之墓不亦善夫事验请贺余为知言因以为记

唐画西域图记

唐画西域图一卷卷凡四则每则各先书其国号风土不同而同为羌种画者又特举其槩每国画一王而一二奴前後挟持之王皆藉皮坐於地侍者皆立一王掀掌倨语员皮头帽如鉢项组铁下垂至藉皮服衣裘牛脚鞢胷悬一员金花一奴小员皮帽歛袂受事一奴曳幕罗手上下奉酒壶若俟而进裘鞢与王同者蜀郡西北二千余里附国良夷也一王皮韬小髻余发垂双辫如缕皮裘玄鞢微解衽交手按膝一奴布韬发余垂独辫朱裘玄鞢者吐谷浑之南白兰之北弥罗国也一王乌犢冠如首經上标白犁牛尾旁驪二雕翎皮裘朱带玄履綠袜二奴一冠饰裘带屨袜与王同而绀紵一绀带素袜而朱鞢者又西於白兰数千里伫貶欲归国也一王二奴皆椎髻王白皮裘黄毛鞢坐而倭指数曲奴青襦黄屨者拍手为节而歌面有酒色丹襦皮束项者与王目同右注而盼衣皆及项者又党项之西千碭国也所藉皮或毛或不毛色或素或淡紫或绀焰成红波人物肤肉溢生纸面顾揖向背动止迟速诸态观之变然如生余器藻镂精润功参神鬼不可探度余考唐史诸国名俱不经见当由史官追书不能谙知当时事而当时来朝此嵬琐者混居羌中亦无特出名字故若是浅浅不着此可以见唐治之盛而为国大体正不必当然也今人常恨生世不如太古生太古时风气不啻如是而已无官府而能不乱无城郭而能不危无宫室玉帛鱼肉藪籛而能不害其为生诚可比於不雕之朴矣乎

崇胜寺长生灯油局记

余儿童时游钱塘三竺与学佛者往来聽其谈无生谓其师教人以得道灭度为乐而悯世人贪生怖死为可惜今持所闻以疑之以为死生之道如昼夜佛氏专於无生为有夜而无昼老氏之道专於长生为有昼而无夜惟吾儒之道如是而生则不苟生如是而死则不徒死为有昼有夜其嘒嘒而不能一还来驱驰五十年科名利禄出入是非之关兵革饥荒呼吸存亡之机可谓沉酣饜饫心欲休而迹不寧者数矣乃始时时邂逅山林方外长往之流虽不能为其学见其逍遥自在意不能无感动若其徒之说以佛氏之道光明莹彻传於诸老先师之润色而不可灭者为灯发之以坚忍滋之以精苦散之以慧悟其初甚微其末甚炽故有一灯万灯无尽灯之目学者存而求之无所穷其想像慕爱则为之宫室焉而束之於躬为之仪像焉而肃之於目为之钟鼓焉而震之於耳为之梵呗焉而严之於口为之芬香焉而荡之於鼻诸事具矣乃复为长明之灯焉而洞之於心情文周流中外融朗余然後知其徒之学於其师所谓无生者初未尝无生所谓灭者初未尝灭而余所疑特未尽也固海宿云山崇胜寺起废既久而经室法筵之灯尚复多缺有元时师静秀而敏於事慨然出私资买田若干亩以供其膏液燃燎之用名之曰长生灯油之局曰吾祖之光明何事於此抑私为吾宿云谋则宿云之灯庶几可以永久不絕余即其名嘉其多贤徒而愧吾党之不及且又感於畴昔之言遂书以似之因而为之记

山陰慈恩院法华会记

一介之夫有未尝学问於儒者之道而能轻死生同彼已置纷华势利为不足顾惜此可谓之难乎曰不难孟子尝言告子先我不动心今之学佛家嚶嚶然守其师说枯坐於山林深阻之中引一世趋之不为劝羣千万人排之不为阻者皆是矣非徒若是而止充其道虽使虎狼跑前蛇虺跃後决无有心怖而色挠者自信之笃而物不能动也世之不为其学者持空虚而议之平居暇日臯比麈尾潇洒振迅岂不亦有一日之勇少遇得丧如鸿毛四肢百体皆不自保而惟物之聽此犹不足望告子而何敢附於孟子之门则其势轻而力屈固不为不幸也越之浮屠氏义方善权及华蕃孙诸人相与为法华之学於山陰之慈恩院月朔望率其党羣聚而合诵焉既而向之者滋广又裒资置田收其入以供薰蜡汤膳百须之费经始於大德元年六月迨三年五月而介其士大夫来谒记谓将镌之石以传永久余方愧叹其道之盛顾反待区区之言而传也然余困日久日为吾学者不望其用吾言而佛者之徒殷勤而求之所谓其道之异於人大抵皆此类也遂为登载岁月本末而略发孟子告子之异同以求正於越之君子若夫资主氏某田数若干别具诸碑陰此不着

宝陀山所见记

明州昌国之东絶海有岛曰宝陀山相传观音佛之居邂逅大人长者以诚至其居地则必为见光明富美瑰怪不一之相於岩洞间值其不肯见求之百端卒无有也至大元年正月十六日今肃政廉访司佥事阿勒达公以渡海賑饥至宝陀观音凡再见初见弥勒终见本像金辉玉质汹涌绚耀珠缨綉幌纏绕灿烂从行者书史南阳李玉君璋括苍季惠迪吉及僧官李主驺廉氓庶缁素苍儒同瞩异盼骇眩惊怛称意满欲欢喜而退惟佛氏之道非儒者所敢知然其大归主於慈悲救苦又时时出奇示幻要皆使人除去妄想而不趋恶为合於神道设教之

说而金事公天性清穆於朝廷为至亲尊属其来明州先声所临山海震动询灾恤荒靡惮艰险不贷魁桀按行之处抱马足投牒诉冤者日以百数人人得吐气去非诚心救苦除恶何能至是以幽明感通神人欣谐如昌黎望衡岳而陰云开东坡祷文登而海市出中庸传曰至诚之道见乎蓍龟动乎四体云云故至诚如神寧非然耶寧非然耶

损庵记

普益师之居在吴州东南海上少长走四方得於大浮屠之有道德者数人其说不同大要皆教之去益以为损及是投老於钱塘之净慈而名其居曰损庵而求文於余余曰子之师日夜教子以损而又益之以吾之说乎则大笑然求不已乃与之言海夫海难言也其广狭浅深非人之智计所可测也昔者子之所居仅得於海之支流余浸而非海也方其泛然而流漫然而浮汪然而经途越港穿塘埭泛陂泽飈驰而来霆突而奔云蒸而盈者海之弥漫衍溢而非可以以为益也及其忽然而休去之沉然而不可得前舒而後泄东决而西泻者海之歛藏消缩而不可以为损也非徒如是而止盖尝静而思之海之为物澄清停蓄终古一息春不加盈冬不加涸输之以湖渌淫之以霏潦而不见其无所容漏之以尾闾烁之以阳乌而不见其有所竭学者之於道亦然慧如痴鲁如敝无所不为也如无所为无所不能言也如默无一辞彼其知己之有可损是犹未离於益也惟无所事损则并益而忘之今有人劝子勿多食者必尝伤於饱者也以辞千金无德色者必能轻千乘者也於是普益师闻之洒然笑曰子言辩矣凡吾之所以自名与吾师之所以教我者皆赘矣姑为识诸壁而观之

竹溪道院真武祠记

人之气盛则鬼神为之辅道胜则物之助之者多此理之当然不可以常情窥俗论定也余尝怪儒生谈幽明之事凡在先民所常言辄弃不信殆不深考其故而胷臆决之盖上古鸿龐之初蒙倛方相之徒固憧憧然白昼与人并行於途而莫之禁也於是有祭祀卜筮於是有祈禳祓除於是有誓盟诅祝其於鬼神既察之不置而谓之非常言也何居横山道院真武祠本经始於竹溪董公祠兴而兵功用靡究其子宗元徙横山废材增於其居之东遂以竹溪道院立石而书来剡源曰愿有记按真武即北方玄武神於行用水於卦起坎於次起斗登三辰六气五岳四渎之属已皆应祀而故牒相传其神为人时先修道武当山中四十余年然後飞举则是列僊之流有功於世以受报享且礼言有其举之则莫敢废安有祖考之命人得通祀而法所不禁而可用一切毁之初竹溪公之父弱冠游钱塘遇黑衣道人於苏堤茶肆坐间玄论蜂起授以养丹要旨及役使风雷秘法时年少不免有功名心姑藏之未深信也寻之永嘉从孙先生学易多年匝值天久旱取前所授法炷香吁祷须臾有白蛇蟠几大雨如注人始惊异而犹未以为好垂老倦游归休山林自号松岑居士黑衣翁复见於梦赐以诗一章有铁皮铁裤铁团圆句年历八十五不疾而化至竹溪翁西游亦遇月蓬道人者朝行天门市中赠言弥切自是绘画真武像展礼无怠灵旗英槩数数常或见之迨家用日充而有横山之筑宗元不敢替斯诺也而终竹溪之役一门三叶前基後构昔张子房得法於黄石公而祠之比其没也後世犹祀黄石不絶陰子方腊日晨炊而竈神见祀之黄羊子孙因世腊祀黄羊史册皆夸称之以以为隐逸之遇慈孝之感今竹溪之祠尊於黄石而备於腊禋祥福泽又复相类谓之气盛而

鬼神辅道胜而助之者多岂非然耶山川风物古今人情不相远安知世无班范大手笔者为董氏书之是为记至大己酉岁季秋四日

顺寧庵记

奉化大小万竹之西登岱山之阳其支之耸曰茭湖其漚之秀曰锦溪风烟田还林樾蓊润处士徐翁之居在焉於居之西不二百步武为之丘壠曰吾异日倘获夫妇同室於此即吾事毕矣既又为之庐舍以严其守护既又选羽流以勤其展省斥禾田以久其贍养若是於人世之所须可以略备而一日请名於余余名之曰顺寧嗟乎人之死生大矣生也必求所以无愧於生死也必求所以无憾於死然後人道尽而天命得彼庄周荒荡之徒视生也若浮视死也若休故为其学者至於杨王孙之裸葬刘伯伶之荷锸则已太薄有爱之者珠襦玉匣石椁蜃炭苟可以用其厚无所不至盖皆过也惟关洛诸儒之说以为人之受身於天地如受命於父母生幸而无过则谓之顺死幸而无辱则谓之寧是其百年间兢兢凜凜不容有一日之暇逸故乐正子下堂伤足而数月不敢出曾参易大夫之簣而始自安以为得正而毙余家去登岱不远南北奔驰晚乃方葺一巢以托风雨何问余事闻翁持家生理种种预备为之欣叹自今以往优游笃老益务谨行止以教乡党开问学以兴子弟使茭塘之枝栖为鸾凤锦溪之澜跃为蛟龙庶不负余之言哉

西原庵记

西原庵創於奉化禽孝乡铜山西足翁师之塔在焉足翁师讳德麟字足翁许氏剡源人剡源有古刹曰西峰圆觉寺十四岁投其主僧一公为师稍长纵游广参卒得法於天童无际派公遂主慈溪龙山三年次芦山六年次昌国晋慈八年撤晋慈一新之次奉化岳林三年次昌国吉祥四年余尚书开奉化岳林住持一年即退归鄞育王关主主育王一年退主镇江焦山四年辛未十一月二十八日索笔书偈辞衆而逝师生庆元己未至是七十三载矣逝既用天竺法其徒介文自焦山捧骨东归余尚书之夫人魏氏捐山三亩令介文塔藏之是为西原既而其徒之长清萃及其季介文介逸各出私力争买山麓拓塔疆崇塔亭又宏屋室以备岁时朝夕展礼若祝厘报本之事是为西原庵既而於塔之左右续二塔以济他比丘之不忍弃其骨与诸人之亦用其法者附窆於其间既而其季介石捐家田五十余亩归庵以助饘粥香火之须既而告诸有司以西原庵立籍使其子孙自清萃而下世世以次传之如是庶几可以坚久不坏而介文介逸介石不幸相继丧清萃?然耄衰尽力於西原庵不少懈惰顾其嗣惟如绍欲以西原之事传如绍而来请文曰愿有以记之嗟夫人孰不死死则无复可念此世世達人皆知之而况於学道者乎然为人子孙则不得若是之愬故为之盖藏为之展息为之卫防盖人心之当然而孝慈之道在佛氏本不废也足翁师有语录行世焦山辞衆偈尤峭洁僧林皆能言之此不着

剡源文集卷四

卷五

钦定四库全书

剡源文集卷五 元 戴表元 撰记

会稽唐氏墓记

古之时生而间居死而族葬故其人敷亲重土昭穆百世而宗不迁文禁未繁而侵欺争夺之讼不兴後之时国无世家乡无礼俗有能仅存而不废者非上之教盖系乎其人焉降及近世风俗益衰吾观於士者之家而三世不别籍者希矣一命之贵适集其躬归视父兄之居若恐不足以容高輿旋乘马闷闷然思更之至择葬也则不求安死而求利生拘忌陰阳之说东奔西驰故有称踰祖支破宗形侵势攘智谋力夺无有厌极既其甚也有出疆远卜非殡非葬世之子孙疲於展省而并失其故封者矣有壤地相交与乡人争寻尺之畔而兴无涯之狱者矣於乎人生而羣不可以无居也死而掩之不可以无葬也先王公为之制而人各不失其厚後世务厚其私而行之胥?於薄有感之士得不惧而图哉会稽唐氏为东南闻族谱牒丝牵?聯数百年不私入其家累世合居一门之中隱然成小都聚斯既贤於人矣其远祖通议大夫之葬在山陰县旌善乡之古城山宝佑中有私致其家之券於乡贵人节度全君者全君以闲壤纳之久而知为通议之墓城也瞿然曰得无有议我者乎俾守隶诘其樵苏而通唐氏之洒扫如故越二纪会通议之七世孙班谋於宗老引义致书以请於全君全君谢而诺之竟还券唐氏且为写图形标界石以信于唐氏如法於是会稽之士大夫贤唐氏之子孙不散其宗能守其身而孝其亲复故物而光先猷也曰凡有家者不当然乎又贤全君之复券能下势於旧族不烦有司以礼信质成仁人之亲而锡之孝也曰凡处乡者不当然乎事成唐氏遂识本末刻诸坚碑以着不忘全君之德以示後人使知为子孙而与人以先世之丘陇与受之者皆义所不容而法所不许以余之尝学礼也书来请文以系於碑陰乃述其槩而授之其岁月先後步亩广袤则唐氏所识详焉

敷山记

昔余尝读晋人絶交书誓墓文心诚怪之以为诸公酣咏山林沉湎乡井亦云过矣久之叹曰嗟乎士大夫心知材业无所益於时寧出此焉犹可矫懦激顽哉然此事贫者亦不易为则好义之士又有为之衰工穿礪致镬买山以成其高者若吾家处士之於吴中符山人之於襄阳风流客主天下两贤之而今岂复有斯人乎庚寅之冬遇吴兴姚子敬于杭子敬倾然为予道敷山之事敷山者西於吴兴十有余里山中卷外截水磬折行平原茂樾间左右之徐山杼山挟敷山而蹲敷山之前苍峭亘连圭起簾伏望而知为美壤也然已入於势家莫可物色更累十年子敬之隣有曹君者始售而有之既克有之则以予子敬初子敬欲规一区之地以居久矣而不敢望如敷山之美也曹君曰敷山之美我幸有之子贫而贤我以成子子敬曰我诚不敢望敷山之美也而不敢不成曹君之义且吾亲年高他日倘幸以为壽藏而筑室读书於其侧耕渔以给口藏修以养体咏歌以舒志洋洋乎曹君之赐吾事毕矣吾闻之惊喜夫子敬之

所以得於曹君与曹君之所以知子敬视古人何远哉虽然曹君义人也子敬非材业无所益於时者也予未识子敬时凡从吴兴来者夸子敬不容口曹君亦用是贤贤乎及既识子敬乃恂然一儒徒清苦刻厉议成而言虑定而动其不负敷山审矣然则曹君不为伤义子敬不为沽惠也虽然子敬材诚高业诚良知子敬者或不皆如曹君之真将有结驷千乘兼金束带问途於敷山之下是吴兴之荣子敬之達非敷山之得曹君也子敬曰吾何暇於是抑子之言为慙姑为我记之吾将自书以镌於敷山之石子敬名式曹君名元弟名浚者字资深名渊者字子澄余剡源戴表元字帅初庚寅之岁是为某年谨记

戴氏剡源张村葬记

呜呼我先考府君以宝佑丙辰葬我祖考府君於剡源张村之长锡畧山十八年为德佑甲戌而我祖妣郑夫人卒以其岁自金陵官舍輦载归祔葬我祖考府君兆西又十年为至元甲申而先考府君卒卒前嘱其孤表元曰昔吾藏吾二亲於此踰家三舍人皆以为远虽吾亦以为远也今脱此持空身来得与汝等同庐居衣食於此朝夕如见吾亲焉昔吾得数寸之壤才足以为坟甲戌之葬吾以金陵贖钱而易诸隣繇逮今计之为亩几累十昔吾之贫愈於汝家无守人视护不时今山有毛吾手所自树亦且向拱不言而封之樵牧不忍至吾於藏吾亲无所悔惟是余壤之未完心犹歉然表元拜而请故则申嘱之曰吾非多求也吾长锡山之颠在兑兑颠折下蛇行数千步而属于家者吾既易而有之长锡颠之表少右而东复有颠焉曰望春尖望春之小支垂为瓠藤曰天厨畧之右又从庚颠分垂高支披之益长以抱长锡长锡之左曰郭浪岭郭浪之左其颠与天厨齐如二肩垂支加高而长绵绵延延其将停也回岩峭壁驻于艮溪曰青梅潭青梅天厨之间巉礧砂磧不堪往来有役于山者往往取迳冢下僥幸而尽有其处嵌者为樊夷者为舍以寧吾亲不亦善乎甲戌之葬力可为矣而不暇今暇而力不给奈何顾吾家有壽种吾父丙申八十吾母庚戌八十五吾庚辰今方六十五年若尽吾齿必能成也小子识之於时见先考府君语訖泫然欲泣於乎安知语出不旬月遂竟尔不祥乎蒙天之罚不敢死既以十二月十七日前卜葬我先考府君于西二里中枝之山又二十年赖先世遗泽凡所欲於长锡左右青梅天厨间不略备表元幼愚逮事先祖考妣祖考府君寬慈朴谨君子也於云台府君为同祖兄弟祖妣郑夫人聰敏精书计於乡贡进士讳一枝字善甫为同父妹云台府君以毛氏诗起家官四方晚始贵於朝祖考府君不及卒業故先考府君学於外家以外家之学学赋学成复以教表元戴氏起云台府君以来仕者三叶其以赋学决科则祖妣夫人先考府君之为也祖考府君有子五人先考府君在仲最爱祖考府君始疾以梦谗先考府君曰属寢於张山甚燠而安我死汝必以是藏我既丧在殡先考府君於近郭之山但号张者靡不如也率不合既而踰信宿不归家人惑焉一夕忽自归曰有剡客与我言问其居居张村吾欣其名惧失之因不及之告而往往而覩一麓甚美与吾父梦合也吾其图诸然而无资则往谒馆於大姓许将教授其子弟既馆询其麓乃杨氏之麓也房而隶之且累十主先考府君以诚谋於许曰公能以馆我数年之资假我使吾亲得成葬自兹而往吾悉心力以偿君如约焉许亦长者惻然相成用其资佐家之所出者分致累十主又曰具體食人求其诺殫劳竭瘁迨於毕也肌顏槁削而後得葬也於乎勤矣人子於亲得称善先考府君之勤不可没也若先祖考府君之隱德祖妣夫人之教与吾子孙之得居於剡源者皆不可以不知也苟知之不可以不念也表元因斋沐追记其事梗槩于册以示後之人大德十年丙午二月朔日孤表

元谨记

小方门戴氏居葬记

小方门在奉化治南二里许宝化山之陰戴氏之祖居之戴氏古大族从汉晋来比比以学行显重关河间而居江南者莫着於剡剡与奉化相犬牙谱系宜近然昭穆不可得而详矣小方门戴氏始於八代祖曰九府君妣曰赵氏夫人七代祖曰十三府君六代祖曰十五府君妣曰徐氏六夫人皆葬龙潭宣公石桥山九府君之葬据横?面左地理家谓之斩关穴十五府君之葬临低?面右谓之尽龙穴也惟十三府君迷其葬当在衆兆中不能定十五府君始定居小方门遂生三子长讳果居忠义仇村为仇村戴氏祖次讳昇居县东郭戴氏花园为花园戴氏祖又次讳暹曰廿六府君仍居小方门葬龙潭山高?亦面右为小方门五代祖妣曰刘氏夫人事具崇寧阁石碣生四子长讳宇曰六四府君妣曰陈氏夫人顾氏夫人葬小方门西南樟树滩府君性寬良长者尝以衙前役服劳县庭一年故平决鬪讼与譬释劝谕而解者无虑累百家役满日县大夫遣子弟拥蓝輿簪花?以华其归樟树滩距家七八步其葬有崇阜左拱水萦萦环之龙潭广度石棋盘诸山趋迎顾揖皆合地理家又谓之冠带穴也是於表元为高祖次讳宏曰八十府君再传而絶又次讳实曰八一府君居小方门西宅为西宅戴氏祖又次讳寅曰八二府君居小方门益西洗马桥为洗马桥戴氏祖六四府君生六子长九一府君讳颜次九三府君又次九四府君又次九五府君讳辛贫而极孝让又次九七府君又次九八府君讳克顺九七府君去居鄂余皆不离小方门而九五府君於表元为曾祖以六月十三日卒妣曰六一夫人以五月二十五日先卒同日葬小方门东北王家塘青塹青塹在田陇间异时族聚盛田皆戴氏物墓有封树今属单居远万一顾视之不周将为犁锄所及吾子孙不孝之诛何以自赎九五府君生三子长万一府君次万四府君皆絶又次万三二府君讳汝明字叔晦是於表元为祖始去小方门别居坊县丝绵行妣曰郑氏千十夫人讳如玉初六四府君之六子有十二孙九一府君之季子讳简字简之最後以毛氏诗为待补太学弟子员一人九八府君之长子万廿九府君讳杰字颐仲又字良英太学上舍附甲戌进士乙科仕至宗学武学谕出倅温州终於奉议郎主管华州云台观次子万三三府君讳□字怀英魁丙子乡贡终於礼部特奏名其子谦四府君讳颐字平甫复入乙未太学先祖府君独朴鲁有至性兄弟间以房院拥隘羣议出婿于郑夫人夫人善父先生讳一枝妹也善父先生以词赋教授里中有重名乡举十四人时预其高选郑夫人督警又严甥孙缘外家故始皆改用词赋业府君生丙申七月十日亥时年七十九卒甲寅十一月二十七日夫人生庚戌五月二十日辰时年八十五卒甲戌八月十二日剡源张村别有记府君生五子长再十六府君讳灏字默叟性貌酷类先祖旧法中朝官三岁得牒上其族子弟名之在總功亲者试国子监试中补国子生府君以伯父武谕牒至杭试一不中即罢业晚岁自号拙逸居士生庚午五月六日辰时年七十七卒乙酉八月二十一日妣曰袁氏三八夫人生丙寅八月十五日子时年五十卒乙卯九月七日次再十八府君讳灏字商叟生庚辰三月二十九日卯时年六十五卒甲申七月十九日次再十九府君讳颀字子美次再二十府君讳南一字梅叟次再廿一府君讳须凡七孙在者四人而表元由居士第三子为仲父後兵毁无所归已卯竟归剡源张村东二里榆林寻奉二父葬榆林西中枝山袁夫人之殡则尚寄小方门西南二里张山下陈家园先兄桂二府君兆东旦夕当卜榆林附近之壤而迁焉表元因念为儿童时隣巷无过从旬日必取间道归小方门问父兄宗党

旧事颇知未离析前诸房鸣钟会食县南轩盖惟吾族及王赵二家常相往来花园之族岁一见仇村之族大庆吊则一见花园後云台公三十年有六八府君讳鑫字淳父亦用毛氏诗自太学上舍附甲辰进士第释褐仕至承议郎太平倅七九府君讳嘉字良父太学特奏名廸功郎主新昌县学盖才自表元得通家展叙龙潭墓有山租钱若干緡麦若干斤每岁一人以其租具清明祭祀祭之日小方门西宅洗马桥坊郭老稚倾室来罗拜墓下拜讫餽祭之余归舍复治酒数行果盘食飫杂饌如式富不敢奢贫不敢陋最後汤饼一箸而散阖族聚会欢谐自以为至乐花园比仇村絶近亦不至其旁枝居鲇崎者荣一府君讳履字元泰又字行之以词赋入庚戌太学成三舍正奏名荣五府君讳元春字仁长辛酉乡贡每与表元兄弟语为之叹息故表元自金陵归即先复小方门特奉公故庐而居之渐欲增墓田广宗谱力不暇及而止惟奉化戴氏甚繁至於明经入学决科登名独小方门为然祖德深长未易俄测而後裔转徙方张莫知本始缺於纠合失今弗图後悔滋甚辄尽所覩闻登载简册以示剡源子孙并録副本使小方门坊郭西宅洗马桥仇村花园之益後於表元者通知而总其名曰小方门戴氏居葬记

计筹山昇元报德观记

人与人相羨羨而至於不可及者以其能也而有能者不必富且贵能矣富贵矣而於物也必劳盖有以命世之英王侯卿相终身之荣而不能得山林隐逸一日之乐兼其乐矣而人之生必有死死则羨者始穷而人之穷者欲不可穷也而神仙之说兴焉神仙者於世之能不足为於世之荣不足有於世之名区胜壤殫人力所不能至者空飞幻出无江湖之阻寒暑之变资粮车马之烦而皆得信其所往又能长有其乐而不死於乎是岂不知可愿哉然自秦皇汉武以来疲精毕岁以求之卒无见者而幽闲荒寂之滨枯槁之士往往有忽然而遇无意而得者焉余自有四方之事及经丧乱所至见佳山水不一每从樵夫猎人访知为古来名迹则为之徘徊瞻眺不忍舍去所居敝庐抵道家所称四明洞天者远无数舍岁时过之蓬蒿没人猿宅焉私叹安得琼台玉宇者而辱仙人居之乃闻吴兴山水清絶之乡有计筹之山当余英之东南古禹氏国之要冲崇峰秀壑峭立天外而栋宇雄严与其地称窃欣慕之问山之所由得名则地志以为越大夫计然尝登此山筹度面势以营隐居久之道成蹶山颠危石乘云而去至汉而葛玄炼丹其上故常有云物腾腾然护其丹穴天朗夜清吴人候望金丸之光以占丰年问栋宇之所以盛则初也有坛寻丈以行乡民祭祀既而坛废既而复置为常清观宋绍兴初和国杨武恭王即观之故而新广之始有肖像之殿退食之堂栖钟之楼巢经之阁与凡所以居止供具始莫不备问居之之人其居之所以能久则当武恭王时亳有祖君庆章王贤其人以礼聘居之为致永隆仁和之田为顷赢二十有八武康之山为亩赢五百以充其用乾道丙戌之春太上皇为枉车驾幸其山中又为内出御书经及他锡賚为宠祖君之後始改今额为昇元报德而居昇元者一轨祖君之道最後得当涂杜君道坚王之五世孙显祖贤其人又为致山壤之田并昇元若隶昭忠庙者为亩赢千又有所谓科仪田经始於祖君以来诸人至杜君益成之为亩赢二百山为故而田如先其山川若是其人之为也若是而昇元之美始完余尝思之夫何必为仙人翱翔是山之中而後为乐诚使忧患不加毁誉不至得为昇元之徒探是山之毛以为衣挹是山之泉以为浆已不翅王侯卿相所无之乐矣然吾闻神仙者不远人日与人居行而人不知不必专在深山穷谷之间亦不必以世俗心窥之谓其欲长处以自

全今道家言神仙宗老子虽於计然也亦云得道於老子其事远不可知而吾读老子书有惛然忧世无繆之心其言忌取物多以有身为苦将忧人之忧而自为者乐乎抑皆其无忧而後能乐乎它日余持此说也从山中之人叩而学之

程母二夫人祠堂记

自宗法废士大夫不幸而无子则取之他宗比其讳之也缘饰覆护若固有然余独见蜀鹤山高魏氏台西涧陈叶氏合二族为一家岁时子孙衣冠朱紫通祠庙联昭穆班拜齿坐上不诬其祖下不没其亲如秦汉前分注别籍而相展叙者礼有缘於人情可以义起其谓此类哉江東醴陵教授程元宪见余言其二母氏之事元宪故弋阳郑族而贵溪程出也程夫人之父礼兵曹掌故用经术两贡于乡入太学释褐称江南名儒委家政於翁夫人程夫人为女甫十龄辄能代二亲经纪中外事化艰险为饶裕既长适郑郑亦益睦当是时程夫人之仲弟今将仕公之夫人邵氏亦贤淑嫺礼度与程夫人相善缙绅间号孝义程家宪府尝列上其事乞褒显值改物不果既而邵氏无子掌故公夫妇年且七十每享先庙却顾深念忧形顔色会甲戌岁程夫人携诸甥归寧见元宪方亂奇之曰必以是为吾贤妇嗣且吾女虽郑归程氏家由吾女而立不可忘程夫人以姑嫜辞明年程邵二夫人相继卒掌故公夫妇固请于郑得如言以童孺持丧行服乙亥秋九月也後三十一年当大德八年甲辰於是元宪归自醴陵既阅岁即高守坞郡夫人之墓西筑堂以并祠程夫人供养铺设种蒔布植一一如式旁祠置田若干亩以充祭荐守护之费初醴陵以乳泉得名其泉不时发父老相传有异人至其地则发醴陵升州设教授自元宪始庚子春山亭落成而泉发于亭下凝碧如染因名亭漾泉中都官部使者州长僚佐学士诸生徵图作歌以相推美及是以名祠前之池亭所以申报称寄思慕之道甚备而不鄙辱谥於予噫嘻此固畴昔所常惓惓於缘情起礼之叹者也元宪年方强仕有才学能不遗其本益取德义道艺倡率程郑子姓使两家贤俊云蒸雾滃他日轩车駟马修宗合谱於高守之亭者累累百世而不絶後之君子夫岂惟高魏陈叶是许将程郑闕闕附焉盖皆漾泉之余泽也耶其年十二月十日剡源戴表元记

固海宿云山崇胜寺记

道奉化鮑埼西南五六十里有聚曰固海有山曰宿云有寺曰崇胜山起镇亭困盘枝披为大小横山蓬岛安岩马鞍龙髯?墟之属千萦百折而後至於宿云傍峙一麓且伏且昂上人目为镇山头若与镇亭相首尾者自此外薄为海而山止矣山止则气必聚前於构寺者取於宿云率面之以为对既而掖之以为右三易而负之以为背趋迎按揭始与山称寺之额自唐天成三年名固海院宋治平一年改今名寺之栋宇兴废则有璋禅师者实为开创第一祖而不知其所从来屋久且敝嘉定间妙圣师一彻而新之惟大殿为故物至元丙子之兵方丈祖塔外皆以毁废祖森师乃重建法堂库院诸室储材蓄工将以次营懺殿立塑像前寺主文彬师亦拟於道场上饰观音自在像渐渐可以完复旧观而森师逝己丑二月隣境盗发寺屋自方丈祖塔及彬师下房外又皆毁于是一正师劬劳撙节而重兴之以戊戌冬建库院又四年壬寅冬建懺殿文约师建台门长者天台蒋邦佐建法堂丙午冬建香积厨马溥建大释迦像诸余藻饰位置以至祝厘禳灾之处凡寺之所须无不具备寺之田产赢缩则旧籍仅二十有六亩

山一百亩庆元元年昙产师始於寺东青山西得海成田得若干亩继而妙圣师於川塘南筑月浦得若干亩然犹不给迨一正师又积累增买六十亩有奇以充长夏口供由是晨昏鼓钟寒暑鼎鉢才成丛林而於後協贊倾赀助役者僧如日如月也及是耆宿文采等以状载颠末与其诸老之绩若一正师之行实来求文以为纪一正师之居号蒙泉奉化泽者吴氏子年十八弃家投寺僧如岳为比丘稍长讲学於南湖安道寧法师华亭西岩伊法师有贤名丙子归尽思兰若奉乃祖彬师师逝继主其席兼主宿云者十有三年逝以丁未正月窆祔月浦祖塔侧壽五十八嗣三人允聽允时允中师为人天性崇重接物无亲疎一以慈恕盖状之云云如此余闻宿云山久山南古仙人种栢林烧丹洞灵迹接踵而有窃以为四方之事可以老息若此山州里之中簪笠扉履之所不及固不得舍寺又当台明孔道要会多游从开堂振锡先後多得贤主人旦夕幸身闲健或寻灵运穿山之踪继兴公登隆之赋而庶几见之遂不憚以文为之先容云至大戊申之後十一月既望记

天壽报本寺记

奉化剡源之山起会稽略天台穿连山界岭石门南东行累十百千折然後達于班溪堂皇旷夷扈卫偃伏行道之人皆以为宜栖禅林梵坊而未有领会之者余近过其地则风湮林莽间朱碧翬焕钟鱼有声问其庐曰天壽报本也问其创之僧曰正思也问规构曰剗荒莱揭隆栋有若幻成凡室之於殿堂廊庑帑廡庖湏像之於绘塑器之於食用诸物无不具也问产殖曰田之可稼者为亩二百陆地山林之可艺可薪者通为亩百五十朝夕之饘粥公私之靡费可不至缺乏也问岁曰经始於大德癸卯距乙巳落成之日无几时也於乎据形势之要擅工能之巧谋敏而业宏心精而虑久是何不动声色而倏忽变化魁伟不常如此哉世儒多言浮屠法能絕私去累无爱惜恋慕於心故遇事往往坚决就不止又所与游尽江湖之交多阅於土风而熟其向背逆顺故所为而成所成而善是不尽然思师於班溪为乡里毛氏子父讳某早世兄弟五人最少者亦为僧曰清瑞思师自其幼年母邵氏即割爱命之薙髮易服复与之经营之资曰他日我老愿汝筑一庵以养我师受其言庵未成而邵氏没日夜念之不能忘於怀清瑞师怀之为助鄞田若干以起其役功用克集庵之考卜师耳目所自悉其初本以居室之名名静山师以庵籍校之奉化凡四五百区今存者才什一非坏於故家子弟则同门僧挟强怀妬以破荡之遂以公牒上闻乞易庵为寺而得今额其名义盖上申华封之祝下存凯风之思云寺僧相传用甲乙思师之下曰拱宸曰自端其世世以次谨持之俾勿替至大改元孟夏七日记

法华寺兴造记

奉化僧刹以名迹着称而人所慕游者东岳林西雪窦二刹相望六十里修溪隔之峻岭矗焉或值霖潦冻雪进不得達而退无所休自余为儿童时闻患此久矣後十年过之则当二刹之中日峰之西南有法华接待者建屋庑储饘餐以为行路之憇食又二十年过之则前钟後鱼左巾右鉢崇殿修庑层轩复院騫高耸跃峩峩然成一宝坊梵宇矣讯其事盖法华僧前後二师者实为之前师曰妙森後师曰文罔前师於时涖日与其贤主人赵二卿者相善二卿为之捐粮以补竭资力以创施久而还孚远悦输助恐後遂罩其趾为唱法之堂为炊饗之庖为偃

劳之室既而二师图所以永久也前师居治如故而後师持函游从江浙间富豪乞求赢余归营子本以贮田产由是法华之举渐立而前师病垂殁力惫求後师于卧榻侧瞠目嘱以吾二人握空拳为江湖竖津梁不可中辍意後师答以尽力当如言即瞑而逝宋咸淳辛未岁七月五日也数经始之年当淳佑乙巳至此二十五寒暑矣後师嗣为之益增田拓址裒材展工又凡二十五年然後缙流居游出纳之所像设妥侑起止之位法屋拱卫庄饰之序大小靡不完备与奉化诸大利等伏腊朝晡百需之费亦不假求外而给於是略可如志而後师又病又力惫以艰难继绍事宜嘱其嗣若珣辈而逝其语如前师加苦元贞乙未秋七月十八日也後五年若珣辈惧岁久坠其遗言而先劳之不可不纪橐事状底里来请文志诸石余惟一法华之有无在宇宙间不为损益而其道之所由兴废可以为世之劝戒方是地之未为法华接待也人见其荒榛野草固不知有今日之盛虽二师往来颺呻霜露中时亦何敢以为必济谋同助劳肯分志广而衆不疑故能赤手竟成之然又必须五十年之相继事始不废孔子称如有用我者期月可也三年有成称王者必世而後仁称善人为邦百年可以胜残去杀矣而孟子称大国五年小国七年至要其大期则谓五百年必有名世人之行志待五百则已远任之者复要之必世而三年五年七年期月者皆是也而功卒不立孤行而少与多嫌而数易故吾儒之齟齬什有八九为二师之徒所笑无足深怪二师皆居鄞之通远前师周氏受经金谷空相壽五十有五後师戎氏受经城南能仁天壽壽七十有五藏骨异塔合亭在法华後凤凰山上大德四年後八月望日记

剡源文集卷五

卷六

<集部,别集类,金至元,剡源文集>

钦定四库全书

剡源文集卷六 元 戴表元 撰记

杭州佑圣观记

佑圣观在杭州城东隅宋淳熙三年丙申岁所创也越再乙未当皇元之元贞元年今灵妙贞常崇教法师王君壽衍被玺书之宠来领观事始至睹营缮事剧即勤励自尅完缺饰废不期月绩望大孚乃从遗老搜问故实而记载之详泯然无闻乃愕然而作曰噫兹寧非缺欤盖观之地旧有明远楼者阜陵尝读书其间後移为观以崇奉佑圣香火为百姓祈福仍赐今额以道士仇君安一主之然馆庀徒具而资粮不充属杭尹若漕以时时经纪之而已又後壽成后许以遗命拨养田二十余顷之隶仁和临平者归观庆元四年戊午观始有产籍既而端平元年甲午有栖霞何氏一区之山林淳佑三年癸卯有钱塘界田原园麓二千余亩俱以恩泽得之然後化者有归而食用无乏嘉熙元年丁酉夏民庐火观遂延毁藉有司之力期岁复旧至元十七年庚辰冬复毁惟门台及陆君宗补虚白斋存焉於是陆君竭囊橐躬畚鍤昼夜兴辑大人长者闻声胥应时则有若平章政事游公副总管张公援助为多荆榛瓦砾中百础齐筑工殫力疲而法师适来若素後绘若耕终亩凡陆之规修廊崇殿丛房复宇罔弗周举最後乃架方丈之室丹青络连簪裳游栖薰修有憩朝展有次岁时朔望羣瞻辈趋琅璈之音檀沉之氛风行雨渟灵旂神槩陰翳闪烁鬼鬼乎信藩都之胜观仙真之珍宅也夫由曩之创则重劳由今之继则倍善诚盍亟图之以传信劝远爰相与斲石来请文余惟神道设教所从来久矣而是观韬藏俛仰於百有余年之间名字若存若亡主者自仇君後且十七易及今始适遇其时而兴又适得其人而盛是殆非苟然者然古之至人常以道超世不以世溷道迹其天游神运逍遥挥斥自当渺八荒为一室阅千纪如一息去留伸缩无不如意而暇计较于区区名迹之短长乎惟至于有生之必有寄有寄之必欲安且久虽甚旷達谁能忘之此纪述之所以不可废也因不辞而为文俾刻之大德五年辛丑夏六月既望剡源戴表元记

婺源羊鬬岭施水庵记

徽之山由闽出其縣连东行千委万折将舒而为婺源也五岭截焉气雄形深修峭阻厄而其涂为三吴百越商旅之所必经加以霾雾暑潦风雪之蒸薄蒙冒前无停居後无行羣则螫虫恶兽异物隐见骇惑不可睥睨往来者胥以为病有上人洪君觉震当五岭之中曰羊鬬岭者躬刊筑之劳创精庐若干楹以休行人之艰惫又烹汲茗饮以沃其渴烦既又惧功惠之不既为捐稼田为亩者五圃地为步者二千一百六十使学道者徒守而居之於是人之有役於婺源者如无五岭之险焉余尝见世儒非杨墨氏杨之持已坚墨之徇人广而要其终俱不能以无弊若洪君之不憚疲其躬以济物不近於墨氏之道者耶而人何由非之盖当先王时斯民

之行者虽累千百驿山不逢虎兕水不忧蛟龙疑也有铸之以象迷也有指之以车阻也有達之以节劳也有止之以舍饥也有输之以食使洪君生於其间虽欲行墨之道如今之为其何所施乎然若是者世必有真儒能为之顾诸君谈何容易而洪君之事近在目睫不可以不纪其始使来者姑有考也五岭於婺源为着其外有回岭弥险前是洪君既尝庐之因附书焉大德五年岁在辛丑八月既望

重建瑞龙威德寺记

信多名山山尤名者往往浮屠氏居之有居贵溪之瑞龙山者曰威德寺相传天将雨即有云气蒙蒙然吐其上旱岁有司为坛墀请辄应由是以瑞龙名山而寺额取神灵润泽之义如所称寺盖为民而设非寻常密土木聚缁褐而已然郡志於贵溪戴威德寺县志并载寺田五百五亩而皆不详其所起惟僧家以为时马祖禅师实始开筑寺久且废田归豪家雩祭之迹亦少而瑞龙为空山矣乃至正己丑岁今天寧主僧妙薰自铅山西林归道途所经目悟心动会诏旨许所在兴葺废寺有侵疆匿产者诘其罪於是夷荒发坚鸠良役能凡经营六年门台廊庑堂寝房帑泊诸庄严像饰之制靡不完丽簷锡往来钟鱼朝昏俨然与承平梵宇无异此一瑞龙山也以昔焉废之之易而今焉复之之亟何居是不系其人乎万家之邑百里之城视一寺为大也居其位而不治其事问之则曰吾志非不及此权不得独为也今夫妙薰师为之不因其素治之不当其任谋兴于邂逅功成於咄嗟劬躬悴心先施其劳而後食之及既去来天寧则以授其徒之尝同宣力者广灯广授广猷大临崇弼等使次第补其处行藏进退从容治办岂不耸然异于人哉师字少白闽儒家黄氏寺成之九年遂来索文为记因为略叙本末若证验文牒倾助氏名它石具焉大德七年岁在癸卯五月朔日记

邢州秀野堂记

邢台王成父自其先大夫筑秀野之堂於所居之里泊成父长成而能仕以材选佐使江南乃及与余交而问记於余余嘉其意不得辞则本故实据古昔为成父讲之先王之时人无不农凡操耒耜服稼穡者通谓之野人人人皆农而何以治之於农之中择其秀者以齿於学以録于乡以升于朝其尤秀者为大夫为卿为公而通谓之君子孟子所谓非君子莫治野人非野人莫养君子此其别也汉始以秀才名科然亦不废力田孝弟诸目自是有公府辟召自是有九品中正其所取之人载在史册往往由草野得之非皆纶巾羽扇唾壶尘尾以清流自命也科举任子兴然後一切鄙农不为余之少时身预斯弊中原风俗则非江南可比三河尤为豪杰义士窟宅想见王大夫名成行尊倦游东归有意於斯堂而营之也神驰大行之飞云目遡漳河之流泉下车舒徐巡按阡陌班荆从容问劳父老禽鸟往来花竹左右一时功名经济之怀收卷净尽平生交游故旧闻堂成而落之烹羊羔糝伏雌弹铗击筑醉舞起和而歌呜呜於是公罔扬觶张老进祝举过庭之异闻修饮乡之旅语雍雍乎于于乎其尚友温国徵名洛园而徜徉於秀野也然乎岂不然乎成父之材之能仕余所闻而知也抑成父有所受之而然而余之知犹未尽也士何用专以材得名亦何用以能仕为材成父顾斯堂之名而常自省焉

徐氏报恩阁记

人道之至亲无踰於父由父之亲而类之凡父之同父皆父也皆父则皆亲然先王制礼独许为父庙而诸父不庙者尊各有所专也皆亲以顺其情独尊以严其义而礼始行又当其时生闻里死族葬服尽者举同之总属远者预四宗之祭想见世家族聚虽百代可以不散而况羣从尚近之亲乎後世宗法既坏人无贵贱以析居异产为俗以第五伦之贤而爱衰于兄子谢太傅之义而哀废于期功他何望哉弋阳徐君觉民尝为予道其伯父思斋公之事徐氏初以儒俭起家迨觉民之生十一年而丧其所天思斋公抚之犹子也为之督业为之聘师为之典衣鬻田以供其费比长为之通名于乡先生谢礼部张教授之门以尽其艺艺成而科举废公亦与世辞矣於是觉民兄弟既葬公于里之杉木原有司上其名而官之遂教授信州再转尤溪遂昌主簿而家且日肥觉民曰吾微伯父之赐不至是图所以寄其慕思者杉木原之旁不半里有寺名中山乃於寺东偏剋飞阁三间严像设洁龕几密鼓钟割上肥田十亩以予僧俾诹日以其礼祠之而聽徐氏子孙会祭阁成扁曰报恩夫此何足言报抑聊以志不忘焉耳如是既定觉民不自安以问于余余曰此虽非先王之礼而犹先王之意也不然儒家者力既不能置宗法又不许备庙人人各亲其祢世世愈远其祖而觉民之一再传不复知有思斋公矣觉民其忍乎君子于此不惟当姑许之又当奨成之使为尊者知恤其卑之有报为子姓者知不遗其旁亲之为美於以扶人伦劝世俗宜非小补阁扁某公参预所书其割田件目剋阁月日载在租籍此记者宜不着

此乐堂记

弋阳徐觉民为尤溪主簿时太夫人年适七十觉民归而率其子弟诸孙奉觴为壽懽如也顾旧堂颇迫隘明年因其後隅辟而新之为人五为楹十二魁深廓方有翼有容遂取白乐天对酒诗中语名其额曰此乐堂而属余为之记余惟天下之乐出于力营势致者莫不皆有浅深丰约之不齐而惟奉亲之乐得于中心之诚然不以贵加不以窳损迨乎情真事惬适无抵牾则单门素士之养或有王公卿相之所不及乐天名位固不为甚高其清才至性发于懽畅形于歌诗铿锵脍炙轰人齿颊觉民有羨于此而取焉无所不可抑区区之论以为觉民似不必甚羨于乐天今乐天在固将求为觉民而不可得也何以言之乐天奉母时家贫俸薄尝从禁林乞兼京兆户曹参军以便养凄凉酸楚闻者怜之後來禄食稍充居饶园池乐备丝竹则其乐日与宾游僮伎共之而不及亲矣新井之篇为母受恶一斥司马再迁分司逃谗畏讥浮沉终身兼之门清祚薄子息稀絶晚节寂寞自同枯禅而何乐之言乎今吾觉民官虽浅足以行志居虽僻足以全真进无简书之忧退有山林之安而太夫人自其盛年秉节励操勤劳之获积成丰余贞烈之苦舒为康怡岁时晨昏问安展庆彩衣盈前含饴拥後意动而甘旨具颐指而供帐给计人生居处承顺之悦一一无所亏缺岂惟乐天愧之将世之凡为人子者举愿为觉民此乐而不可得也古者朋友比兄弟之义将登堂拜母觉民於余不可辞乃次第所欲陈之云云以先之而因以为记大德八年四月既望

冰雪相看之居记

吴成李法师之居在京师崇真宫客有疑于冰雪相看云者以问之其人臆之曰法师厌纷囂羞溷浊姑有取於天地间清物以为洗心荡目之玩焉耳何疑乎其人之羣有学道者闻其人

之说呀然而笑曰噫是以世议相短长可也乌足以尽达人之云云哉且子以为冰雪者孰为之曰气为之曰气孰为之曰水为之曰水盈於天地间为云为雨为霜露之属皆是也而得为冰雪而可常常玩之乎曰冰雪之可玩者以其为水之变而愈清者也曰水变为冰雪而愈清不曰冰雪又变而为水乎盖尝静而思之冰雪者水之迹水者天地之迹天地者太虚之迹太虚者气之迹人以其迹与太虚之迹相摩不啻百千万尘之一息其偶然得气之清而能以功言行业著称於时而超异於流辈者亦犹水之偶变而为冰雪也名成志就得其凭依享之长年而有後者冰雪之近於人而收藏稍久者也俯仰虽不愧于幽明而忧谗畏讥名不能终全志不得尽遂者冰雪之难成而须臾幻灭者也全贞守素深潜不市以自善其道冰雪之处於空林邃谷而无斧斤之戕风日之烁者也是数者皆不能不化虽不能不化而其为冰雪清气长在也抑其说何止于是吾游於世而知夫人之可贪可慕者无如权货势禄大之英雄豪杰之所必争而小之不免为愚夫愚妇之所共惑当其疾趋而求重关而扃莫不以为难致之珍不拔之业而由吾观之经於吾前而不留于吾目萧萧然冰雪之不若也故冰雪一也有化之于迹有化之于无迹有迹之化吾前之说也无迹之化吾後之说也吾常见儒者不涉吾道家门户以为恍惚怪诞故其事难为言吾道家所居有琼林珠玉之雕饰夏暑不能使之暄冬寒不能使之冻穷其飞腾变幻絶迹之观希世之须何境不可遗何求不可获而况区区冰雪之玩欲有即有欲无即无乎而公等何以疑之於是客与其人者骇叹愧谢知世外之学果有所未尽也托余述之而文之以为记

晚香堂记

番禺樵隐吴君作新堂于壽栢山所居之西偏种菊其间而名曰晚香其子法师与余游以书属为记盖当其时公之年与夫人之壽皆七十法师自禁林得请归奉觴称庆朝廷之近臣江湖之名儒凡能文词墨翰者俱有饯赠以相褒美夸叹华编魏榜照耀山谷文轩贵驿震动行路以人情论之意亦可以娱迟暮畅忧鬱而不愧于其名矣法师曰不然吾家居栢山几余二百年自樵隐公以上世有厚德不戚戚以居不汲汲以趋方番禺盛时朝朱暮紫东印西组人无寧踪而樵隐公处之恬然及今途改举罢驱驰之事尽息而吾樵隐公恬然犹前日也顾作一区之宅以避寒暑燥湿前有清泉盘石之观後有修篁茂樾之美行豆觴业诵弦于其中已不啻足必於耳目欲有所增益将世情何物不可愿而独取夫菊殆微怀淡泊偶自相合耳而何他说之云乎嗟夫物之无情不如人之有欲自垂髫以至皓首余见富贵家多矣名园甲第迁奇花构怪植千金之资万夫之力聘致惟恐不亟装饰惟恐不侈歌钟未休老惫且至幸乃有贤子孙扶持之仅仅犹可自保此不待远取而知也而吴氏隐德盘薄停蓄至于二百年之久可谓晚甚犹徐行廉取如是天岂不愈念之而士大夫闻晚香之风亦可爽然动心哉是为记大德八年秋九月四日

先天观记

信之龙虎山以僊着学僊者附之而居枝牵叶联不可胜数也曾贯翁作先天观於其山之南役最後地最僻境最胜其初也人皆疑之终也人皆奇之贯翁曰噫嘻吾何意于是乎哉盖吾生而畸孤年未衰而倦游交虽多而寡谐以为既不愿有求於世徒得数弓之宅一夫之田奉

吾师香火而休焉已不翅足顾便近地不可得会有以山麓售喜而质之则樵者扞岩而苏耕者焚林而畚其艰且劳如是而何以为居然不敢决焉舍去为之尽力攀陟一睨忽然而堂皇开突然而辅卫立问其名若仙人冈尘山台山天应山之属平时想像於烟岚渺没间者一一近在目睫心不能无动遂乃铢累寸葺自经始于庚寅明年辛卯精庐成又明年壬辰中堂成越十有三年甲辰祖殿庠序门台诸室俱成涧径自水口磴至观前可三里水萦萦四时不絶流遡鹤飞台下少东第一桥曰双清其南曰月泉益东第二桥有成石如船俯矚涧中曰云阙而遡少南第三桥曰桃花流水益南又桥【缺】北折滙一巨池曰长生先天观门临焉

过门益北【缺】粟中又折益西曰自然亭自然之西南曰深处【缺】深处陡上巍屏矗张正与僊人冈尘山相客主曰雷坛俯坛而西南曰云庵曰逍遥眺琵琶峰可企而摘也复南俯一圆池曰鱼我鱼我之顷曰天风云外其东下曰玄圃益下横二泉而瓠腹者一瓢余流为丹出二泉右可以第四桥左可以长生池也诸名或亭或不亭或扁或虚大略使人游其中如循环无端观傍田可稼者余百亩田上山破荒发坚悉种花竹杂果木今皆滃然成茂林此吾居山之颠末次第诚不料得至於此而人何以疑之复何以奇之乎吾始闻贯翁贤愿亲之及承其言俭而慈静而贞信乎其有道高君子也古之为僊者不择地今所称琳馆往往为人指目者其先固皆荒岩絶谷不通车辙马迹之处意有神物秘惜待其人而居之如贯翁之於先天寧非是耶寧非是耶请以是为记大德八年九月日朔旦

虚室记

人情之至不能忘者莫如身因有身也而不能忘其居因有居也而耳目口体百物之须举不能忘焉因有耳目口体百物之须也而贫贱者思足其欲富贵者思固其获贫贱者思足其欲富贵者思固其获而世无闲民矣临川危公远法师与余相遇於玉溪之上曰若我则庶几免於斯夫余闻其言固心异之阅一年而以书来请记其所居之虚室嗟乎公远乎子之室其既真能尽虚之耶抑方将有诸而遂以渐虚之乎人之一身寄於茫茫行於冥冥得有其室实难有室而能虚之尤难有而能虚虚而不失其有尤加难焉公远生于世家左玄右史前道後术少无科举利禄之贼长无妻孥产室之锢所谓耳目口体百物之须仰於世者甚简使之富贵可以知其不迁使之贫贱可以知其不?而又出门尽见天下之名山大川登堂则纵交四方之公卿豪杰凡老师宿儒经生学士白头羡慕而不得如意者不劳经营悉萃几席餐芳袭腴擎奇揽秀天爵之华内美之珍无物不具公远方守之以谦取之以廉薄积而厚贷多糴而少获其为室也可谓之有而能虚虚而能不失其有者非耶虽然公远为老子学者也虚室之言出于庄周庄亦师老子而老子之虚与庄周异老子之虚虚其德其言也忧世以为慈同物以为和譬之与天地八荒万象为一室者也庄周之虚并其言而虚之久则将使人傲世逃物而自居其福譬之欲以天地八荒万象为己之私室者也公远其审择于斯二者而居焉大德八年孟冬既望

剡源文集卷六

卷七

钦定四库全书

剡源文集卷七 元 戴表元 撰序

春秋法度编序

咸淳中余备员太学博士弟子见学官月讲必以春秋窃怪而问诸人曰是自渡江来以为复讐之书不敢废也夫复讐之说初非春秋本旨中兴初胡康侯诸公痛数千年圣经遭王临川禁锢乘其新败洗雪而彰明之使为乱臣贼子者增惧使用夏变夷者加劝儒者之功用所为与天地并如是而可耳场屋腐生山林曲士因而掎摭微文破碎大道为可悯叹及其久也春秋之编未终讐不得复而鼎迁科废学者不待申临川之禁而絶口不复道矣虽以余之困而愿学求欲如昔年从博士後时意气诎可得耶乡郡赵君汉弼与予为同年生精力趣尚记诵讨论视余略不衰惰其先人清敏公尝以春秋经传集解奏之经筵刻之琬琰者若干言经火毁灭汉弼追忆而补存之摘其出於先公自着者定为若干言又评考二百四十二年行事合於诗书六典名曰春秋法度之编者若干言无近世掎摭破碎之嫌而於儒者之功用有所发於戏何其能哉盖汉弼之为人吾知之生於纷华之窟而能勤长於功名之涂而能静老於艰危之境而能泰故其於是书亦不以世故炎凉盛衰而夺抑交游之期於汉弼何有纪极汉弼年未甚高余戊戌春过之见其萧然一室几砚在左杵臼居右畦蔬汲井无一毛干世之色其於春秋法度未可量也

通监寤辩序

学者之於书犹贾然贾欲居贷必据乎雄都要府五通八达之衢百物之聚时其赢拙而察其良窳博收而精出之而又取之以廉而守之以不悖然後可以为善贾不惟能富而能不至於败通监者衆史书之雄都要府五通八达之衢者也通监未出之前稽古之士一史不窥以为阙通监既出衆史书可以略废是天下之货一日不劳而致之矣然自余知学以来所见前後辈习通监者甚少不曰未暇则曰力不足夫力不足者穷贾也力足之而未暇者弱贾也暇矣力及之矣而有终身不习焉者陋贾也幸逃是三者有人焉穷力而习之诘其事前举而後随诵其言累百千万不逸一辞可以为难矣然而不通其理不尽治乱贤否之所以然则犹多蓄天下之货而不时其赢拙不察其良窳货虽多而不知为富之术是滞贾也又有人焉能习其书能通其理能尽治乱贤否之所以然可以为愈难矣然而措诸辞则戾於训施诸用则趋利逐便而不适於经久则奸贾也奸贾不若不贾之善也里中有博雅君子曰王君熙字子和予晚不及见而见其弱冠所着通监寤辩若干言喜而读之竟事求当不求遂语求尽不求巧时引周汉以下千余年陈迹裁之於王道此其譬於贾也若挈禹贡九州山海之富而用周官之法衡之也岂与夫白圭范蠡辈比力而筹哉惜乎王君年未充而学已成迨其老且益昌而不得一名以行其志使之议於朝闻於国也君止一子今亦老矣贾术非不善也而世穷人之传其书与否不可知姑私系所闻以谗於同好云尔

读易蠡测序

古圣人之经至难言者莫如易余考王制见先王时之居学校者其法春诵夏弦秋学礼冬读书而仲尼之门人记其师雅言之详不过诗书执礼而皆不及易惟其自为也则不得已有文以明之以见易非圣人不能言而虽圣人之教人亦不使人之得以易其言也汉以後始有易师今诸家法度髣髴具存往往用之占步测筭非若後世之言易者以为必能通圣人之言而续为之说也余之少时不免斯累近乃稍自悔艾欲慎其出窃尝间与为杂学者往还若丹经之铅汞历书之纪朔医家之运气兵家之机势大略反与易合而支离泛滥不切者莫如书生举子之说此无他彼数氏者犹托於象数为可準而书生举子专以空言谈理故也儒者徐君之祥自番易橐所着易经蠡测若干言见余於余杭其言象数取皇极於康节取太极於濂溪厥既知所先务而诸卦之中多详其变曰非变无以明易自正体伏体互体变体反对体上下体而通之一卦有六十四以至於四千九十六愈变愈通而卦愈不穷有辩卦中有四画五画而成卦者皆见於易反覆恳欵实皆不叛於新安汉上二朱氏之学余甚慕而奇之而徐君机神敏给於天人性命事物精粗之理他人经年历纪而未喻者一日即了其得於天盖厚不但人力之勤也然君於易书之变本由象数以通理而象数者起於无而寄於有理者妙於有而归於无寄於有者其变可知可言归於无者不可知不可言也人之可知而言易之变固不止於四千九十六人之不可知不可言画之一不必三卦之八不必六十四可也古人老而学易易又为忧患作徐君涉世益熟刊落轻鋭而复谗之蠡乎蠡乎其游於圣人之海有不为夜光乎

左氏窥斑序

夫子没遗言之着於世者为经学者各为说以通之通之不得则反诸经惟夫学春秋则异是左氏公羊谷梁三家者与我肩随而学夫子者也後世信於其言乃过夫子三家之中左氏之徒谓其师逮与夫子同世信之尤确而春秋反为疑经夫左氏者岂曰真足以蔽春秋哉缘其文胜学者有求於左氏而无求於春秋故耳余於近世得折衷左氏之书二编曰晁吏部杂论曰吕著作後说晁约而通吕博而核尝欲依仿其法删繁去滯定为一书以达於春秋之义而力未克也年来倦学葩叶凋槁以为二编之法虽在所举而江南研经家自欧阳公以来皆直取春秋为断甚者尚疑今之春秋出於鲁史本文者不可尽考无问左氏因知学广者疑固多如登千仞之峰举足愈高而见愈杂如游四通八达之途奇珍异货目眩而不即定要其定而不杂久然後自得之耳叶君正道以左氏窥斑示余余读之犹爱晁吕时也问书之所繇成则方诸儒汲汲科举之年君已脱稿久矣嗟夫此岂若余年少退惰不自力者比邪君名某台寧海人

于景龙注朱氏小学书序

余儿童时闻乡里老儒先生以小学教授者才四五家每讲课罢杂试河图洛书之数若尧典闰法禹贡赋则周礼兵制之类又少暇则都讲口授顏氏家训少仪外传等小书故诸生略有姿性者自未冠以前而诸成人之事皆已槩举於时朱氏书犹未盛行浙中时从人传抄之以

相啓发恍然如扬雄问方言蔡邕见论衡之喜及甲辰乙巳间有用其说取甲科者四方翕然争售朱学而吾乡以远僻方获尽见徽文公所着书大抵诸书惟易本义四书注小学书最为完备其余或未经脱藁或杂出他手非全书也今三书者惟四书家有人诵之易本义真知者絶少而小学书最益於人人无读者良可悯痛于君景龙生於文公阙里年齿长大而好深沈之思独取小学书句释章解欲以行世美哉其为人乎余也少而远游长而亟仕不惟学不俟成而并与儿童之所得而失之固于君之罪人也哉天啓其衷方自悔咎幸于君书成则愿秉烛而学焉属书序引谨笔诸其篇端云元贞乙未季秋朔旦

陆宣公奏议精要序

右陆宣公奏议精要三卷宣公吴人以纯诚直谏嘉猷远识学行政术为唐忠臣未尝以文名也其言亦止缘当时利害而发非有垂世传远之意而眉山苏公父子亟慕而学焉大苏公遂取其书进之经筵以备讲读自是以来学士大夫以谏诤者尚其慤实以诏檄者尚其明达以书判者尚其果决以谏议者尚其详尽而宣公之书行矣夫以宣公之诚之才之识之学发而为文在其当时虽尝暂用而蔽於昏愎怵於谗邪至於蒙疑负累偃蹇困蹶视同列材名下已而位宰相者滔滔皆是独不得久立於朝而卒以罪死死数百年其书始盛行於天下则於宣公可谓无负而怀忠抱朴之士行不愧神明信不欺豚鱼一时偶不遇於其身者亦可以无悔矣呜呼韪哉然自唐史称宣公议论炳如丹青者已数十百篇今之所存卷帙犹为浩汗故穷檐白屋之下沈潜雋永无所不可而簿领剧繁刀笔倥偬者卒然窥之有不得其涯际余友苏台陆君子顺乃采摘其精语要义聚为一编以便观者万目之网挈纲而皆举千口之室入奥而不迷余为之深嘉重叹不独喜吴中陆氏渊源之有自而由今以往使人人不惮烦於宣公之书因而熟复其用心行事将见草野怀珍者俱謇谤之士台阁结绶者举端贞之臣於人文治化似不无少补云大德戊戌孟冬朔日

汴略序

古之通史者百家皆出於父兄先世闻见积累以得之若司马班范刘李以降可睹已其有草野後流庠序遗哲辛苦采拾而後喻者则不在此限然及其至也精之以讲学粗之以用世俱不病於匱乏故东方生三冬之劳而文史可以足用陆贾贾山辈掇缀秦汉近事以资口辩而时人谓其知务此其效也汴梁立国百六十八年渡江而南又百五十年其间设施沿革本末条贯笔之汗青緘之金匱在承平时学者尚不能尽睹加以兵毁相仍典籍散失以余之涉猎记诵问咸淳景定中事首尾茫然不相聯属而况耳目疏远者乎天台潘可大生又後於余质敏而志专学劬而识精穷坐山谷授徒以奉亲足未尝出户限之外而网罗旧闻自建隆庚申迄靖康丁未详其记事之体附以辩论若范淳夫之唐监胡明仲之管见名为汴略者三十卷又自建炎丁未迄德佑甲子金天辅戊戌迄天兴甲午撮提纲要名为南北纪年者若干卷嗟夫如可大之讲学岂非灵龟神蜃潜藏岩泽而光彩氛祲自见於外也哉使之进为以用世何可揜抑而可大不愿为东方生陆贾贾山之流者也姑为题辞篇端以发其槩云

急就篇注释补遗自序

古之君子不以道废物自一艺以上苟有所益於人虽农匠庖祝之贱犹身亲为之粵大圣人亦莫不为若皇帝之医药虞舜之陶渔夫子之牛羊会计皆是物也夫古之圣贤岂以殫力疲肌为异人之能也哉後之君子平居侈然论古先王之道若不足为而问之以目睫之事於其所服食於其所居处於其所游衍肄习有日与之接而不知其名义者焉岂不大惑耶余之幼也被沐父兄之教凡小学之所当讲者幸而得其端倪气昏质陋中道辄废年益长而悔之乃始拊膺持颊以自刻励而文献凋零微言就絕一时交友方共诋伤以为不切於事每至耕鋤之余酬画之顷有触於心必默识而私求之家罕书籍有急就篇一卷汉黄门令史游所撰唐弘文馆学士顏师古所注又经新安朱先生仲晦所校自谓名本然而篇中正文絕无音训注之所及疑义尚多窃不自量为之补其遗阙兼有异同之说载於左方尝觀洙泗以来师友会辨皆互出所疑以相扣答然後理尽而学精使顏朱二公而在余固愿得而面请也又惟古人着书动缘教戒而作此书本取急速成就其辞以便於童习而四民之业百用之宜靡不周究秦人以法吏为师公私宦学转相授袭故以吏文终焉儒者欲求汉学惟齐鲁诸生训注犹近古哉

左氏蒙求序

吴伯秀为乡校诸生时余与之寒同枕饥同竈比试於有司亦同业也然余性迟每得有司命题辄勉强营度至移晷刻不能辨回视伯秀引笔书卷滔滔十已成五六矣又当是时学徒如林问疑请益者八面而坐人人得所欲越几日榜出伯秀巍然占居上游诸问疑请益者班班选中余甚慚而慕之以为为儒不当如是别十年余自太学成进士伯秀亦阶乡举收礼官之科各相慰劳满意年齿又皆壮强自度非碌碌必将有所着见於世既而皆失官家居流落颠顿积二十年顏苍髮枯皆欲成老翁於是余始悔其旧业谋以筋力之劳办治衣食寻计滕种树书陶公养鱼法之类而习之顾此事亦非旦暮可就徒失之而已而伯秀学益坚识益深风节益峻乃方阖门下帷躬少年书生之事取数千年兴亡之说贤否之迹皆紬理纂缉成一家言惟左氏传自其少时即已精熟盖尝取义类对偶之相洽者韵为蒙求以便学者余读之如斲泥之斤鸣镝之射百发百返而不少差嘻乎异哉夫人之材力相去果若是远乎伯秀蒙求成於左氏传又有笔记通纂於毛氏诗又有集义等书次第皆且脱橐余虽坐前累不可望有所进抑攘臂於勇夫之旁垂涎於饱人之余意气固未已也伯秀名化龙今又字汉翔云

伍典蒙求序

古之学者自其孩童能言而所以授之之事详矣然必至於十岁请习於外传虽其篇数今不可闻大要不过诗书执礼之目既又俟其年愈长而气愈强识愈明也然後始许之以博学盖初不以譊譊口舌浮华为急而惟恐夸根傲蘖芟鋤之不早以为终身之累而为之师者又必学成行笃而不仕者乃敢居之故其前後辈之相成班班可考其诗曰肆成人有德小子有造此之谓也余为儿时犹及先生长者而事之景定中时议罢童子科以为韶亂之质而贼之以辞章记诵虚器无益其说是矣而白首纷如者雷同一律仅不过以举子业相传授其智复出童子科下识者病之铅山詹仲美实生於衣冠之林长於文献之府来杭以伍典蒙求示余其一事亲其二事君其三夫妇其四长幼其五朋友典系一章章系百句句系一事询其所以然

则仲美尝登故相江文忠之门而学於白鹿洞有覩於先师晦翁之说而为此也呜呼令仲美之书行充其言庶几乎成人者有以教而小子者有以学乎属余方以穷授徒见朋友间续蒙求何翅百家论其不畔於小学家篇数而可以养人之纯心釋节固无踰此编者故为之序云大德戊戌岁孟冬二日

昌国应君类书蒙求序

余五六岁时亲党间有中童子科者心慕之盖其法以通念九经而复试中能文为出身夫以江南东西闽浙淮湘广蜀之大试者岁不过一二十人而中者不过一二人则亦可谓难矣景定咸淳中试员稍衆有司厌之以为徒斲人之淳心而长浮慧废其科不用因念取士之法敝矣进士科最贵最敝三舍宏辞次贵然亦皆编析成言以待问谐比虚词以眩举幸而得之则冀不次之擢非若童子真能淹诵群经而试所能而後授一下士之秩而已自余任子军功吏员纳粟之类岁以累百计又所不论有司不敢废岂皆爱其能哉重变古耳而独靳於童子一二人何邪其亦不详之甚矣童子科既废三十年人讳之不习而风俗愈不加厚余以穷授徒江海上乡大夫昌国应君翔孙过之相与慨叹江南经术荒芜纷纷朋俦中疑难满胸而卒无所问是谁当执其咎者出其类书蒙求示余凡诸经之指篇标韵举粲然在目泛滥而及於仪礼尔雅诸子扬雄之太玄马融之忠经莫不皆有蒙求自初本以来昉而为之是不一氏其能散而完博而精固未有如此书者应君盖景定咸淳前未废科时童子也呜呼难哉余既序其书闻昌国宦学士大夫应氏实为祖至参预公遂大其闕而应君问学气行白首不衰方就家塾请合祠先贤天之欲昌其文以淑其徒者意未已也大德戊戌孟夏望後五日

奇童烈女宝监序

古谚有言教妇初来教儿婴孩余垂髫时每得侍坐乡父兄必闻其举此二语以为家诫为之耳熟於时东阊西巷男诵女织气象可入图画稍长大驱驰未倦而归则见畴昔儒素之门僮奴輿马姻连玉帛光艷薰烁一一无复旧俗盖时尚推移而礼之衰久矣史称万石君家醇谨不再传輒废而洛下袁司徒子孙後皆以骄奢败士大夫辛苦立门户至此岂不可怜哉窃尝思之人之常情当其未纵也先生长者以片言只语收之而甚易及其已决则虽有司严行重法禁之而良难故古之人不问男女於其幼穉一步趋则教之习让一饮食则教之知耻一祭祀则教之观礼非固劳其筋骸而?其视听盖爱之而纳於善也想见当时少仪弟子职诸书与彤管女史之类朝吟夕讽亦如余少时所睹记而今去之数千年謡译荒凉简篇散脱何由复可髣髴庚子之春有吴兴故家张生炜於废书中得所谓奇童烈女宝监者喜其有助於名教为之裒广厘葺板行以示人而徵言於余余惟他书之行不行未必能损益於世而此书行则足以使人知童幼之身而必有所事闺门之行而必有所传其於劝讲学扶彝伦殊非小补遂怱慙成之而并书所闻如左

程宗旦古诗编序

语之成文者有韵犹乐之成音者有均一也均法废世以後代新声为古乐韵学流人又以唐

人近体为古诗矣可不痛哉余尝有意绪正其事以为乐出於中声与人之歌诗最为不远三百篇国风雅颂可以被弦歌荐宗庙者本不求如後世音切之备然当时人之诵念精熟士大夫寻常叙述邂逅寄托必取断章一二以流畅其意者诸成文而有韵故也汉魏後诗犹入乐府遇其理到处流传至今儿童妇女辈能讽之兴起若如今人直谓之无诗无乐可也宛陵程君宗旦老而笃学取唐虞以来诸经传语之有韵者目为古诗一编以诱激後进其意若与余合为书梗槩卷後而归之元贞乙未秋八月日

赵子昂诗文集序

吴兴赵子昂与余友十五年凡五见必有诗文相振激子昂才极高气极爽余跂之不能及然而未尝不为余尽也最後又见于杭始大出其平生之作曰松雪斋集者若干卷属余评之余惟人之各以其才自致於世必能相及也而後相知必相知也而後能相为言余於子昂不相及而何以知何以言乎子昂曰虽然必言之余曰必言之则就吾二人之今所历者请以杭喻浙东西之山水莫美於杭虽儿童妇女未尝至杭者知其美也使之言杭亦不敢不以为美也而不如吾二人之能言何者吾二人身历而知之而彼未尝至故也他日试以其说问居杭之人则言之不能以皆一彼所取於杭者异也今人之於诗之於文未尝身历而知之而欲言者皆是也幸尝历而知之而言之同者亦未之有也子昂未弱冠时出语已惊其里中儒先稍长大而四方万里重购以求其文车马所至填门倾郭得片纸只字人人心惬意满而去此非可以声色致也而子昂岂谓其皆知我哉故古之相知必若韩孟欧梅同声一迹绸缪倾吐而後为遇而後世乃欲望此於道途邂逅之间则又过矣余评子昂古赋凌历顿迅在楚汉之间古诗沈潜鲍谢自余诸作犹傲睨高适李翱云子昂自知之以为何如大德戊戌仲春既望

尚书小传序【双溪王先生】

古之君子欲明道於天下者不能使人无异而尝恶人之苟同以为异则道可因人而明苟同之情虽一时懽然无失而初不能以相发故以仲尼百世师西家之邻夫犹不知其贤而乡国之人至以为不知礼故旧交游门弟子之徒虽达如原壤贤如晏婴亲且久如仲由陈元犹或愕而疑之及乎事久论定则亘古今之远穷天地之广家传其书而人习其道此岂人情眉睫旦暮之所可期哉徽士大夫尝为余言朱文公无恙时同里閭有双溪王先生炎字晦叔亦以学行为诸儒宗两家议论时相纠切文公既没而诸生方脱党祸起而尊獎先说非朱氏者皆废格不用王先生之书与其为人後生辈不及尽知以为惜余不暇论其何如也已亥之夏有王君传自京口来以尚书小传五十八卷相示盖双溪先生所着而於君为四世矣曰自吾先君子遭丧乱迁徙不一旧物皆不得存而此书俨然独完窃自喜幸余以余隙稍取问习其发蒙之义破的之辞大抵训诂家所未及文公居闲多於诸经厘正不遗余力而独尚书及春秋逊避若有所待先生此书稿脱於开禧末而板行於嘉定初於时文公易箴之日既久假令尚在必相与绸缪桑梓雅旧相乐当有莫逆於言辞文字之间者殊乡晚出各立名字骤开门户遂生异同之论岂复一一尽出其师意耶且经师自汉以来专门尚不相一惟其不相一而真是出焉而今人谓独视单听可以尽天下之耳目无是理也王先生又有易上下经解六卷易系辞总说若干卷余次第将尽求而学之大德三年四月日

天原发微序

古之言天道者必兼人事自羲和来絶地通天以前书传之所睹记不可考也由是而有历象有律吕有龟策有祠祭礫禳盟诅之类其法与仁义道德纪纲制度之说通行於世至其绪闻余论春秋之季犹人人能道之先儒有云河图洛书圣人以神道设教通经者病其固岂天人所以然之故在当时小人之所易喻而後世搢绅先生以为深远而难言耶天之未丧斯文而仲尼出仲尼曰天何言哉四时行焉百物生焉至哉其自为言乎再传而子思子明之曰天命之谓性率性之谓道修道之谓教而充其极至於三千三百礼乐之美九州四海声容文物之盛而其妙又归於无迹又再传而孟子明之曰知性则知天曰存心养性以事天而诸事一一以天行之能治其人曰天吏能自治其身曰天民位曰天位职曰天职爵曰天爵道之将行而为尧舜也曰天使之道之不行而退不失为孔氏徒也曰天止之呜呼至乎哉秦祸息汉学兴传言者杂灾祥?纬尚象者拘巫史推步明理者溺清虚释老千有余年之间学者醒行寤语诿天为茫茫无预吾事於是有周程张诸大儒同时参立於隆平之代药其狂昏震其冥聒迨其说之流传未久而将惑也又得新安朱子即为之厘析剖决然後微言要指粹然一趋於是了然而无复遗憾士之幸而逢於其会亦可谓如天之福矣而奈之何学之者又以易废城阙之童耳熟而心荒市朝之夫口然而身悖前所谓秦汉以来之弊夫何以相远余行忧患展转百折窃意深山穷谷中轻功名拙进趋之士必有精其学而藏於家者一日新安方使君出其平生故人鲍景翔所着天原发微五卷相示读之自太极渺茫之始至於行之所倚气之所使数之所起器之所拟精粗内外无所不纪而纲提领挈出於使君指画不少景翔尝以乡贡进士一诣春官不售归食贫终身乡长者提学郑君孔明馆谷之朝夕与共讲学书成遂为板传之以成其勤名以慰其遗志鲁无君子斯焉取斯诘不信然属使君已为序俾予附书其後谨不敢辞

先天图义序

自汉儒易林之传絶而士大夫一切以理谈易几二千年如扬子云太玄虞仲翔纳甲关子朗洞极魏伯阳参同契之类往往皆古人象数之余说而学者疑其近於历家方士弃不肯习迨至近世乃有太极先天二图於易最为深密然非濂溪康节阐张於前考亭朱先生尊獎於後则二图者安知不以疑废今二图既皆显行於时而今谈先天者犹不如太极之盛何也太极以理先天以象数理易喻而象数难精前贤所以有狗马鬼神之论也余之少也固习於科举长也厄於忧患又生穷乡僻邑无所师授亦莫能听受其说山陰严养晦以四十九图相示方员之象纵横之数不劳执比一一昭合而陰阳往来动静消息之理开卷可一目而尽是其於濂溪康节考亭之学可谓叩其疆藩而窥其堂室矣世念渐空幸有余力可以偿平生饥渴之愿当从养晦卒业焉

老子原旨序

右老子原旨三卷当涂南谷杜君所着注老家多矣亦有出於名儒大老之手而人无传焉岂故略而遗之耶缘其中未能释然於老子之学而务矫其辞以合吾意毋怪乎有所扞格齟齬

而不能通也儒者疑老子道德仁义与礼之说又忧祸厌乱自为也过多又谓老子非神仙无久生不死者以此数说积於胸与今之言老子家异譬如越客楚服泽居之人而评陆产安从而折其衷哉余尝与杜君商略此事杜君憭然而笑曰是乌足以疑吾师乎凡吾师之事吾知之若他人则何由知之吾师历年多最後为周柱下史其着书某章指某事某章指某事类古史因尽出其原旨诸所云云世儒穷年敝纪而不得者一一传其师意纵横出入无所顾虑呜呼世无老子之学即已耳必若欲崇老子之学其书当自老子之徒自为之吾夫子独善时门人高弟身亲受业然目未瞑而难易同异之论纷然而起後來残编断简同门彼此相违者又所不筭盖皆以为出夫子而卒不敢自以为是而又暇强知老子意而注其书耶故道相若则能相为知智相及则能相为言杜君黄冠师不事煅炼方药役使鬼神察其意似耻之而不言至於谈笑王侯之间游戏荣名之外逍遥委曲以退为体以忍为用变化无碍委蛇若虚是庶乎能为老子者若余也何足以知之若余也何足以知之

王伯善农书序

世人尝讥嘲儒者无所用心为必不得已寧退而躬耕野间为农以毕世犹为无所愧负余每隘而非之使儒者诚用将无民不得业而农预其数矣安在栖栖然亲扶犁负耒而後为善昔者仲尼鄙樊须孟轲辟许行良为此耶丙申岁客宣城县闻旌德宰王君伯善儒者也而旌德治问之其法岁教民种桑若干株凡麻苧禾黍牟麦之类所以蒔艺芟获皆授之以方又图画所为钱鏹耰耨耙 诸杂用之器使民为之民初曰是固吾事且吾世为之安用教他县为宰者群擲揄之以为是殊不切於事良守将贤部使知之不问问亦不以为能也如是三年伯善未去旌德而旌德之民利赖而诵歌之盖伯善不独教之以为农之方与器又能不扰而安全之使民心驯而日化之也後六年余以荐得官信州伯善再调来宰永丰丰信近邑余既知伯善贤益慕其治加详伯善之政孚於永丰又加速大抵不异居旌德时山斋憭然终日清坐不施一鞭不动一檄而民趋功听令惟谨岁时属耆老强壮问能从吾言试其具幸而能则大喜出卮酒相劝獎即不能或怠惰不帅教辄顰蹙展转引愧如不自容呜呼真美哉而儒者之道所谓为民父母能近怀而远悦者有不当然乎於是伯善自永丰橐其书曰农器图谱农桑通诀示余閱之纲提目举华摯实聚顾旧农书有南北异宜而古今异制者此书历历可以通贯因为序发其大指并附载所闻见以信儒者之用世皆非空言令是书行而长民者一以伯善为法虽人颂子产邑歌 风可也

礼部韵语序

余少时请益乡先生问记礼家言春诵何也曰诵诗也曰诵诗何为也曰将以为乐也曰夏又弦何也曰古之学官惟礼与乐其春夏皆乐其冬读书亦将以为礼也不特此也其学曰辟雍辟以明经雍以和乐其官有祭酒司业酒者行礼之物而业乐板也余於时颇领悟顾琴瑟亦不易为惟诗为近乐差可自力由是日为之荣辱四十年人情世故何所不有而不至於放心动性而出於绳检之外者诗之力也来江东有铅山虞世民取平生所见古书之涉於礼者叶为韵语欲使儿童妇女流传成诵熟於口耳浹於心体将见朝昏节朔之仪不教而自行父师保母之训无言而皆喻甚有功於人其教固不浅浅而虞君之意亦云厚矣於是遂从之以成

书而附余所知之区区系诸其篇端云

齐东野语序

齐东野语者吴兴周子自名其所编书也周子吴人而名其书齐语何也周子其先本齐人也周子之客读其书而疑之曰周子之辞谦耳非实也盖昔者学废兵起而天下谈客悉聚于齐临淄稷下之徒车雷鸣袂云摩学者翛然以谈相宗虽孟子亦尝为齐学者也然而能非之今之所谓齐东之云者非实辞也故庄周曰齐谐为滑稽汉高责齐虏以口舌如斯而已矣今夫周子之书其言核其事确其询官名精乎其欲似郗子也其订舆图审乎其欲似晋伯宗也其涉辞章礼乐赡乎其欲似吴公子季札也他所称举旁引曲证如归太山之巔而记封丘之壝也过矍相之圃而数射夫之序也凡若是不苟然也而岂齐东之云哉故曰周子之谦耳非实也周子曰我自实其为齐非也然客谓我非齐亦非也我家曾大父中丞公实始自齐迁吴及今四世於吴为客先公尝言我虽居吴心未尝一饭不在齐也岂其裔孙而遂忘齐哉而又大父侍郎公踐六曹外大父参预文庄章公出入两制台阁之旧章宫府之故事泛滥淹贯童而受之白首未忘失今弗图恐遂废轶古人有言人穷则反本若我者今非穷乎苟反其本则当为齐故吾编吾书而系之齐何不可乎客曰唯唯则次第其辞以附於其书之末周子名密字公谨

剡源文集卷七

卷八

<集部,别集类,金至元,剡源文集>

钦定四库全书

剡源文集卷八 元 戴表元 撰序

潘可大孙子释文序

始余疑孙子教吴宫美人战阵非事实太史公承袭所闻括其奇载之耳及言为将西破楚入郢北灭齐晋事亦甚略盖古有是人善言兵不必其能自为兵也而孙子十三篇遂行於世後之能兵者因共宗之嗟乎夫孙子者岂非春秋战国间恢诡抗拔人世不独能兵者耶其书纵横变化深而切博而尽读之使人好焉友人潘可大盖修词而好焉者也年方冠於书无所不观而独为孙子作释文若干言一日?以过余曰自吾为此书朋友始而骇焉什四中而疑焉什六卒而非且笑焉什八矣夫非且笑者是诚不知而疑焉而骇焉者亦犹未释然於此也昔周之衰学士大夫失其所承凡能修明世教不畔於先王者惟仲尼之徒为然自余为游谈雄辩为狂愤着书最下为刑名计数诸家盖人人而能言言而能文也孙子其言兵而文者欤夫既言而文故能勇变古人之法而自名其家由汉以来最名将如韩淮陰赵营平皆口传其语班班於策最奸雄如曹孟德至亲为之议他可知矣然而其书之要曰兵以诈立以利动夫车马资粮之输赏罚部伍之节山川陰阳之宜不待武之智而能及之也必若以诈而立以利而动生人何罪焉後世尊其人专徇其法袭其实阳讳其名凡轩辕氏之子孙逮于兹累千百年为血为肉皇皇然终不能自必其命非言之文者为之乎於此复以文翼之譬若惧火之熄而扇其炎愈不知所终矣然潘之意非翼孙子者观其书所折衷至称仁人之兵主於除天下之害其杀之也所以生之诸如此类本孙子所未讲而学孙子之家所未悉持兵者得是说而行之则为汤武之举谈兵者得是说而推之则为伊吕之佐其心仁其术慎其於诈利也远矣然则必若潘君之云然後可以论孙子哉故孙子犹或可废而此书之意不可以不传也君名衍翁天台人

大学中庸孝经诸书集解音释序

儒者之说其精者为道德而粗者为礼乐刑政当三代以前虽世治有断续而二说未尝一日废於天下书之所存者略也周之既衰礼乐刑政尽坏道德茫然无所附丽夫子不得已始与其徒共详之於书书详而後世之托言者始杂然自其徒相继皆歿之後千有余年往往常有穷经学古之彦不以世故动心枯然自守师说於山林草泽间宜举一世不好之而不变声薰气染之久而亦或为人所采拾道德之绪余礼乐刑政之髣髴因之而不坠者什五至於近代濂洛之派兴於杂书之中定着其书通於夫子者曰子曾氏子思氏子孟氏而上三代之书存者曰孝经中庸大学孟子若论语又孔门之高弟共为之尤精者也为之披微文抉浮辞使寻源者不迷其津趋涂者不昧其岐有功哉濂洛之徒皆没说者又杂考亭朱先生出又取濂洛

之已详者与其徒加明之故孝经有刊误论语孟子有集注大学中庸有章句以迨太极西铭通书之类凡残编断册之关于义理者举有训解其徒之书余之资虽钝犹得而窥之其徒之人为余之先犹得而知之顾岁月推移风气变化资品之尤钝於余者则不及预此矣余也白首东来乃始获闻番阳有双峰饶君者尝学於考亭之门人而於考亭之书鑽研探索纂述彙叙其意犹考亭之於濂洛也久之是州之儒者凌君尧辅与余游余又见其笺诂疏释问答图辨而知其游饶君之门而於饶君之书又如饶君之於考亭也呜呼兹非余所谓穷经学古之彦不以世故动心而枯然自守师说於山林草泽间者耶尧辅归而於是书也益弘其入谨其出幸且及於伏生申公之年其有欲闻道德礼乐刑政之说者不以属君之徒而谁耶

仇仁近诗序

景定咸淳之间余初客杭见能诗人不一二数不必皆杭产也时余虽学诗方从事进取每每为人所厌薄以为兹技乃天之所以畀於穷退之人使其吟謠山林以泄其无聊非涉世者之所得兼余尝隘而非之诸君子非失职安得为此不祥之言离去二十年复来事有不可言诸诗人皆尽而余恍然独行独止如羈禽越乡而无与羣如马行过其故枥裴回而悲鸣也呜呼畴昔之叹岂不以此哉然犹未敢自断何世无人何人无心特余交际先後疏数之间不足以得之久之屠君存博白君廷玉二君者皆亹亹志於古人皆不弃余而肯与之交私心自喜久之因二君得仇仁近也遂赠余镌成一巨编叩其藏未镌者尚什伯於此余惊其多而服其善美其敏而敬其密自是寓客中抑郁不自畅不得与诸君晤语则取其所编张之案端行坐讽之以为快仁近又方力学期树立以为千百年後世计视余区区相知於耳目间似不足为既窃自喜兹编之不絶於世而余犹及见之耳仁近诗余不敢托於知言就杭人求之比其盛时有过之无不及也余年视仁近不甚相絶而气尽衰业不早就进退皆无足据幸君之相亲庶几诸君愈益见厚时时得新闻以洗旧蔽不敢望有名誉或藉以一乐稍稍捐去晚暮孤贫之忧即君赐大矣若君之所愿君自得之余无以进君也

初寮王先生摘稿序

初寮先生左丞遗文前後集内外七十六卷李文敏公周文忠公为之序所以尊獎称美之者至矣靖康之难公落南且死子孙往往散居江闽间皆以材业通显而台阁词章议论之臣一时收用中原旧族士大夫不诵习公文者以为野陋於是七十六卷之传家有其书焉大德己亥夏余始识公之六世孙庭槐于杭问之云甚矣乎吾先公之泽将微也吾忧之然兵毁而犹宝藏其书惟是一二父兄之不竞於力惧无以貽永者且先公仕政宣历两制登中司尝以直忤蔡京父子被谗斥死地偶幸不殒而本末人不尽知颇欲摘取奏篇制草之有所关涉者别为一编以便传览其间关楚越倡和之作实与棊山曾公吉父东莱吕公居仁龙门陈公去非诸老相为鼓吹文献之不亡繫此之故因亦附载编中子以为何如余惟公之言行名实布在天下耳目如膏粱绮縠其谁不厌饫被服而是编所谓餽其珍而裼其华者也遂相与赞成之而并书所谓詮择之意如左是岁六月望後四日记

方使君诗序

右紫阳方使君丁酉岁杂诗一卷使君初为名进士时表元以儿童窃从士大夫间得其文词诵之沾沾然喜也年二十六入太学而使君适由东诸侯藩府归为国子师始获因缘扳叙偿平生之慕愿焉然当是时诸贤高谈性命其次不过驰骛於竿牍俳谐場屋破碎之文以随时悦俗无有肯以诗为事者惟夫山林之退士江湖之羈客乃仅或能攻而馆阁名成艺达者亦往往以余力及之使君魁然其间外兼山林江湖清切之能内收馆阁优游之望於是一时好雌黄掎摭者无所施其轻重越二年表元亦成进士稍稍捐弃他学纵意於诗而兵事起矣自是别去使君二十七年然後得读此卷大篇清新散朗天趣流洽如晋宋间人醉语虽甚?不及声利小篇沉鸷峻整如李将军游骑远击自成部伍盖使君好客志气白首不衰而学问播闻端平以来诸老於书无不窥於理无不究故能若是之有余也闻篇帙浩繁承学之士疲於传録惜未有好事者托之木石以广其传云

桐江诗集序

紫阳方使君平生於诗无所不学盖於陶谢学其纤徐於韩白学其条达於黄陈学其沈鸷而居常自说欲慕陆放翁岂其暮年安贫守约忘怀出处有偶相貌类者而姑引之以自托耶抑放翁虽生长东南承接中原文献独其为诗亦亲经东莱茶山诸先生指授遂为是虚心倾思如不可几及也此前辈风流盛德非近时沾沾自喜之徒所可窥议然有一事不谋而合放翁晚起家得严州为诗几千首翁去而州人爱其诗版传之至今使君垂老亦守严多为诗州人为刻其桐江集者六十五卷锦峯绣壑淋漓翰墨前後照映於百年间良堪绘画表元因念生世不早不得事放翁而窃幸熟从其子孙游闻翁为州日江湖诗客羣扣其门倾箱倒橐赠施之无吝色及解印东归扁舟枵然使君去桐江属邑即僦庐杂餐人人见之者不知其尝为二千石也偶遇台馈却玉挥金贯酒讌客终日一时雄襟雅量略视放翁何远故其为诗笙鸣镛应磁动针合虽不规规求与之似而自有不容不似者其居使之然乎於是同游之士来谓表元子於门墙衿佩中若知言者盍识其云云以为桐江集序

周公谨弁阳诗序

人尝言作诗惟宜老与穷彼老也穷也事之尝其心者多矣故其诗工人孰不愿其诗工而甚无乐乎老与穷则夫诗之必至此而工者人之见之宜相吊以悲而顾好之何哉曰天固以是慰之也天以是慰之则凡人之得工於诗者命也非其性能也诗之工非其性能而有挟之者是挟命欤曰是亦人也人少而好之老斯工矣其穷也亦好之而诗始工也其不好者虽老且穷犹不工也人之好工其诗且好老与穷欤余亦好老与穷者也然亦适遭之也若吾周公谨父之於诗谓有遭非欤公谨少年诗流丽鍾情春融云荡翹然称其材大夫也壮年典实华瞻觀之如陈周庭鲁庙遗器蔚蔚然称其博雅多识君子也晚年展转荆棘霜露之间感慨激发抑郁悲壮每一篇出令人百忧生焉又乌乌然称其为累臣羈客也公谨盛年藏书万卷居饶馆榭游足僚友其所居弁阳在吴兴山水清峭遇好风佳时载酒殢浮扁舟穷旦夕赋咏於其间就使失禄不仕浮沉明时但如苏子美沈睿达辈亦有足乐者今皆无之虽其弁阳且不得居顛顔皤鬢离乡索立而歌歔歔如此而人方美其诗工不知於公谨何如哉虽然公谨非此愈无以适其心予丙戌春道杭遇之气貌充然不衰类有道术者此又非後生俗子之所可知

也诗凡若干首犹系之弁阳示不忘士风云

张仲实文编序

诗者文之事余尝怪世之能诗家常谦谦自托於不敢言文而号工文者亦让诗不为曰道固不得兼也嘻噫是何异於言医者曰吾曾为小儿医妇人医而不通乎他言兵者曰吾能车而不能徒吾能谋围而不能谋鬪岂理也哉西秦张仲实余诵其诗久矣信乎其杰然者也交之二十年而始见其文其叙事如诸葛公起草庐谈鼎足形势某当如是如是而无阙辞无剩语也其析理如吴公子札过鲁观历代之乐因其所起而知其所止也其立教如严君平依卜筮劝人父慈子孝而各喻善也旨哉旨哉然仲实终不自眩鬻其累帙巨编云蒸锦组山翔涛涌而皆缘於人情时务若迫之而答不得已而发此其趣量又有进於文者耶抑犹欲姑出入於谦谦自托者耶仲实生世家能力贫劬学为进士能早不累於科举纵交博览意气超卓而年少余十许岁其材名何假余言而着独感於所见为叙大略云

赵君理遗文序

吾乡五桂堂赵氏以文翰科目起家兄弟皆为名大夫余晚不及识而识其後人澧阳使君之孙曰君理与余交最相厚也君理虽生世家贫与余同其处贫之策亦与余同锄园授徒取赢筋骸以充饘粥如是积十数年家稍康始有意远游以广其成名尝客崇德州理侯家衣冠铅槩之士争附之不二年以病归里中辄死初君理与余游雅独好书见奇书倾囊倒橐收买不吝惜昼閱夜讽务欲蒐揽玩味而为词章举笔沉重整综有元和嘉佑之风诗骚赋尤敏贍应接如响然骨相清峭天台舒景高在黄甘余携见之景高私余问曾识欧阳公二苏公画像乎余应曰识则问君理何如余时以为景高好庾言斯人正不须若是呜呼庸詎知其不祥之卜遂诚然乎天之多与人以才常少与之福故自古名能文人十有八九穷困坎坷庐陵公虽富贵比於同时两府诸公犹为未遇二苏颠顿有不可言至其门第非不奇麗秀伟谁复如意独身後声名赫赫能千古令人叹仰此福固将安用君理死十年其弟幼宣为之收拾遗稿托余为序引余知君理早凡所撰述多为监史而惜幼宣求之未尽今之奉化於古为鄞今之鄞古乃为鄮君理尝为古鄮志大佳亦不在卷中宜使广询之

陈无逸诗序

余年二十四五时识龙泉陈公於杭自是展转离合八九年得间无不以文字相闻然未尝说诗龙泉公居湖晚年归湖既歿而余始识湖之秀民奇士能诗者数人数人诗皆清严有法度窃怪之盖虽科举学废人人得纵意无所累然未应顿悟至此久之识公之诸孙无逸始间得龙泉诗读之然後乃知湖人之於公良有所受而公平生雅善为诗中经忧患寄托益广但不喜诵夸於人而独家庭里閤子弟时时窃闻之耳最後戊戌岁与无逸同客杭始又得读无逸诗无逸之诗视其祖天闲之驹朝生而知步玉田之禾晚耷而同熟也视其乡人冰蚕火布起尘煤脱垢焮倏然而洁也於是絕慕与无逸游而无逸以家世故犹若未弃予者或携手秋郊行吟或抵足夜榻卧讽或杯觴探筹或砚席点橐欢谐怨怼舒适困促一一共发之於诗余年

衰学放任心而成遇手而得兰蒿杂揉璚玉混袭有一时欣快出之而徐即增赧自悔无逸盘旋营度一字不圆不脱口尝笑问何苦乃尔无逸亦笑曰吾自吾苦也吾苦何容外人知之余退而味其言真陈氏诗种也至是岁晏将别忽倾橐出数十百篇示余求余评余惟区区之言必不足以重无逸而交情世好实深相知有如所陈者乃为登载梗槩其篇端云

李时可诗序

余自五岁受诗家庭於是四十有三年矣於诗之时事忧乐险易老穉疾徐之变不可谓不知其槩然而不能言也夫不能言而何以为知诗然惟知诗者为不能言也今夫人食之於可口居之於佚服之於燠而游之於适谁不知美之问其美之所以然则不得而言之昔尝有二人射其一百发百中若矢生於手而侯生於目其一时而中焉时而中者每中辄言百发百中者未尝言也揖百发百中者问之其人哑然而笑曰吾初不知吾射之至此也问可学乎曰可学而不可言学之法固问之曰日射而已矣夫学诗亦犹是也故余平生作诗最多而未尝言於人亦不求人之言今年辛卯春余来吴吴士李鸣凤字时可以其诗示余余以前说告之时可曰虽然必强为我一言盖时可之於诗勤类余居家穷类余穷而不废业类余往年吴中熟时可携书就食诸公间东家饁币西家发廩妻孥终岁充然无不悦之色而今此乐何可复得时可间关憔悴犹日为诗自娱为诗必拟古自近古名能诗人陶谢以来之作规模略尽故下笔辄无今人近语时可之於诗其视余殆可谓莫逆於心者耶嗟乎时可休矣今与时可别更五年三年相逢於江湖之上樽酒班荆握手道旧当亦恍然於吾言之非诬矣时可识之

胡天放诗序

严於浙中为佳州奇山帷攢清流练飞世之骚人称之有锦峯绣岭之目迨至於淳安则佳益甚山丛而益奇川踈而益清异时余尝识其间知名者数公衣冠笑谈楚楚然称其山川者乎然当是时诸公之文章方期於用世无有肯剖心凋形沈埋穷伏而为诗者山川虽佳其烟云鱼鸟朝夕真趣不过散弃为渔人樵客之娱而已兵戈以来游宦事息乃始稍稍与之相接而前时诸公訏谟典策之具亦且倚阁无用呻吟憔悴无聊而诗生焉去年春识胡天放天放者淳安诸公中之一人也读其诗独无呻吟憔悴无聊之声焉余疑而询之盖夫天放生二千石之家而甘簞瓢之操怀四方万里之志而存邱壑之好自其童年厌薄世禄疎擯举子已耽为诗今之所编稿欲十易於戏美哉乎余於天放交游视淳安诸公为晚古人有言白头如新倾盖如故余於天放独安得而无言乎天放名侨

张君信诗序

人之於艺苟非其攻而好之者则不能精余少时多好好仙好侠好医药卜筮以至方技博奕蹴鞠击刺戏弄之类几无所不好翰墨几案间事固不言而知也然皆不精惟好攻诗最久而异时以科举取士余当治词赋其法难精一精词赋则力不能及他学在杭州见异方之精词赋者莫如闽士闽士中有尤精者焉当是时张君信闽士中尤精词赋之一人也余既早成进士去益为诗君信虽精词赋遇大进取辄不利然亦数数为诗尝以贄见其乡先生陈性善学

士陈学士戏曰子欲持是上春官乎君信惭之弃其诗复专攻词赋而科举废矣於是君信若愠若狂始放意为诗不复如前却行顾忌辛卯春余来吴君信尽出其所作累百篇相示酒酣气张音吐清畅余为击节从容停蓄隽永驩乎适哉虽然余与君信皆渐老矣余自追念少年血气盛强时所好诸艺皆为无益幸而不精虽精於诗亦复何用曾不如医药卜筮方技犹可以自给博奕蹴鞠之流犹为人所爱幸东方生叹陛楯郎之不为优旃太史公差节士而尊货殖非空言也君信此事姑止闻新年移家湖上为我种鱼千数头栅鸡圈豕令牧养可作百十日具艺秫酿酒数石余以深冬访子为子屡醉不一从来二曹父子渊明太白辈精於诗者无一诗不及酒余二人亦可缘此纵言乎君信名革

张仲实诗序

异时搢绅先生无所事诗见有攢眉拥鼻而吟者辄靳之曰是唐声也是不足为吾学也吾学大出之可以咏歌唐虞小出之不失为孔氏之徒而何用是啁啁为哉其为唐诗者汨然无所与於世则已耳吾不屑往与之议也诮改举废诗事渐出而昔之所靳者骤而精焉则不能因亦浸为之为之异於唐则又曰是终唐声不足为吾诗也吾诗惧不达於古不惧不达於唐其为唐诗者方起而抗曰古固在我而君安得古於是性情理义之具譁为讼媒而人始骇矣杭於东南为诗国之二说者余狎闻焉盖尝私评之诗自盛古至於唐不知几变每变愈下而唐人者变之稍差者也今人服食寝处之物玩适之器不暇及古虽古不能信其必古但得唐人遗縑断楮废材败絮数百千年间物即古之疑其攻能精絶亦喟喟叹美以为不可及至於为诗去唐远甚然谈及之则不以为古诚古不止此抑充其类焉姑无深诛唐乎张仲实循忠烈王诸孙在杭友中年最妙而诗尚最力强志多学尝与庐陵刘公会孟往复是能为唐而不为唐者也故吾槩举诸人所疑於古者告之亦以坚仲寔之学云

白廷玉诗序

日余得白廷玉姓字於周义乌往还书中其赋铜浮沔一篇尤清驯可念自是欲识廷玉逢人辄问之而廷玉授书北关数里外栖栖然穷书生耳时节一入城不能与故人从容立谈而去则余无自而接廷玉焉一日僦褰博之衣忽来顾余逆旅中辞倾意酣慨然有古人班荆之喜倾盖之诚义出其自写诗数十百篇赠余以其有以自重也愈益念之昔者杭为行都士非欲售其业者不至杭诗虽非干世之业而自山林攻诗者一涉足於杭而迁焉若杭人之所自为诗则迁愈甚何也累於知也今夫士大夫之居游於杭者皆无前时之心而余之得廷玉与廷玉之得於余岂不亦有可言者哉廷玉诗甚似渡江陈去非而尝讳言去非又特好记览每一篇必欲令注波於六经之渊披条於百氏之畹诚放此不止余何云以得廷玉哉

陈季渊诗序

昔年尝为人赋海东青诗有言此诗经斫云公题絶似难复措手也并举全章云云余记之不能忘来江东夹谷子括都事以使杭经过席间及前诗始知为畸亭陈季渊所作季渊京兆人与遗山元裕之同辈遗山盛推下之他诗文极多海青诗斫云外尚余七章皆清豪可讽既而

子括云归杭将倡率朋友之知畸亭者尽刻其所藏以传会郡守朱侯适同其语忻然属意以为不烦他人遂下诸学官为之彙叙厘正登载版本凡得古赋一古诗六律诗九十四絶句七乐府三自古文人才士能以著述名字闻於後世要自有不可泯灭然亦岂不幸而不自传者如杜子美称薛华长句至与李太白相埒而华无一语行世计当时留连颠倒淋漓挥写歌阑兴尽不自收拾而诸公虽相赏爱或者不免脱落散失故为是可惜耳然则是编之传不但後生可以想见中原文献之美如夹谷君之尚友朱侯之好事皆不易易得也

剡源文集卷八

卷九

钦定四库全书

剡源文集卷九 元 戴表元 撰序

汤子文诗序

丹阳汤子文官余州时余方为民万山中势不得相往来而子文数数以诗见交余重谢其意而心贤之阔絶十五年以为子文去而翱翔江湖之上当已执士大夫之珪乘客卿之车而开通侯之封久矣辛卯孟春忽邂逅于钱塘逆旅握手问寒暄竟复出诗若干篇相示曰自去子州所辛苦极力而得者才此耳余读而味之则子文诗肆丽清邃乃一如丘园书生山林处士之作搜罗虫鱼抉摘烟霞几相忘於前日之为者嗟乎子文何以若是然乎富贵不足道然得而处之亦良不易使子文十五年之间幸能如衆人有所成就不过亦如衆人徒劳而已何苦劳於诗耶此事勿论论切於诗者余自学诗来见作诗人讳寒语兼不喜用书云二者能累诗是矣然古诗人作寒语无如渊明最多用书无如太白子美而三人诗传至今不见其累之也今吾子文诗二禁俱废尤有爽然於余心者哉子文所居丹阳古诗国今交游风流可称者有谁其江山高秀余平生雅爱游处也旦夕从子文归而求之诗在是矣子文名炳龙

陈晦父诗序

世多言唐人能攻诗岂惟唐人自刘项二曹父子起兵间即皆能之无问文士至唐人乃设此以备科目人不能诗自无以行其名故不得不攻耳近世汴梁江浙诸公既不以名取人诗事几废人不攻诗不害为通儒余犹记与陈晦父昆弟为儿童时持笔橐出里门所见名卿大夫十有八九出於场屋科举其得之之道非明经则词赋固无有以诗进者间有一二以诗进谓之杂流人不齿録惟天台闾风舒东野及余数人辈而成进士早得以闲暇习之然亦自以不切之务每遇情思感动吟哦成章即私藏箱笥不敢以传诸人譬之方士烧丹链气单门秘诀虽甚珍惜往往非人间所通爱久之科举场屋之弊俱革诗始大出而东野辈憔悴老死尽矣余亦髣髴种种晦父在当时年最少且复五十余作诗方工天固将迟其成使之行名以遇於世乎晦父诗凡若干卷畴昔已经闾风翁称道者余不复举举自括苍以来缙而通清而有余妍编诸唐人庶几升堂而入其室者也大德丙午孟冬三日叙

洪潜甫诗序

始时汴梁诸公言诗絶无唐风其博赡者谓之义山豁达者谓之乐天而已矣宣城梅圣俞出一变而为冲淡冲淡之至者可唐而天下之诗於是非圣俞不为然及其久也人知为圣俞而不知为唐豫章黄鲁直出又一变而为雄厚雄厚之至者尤可唐而天下之诗於是非鲁直不发然及其久也人又知为鲁直而不知为唐非圣俞鲁直之不使人为唐也安於圣俞鲁直而不自暇为唐也迩来百年间圣俞鲁直之学皆厌永嘉叶正则倡四灵之目一变而为清圆清

圆之至者亦可唐而凡枵中捷口之徒皆能托於四灵而益不暇为唐唐且不暇为尚安得古余自有知识以来日夜以此自愧见同学诗人亦颇同愧之头白齿摇无所成就来上饶得新安洪焱祖潜父潜父诗优游隽永处不减宣城沈着停蓄往往豫章社中语视永嘉雕琢俯手而徐就之耳为之惊喜赞敬恨相得晚而潜父之年非余所及谦躬强志於书方无所不观於理方无所不究诚若此其升阶而趋唐入室而语古不患不自得之余惫矣不能从也大德八年九月朔日

许长卿诗序

酸咸甘苦之食各不胜其味也而善庖者调之能使之无味温凉平烈之於药各不胜其性也而善医者制之能使之无性风云月露虫鱼草木以至人情世故之托於诸物各不胜其为迹也而善诗者用之能使之无迹是三者所为其事不同而同於为之之妙何者无味之味食始珍无性之性药始匀无迹之迹诗始神也余自垂髫学诗以至皓首其间涉历荣枯得丧之变是不一态诗之难易精粗深浅亦不一致虽不敢自谓已有所就然不可谓之不勤其事也方其勤之之初颦呻蹙缩经营转折几亦自厌其劳苦及为之之久积之之熟则又幡然资之以为乐戊戌之冬遇钱塘瑞石山许长卿於逆旅中与之商论及此长卿曰夫我则亦然盖长卿生於二千石之家尝通金马门之籍从下士之列而游东诸侯之幕府最後遂为文相国知用志既不展则幅巾布衣浮沉民伍故其诗徘徊窈窕情鍾意剧如高渐离李龟年之过都历国惊欣而凄怆也噫呜慷慨神张气旺如唐衢庄舄之怀人思土若不愿居而中不能释也登山临水留连畅洽如宋玉司马相如之感遇而有所适也扫门却轨呻吟沉着如虞卿冯衍之独行无与而莫之悔也呜呼兹非余心之所同然者耶兹非人情世故之所托於无迹之迹者耶虽然长卿之齿在余後而才气在余先非泊然无用於世者不得以余为比无室家极力孝养其母扁舟往来吴松震泽间鸾翔水峙见之使人毛髮清竦旦夕幸西游或当就而问之此中多车马尘非论诗所也

李元凯诗序

括苍诸老先生之贤而文者余犹及识长山叶公其稍後则梁君子奇又稍後则华南伯胡国器与余相莫逆者也当是时括苍衣冠名宦焱起为执政侍从谏诤官者六七辈不止浙河东西侨儒寄客依之成声然至於谈乡曲学问渊源本末则诸公歉然各有所避让每私居盛集长山翁幅巾癯肩专席中坐南伯国器之徒摄齐群趋执简交叩如师弟子惟子奇以嫌在远不得至会所观其一时会合风致浮沉雅俗餐吐华实真如建安邺下元和鄆城之适而今想像何可复得庚子春有李元凯舜臣过余吴山坊中蓬蒿风雨之舍问其年与余同甲子也问其业与余同词赋也问其居括苍问其族其父兄畴昔与余同集於长山翁之席者也於是元凯老而好诗呻吟嘬嚅心愈勤而身愈穷又不得寧其居而游其事种种有与余相类者及为诗之曲折悲叹炎凉之感盛衰腴瘠之变疾徐繁简古近之发开怀抵掌颠倒倾尽亦往往与余合嗟乎元凯乎夫身既已老而穷而方好诗以游游将何之而诗复将为何用顾为诗亦穷不为之亦穷吾人姑母尤诗惟游当少止元凯归山中疏少微清冷之风以为丝笙酺石林沆瀣之泉以为醪浆委蛇行吟徜徉醉歌诗不少康乎为我问讯长山翁子奇南伯国器之徒之

子若孙其亦有可与元凯同游者乎

董叔辉诗序

吾奉化前百数十年时地理去行都远士大夫安於僻处无功名进趋之心言若不能出诸其口气若不欲加诸其人闭门读书以远过咎耕田节用以奉公上虽无当涂赫赫之名而躬行之实为有余矣渡江以来乡老之书天官之选信宿可以驿致加以中原侨儒裹书而来卜邻而居朋俦薰蒸客主浸灌编户由明经取名第者十有八九可谓诗书文物之盛而过饰之器必渝其素倍华之末易腴其根於是平时恂恂自重之夫濯纓鼓篋为时而兴居有喧譁讽叹行有通名投赠声华气韵岂不愈伟求其复为前日惓朴默讷之俗何可得也董君叔辉之族为砚溪寺下潭头三院当其盛时儒衣乘轩飞盖者几累百年然诸老大抵专以躬行明经为本故虽门户俱相颉颃乡间乃最称独为长者至於词章学问淹注发泄无所不具而不肯琢刻镂绘而为歌诗谓之江湖技痒耻而笑之以余所闻惟叔辉之远祖耐叟参军有集藏于家其诗近乐天近世静笑翁方严简重不轻语语出必该涉名教其诗近康节少充乡贡公每见人即说张武子姜尧章作诗家法而不作诗即今文献凄凉前後行辈荒落殆尽而叔辉孤承大宗远绍坠业穷居教学之隙大肆其力於诗诗之成家无一不学而尤酷好余作见辄称獎余投老空山单行无徒亦喜叔辉时时佐之值一篇成相与倚桐叶为歌而折竹枝扣牛角和酬以为乐及是以嚼蜡编示余求评余评不评於嚼蜡编未能轻重抑蜡之成非一味叔辉之世其醞釀之积采撷之劳非一朝一夕矣迟其熟而嚼之其甘苦辛酸之变亦已详且悉矣故余惓惓先之以诸老躬行明经之本若食之祭先炊饮之祭先酒然不亦可乎

赵生诗序

往岁余游金娥山中值天大雪上下冈涧一色急投寺门回顾已无行踪寺僧歛余附火坐定问案间何书乃张武子诗一巨编因取讽之穷昏昼不厌僧见余嗜之甚云有能诗赵翁才去此可三十里许甚恨无晷刻从容机便不得相接叙也迟晴上大梅山访保福护圣赵翁在焉盖余里閭前辈出所谓秋汀诗诗中交游名字往往有白玉蟾紫厓诸公亦及与张武子父子甥舅间相浹余心异之夫白玉蟾以仙紫厓以侠张武子以文今人谈此三人令人翛翛然有宇宙外意而翁周旋其间良可人哉游大梅山归後翁死翁之子景嵩今又能以诗示余余晚学不能知诗而知世间如白玉蟾紫厓张武子诸公必尚有盍往游而求其人乎

国南仲诗後序

往时国温州使君官钱塘余方弱冠尝熟游其门值衣冠盛集乡人自寧海至无虑累十数人人以为词宗赋伯谈辩纵横无所避独胡俊甫舒东野在坐则衆客停喙听其谈嘲以为笑然二公多说诗当其时自二公外诸君皆薄诗不为使君居席端两容之余间起遮使君挑二公欲私有所问辄摇首闭舌不语然余心知其不必语也俊甫穷布衣得一官归死使君归自温州亦即弃我去独东野老寿巍然高卧阊风香岩上三十年浙河以东学诗者朝暮至余以贫贱逐食时时得一相过从闲去岁又亦弃我去矣嗟乎余之慙慙乎其处於世岂曰不遇而今

若是乎於是零丁忼愀神消氣懾若孤行無鄰若中渡奪楫有儒學子橐詩一編邂逅錢塘客舍叩之其居寧海其氏國其字南仲其名煇蓋使君季子而余故人也發其編閱所為序東野公也問嘗識俊甫否曰吾鄰且父友也逆而計其言當余在使君傍問詩二公時君垂髫踉蹌知狀也余為喜慰甚喜以幸使君之有子慰以私其孤窮而將振其陋也然君方欲余評詩君詩本有家法又經鄉先生二公鈐鞫風姿格力已超脫凡近至於年加境變則識當自長此非他人可預雖使君與二公之初亦不以語余也然則是行也君歸而行吟坐嘯於南岡北澗之間翛然而喻矣

長汀和漁歌序

長汀和漁歌者州判官吳公熙載之所作也奉化之為州其右連南明跨沃洲陰岩困盤崇嶺璽積行人經從值天凍冥非籌明挾群不可以縱適其左蓬萊瀚海盲風駭浪春翻吞啗晝夜變態雖好游之客亦不得安意而處惟州之背腋通涂坦郊平達於北渡不五十里而清溪貫之紆徐縈回水行者以舟程折計凡七十二汀近州之汀稍長謂之長汀汀人多漁每風休月淨時輕篷小艇往來如織忽窈窕聞漁歌聲與鳴榔相交意像森悄非復人境汀中父老又相傳唐時有叶法師修真結壇汀津而白龍嘗來听法又憨僧持布袋行丐市井一日因裸浴汀潭而人見其背上有眼驚怪禮拜稱為古佛雖非事之必有要其山川元氣噴薄隱見自應為仙真神佛之所栖托熙載之從事於是州長官之賢者禮而懼之專者簡而安之吏民之能者親而孚之不能者柔而勸之故居其職少勞而多暇獨喜為詩詩成名之曰和漁歌歌不能為漁作而作之趣與漁合又實常以公檄過從漁汀諳其風俗嗜好音節態度出語輒能道漁意汀漁安公之政樂公之為人見公之來喜動眉睫往往詩方脫編而汀漁已傳相成誦自下車至解印通作若干篇清純縝美如其性行一一可繕錄昔元次山有浯溪詩劉禹錫有湖南竹枝歌近世名賢宦迹所歷惠愛不可忘者皆謠其篇章長汀之歌其為吾州琬琰之鎮笙鐘之編乎至大改元之季春既望叙

朱伊叟詩序

往時吾州皐硯劉良佐有詩名其詩多山林田野之思江湖交游相為引重者吳郡范至能山陰陸務觀其尤也於時浙中諸老林立寄公僑客自中原避兵來者泉集而吾州尤為淵藪衣冠談笑朝暮翕合若皐硯之徒雖鶉衣芒屨塵垢滿面徒行於市井之間人豈有靳靳者哉自余為兒童猶及見父兄行年三四十不遇則去而挾詩以游或藏重草廬中莫不皆有王公之高千駟之貴嗟乎古先賢達不及識士窮如此豈不亦可以浩然無憾於世乎戊戌己亥歲余與鄉友朱伊叟相遇于錢塘逆旅白髮蒼髯皆老矣皆窮皆能以文字自樂而伊叟示余手抄詩一編讀之藻艷律熟於皐硯時時過之無不及也顧江湖交游不得范陸有位貌者以為之名雖相知如余輩聒聒何足為伊叟損益因相為扼腕太息而伊叟一不以為意惟殷勤欲知吾詩可不可何如耳是其中愈非俗子所可窺測遂留其編篋衍而書私情之感慨者以復伊叟云

劉仲寬詩序

余少时喜学诗每见山林江湖中有能者则以问之其法人人不同有一老生云子欲学诗乎则先学游游成诗当自异於时方在父兄旁游何可得但时时取陆放翁入蜀记范至能吴船录之类张诸坐间想像上下计其往来何止日行数千万里之为快已而得应科目出交接天下士大夫谙其乡土风俗已而得宦学江淮间航浮洪流车走巍坂风驰雨奔往往经见古今战争兴废处所虽未能尽平生之大观要自胸中潇潇然无复前时意态矣身又展转更涉世故一时同学诗人眼前略无在者後生辈因复推余能诗余故不自知其何如也然有来从余问诗余因不敢劝之以游及徐而考其诗大抵其人之未游者不如已游者之畅游之狭者不如游之广者之肆也呜呼信有是哉番阳刘仲宽自其乡橐诗数十百篇东来不肯妄以示人而专求一言於余余读之终帙其遒整而镇饬者升许丹阳之堂其顿挫而悠扬者摩黄豫章之垒讯其所以然非过从经历足之所及目之所获则一语不以营于心而讽诸口今观卷中山川草木云烟?鸟皆有余往年经行踪迹无遗落者仲宽盖似与余不同谋而同法也抑仲宽年方盛仕方开材良气锐游恐不止於此方当裹粮载笔与中原燕赵梁宋齐鲁诸名儒弦歌二南之风笙镛九成之音其次尚当颂碧鸡赋洪都歌于焉以发扬太平制作之美如此则游益广诗益肆而非余衰穷拙陋者之所可知已

方端叟诗序

余於吴兴方端叟以诗交三十年矣其初见在钱塘吴山下于时年方盛壮意气疎爽诗如杜牧之落魄放游不顾人世拘检但欲自快胸臆耳再见在秦淮官舍诗如曹景宗得一州虽左右顾盼自如而终不如渔猎山泽间之为乐三见在山陰逆旅值流移初定相顾惊嗟嘻怅诗如张中郎海外远归神气自完而容泽故少四见当大德庚子之春乃幸复在钱塘吴山下余既以饥穷裹书授徒而活忽忽何暇作诗间作诗不过如李龟年白头感慨悲歌对人羞涩人亦无与听者此余自叙平生血气盛衰之大略也尝举以语端叟端叟曰夫我则不然吾自喜为诗以来游江汉淮鄂最久江淮汉鄂间诸将吾识之几尽异时谈封侯富贵之事如取诸其寄而今归来穷山深谷中风露之与栖草树之与隣禽鱼兔鹿之与群外之荣枯喧寂之役内之悲欢强弱之变是不一态而吾诗未尝一日而废吾所以出吾诗者亦未尝一日而异也而子何以若是纷纷然乎余聆其言慙焉既而端叟示余一巨帙通若干首徵余序余读之信乎能充其言者也端叟居越诸暨之方与桐庐近学诗者大抵祖玄英先生玄英诗既高晚年更以节着端叟今年七十余出处清谨余知其为玄英子孙不辱矣宜乎能充其言哉

吴僧密古师诗序

人之能以翰墨辞艺行名于当时者未尝不成於艰穷而败於逸乐何者材动物也诗人之材其於翰墨辞艺动之尤近而切者也彼其营度於心思绵历於耳目讽咏於口吻辛苦鍛链百折而後以其成言裁决而出之而诗传焉其得之也勤其发之也精使有一毫昏怠眩惑之气干之则百骸九窍将皆不为吾用而何清言之有乎今夫世俗膏粱声色富贵豪华豢养之物固昏怠眩惑之所由出也吴僧崇古师生华亭钱氏世家当钱氏全盛时余妇舍与之相连屡过之轩綬填门駉诃塞途岁时节朔休沐子弟褰衣靓饰嬉行庭巷略与四姓五侯家贵游何异崇古师娟娟然在鴈行中不知其何以能别异於人也齿日加势日专而事日殊崇古师之

所交吴人也所见所闻吴事也计其心虽欲不为吴不可得阔絕二十余年再来练塘张湖间壮年歌游处所一无复故物独烟林水鸟相顾徘徊太息颇欲捐弃生理访张季鹰天随生之遺蹟而隱焉有緇袍而癯者袖诗一篇覬余閱之清驯而不枯抑怨而有章諗其刺崇古师也讯其族华亭钱氏也呜呼使崇古师犹有其家富贵豪华豢养之具所以昏怠眩惑人者去之不尽不苦其心不动摇其肌体岂暇若是专於诗耶盖天快其疾而纳之以清能灵识此可以为崇古师贺而不可以为吊也且又同时贵权相先者既皆归于灰飞烟灭而钱氏子孙乃今犹以诗着不又重可幸欤崇古师勉之大德戊戌岁仲冬日南至前进士剡源戴表元序

圆至师诗文集序

圆至师诗文集一卷师讳圆至字天隐江西高安姚氏子父兄宗邻俱以进士科目起家独喜为僧江上兵事起即去依袁州仰山雪岩钦禅师至元中自淮入浙依承天觉庵真禅师天童月波明禅师育王横川巩禅师二十七年复归庐山越四年建昌能仁虚席郡牧赵侯移文请居之二年竟弃归庐山卒於大德二年六月二十四日以上皆吴僧行魁师所记圆至师在天童育王时余适授徒郡郭屡相遇於亲友袁氏舍每见但好奕棋劳形苦心拈子移时啜嚅不即下骨貌素癯不善饮啖一语不肯为人说诗文性似厌然退而出其所作清驯峭削殆以理胜魁师又言在承天时亦留磧砂三年磧砂魁师所居有贤游从佳馆谷留之甚安既不得已居庐山愈多病魁师尝南泛长江问其安否今死又惧遺藁散坠为掇拾刊木磧砂以传其气义可谓能始终而天隐为少慰矣师可传不但诗文今世言禅者亦多推天隐又或号筠溪牧潜云

魁师诗序

艺之於人有好之而不厌者以其乐也苟所乐之在此他虽有可乐者不好之矣千金之家终日吹弹碁鞠而穷阎窶夫皇然摩 洒削雕鍛利贏余以给妻子此二途所为乐不同而乐於所自养者同故当其疲精神穷昏昼忘饥渴而为之虽使师襄放叟歌周南诵离骚於其侧有不能暇听何者所乐不存焉故也浮屠氏之枯空淡泊草衣而木食居而野游无富贵繁华之美於其心无贫贱急迫之劳於其体其於人世一切之累举不可以相及而诗之为艺出於人之精能虚觉劳不挠形清不胶物又非若吹弹碁鞠之鄙而难成摩 洒削雕鍛之喧烦而为美也则乐而好之是固其职余之少时往来西湖三竺间见其徒能此者不一令人爱悦甚时虽未能学诗学之固未能精因亦以为彼山林世外人适当然耳一来省事屏居同时先辈士大夫翕忽向尽始好为人说诗以为乐尤喜与山林无世累者游而所见闻一不如昔戊戌己亥岁有魁师自吴中来屡相接前後诗覬余累十百篇指斥倾尽寄属沈着读其诗繁者鏘遥音简者涵淳风究而讯其能奔驹纵鹘摹拔俊耸飞丹幻宝闪烁迅发盖於余少时所爱悦有过之无不及也嗟乎师之诗至此信其所自养与好而乐之者异於人耶将视他人以为异而在师能之则固适然耶闻师所居吴中有良父兄别业藏书致客规模风指凡皆出人意表师所以能纵游博交耳目肺腑豁无鄙滞者亦有以成之而然也余家大处士晚年吴中好事者经理佳山林馆留之迤邐遂居吴中余穷困何由就师结诗邻乎

珣上人删诗序

人之於言少繁而老简彼其中固有定不定也言之至者为文而人之文有涉於刑名器数而作者不必皆出於自然惟夫诗则一由性情以生悲喜忧乐忽焉触之而材力不与能焉此其老少之变繁简之异岂得不有待而然哉珣上人学佛氏之道违世避俗与木石并居於大山长谷之中余不敢以常情论之顾独喜为诗出所作十百篇示余谓余曰为吾删之余疑而叹焉夫古之学佛之徒以吾书所载如支遁佛图澄二人者於其时最号能言能使国君大臣公卿子弟人人倾听之然其言传者甚少将其所为言与今浮图之言不侔乎抑固多有之而不见於吾书耳文教益衰诗律滥觞於是其徒始有弃其空空之说而以能诗鸣于世者盖兵乱已极衣冠之流铅槩之士逃於其类而为之非佛氏之为教或当然也上人本三石陈氏儒家子年未四十气貌嗒然如不欲语今又厌诗之繁而务删之是不待年老而能简於言者欤夫由佛氏之说则不无如言由吾之说则气识定而言当自简上人其幸思之

珣上人再删诗序

余识东玉师在紫芝山中且一年尝为序所删诗者也迁鸟石之明日入剡源村省拜丘墓礼毕循溪行恍恍若有所失有衣缁褐之徒胫其行滕而来盖东玉宅里在焉余邀归信宿见其虽习为超世忘物之说而温笃孝友信乎仁义人也且别出一编贶余曰子昔所叹於吾诗者吾删之既矣吾归而谂之吾法於吾徒之言有所不屑而何子言之须乎虽然必为我竟言之余闻而益疑盖佛之说异於吾之说者不独此也吾以百世千万世为久而佛曰是旦莫之驶尔吾以九州四海为广而佛曰是得其地初无几何尔吾以生人以来莫尧舜夫子为圣而佛曰是圣人於人间世而已尔其大者若是自余刑名器数民物事为宜无所留於心而况饥渴寒暑之感昆虫草木之喻嚶嚶然呻吟杂扰以为辞者视之何直剑首之映哉何东玉遗於大而不能遗於小也吾观东玉行应法言近道其必有所异於诸人之得者矣虽然东玉之道於今为盛载其轻单无累之身辅之以学将何行不可至何入不可得余惫矣不能从也家有三老人方谋佣赁山樊之间动摇筋骸以治养具于其暇日修闾种牧之书与溪丁野稚讲而治之幸而征法不加饘粥无絶上下相保优游天年斯既多矣他日东玉游行而归过相劳问於是益出瓊闲诡观以发药其蔽陋是则余所望於平生还往者也余何有哉余何有哉

余景游乐府编序

词章之体累变而为今之乐府犹字书降於後世累变而为草也草之於书乐府之於词章礼法士所不为余於童时亦弃不学及後有闻乃知二艺者本为不悖於古而余所知特未尽也今夫小学之家鈎毫布画一人意而剏之千万人楷而习之者世之所谓正书而古法之坏则自夫正书者始也放焉而为草草之自然其视篆隶相去反无几耳国风雅颂古人所以被弦歌而荐郊庙其流而不失正犹用之房中焉此乐府之所由滥觞也余尝得先汉以来歌诗诵之大抵乐府而已宋梁之间诗有律体而继之作者遂一守而不变声病偶俪岁深月盛以至於唐人之衰而诗始自为家矣其为乐府者又溢而陷於留连荒荡杯酒狎邪之辞故学者讳而不言以为必有托焉陈礼义而不烦舒性情而不乱其事寧出於诗刘梦得有言五音与政

通而文章与时高下乐府之道岂端使然同乡友朱君景游自絶四方之事捐书避俗日课乐府一二章有所愤切有所好悦有所感叹有所讽刺一系之於此编成久之不敢以示人而先私於余余跃然曰此固畴昔所悔以为未及尽知者也君强记洽闻法度修谨故其所作援古多而谐今少览者多有以余为知言岁阳在玄默陰在敦祥良月晦日剡源戴表元序

王德玉乐府倡答小序

往年客钱塘与金仁翁刘养源处静辈商略乐府往往花朝月夕皆能自为而自歌之余虽不能辄从旁拊掌击节称善亦一时之快也聚散三十年升沉工拙是非贤否悉所不问独江湖交友过从之乐时时未能去心耳览山陰王德玉此卷令人恍然慰喜然德玉世家学问词语佳处自不减吾仁翁其所从游永嘉陈用宾淳安胡天放诸公皆耆儒名辈醞藉自重亦无养源处静留连放荡之态余末路得翱翔其间良可自庆幸乎材思益衰无以映发聊作小序附名篇端譬若侏儒顾优而笑曰彼长者岂欺我哉元贞乙未孟春十日剡源戴表元序

剡源文集卷九

卷十

<集部,别集类,金至元,剡源文集>

钦定四库全书

剡源文集卷十 元 戴表元 撰序

富春孙氏族谱序

富春孙氏在东汉时有长官者死葬余姚四明山中子孙从而家焉然越千有余年至宋之乾道淳熙间始有以学行着又百余年而遂为大族名卿望郎良守牧贤师儒萃於其门盛哉顾世代愈深而谱牒不立夫世代愈深则恩疎而忘祖谱牒不立则传久而失宗有国子监进士垚字叔高慨然以为病家询户问旬纂月緝凡寢庙之所藏碑碣之所存父兄姻故之所知心思耳目精力之所可得而及者蒐讨略备亦既可谱数世盖已无复遗憾矣其心思耳目精力之所不得而及虽孝子顺孙夫如之何哉一日偶得先世尝为浮屠氏之教者数纸於尘煤鼠蠹中自其谱以上於是又得讳第居娶男女生卒葬之岁月者数世而谱遂完呜呼以孙氏之积必待二千年之久然後始大而其子孙始克为谱度东南士大夫世家固少有能致此者若进士之纯诚笃孝日夜恐坠失其先绪殫勤尽瘁然後仅以成就皆余所愧叹而不及者也进士君作谱兼有书法某男子长而能为人子弟若父兄某女子嫁而能为人妇若母与其有犯失也皆備书之读其谱者劝戒生焉谱既成其群从兄弟之贤而有力者又相与纠合其族人使行为一第以五行相生之义第为二十字以传永久曰如此周而复始吾长幼昭穆可以百世而不乱其族人穷老废疾孤寡不能自立婚嫁葬埋之不能举者又皆为条画以调恤之孙氏之义风殆方兴而未已也余姚他孙甚多惟祖长官者自别其望为富春故曰富春孙氏谱

秣陵翁氏谱序

氏族之难言久矣世之贤而有知识者虽欲求之而不能得不贤而无知识弃之而不求者固不论也盖古之所谓同姓昭昭穆穆百世而宗不迁离乡别土疏支别属有庆吊或絶而婚嫁不容以相通谓若唐与陶陈与胡之类是已而近世自其近而可推者则已不问呜呼是孰使之然哉余尝见庐陵欧阳公孩提之岁而丧其所天流离艰苦寄食他氏稍长大发愤问学即痛念宗绪之凋疎而为之访求纂緝定次为欧阳氏谱一编他日至谓人曰人而不知族姓所自出者则无以别於禽兽盖深切齿於此矣一时游从诸贤相与激发故眉山之谱祖味道而南丰公宗鄮子然亦臆度倚傍而言之尔而此三族者其本末幸而犹若可考故言之而通自古昔丧乱以来族愈大者散失愈深而混夺愈甚则虽有贤者固无如之何也秣陵之翁有夔者以谱示余閱之由其高大父通直公而上通於楚国左臣丝牵绳连可数者五十世又由楚国左臣而上通之於轩辕少典数千世之远而可以一日尽也嗟乎美哉间尝问其故则潜然曰夔之生也幼而孤惟其不忍翁氏之宗将由我而忘焉而为此也且非我也独能之虽生之晚而凡翁氏之显人靡不知也姻连中外有所可知於翁氏者靡不求也知之求之而靡不考

也故是谱也幸而备余於是既为传録其大略可备考证者于家而有感於庐陵公之事因举而赞之以成其志且以益广其学云元贞内申岁季春既望前进士剡源戴表元序

李氏族谱後序

奉化江口李氏其先自闽来明至秉义复以盛德者起其诸孙多美而文皆能因缘科目以取贵显当其盛时举族几无布衣盖江南之取士有二途其一曰进士甲科其法以三岁之秋举于乡于漕于国于监试用经义诗赋论策明岁春再试仪曹中即进之大廷策之第为五甲而高下皆授之官其二曰三舍法其法仪曹於春试进士毕取去岁秋举之见遗而不忍弃者单试之经义诗赋中即升之成均曰外舍生以经义诗赋论策月各一试而学官自考之曰私试岁终较其优升内舍曰外优优成又取内舍生月考之岁终较其优曰内优优成仪曹再岁取内舍生通试之为优平二等曰上舍试内优成而再入优为上等上舍授官比进士第二人其次一优一平为中等上舍其次二平为下等上舍与教授而通名之曰释褐外舍生之未升也仪曹又每岁以经义诗赋论策一试之亦分优平曰公试既升而试如上舍法李氏之兴自族谱外有传科録别载子孙中诸科者名字有棣华集载子孙中诸科之文以其法之细且烦得之宜艰而李氏於传科也岁无虚籍於棣华也月不停书如此垂七十年殆亦可谓盛矣兵火以来高堂列宇作为灰尘传科棣华之彷彿不可复考考而旧谱亦再以毁废於是水口镇通直公之子明新以为惧日夜以所记忆精询备葺而谱得略完惟是漏落者不能增加传闻者且将就尽为之恍然不寧而徵言於余余家三世成均与李氏为砚席交知其事不为不熟且亦自惧宗祚荒凉後有问阅閱曲折於儿辈者卒无以对因以身履目睹之故备陈之附书谱後比之纪游述梦万一或有考焉若夫李氏祖泽积累之源则有传宗龟监建炎备御録江口桥记及诸墓碣去之百世不可磨也至大己酉秋季既望剡源戴表元书

臧氏家集序

吾州臧氏自鄱阳东迁以余所知十数公皆锵锵然能用其文辞气谊行名儒林间而吏部公正子最着然其家单矣自余往往清纯自持纯甚者业医闻其先人世精医医全活人不可计故天报之以贤子孙云每乡国大比若试於礼官臧氏昆弟子姓群然斓斑籍中盖亦可谓盛矣而鄱阳之族余以远未之闻焉丙申季春始识廷瑞於宣廷瑞鄱阳族之锵锵然者也鄱阳距宣尤近其来宣者言其族之在其州犹其在吾州者也於是加叹慕焉既而廷瑞出其世谱载其着者爵位名字凡鄱阳与吾州之族皆备又附系遗文人为一编呜呼富哉昔太史公既广览奇书轶传作成史记其辞伟矣而自序家世旧文如劔论等类亦不遗弃王仲淹称其先人铜川府君以上人人有述仁人孝子之於其宗固如是乎廷瑞之作视二公尤广当学衰族散之久而极力从事於此其志为尤可尚也惜乎余陋不足以发其事廷瑞尝中童子科当仕矣今犹强力而吾州之族国史公之後方以廉誉进为於时天庶几未忘臧氏也哉

褒中杂咏图诗序

异时闻关陕多奇士其山川峭深风气清厚怀珍负异而隐者可以为郑子真逢时抚运而起

者可以为诸葛公皆无所愧怍於人世而惜强壮之年道里隔絕不得接识其人以为不憊迨於混一车马廐置可相往来而老惫及之所居又海滨遐壤非进趋当世者所屑至以故常有齟齬穷陋之叹乃不自意诸公怜其无营荐授之一秩得以职事受察於今江东廉访僉事王公而因以讲闻先大夫褒中先生之为人先生博学而通宏材而潜余也何足以知之而僉事公渊源文雅猷为器业川驱霆行春煦霜肃寬不容奸广不别物观公之施於身达於吏民推其本於家庭者可以得先生万分之一焉先生尝着褒中杂咏若干篇隐居之怀经济之识陶写具备其在宪台商左山魏中丞阎徐二承旨之流皆为之叙述称赞来江南高郎中赵学士复写诸画图以相映发余实不揆辄亦附辞各题之下以致想像尊慕而并书所以然之故于右方诗不云乎虽无老成人尚有典刑先生有焉大德九年岁在乙巳冬十二月望序

旌表节妇徐夫人诗序

人之常情以物与人而人能守之不失则爱之也愈甚天之所与物於人其何独不然天之所与人之物莫贵重於其身而又与之以守其身之物曰礼义人受天之所与而能守礼义不失其贵重之身者天亦不失其爱而常扶持之故孤嫠寡弱之家艰关勤苦百折能行人之所难行则生於其门者为子必孝为臣必忠而其人必康强寿考及见幼穉之成而身厚其报此天理之自然人事之必至如炊之食如种之获可坐而待其熟也浙东部使者拜降公之母太夫人徐氏生公而寡太夫人秉不欺之节躬靡它之誓内谨祭饌外勤师资朝晡祝动不违正迨公业成名立遂陪台垣仪宪府出藩入从左侯右伯而太夫人鱼轩彩衣委蛇就养金罍锦诰便蕃受宠人以为康强寿考享礼义守身之报而取爱於天者岂不在兹乎已亥之夏有命即所居第旌表如式有司题其门曰旌表节妇徐氏夫人之门轰轰乎义风炽乎当涂洸洸乎颂声流乎寰区於是缙绅士大夫侈其事者咸作为歌诗以播扬积善之庆且上以光孝治而下以劝礼俗余之昔也受?於公为民又尝登堂为客歆艳赞慕之日深矣谨显诵所闻题辞其编首云

贾母滑氏夫人诗序

古者内讳不出门外言不入阃妇人女子而以名字闻於人难矣世德之衰始有嫠居贞节之誉班班简书间然宋共执经蹈死左氏尚惜其无权巴清肥家蒙褒史迁不以为知礼求诸婉变执法从容名义严而有政慈而能断若今贾母滑夫人者近世鲜有往古亦无愧焉夫人居赵州柏乡滑里嫁同县儒者贾府君年三十四生二男二女而府君没於时孩幼满室舅姑耄衰夫人俯躬艰劳仰备珍养支倾补羸晨夜靡息二老人者安其经营皆以高年乐终及时招师资选婚偶遂以余力改厝先亲之槨殡者四世贾氏纲纪资业倍振於府君存时大德庚子岁於是男廷瑞以承事郎来江浙为中书行署都事年三十九数始孤之期三十有一年矣而甚勤其官苞苴之谒不行冰檠之操日着绯衣象板鱼轩锦书出仪都寮入侍亲膳诚宦游之美家教之饬而造物者矜其苦节报之以材贤而享其庆也嗟乎盛哉南北缙绅韦布之士交为歌诗以颂叹美德谓表元之旧也尝为文学掌故俾以古义发题篇端谨为叙次本末如右

东平杜氏析岱宗事序

鬼神之事自孔氏以来难言之因其难言而世之人诿为茫茫吉善者无所恃悖逆者益无所惮不知古先圣王虽不日誉其说以求人之震眩而初亦未尝废也故有占筮有盟诅有礪禳禱之礼而人之爱厚其亲者至有减年以相益移祸以自损其事往往有时而信其为儒者又正言以非之曰天之道岂若是渎而甚者又拟人之近名而言之也呜呼金滕之书载武王病而周公为弟欲代其死使非仲尼存之於经则人亦岂信之哉东平杜克仁客山陰其兄以檄出余姚俱病疫克仁念其家自严侯开东藩即有名宦之籍今兄弟南来相依而生死不可知且父远恐遗无穷忧则私禱岱宗愿损已十龄以延其兄幸万有一得良愈即归自家步拜詣祠下谢神既而皆愈克仁如其言步拜詣祠下谢神巫请其故惊异之事遂渐闻於人士大夫寻各为词章嗟叹以激摩流俗之隆於私而薄於义者而示以谕於余余於岱宗之能生死寿夭人其理不可知也然岱宗无神则已岱宗有神不以与杜氏兄弟而谁与而其事则孔氏之徒所难言後世以为疑而古先圣王之所不废者也遂为略书梗槩而归其卷杜氏云

杨氏池堂讌集诗序

丙戌之春山陰徐天佑斯万王沂孙圣与鄞戴表元帅初台陈方申夫番洪师中中行皆客于杭先是雪周密公谨与杭杨承之大受有连依之居杭大受和武恭王诸孙其居之苑御多引外湖之泉以为池泉流环回斗折涓涓然萦穿迤间松篁覆之禽鱼飞游虽在城市而具山溪之观而流觴曲水者诸泉之最着也公谨乐而安之久之大受昆弟捐其余地之西偏使自营别第以居公谨遂亦为杭人杭人之有文者仇远仁近白斑廷玉屠约存博张模仲实孙晋康侯曹良史之才朱棻文芳日从之游及是公谨以三月五日将修兰亭故事合居游之士凡十有四人共讌于曲水客皆诺如约而大雷雨作自朝达昼不止官途水尺行者病涉十四人之中其六不至公谨望望然冀之起视曲水则既漫为壑恚而曰余惟客缺是愧若饮岂必曲水哉乃揖其在者迁酒与殽近集於临池之堂背堂有危楼翼然俯纳衆碧大受又特具礼领客陟之既又复于初公谨大出所蓄古器物享客为好或膝琴而弦或手矢而壶或目图与书而口歌以呼醉醒庄谐骈譁竞狎各不知人世之有盛衰今古而穷达壮老之历乎其身也酒半有作而叹曰兹游乐哉其有思乎抑亦知夫兹游之所由起乎盖夫兹游者兰亭之变兰亭者郑国风溱洧之变也郑之溱洧在当时小人知惭之而晋之兰亭在後世君子以为善也虽然人生而感乐哀之情犹天时之不能废於寒暑其发之有节而导之有故苟使变而不失正则岁时乐游以尽人事之适岂惟君子虽先王张弛之道其孰能废之方晋之未迁故都之氓处五方之中而习累世之盛男袿女袂春游而祓焉固其閭閻委巷之所通行也晋之既迁名士大夫侨居而露宿愁苦而嗟咨有愿为盛时故都之氓不可得矣故且驾言出游以写我忧而何择於禊之有吾观兰亭一时临流援笔之作率嘖嘖喑黯如长沮荷蓐冥然而远怀其能言者不过达生捐累如庄周翛翛然羨死灰枯骼之适若是者谓之乐乎非耶今吾人之集於斯也宜又不得视晋人而乐於晋人何耶於是坐中之壮者茫然以思长者愀然以悲向之叹者欲幡然以辞既而謹曰事适有所寄也今日之事知饮酒而已非叹所也且我何用远知古人盍各为辞以达其志辞之达志莫如诗公谨遂取十四韵析为之筹使在者人探而赋之不至者授之所探而徵之得某韵为古体诗若干言得某韵为近体诗若干言群篇鼎成咸有伦理是庶几托晋贤之达而返郑风之变也已矣因次第聯为巨编而命表元为之序

牡丹讌席诗序

人之於交游会合谈讌之乐当其乐时不知其可慕也事去而思之则始茫然有追扳不及之叹渡江兵休久名家文人渐渐修还承平館阁故事而循王孙张功父使君以好客闲天下当是时遇佳风日花时月夕功父必开玉照堂置酒乐客其客庐陵杨廷秀山陰陆务观浮梁姜尧章之徒以十数至辄欢饮浩歌穷昼夜忘去明日醉中唱酬诗或乐府词累累传都下都下人门抄户诵以为盛事然或半旬十日不尔则诸公嘲诮问故之书至矣嗟夫此非故家遗泽余所谓追扳而不获者耶大德戊戌春功父诸孙之贤而文者国器甫复寻坠典自天目山致名本牡丹百余归第中以三月九日大享客瓶罍设张屏筵绚辉衣冠之华诙谐之欢咸曰自多事以来所未易有是乐也不可以无述於是国器甫与永嘉陈某等各探韵赋诗通得古律若干篇而命前进士剡源戴表元序其卷端云

八月十六日张园玩月诗序

斯人之居斯世虽学道不可以过劳於是乎必有时节讌游咏歌之乐以节适其筋骸而调娱其血气其尽游之乐非远之乎山林寬闲旷野之处则不畅固亦有因劳而求乐未乐而反劳者矣幸而得其游而可乐然四时之中值乎冬夏隆寒毒暑则不可出可出而游者惟春秋而春气暄浊不如秋清故自古骚人逸士以中秋玩月为四时乐游之最大德戊戌岁八月十五夜望舒掩其明游者阙焉乃以次夕合讌于君子轩之圃圃主清河张模仲实其族焞如晦烈景忠客剡源戴表元帅初钱塘屠约存博龙泉陈康祖无逸会稽王润之德玉戴锡祖禹嘉兴顾文琛伯玉侍游者仲实之子炬熒如晦之子奎无逸之子绎曾是夕也云河豁舒风露娟爽客主诸人谈谑庄谐啸歌起止各尽其趣而圃在杭?闌闌中略无嚣声深垣窃径芳林远榭居然令人有山谷意酒半有歌退之赠张功曹长句者遂取其末章分韵赋诗以为乐夫其游足以散劳而不烦饮足以合欢而不乱气清而能羣乐最而有文是岂非学道者之所许而骚人逸士之事也耶明日聯其诗一编而谓表元之齿稍长於诸客也命以为序云

北山小序

大德己亥之春前清明二日余与顾伯玉约游北山访林以道骑过陈无逸要之俱行以道之居去北山尚二里而远至己日高春留饮少憩以道遂导余三人者循冷泉穿玲珑岩缘三天竺出小陌复南入弥陀寺谒大山恢师初游时自不拟即归谓幸可留得留为佳尔至是恢师一见以文墨故家相厚诸客殊无去意行谈坐歌俯仰自在倦剧夜向深才就枕席闻山雨汹汹声牕户摇动如卧杨澜左蠡舟中也明日饭已恢师复留以道之子自其居载醴食来稍出就弥陀西小精庐享之大醉客主将各散去因分韵赋诗记懽而属余序其篇首无逸伯玉吴士余家近越於恢师以道父子盖乡里云是日剡源戴表元帅初序

游云门若耶溪诗序

出稽山门东南三十里得陶山魁然一佳坞也於时暮春湍林昼鸣散坐索索有凉气夜分尤

甚卧者闻岩上虎声诘朝问人非虎也出山益东六七里一溪清?如带居者云即若耶溪溪上有任公子钓台恂恍无复人境乃知唐诗人夸诩非虚语彼王谢辈怀章绶携导从而游直以不能遽尔舍去故耶溪忽萦忽直山乍昂乍伏左右顾皆会人意稍转登明觉寺诸胜一一在眼中穿西望碧帷四悬云门寺也初游陶山小雨至若耶尚陰噫近云门天日始尽清朗遂投元上人竹房饮酒酒酣倚顾况所题松树酌葛翁丹井泉分韵咏诗游者自永嘉陈用宾而下通十四人皆赋之诗成剡源戴表元序之甲午岁三月二十日序

游南岩诗序

余既弃故业以文学掾至信州盖老而远行意惻然不自聊颇闻州之南有危岩空寛僧庐其中林泉溜清禽鸟往来幸而一游得以发郁积舒固滞然至官四閱月不能遂也乃季秋二十有八日高春约朋客出关驾轻舟西浮可七八里所舍舟遵小径益南坡壠高下起伏又三里所得岩形如剖瓠穰实悬缀飞层仰积横嶂旁豁崩湍欲穷未半倏涌居者缘其余隙砉坐床斲步道曲会人意岩东有泉时时出一滴石罅中地宜拒霜花於时暄晴光彩穠泽可爱满岩镌来游人名氏前漫後缺独朱晦翁辛幼安题踪俨然数之适百二十年岁月日与今游皆相同良为奇事岩西攀磴上小窝无数其一稍盘窈云古有得道老释结坐於此平出转南竦矗一石峰相直?第刻成立梯者五登其巔州城郭可俯眺余极力及四梯不敢尽登而止所见已不赀矣初约以昏归抵岩既晡遂治宿具歌饮岩中夜向深气倍凄峭非人境凌晨 周遭按历俱不忍去是游之事取饌於渔因庖於樵假笔於圃惟牢羶壶酒糜米烛蜜客有预携者懽纵之极他无比喻垂归忽自笑余也固习於山居平生行吴楚间见若不少而独为此留连不能忘情何耶余既不自持抑诸人者方英年盛气又多土居何为亦若是复傚傚乎於是分韵各赋诗一篇同游者大名王应夔景然先归余客铅山虞舜臣舜民宋如曾吾省上饶郑仁则则荣曾道华华父徐如砺若金玉叔太正辅叔谦自牧则荣之子义荣番易汤及翁及翁而余剡源戴表元帅初是为岁大德壬寅良月朔日序

陵阳牟氏寿席诗序

天下之乐有可以力得之者有不可以力而惟其所欲则得之者可以力得之者富贵纷华燕私之奉皆是也不可以力而惟其所欲则得之者家庭顔色起居饮食甘旨之情是也士大夫当钟鸣鼎食时豢养百为纖悉如意势足以厚其亲而行须舆卫居仰安宅礼或有以烦驰暇或有以劳夺至於穷栖寥处杯浆爵酒齑鲜粒糲非心营手治则不能给可谓艰薄已甚然即而将之其欢忻畅悦反过於备物之享何也力在外可屈而情由中难量也陵阳牟先生自还会稽使者节食贫茹辛卧苕溪上二十余年夫人同郡邓氏毗陵使君之子冬官贰卿秀岩李先生之外孙家世轩冕忘其贵奢相与隐约产息烦衍更衣而燠并釜而饱清风苦节与陶渊明家伉俪翁稚相同人皆高其贤而叹其约也丙申春先生年七十其长子余同年弟成甫帅诸弟大设醴食私第为二亲寿二亲燕而乐之游从朋客甥孙中外闻而为诗以歌吟颂美者累十百人越三年岁已亥春邓夫人复七十成甫复帅诸弟设醴食如前礼二亲加乐焉於是闻者相率为诗以歌吟诵美而余适预名其间咸以为是事兵革以来衣冠閎閎之所无有余重自惟念以牟邓蜀大家先生父子又东南久宦极今之丰宜不能亲昔之俭而真情懽忻畅

悦如是衆人之歌吟颂美如是是吾徒所为优游自得於斯世者真不系於外物之去来由今而後闻风而作感义而起知人人孝德之易为而明时礼俗之将成也遂率意为辞表诸篇端而题为陵阳牟氏寿席诗序

城东倡和小序

余少时学诗诵夫子之说曰可以兴可以观可以怨易知也至於可以群而难之有老先生教余汝他日当自解此非可以言语悟也盖自弱冠出游至于今閱历三纪平生所过从延接贵贱浮沈贤愚聚散无虑千数至是而始略知夫交之难而尤未知群之难也非群之道难於交而交之可致不如群之不可致也交之群莫盛於杭於是岁在大德戊戌嘉兴顾伯玉客於杭城东杭之贤而文者皆与之游而屠存博白廷玉以岁晏立春前一日过庐清谈剧饮甚适既少倦即相与循开垆步江臯眺太白金鏐之荒墟吊陶朱子胥之遗迹意色苍莽襟神飞疎退而存博遂先成古诗二韵六言五章以纪其事既而廷玉有和伯玉既和又别为诗而张仲实陈无逸诸贤又皆和有和诗遂不可胜纪其气如椒兰之交袭而郁也其音如箫钟之迭居而不乱也其类如针芥磁铁之不相违而相入也噫嘻美哉其群矣哉余也山野土木之人无能预於兹集而知旧怜其流离每不疎外辱以小序见命不敢固辞私心亦喜交道之有群而诗学之少验也而为同业者愿之因附系其颂叹云明年仲春哉生明剡源戴表元序

游兰亭诗序

兰亭自右军後一千年人无继其游者山川人情古今贤愚不相远盖岂无游者而人不传耳至元甲子之春於是部使者东平王公新兰亭右军之祠塾且再岁荒原废墟粉垩翔涌今使者河南狄公?帷踵临教治益洽当三月三日右军肖像适成王氏子孙之贤而文者曰子才拜荐牲酒祠下遂诣曲水流杯序饮如永和修禊故事当是时两使者前後至越以词翰风流接士声撼江浙东平公虽去越行部相望而河南公欣礼之成首隶於会郡僚之良儒官之英驹鸣辙流于于而来缝衣絺冠弥巷满谷山翁野叟奔走出覩先是东平公即塾招明师选童稚之秀者以为诸生至是命之当席拱立群诵永和诸贤兰亭诗音容谐同情礼清鬯凡在饮者无不懽懽中饮有坐而叹曰美哉游乎自吾具耳目以来所未始睹识也独未知较永和诸贤时何如昔仲尼感逝川羊公悲岷山後吾人一千年亦能使人慨慕咨嗟叹想如吾人於永和否是未可知也既又有作而非之者曰子何以古人为哉子不观夫杯乎今夫杯油油然随风而行浮浮然乘波而流盛醇驾轻若浮若沉前行既迁而後至者亦莫能自休焉今吾人之游于世有以异於杯之游於水乎今人之不能为古人犹古人之不能为今人也而何美乎且人苦不自知当永和诸贤徘徊几席间取快一时岂暇豫期後世事若然者徒败人意耳今日之事且极饮为乐安知後來者不美从吾今日而不可得乎饮酣遂取右军诗为韵人探一韵韵成一篇自河南公以下总得诗若干篇而属剡源戴表元为之序

客楼冬夜会合诗序

五官四体之於人皆不能以无役役而有所获则因而资之以为乐农之於耕商之於市百工

之各於其业当其冲风埃触雾潦艰难曲折穷心思之所营殫筋力之所猎而後能有区区之赢余或终朝莫息或穷年暂逸幸而值之则收形神散肌肤与妻孥姻党笑谈讌集以展平生之绸缪以补寻常企愿之所不及岂徒若是而已人之能以功名志业致其大欲於世者虽贤愚臧否为人称慕姗笑之不同而皆未有不为而成者也况若吾人之云云进无所荣於时退无所佚於家疲其躬苦其心自儿童占毕学诵间关於名实之得丧颠顿於事物之变迁其勤劳又有過於农贾百工者矣而欲何所成而何所资以为乐耶於是必有默然而自喻者焉而不必人之同之也虽不必人之同之而必有同之者焉何者四海之广也千万人之衆也我为迂人必亦有为迂者焉我为独人必有亦为独者焉大德戊戌之孟冬余客杭久且念归而方韶卿自婺至顾伯玉自秀至一夕不约而胥会于霅陈无逸之邸四人者皆穷皆好迂行独间关颠顿而不悔而余与韶卿老矣相顾尤不能为情因相留止宿无逸大出酒炙饌具相饮饫左觴右奕前歌後笑至於语洽气酣感慨之极则又各以古今名义相振激舂撞摆阖略无道途羁旅之感意度相与驩甚夫由贫贱而得其求者乐止於妻孥姻党而已耳富贵而肆其欲者乐止于多僮奴侈宾游美衣丰食则亦足矣而岂复有贤於吾四人相与者耶是果有与吾同不悔於徒劳者耶夜聿云半诗筹再探群篇告成厥有序引是月二十有三剡源戴表元序

剡源文集卷十

卷十一

钦定四库全书

剡源文集卷十一 元 戴表元 撰序

王丞公避地编序

父党王丞公子兼字達善避地编古律诗杂着凡七十五篇始丞公以文学行义杰立卿田间余初为童居相距无半舍不能识也来钱塘乃始邂逅定为忘年之交聚散数岁各守一官江浙不相闻乙亥之夏皆失仕归余又买庐并公为隣於畴昔重邮累驾之不可接者一旦尽得之当是时两家生产赤立徒有六经诸史先秦以来古文奇刻处士之书合数百千卷每闲暇时留连聚论日至五六往返间又为歌词韵语以发其燕居之娱私心甚幸以为吾徒虽不得志於世固有以乐矣越明年兵声撼海上村郊之民往往持橐束縑而立伺尘起即遁余与公势不得止仓皇弃其故业指山中可舍者为之归盖其事不能相谋而流离转徙困?百折不自意复相出於天台南峡之麓自是而行同途止同旅交同友客同门急则传声疾呼老穉携挈以遁须臾之命缓则握手劳苦流涕譬释以寬离鄉弃土之戚此於人情何所暇逸而长篇大章交至迭出伉俪乎若不知其身之受死祸而饥渴寒冻之号其後也将痛极感深力不可措遂且猖狂放恣以暢其郁滯而不自知耶今观编中次第一一而在窃尝想像当时交际间事惟马隩时为详或临流据石伫思而迟成或褰裳掷笔率意而立就独吾丞公须眉老苍矩步就席至一字不肯出口少焉迫之而作语尽遒妍音度谐合比事属辞默写如注衆客始为倾叹自失而已若无有焉是不亦盛德长者人哉公平生他所论着悉毁於火既出峡率妻孥耕烬地而食终日言不及利天果不欲丧斯文乎何其老而坚也余虽不材旦夕从东阡南陌後和叩牛之行歌续负笈之坐论尚能为公好之

王敬叔诗序

金华王敬叔示余古近诗若干篇余受而叹曰敬叔诗非余不能知非敬叔亦无以知余之知也敬叔初与余相识时在钱塘西湖之上翛翛然山人处士日幅巾杖履往来南泉北嶂间或遇豪富人供张其处耳如不闻目如不睹时虽不肯与余说诗时时察其动作俯仰盖无诗也尔後来吾鄉州同寢食稍及诗事然非有所游历及邂逅高人异境潇散适意亦不出一语余尝评敬叔斯人有无故而饒之千金度正色能辞之故其诗自然与世故简远最後余来宛陵与敬叔益狎见其诗益多敬叔虽世家金华而生长宛陵有先业之池台足以备游眺有中产之田园足以充庖釀贫而不怨卑而自肆当户门清休风日佳好兄弟壶觴砚席浩歌驪醉茂林幽樾之下无不足者以是其诗往往皆非无故而作作必为人脍炙不厌庄周有言瓦注者巧金注者昏百里奚无爵禄於心故饭牛而牛肥岂不信哉敬叔亦尝与余言吾人学诗如烧丹道人劳形内悦或能以余力取给朝暮若王公大人则不必待是而乐嗟乎敬叔之道信其至於是乎抑吾人之相知犹未之悉异时宛陵有李咸用诗种子孙世其业数百年虽贫而衣冠蝉聯至今近世梅都官能诗尤贫至使人不敢踐其墓草敬叔勉之余旦夕归剡源山中亦

不敢废故业以求无愧於所为知敬叔者焉元贞丙申岁长至日剡源戴表元序

顾伯玉诗文稿序

古之闻人能以文学华其躬而名於後世者岂独系乎人力之所成就亦其豪杰之见有以异於衆人而然乎予常怪今人好揣摩时材者靳吴士呜呼彼直见其居衍沃安纷华而无志於超观远举以为土风适当然耳是焉知其初吴之初有延陵季子以多闻博识能使齐鲁晋郑诸国之名贤倾身而愿从之交者有言子游轻千里而北学於仲尼仲尼之门游者累千人而子游为文学首凡东南之儒者班然名扬艺显宜皆出於二人之苗裔焉故其流膏余泽沾注吴士汉魏以来閎閎尤盛若华亭顾氏其一也顾氏起丞相雍子孙世世不坠清业其详着於史牒余尝客华亭闻所谓亭林野王读书堆而愿游焉亭林之东数十里亦有顾氏之居东园而与余同太学屡为之留连往复如是二十年始识伯玉伯玉虽世居东园业成而科举罢即大纵其学於六艺百氏之书浩浩乎慕为古文章而出交於当世之胜已者以广其识既而犹以为隘也会郡国以其名举茂才异等则橐其书走燕赵间尽与其奇士游遂迺见执政大臣将撼动之以太平经济之略当是时年甚少气甚鋭视勲名爵位若不足致留滞未见省而亟翩然以归诸公相知者颇极力羈縻之不可得人或为伯玉惜伯玉曰我之为我未失也归而益力学攻文章乃今丛编鉅帙间楚客之赋词汉儒之论议唐贤之篇什旬抄月纂已使人脰炙不暇令不止其可以名终身传後世者虽古之闻人何远也士大夫怀居养安内无豪杰特起之见外无交游广博之助而望有所立其难哉惜予虽知出此而早衰多累年又加长不得从伯玉驱驰先後而相与观德业之进则为深可愧悔乎

紫阳方使君文集序

日月五星昼夜与天错行而云霆风露雨雪电雹为之变化不测山起西北与水东南驰而外截为海介鳞羽毛齿角物果宝藏之美从而蓄焉盖其为物也停涵盘薄郁积之者厚则其周於用也不竭人之精气蘊之为道德发之为事业而達之於言语词章亦若是而已矣窃独怪夫古之通儒硕人凡以着述表见於世者莫不皆有统绪若曾孟周邵程张之於道屈贾司马班扬韩柳欧阳苏之於文当其一时及门承接之士固已亲而得之而遗风余韵传之後来犹可以隐隐不灭近世以来乃至寥落散漫不可复续岂天地之数有时而不齐如适值其薄蚀震动倾陷漏泄之或然者耶故尝考之自夫子之徒没言道者不必贵文言文者不必兼道如此几二千年迨新安子朱子出学者始复不敢杂道於文子朱子没其书大行最有力者建安真希元临邛魏华父二公纂辑而彙绪之为精余生愈晚并不及识二公而每每私从诸老先生之尝为其学者剽传之戊戌己亥间来钱塘始得熟从紫阳方使君游使君生子朱子之鄉而於真魏二公书缕析铢校无复遗憾礼乐刑名度数之规天人性命智识之奥询之靡不知知之靡不乐一夕乃得尽其平生制作读之荧荧乎河汉之光华而阴明舒惨若有鬼神物怪先後而翕忽之也恢恢乎太山乔岳长川巨渎之喷薄氛祲而龟鼃蛟鳄豹犀虎象出没震耀之不可狎也熙熙乎时春美卉平郊茂樾舆马丰腴而衣冠靚侈舒眉酣气乐闻歌謡之奏也呜呼是岂非精气之英统绪之会而诸老先生未尽之泽者哉余既惰愚虽幸许教於门而衣食经营有所不暇顾今江南旧德如使君不一二数诗不云乎我日斯迈而月斯征又不云乎

虽无老成人尚有典刑是用疾首疚心愿与同门者永其传焉辱诸生以序引请故不敢辞

恒庄诗序

客有言恒庄於余者曰缙山李侯德隆自其远祖太师公以勲业行义立家为北州钜族事在史官名在天下士大夫天下士大夫识与不识尊称之为缙山忠孝李家德隆又自用其敏介清慎为时能臣而念先业之勤惧愈久且散其宗乃取旁近先莹之田若干亩命之曰恒庄使李氏为子若孙者世守之以图永久不坏庶几近於古之亢宗保族而能恒其德者乎余答之曰李侯之世则美矣李侯之为是事则加美矣抑客亦知夫人之所能恒者乎夫人居土而生资土而养其没也藏土以为归先王知人之须是三者也於其居也裁之宅里於其养也界之田畴於其藏也成之莹域而贤有功德於人者又世世胙之国邑以酬其劳以劝其类然後人无贤愚贵贱皆得而恒焉後之人於是三者既皆其所自为有力者过於有余而无资者遂至於无以济其不给人之常情有余之过不能无为不肖不给之久亦不能自制其命而必为贤於是惶惶然或起於游说或发於技击或豪或援或譁或艺干荣冒举以求脱贫贱之厄其不幸而不得与得之而後失者则去穷民之狼籍无几耳而惟礼法之家豪杰之士始仅能自以其志节表见於世故古之能恒以时而今之能恒以已今夫李侯植身於璆璧之林罗名於冰雪之府名言应经制事合法而方进为於时以大试其道於是举也声激气荡家振户率将合四方好义之士悉取缙山恒庄以为式则销颓风扶善俗其於时政也不为无补岂独亢宗保族私其德於李氏子孙而已客曰侈哉子之言乎退而率其朋相与为衢歌以发扬李氏之美凡得古律诗若干篇而属笔於予予缀缉前所问答之云以为李氏恒庄诗序

千峰酬倡序

故友谢羽皋尝为余言唐诗人在江东者郡最多不过三四人而独新定自元和至咸通间施处士肩吾方先生干李建州频章协律八元之属以十计余考之信然岂其山嶮水驶风气疎爽士大夫得之而为清能灵解往往有非他郡所可几及耶而恨平居以来不得担簦裹粮往从之游以纵观其如何之为快庚子岁余在钱塘有携千峰酬倡过余朱墨伊优中取而疾读之盖皆新定诸公所作亦有与余江湖场屋庠序之旧方其濯纓清流连鑣层云雍容雅言优游燕歌固当他有汲汲於今时之为者风霜摇落砂砾净尽平生扳援驰逐之好一切不以介意乃相率俛首从事於山川篇翰间一以逃喧远累一以忘形遗老寒暄荣悴器寂禽虫卉木百物之变出没於前忧愁喜乐穷达贵贱史册古今之感往来於中一一可与吾接而不得为吾累也何莫非诗之助者呜呼快哉然而余言诸公之诗顾若倘然无所遇而作非如唐人朝暮刻苦挟之以资身华世者也夫为诗不挟之以资身华世而倘然以清能灵解自适其不遇此正古仁人君子隐居求志之事而於唐人乎何夸惜羽皋不在不得反覆究极此论姑摭大略题诸卷端而归之

陆孟孙字士宗序

笠泽陆孟孙以其父命请於余曰陆氏幸甚得公为婿今者孟孙又幸得婿於公惟是孟孙年

浸长矣而业不修惧頹其家且貽公慚愿赐之字以教孟孙余谨为字曰士宗姑苏之族莫望於陆自三国至於李唐代有隼士其学行志业载於简牘间班然伟矣迨乎近年资禄名第不为无人而不闻有以是族而行於儒林者与微族等耳而山阴之族遂名天下谈者曰姑苏田腴而俗侈田腴则其小人无耕锄粪治之劳而不害得善禾俗侈则其君子偷而无远心彼山陰之壤多雄冈洁流土生其间不耻无资而耻无名虽牛医马人之子知贵挟册而歌唐虞况以旧族鲁语有之息土不材瘠土好义兹非其证欤余以为不然土视其所居立耳土之腴瘠何择焉自余为尔家婿犹见褰衣而能清言者数公远祖唐宣公之牒犹柜而藏诸庙宣公之祠于社岁时子孙陪祀犹於尔家取足今皆无矣更去之百十年将愈无矣呜呼孟孙之宗可不为寒心哉孟孙於嗣为嫡长礼为之宗子吾女亦嫡长也获承宗事孟孙其力务为学焉以无忝所生以解谈者之惑毋惰

袁钧字德衡序

积物之力其初起於铢其轻易举也铢铢而积之累百而至於为钧则不胜其举矣智者於此欲举之不劳而知其力之所以然必程之以衡衡举钧力而物之无穷可以坐致人之於德亦然人之与人其初并鄉而居同途而趋循循然固相若也忽焉而为大贤无以异於物之积铢而成钧又由此加积之旦旦而程之而至於可以为尧舜故程物之力而知钧之无穷者衡也程人之所至而知人皆可以成尧舜者以德为之衡也济南袁氏钧字德衡请文於予书此赠之

史景正字序

甬东史君蒙卿其族昆弟之字皆冠以景既有字君景吕者矣年长学成而疑之以书来剡源曰是不慊吾志愿有易也遂为易字曰景正而告之以其说夫物未有可必正者也必正之能正焉者寡矣惟人之心自其童蒙未有不正者也既而能言既而有识知既而无所不为不正者斯至矣虽然其所不正幸而有以治之已失者可使未远而还不幸内无贤父兄外无良师傳资微气薄功力不充兹其陷於弃人也已尔吾他日掘地尺而得泉涓涓然出窞穴间舒之为沧涟漚之为沧浪清可监而美可釀也放之数寻则有混而为泥沙郁而为污池湮而为粪壤草莽交之虫蛇兴焉其不至於是然後积衆流之会为渠为溪为湖为江以达於海人心之初不愧於斯泉之清与美也世故之为泥沙嗜慾之为污池利禄之为粪壤朋儕臧获之为虫蛇草莽可以不惧哉圣人於易之蒙曰蒙以养正圣功也其象曰山下出泉蒙吾子其务慎其出而养其正也乎哉年既长者德将愈加学既成者识将愈坚积其功趋而会於圣人之海无难矣

陈处度字序

盈天地之间凡其形之大小声之重轻数之多少至杂而不能齐者必权之於度然亦有度之所不能权则又折而归之于矩故有度以度物有矩以处度而天下之理尽矣岂惟物学者之於道亦然今有人处闺门易周也而不能推之於鄉党处宾僚易严也而不能推之於昵近处

穷约易持也而不能推之於贵盛处烦剧易决也而不能推之於闲裕处安乐易肆也而不能推之於患难诸如此类盖必有纵横曲折旁通泛应而不失其度者焉大学论絜矩之道曰所恶於上毋以使下所恶於下毋以事上所恶於前毋以先後所恶於後毋以从前夫子年七十而始从心所欲不踰矩者其为不失之道也陈氏子矩字处度乞言於予书此遗之

王一初名字序

松江王君名一初既又名读书之室曰一初而问其说於予予复之曰子之名若字子皆自为之为之而不自知而他人何从言之且亦尝推夫人名字之所由起乎人生之初一而已矣既而不可以无别也而名生焉名之又不可以无别也而字生焉既而其所居处其所服用其交接游历不可以无别也而名始纷纷然而繁夫其初之一也而谁与约之其末之纷纷然而繁也而谁与益之是非惟吾与子二人不能知虽有上智神识而何以言其然乎且又非其人之生者然也天地之间形色之类事物之故其生者何限一一而名之将不胜其名一一而言其然将不胜其言故姓氏一也今几族井地一也今几等历象一也今几家书契一也今几法以至皐陶之刑名伯夷之典礼伶伦之音乐岐伯巫阳之医药卜筮与凡百工衆业莫不各有本祖其初如此而今如彼是孰使之然哉且又非惟人事之变然也陰阳之升降古今之去来其淳其疵其成其败如螭蟬之化蛇虎之逝故者控持把玩不能须臾之久而新者已代之矣则其所谓一者何尝可一而初安在哉虚无幻诞之徒乘其眩也遂欲悉取而屏之而索诸羣言之外九州八极之表而世之儒者攻之愈坚守之弥力虽其说不必强所难通而远自自古以来天地之所以立日月之所以明风霆之所以神江河山岳之所以流载近取吾人日用饮食之所仰赖更百千万变而未尝不一者夫岂不可深言而况吾与子之所欲知乎於是王君憭然而笑恍然而喻曰吾问一初子并举其极吾问名字子徧语其类辩乎哉因书以为序大德戊戌孟夏望日剡源戴表元序

曹仲達字序

大学曹君之子和父字仲達居吴与余世好相善余为序所为達之义以谥之今夫鷄鸣而起日入而休人之起居偃仰劳逸荣悴关於气之嘘吸凡计一万三千五百息能和之者鲜矣幸而和则四肢百窍皆无壅塞窒滯之处疾病不兴而安乐生焉此一身之達也亲亲长长老老幼幼而家道具莫难於为上寒暑饥渴丰杀之权不敢悍焉莫难於为下喜怒爱恶予夺之欲不得肆焉惟夫不悍不肆处之得其宜则指挥唯诺节度愜适而情义谐洽此一家之達也为人子弟而抚之者顺为人师友而接之者悦誉近而远者闻身贱而贵者孚然後不求之禄非望之福踰都越邑而自至盖有闔垣扫轨恐不免焉此一国之達也珠玉不市街而光麟凤不庭畜而祥贤士不出里巷其治行故穷居而和其言则信而化之可使为三代之俗盛行而和其政则尊而用之可使为三代之王此天下後世之達也达於一身古之人有行之者严君平费长房之类是也達於一家龐德公陈仲弓之类是也达於一国管幼安李令伯之类是也達於天下万世伊尹周公孔孟之类是也仲达於此数者其何所从乎仲达曰吾将思之遂以为序大德三年岁在己亥五月望後三日戴表元序

李氏子字说序

桷之屬於室也其為木至小而為數至繁繁故易售小故易求然惟其直焉者為中桷也吾嘗居山見匠者之擇木得為棟者十難一二焉得為梁者十難三四焉得為楹為枅者十難五六焉至於桷宜若往往而遇而積之反勞於他材輒疑而問之曰是尋常之須耳他日營大廈其用有數倍於是者非踰都越邑累年歲而求之不可得蓋不惟直之貴而兼其長焉然後為美桷也故愛木者自其拱把而養之以至於桷既桷矣不敢使止於桷也益養之至於為枅為楹為梁為棟亦不止也益養之如皆不適用則有規而為應門為闕者取焉為明堂大室者取焉此非其材之異養之者至也君子之德藝亦然小進如大却羣居而独行拙於美成而工於持久怯於近名而勇於任重夫然後材堅器良行乎世故霜露之中出乎衆累斧斤之上不败不傷引而伸之無用不損矣袁季源命其子曰桷復取義於殷頌字曰伯長余愛之欲有以助其養也為茲說以廣之

史昭父字序

人常言日中必昃以為世之用明而不能持久之喻余竊謂不然蓋日之行乎中天晡乎下土千萬世旦旦仰而不?者正以其能中而能昃也苟使中而不昃則人得以窺其神而為日不既勞乎豈惟日天之於雷霆風雨霜露所以寄号令行惠澤者也然朝之烈者昼即收春之震者冬必藏何也彼所為不數數於用者即其所以用也豈惟天人之精神智力不惧於不堪而惧於難繼故有聰如愚敏如鈍其初晷刻不能自給而日積月累沛乎其有餘在易之晉曰明出地上晉君子以自昭明德夫晉進也明出於地上其勢加進也以加進之明而其體四柔二剛剛又客而柔主也用易者詳戒義於爻而嚴加辭於象使養之以柔而自立於昭若其明不出於勢而出於我陰多而不晦氣升而能卑噫嘻至哉而於序卦有言曰晉進也進必有所傷故受之明夷若之何日中之不昃而可以持其明乎鄉友史昭父名晉伯生於袞綉之門而世鉛槧之業躬韋布之禮余嘉其可以語易也為序以贈之大德三年歲在己亥十一月望日剡源戴表元序

王仲昭字说序

三衢學者王君勲字仲昭詣余而請曰勲之幼也既幸受名於親長也又幸得字於友而未有命之以訓辭愿序而贈焉何如余讓不獲則為仲昭略疏其概而听仲昭自擇焉蓋夫人之居世未嘗無勞而食者無勞而食者謂之惰民政之所非而刑之所不貸故於文力田為男自其勝耕也而皆與之一夫之產使之動搖筋骸以孝養其父母以活其妻子雖以舜禹后稷伊尹之聖而不得免於其初而況他人乎此以耕稼為勲者也耒耜既閑則業必有所馴筋力既疲則氣必有所滯於是射鄉賓介之講有干戈羽龠之示有弦誦俎豆之率歲時伏腊涖之學官錄之黨正而登其成者進之鄉老而列之士大夫此以肄習為勲者也責非君師而求學者聚於其門權非官府而辨訟者決於其庭若漢以來名賢貞士雖功烈不能暢於天下而一時遺風余韻薰良伏暴扶頽起懦如江河之浸雨澤之潤日夜長養而物不知此以教勸為勲者也德行道義也者人之根干也言語詞章也者人之枝葉也枝葉之去於根干遠矣然木無

枝叶无以庇其身人无词章则亦无以养其德自有人类以来以迨於今纪载之事莫之或废而千载之间行名之士精於言者皆传大之以铺扬先王典章礼乐之美而小之呻吟伊优以自娱其不幸此以着述为勲者也若乃为大丈夫而遇於世才足以行其所欲为计足以达其所欲谋从容庙廊而使四方万里无桁杨桎械之辜谈笑边陲而使三军百姓无鼓桴烽埃之警其存也珪冕以迎之篝鼎以荣之其久也旗常竹帛以旌之此以宦达为勲者也耕稼也肄习也教劝之於着述也勲之在我者也自昭其昭者也宦达也勲之在人者也昭人之昭者也昭人之昭者待於命命得而为之则得为之命不得而为之则不得为之自昭其昭者不待於命为之在我而已矣今之人穷岁年弊血气以争不可必为之命而已所得为者反若不暇为之呜呼吾见其力之劳而不免於惑也仲昭智人也今而往其且将自昭其昭乎其将徐有所待以昭人之昭乎仲昭曰吾谨喻矣是为序

剡源文集卷十一

卷十二

<集部,别集类,金至元,剡源文集>

钦定四库全书

剡源文集卷十二 元 戴表元 撰序

陈公辅字序

天下之器可以远行者莫如车居而能制人者莫如弓然弓非矫之强莫得以成其坚徒车而无所翼亦不能重载故古之君子择义而名之取於弓之矫之之强以为弼取於车之翼之之重以为辅自其孩童知父兄师友之教也一噫咿唯俞罄折不敢自用也而必顾於礼其闻之於昭昭也若有官府书之其为之於冥冥也若有鬼神临之凡所以矫之而强其内也自其达於政而可仕也求之山川风土国俗以广其识质之简书词令才艺以弘其业责之封疆兵革要约以信其节凡所以翼之而重其外也内强则不至於失身外重则不至於失人大丈夫所为平居俯仰无愧临事从容有余者用此道也今之君子方其自为也既不过以途人待其身及其待人亦仅仅相与为途人无怪也宛陵陈君名弼字公辅问其说於余余为略考书名之义而遂及於弓车之用昔工尹商阳以弓射人而知礼君子善之王良耻为嬖奚御而见称於孟氏公辅往而务其矫之於内者慎其载之於外者其於义也思过半矣

陈养直字序

学者陈生名规靳於人之意其圆也其族昆字之以养直曰规弓材也弓材直养直疑之以问於余余曰何伤乎古之言规者曰官师相规曰沔水规宣王人未有已不直而能规人者也故规也者以已之直直人之不直者也仲尼崎岖以行道而长沮桀溺非之以矫规者也西都之季篡势已成谷永贡禹譏譏於乱朝昏主之间以容其身以诈规者也鬻拳泄冶不胜区区之谅讦君以干祸以隘规者也范蔚宗柳子厚才高气峭欲伸一二而丧其千百以乱规者也故已直而规人则其规行已不直而规人则其规毁若伊尹规太甲孟子规齐王汲黯规公孙弘韩退之规阳城规之善者也养直美资识严检操是能顾其名矣是能直矣余得广其材说於弓材之外以坚生之养大德丁酉岁後十二月朔日戴表元序

陈同与其弟周字序

人虽甚贤所以待人者必有不能使之同人虽甚不肖所以谋已者必无不欲使之周余自涉事以来至於今有见於斯理熟矣诚有一人焉能恢容博施於其躬之饥渴寒暑安危苦乐举不暇乎自为而必使惠足以及人功足以善俗则天未尝不与之名位禄寿而昌其子孙之胤故尧舜之忧勤而不私也以朱均之不肖而犹百世不乏其祀禹之水功契之教绩稷之农劳而配天皆数百年孔孟之皇皇明道无一丘之势以资其身而袞冕蒸尝至今为万世师门恩

里?他姓莫敢望焉此岂区区褊心狭量之所能知哉颍川陈文忠公家礼法为宋大夫第一化其德者国称忠臣家称良子有远孙罗田尹见其第二季同周於余而曰愿赐之字而因以教之余与之交信乎其为仁贤忠厚之泽也谨为字同曰孟恢字周曰仲博而推明之以人情天道之说庶几休风庆誉勿替引之以期於永久莫坠云大德丁酉十二月朔日前进士剡源戴表元序

字三友序

五行之近民用莫如火彼木金水土皆出於自然惟火也人为之虽人为之而亦出於自然古之人当其时也则然新火而後始饮食火之不新盖自五季以降不以为怪矣学者安於旧弊而不闻先王之法此其一也字舒然以新之易之象曰风雷益吾尝观於风其顺於物而动者皆益也其不顺於物而动皆损也惟雷亦是风雷之於物有二道也君子观其顺之道而从之则为迁善观其不顺之道而违之则为改过然善与过岂有能自知哉吾若求益也而入於损吾若求损也而入於益在择之而已矣字董益之以择善天下无有生而贵者也自古之圣贤舜禹伊吕皆起於陇亩耕渔之流当其穷时未有不以所事在位而贵者也孔子之法曰畏大人居是邦不非其大夫而孟子曰彼赵孟之贵非贵也我仁义之贵良贵也斯言也是孟子出之是也非孟子而言之则涉於傲安有傲而犹得有贵於已者乎虽然若孟子之道则不可以不守也字吴良贵以守道

陈景惠诸子名字序

儒者陈景惠氏自其严君积德攻文以良闻於乡里乡里同业辈行若後进生往往持所售名荐书齿仕籍独齟齬不偶而天昌其家景惠遂有丈夫子七人皆明严整饬良种几未坠云一日以名字请余余为贰名系之於良而各为字以训之曰汝良合合莫杂於羣玉羣石而润於石兰羣卉而润於卉其类不可远其自处不可不严也字良合以孟严曰汝良会事当其时之可谓之会然知时之可而不知理之可则入於悔暴虎冯河有不顾而为之者彼其心一时亦以为可也字良会以仲理曰汝良全人之受身於父母耳目四体之与其心俱不可妄也耳全於聪故不妄听目全於明故不妄视手足与心各全其职故不妄为字良全以叔受曰汝良俞古之君子重然诺然者然人之言诺者诺已之许而其最着於经传曰唯曰俞唯者惟於已而有所悟俞者喻於心而有所感今之君子意而言色然而许而望其能自信信人无有也字良俞以季信曰汝良金自大圣贤不敢以胸臆明智自用每见一谋必博尽於衆言之金同而後出之穷阎白屋之士横经以待问怀珍以求聘而曰我能为人决大疑发大政吾知其必有以得此也字良金以季博曰汝良介柳下惠之居鲁谓之可也徐邈之居魏谓之通可也他日君子考其本末之实而以介归之字良介以季实曰汝良企白圭企禹而不至於禹燕唵子之企尧舜而不至於尧舜岂独不至去之益远惟七十子企仲尼虽不能至而去之不远则学与不学之分也字良企以季学训毕七丈夫子者请书於牋因书以遗之

陈氏三子字序

剡士陈子得名其三子曰模楷格而请字於余余曰是三名者其义一也传曰膏粱难正夫子弟之难正岂独膏粱哉余频年浮沈客徒所交游大家子不一有见狗马声色而悦有见货玉章绶而悦有见宫室舆御而悦号称贤者不过见吴书吴服古器玩而悦无有恂恂然谦颜愿辞而能行儒生学士之事者越来山中气象朴野前数者之疑幸且不接於目而谬用其心者犹不少也陈氏之子耽儒而好礼是能正矣模也者正之始也字模曰伯正木无楷不能器人无学不能材舜楷尧禹楷舜七十子楷仲尼古之人皆然字楷曰仲学学欲博博则不能皆正学欲约约则不能必正於此有道且学而且格之格也者所以一於心也字格曰叔一三子盍往而各思其义也哉虽然居是家而无以正其子弟非良父兄也居是乡而无以正人之子弟非良士也余与子得亦盍交自勉焉

赵氏二子字序

仲尼於春秋诸国非主齐则主晋成季之在晋犹夷吾之在齐也然仲尼以功许夷吾言不及成季何也夷吾之功及天下成季之功止於其国他日谓齐桓公正晋文公谲亦犹是也由求子贡之才过曾点远甚舍瑟言志悠然累十言适契圣人之怀亟称与之至终身所成就竟亦何敢望由求子贡故以成季之志而能扩之以弘毅曾点之志而能斂之以平实则全才盛德无复遗憾是皆不可以无学也上饶赵氏以丈夫子长勲字伯成次点字仲与请为训辞书此遗之

曹氏四子字序

易之道无不亨者也易为忧患作而能无不亨何也易有亨不亨而易之道无不亨也今夫人有生而见与於天者天亨之有生而见与於人者人亨之夫我之道欲亨而天与人交亨之岂非我之大愿至於道不可期而天与人或不见与则如之何若是者我必自亨之故命之有亨有不亨在天在人而道之无不亨者在我太邱曹君士开取易名其四丈夫子皆以亨且既皆有字而质其义於余余前四子者而谄之曰来震亨字子以德修震於易为长子为动为惧为长子重任也动而惧危道也任重而危人何赖焉古之人於此不恃无惧而恃己之有德周公之东山也而赤舄几几仲尼之陈蔡也而调琴自如修德故也来贲亨字子以文刚贲之体中柔外刚而饰以文夫苟中柔外刚而饰以文君子何贵焉彖易者戒之若使之以柔文刚不若主柔而文之以刚於是体不挠於内饰不虚於外而文以成来谦亨字子以光益天道之不可过莫若谦谦也者欲人损有余而益不足王公损骄吝故能以富贵光其家士君子损狷嫉故能以贫贱光其身来复亨字子以善初人之初无有不善雷静而伏於地中其气氤氲然及动而震惊击搏物有病之者矣性之於情犹是也故曰为善者务要求复其初曹氏之四丈夫者为人子者也为人兄若弟者也今而为人子者他日为人父者也为人子若弟者他日为人臣之道也为人兄若父者他日为人师为人长之道也四丈夫者处其义则思慎其躬慎其躬则思称其名称其名则思亨其道乎哉

唐氏十子字序

相台唐氏一门十男子其乡大夫紫山胡公命之皆名居字元若曰元善也人之居不同而同归於为善云尔余考传纪元非徒为善而已也盖於事之序为初物之数为一而人之体为首若是乎其尊而孰能踰之今试验之於君之乡羣然朝而同游暮而同休者孰非吾等夷侪辈也而有一人焉能修饰顾籍为善人君子之事则衆必交相推异耻其身若不敢与齿何也彼为善则我亦莫能踰之也为善於一乡一乡尊之莫能踰为善於一国一国尊之莫能踰为善於天下天下尊之莫能踰为善於千万世千万世尊之莫能踰亦犹是也虽然彼为善者非徒曰能善其名字而尊也而为善者无有不得善其名字是道也虽文王周公不废岂惟文王周公古之人其子之最贵称元子卜用元龟筮用元日员用元士冠用元服凡物之可以愿其善者无不用也天下之民族亦无别生分类若垂禹臯陶伯益之伦仅始得称才子而稷契朱虎熊罴八人遂目之为八元嗟乎唐氏之子亦务尊其名字而使人无以踰之哉按十子海盐使君者五曰居仁字元寿曰居吉字元太曰居敬字元让曰居约字元博曰居礼字元修提舶君者二曰居安字元静曰居谦字元益南城令君者三曰居简字元可曰居信字元谅曰居贞字元实三君者方以才名器业显扬於时余既谗而嘉之其往而益厚基构绵礼逊隆宾游使此十元者虚心而强学顾名而思义居则不失俱为良子弟出则相望俱为名卿贤大夫他日国史书之儒林谱之三河衣冠世家遂将推唐氏为称首不亦可乎余於紫山公之言非敢益也直衍其遗余焉耳

凌氏二子字序

安吉二凌长愈次懋其父官宣城时招余馆中所教学徒也既有字之彦道彦德而未加之以训辞及是乃来请於余而告之曰噫尔愈尔崑崙昂昂欲为韩者耶为韩有四难起孤穷得官遇当尽言不怀禄当尽节不畏死勇难无师资之素遗言絶学径诣圣处敏难知顺逆谓叛镇为必不可宥明同异谓外教为必不可殽介难与人交无怨仇而平生所受恩必酬厚难是四难者在同时同辈中行之不能一二而韩子全之是非有见於道不尔也而世人但以文求韩远矣噫尔懋尔天下之物无不求而至天下之业无不为而成故富贵贫贱所以朝暮焦劳其筋力不同而同志於得然而不能皆得也惟德之在人其物甚良业甚精其得之甚不难而人未有求而为焉此不懋之过也今夫仁始於不忍欺孩童及其懋之也至於为尧舜之博济义始於耻穿窬及其懋之也至於可以为夷齐之让国今骤焉语汝以尧舜夷齐之事歉然诚有所未暇而不忍欺孩童与夫见穿窬而耻者人人之所可能也夫道务於为韩之勇敏介厚而不专於文德务於人人之能为而可以至尧舜夷齐之仁义人之欲纳忠於二子者宁复有加於此乎二子顾其名若字而无负余之言哉

朱使君七子字序

广信朱使君以德世其家有大丈夫子七人既皆取德为名系之以曰懋曰辉曰容曰成曰润曰明曰觉且既皆以伯仲叔季得字曰昭曰刚曰大曰振曰温曰俊曰裕而未加之训辞客剡源戴表元乃为考据名义本使君之意为词以序之山木之修然其既成材也人知之其寒暑之所望日夜之所息不得而窥之伯昭昭其懋乎哉日行乎中天人日日见之而日日其辉如新岂非以刚故耶人之辉其德亦然刚纯者明极刚杂者明微最下无刚惑矣仲刚刚其辉乎

哉海容渌渌容湖湖容谷故大贤容小贤大才容小才德之优劣於容之多寡稽之叔大大其容乎哉物之成实风振之音之成乐磬振之拜成礼曰振动之拜师成列曰振旅之师德之成尤不可以不振也叔振振其成乎哉玉在石中其德温温而山不枯君子取象焉温乎其性以润身温乎其文以润国温乎其政以润物温为质润为华也叔温温其润乎哉毒莫憯於獰渊鱼智莫穷於数眉睫明於大者小固有所遗也故书称克明俊德俊之为言大也叔俊俊其明乎哉土寬者裕於耕資寬者裕於商才寬者裕於行德寬者裕於藏季裕裕其寬乎哉序既七丈夫子者肃然而兴耸然而思请书其词於册以蚤夜观省无违义方云

张训之字序

襄国张氏子严既受其名於亲不敢一日忘也而字莫能定其友王成父欲字以训之若曰严其亲之训云尔而不远数千里来谄於予予曰可哉按训之为言古笈传家皆释为顺顺以行美美以立顺其为人也殆庶几乎姑以人事切近言之目不敢睇非道之色耳不敢听非礼之言足至於不敢履闕手至於不敢下帶此一身之严也父坐而子立兄行而弟随夫语而妇诺此一家之严也推而至於严交际则行必执贄见必修容坐必正席语必俨顔又推而严於官学则辨必援经取必顾义谏必守礼刑必据律严於祭也必斋严於战也必誓严於婚嫁也必媒必币严於聘享也必宾必介凡此皆所以为严之目也行之既久执之弥熟则血气和平而灾害不生仪情纯习而悔辱自寡天下之言顺亦无以加此矣成父归语训之母多谈西北自古多奇男子子之乡有尧之遗风焉迨於近世如宋广平元鲁山犹磊落令人歆重训之顾其名若字而就有道者正之哉大德八年九月朔旦

道上人字逢源序

事之发必有原故地之高平曰原物之可复言之可述情之可矜亦皆曰原取其动之善而不失其初也学者之於道亦然人之生天莫不与之以口目耳鼻百骸四体之属曰身主其身有知觉而能动者曰心心之动之之初其原皆系於仁义曰性动而不失其初之原耳不能使越仁义而听自不能使越仁义而视口鼻手足百为皆不能使越仁义而动以至达於事物发於礼乐刑政着於君臣父子兄弟夫妇朋友之别而散於陰阳日月星辰山川草木之运曰道道之所以不可一日离於事物人之区区之身所以能参天地变化而为三才盖以此耳故学道者贵於逢原逢之如何逢之仁义而已矣人之心初动於仁义之原能择之精守之坚勉强而皆逢者则为大贤君子逢之自然不待勉强者为尧舜力不能为恶时一逢之而不能精择坚守为中才愿人强者隔於血气弱者陷於嗜慾昏冥终身不能一逢为下愚不肖为桀纣为禽兽无足数矣斯说也由孟子以来不废而为佛氏者曰性不可失其初是也若心则惟恐不灭盖南湖道上人之字曰逢源余尝与之言其义而疑之上人曰今吾教行将人人不失其性不起其心不私其身将举国而为善人虽官府可以不设而君何疑乎嗟夫上人为上人之学鶻居龟引於山林间以其说身行之清斋寡求屏絕世故何患不得为善而吾之云云则稻粱药石衣冠琴瑟可以通行四方公传百世而无厌者也且道无二原子不可以为余之逢使我而慕上人之逢亦劳矣而上人冲虚秀朗内练精苦於诸问学并通转注然能将之以静絕无丝毫浮佻险诈之气虽不垂绅紬屨吾知其深於逢矣故详为之言以导其名若字导之犹有所

未喻也则还心难冀矣上人他日数称太章其学与上人远甚亦以示之何如

陆元章字序

物之丽乎文者皆曰章倬彼云汉为章於天其在水清浊错而成文曰漳水在玉器合而有文曰璋玉在木理合而有文曰樟木其在人为士而有文曰文章首有文曰章甫之冠身有文曰章服然皆以文其外夫为文而外之不止将令人轻学而文亦有时而渝虎豹之炳然其存也人畏其威其获之也犹爱其皮君子之为文章者取之然使非虎豹而生蒙其皮则不若是畏爱之矣故君子贵质质也者所以出其文章者也甫里陆氏世贤而材余姻家少年子名元章请字余为字曰士质

送袁伯长赴丽泽序

人之居世自其身之起居寢食与其家之指挥洒扫推而大之为官吏而受人之民人为师儒而受人之子弟无非事也人自幼少强壮而至於老日日而学之凡以求无愧其事而已未有当曰我不能而姑止者也而今之君子率习为之辞曰我学治其身治其家犹未之能也而安能治人此说行故贤者得成其谦而不肖者亦以容其伪及乎人不得已而取之则谦者退处伪者售焉此甚非君子之通法也盖往者铨格以科第高者为郡博士吾乡之先生长者史文惠袁正献沈端宪之徒於格当得者皆辞逊不受而宁求他官他官之难不优於郡博士而为之者以为皆以不能而不为则势所不可故随其资就其力且为而且学之耳余年未三十以新进士谒天官於格亦当得郡博士而不敢辞避不就当是时家有老人须禄以养余性尤不通吏事勉强文墨议论间且为而且学之亦先生长者意耳迺来又二十年居闲散放无丝髮进益时时回思前事令人面热汗下今袁君伯长与余同郡同业怀丽泽之牒当行已久而不肯决曰为长於丽泽师儒也其任异时与郡博士正等而东莱公之阙里也吾趑趄焉余曰固也然吾伯长当学为其事而求无愧者也谦而非伪也东莱公之学又史袁沈诸公之所同者也必不可已则当且为而又且学之者也伯长持身有士行居家有子道天资高文章妙博闻广记尤精於史学近复贯穿经术他如琴书医药诸艺深得其理嫠多君子至必皆愿从之游者余故人王及翁御史无恙其介绍而请焉元贞乙未春十日剡源戴表元序

剡源文集卷十二

卷十三

钦定四库全书

剡源文集卷十三 元 戴表元 撰序

送屠存博之婺州教序

古之君子可以仕乎曰可以仕而可以不仕者也今之君子不可以仕乎曰不可以仕而不可以不仕者也可以仕而可以不仕何也其材与学可以仕而其身可以不仕者也不可以仕而不可以不仕何也其材与学不可以仕而其身不可以不仕者也古之君子其得材也厚矣其师良其学之之法备上之人时其可仕也然後仕之然而不必皆仕也不必皆仕而为民则亦无不乐也今之君子其材不及古矣师不必皆良也学之之法不必皆备也其可仕也上之人不必皆仕之也然而皆有欲仕之心焉以为不仕而为民则其身将不免於累也故古之君子可以仕而仕则为仕者皆为贤公卿大夫可以不仕而不仕则不仕者皆为良民今之君子其仕者既无以心服不仕之民而不仕者至於无以自容其身今古之不齐与其俗之静躁人之治乱如斯而已矣杭有吾党屠君约字存博学古人之道而其材能为今人之所难能生於纷嚣长於豪华而阖门哦书耳目不乱取所得於书之清切雄快者发之於歌謡布之於翰墨有骚人贞士之趣年四十矣当路数授之以官翱翔而不就迨於今兹又板之为婺学正始拜而行斯人也使之不仕知其能静使之仕知其能治者乎然余於存博犹有欲言焉盖存博之可仕者以其材与学而不可以不仕者犹以其身乎夫人之生於世劳矣其不劳者非人道也古之为民无刑狱猝至之忧无赋役淹久之苦人知其可美如彼也然其筋骸肤体疲於田畴而拘於耒耜狎习於风寒暑湿之事与今之农夫正等耳居之久也以百里奚甯越之贤不免於叩角而嗟释锄而起他可知已今之民一名为儒则其处也唾壶而麈尾其出也高车而駟马乃有古时已仕在官者之所不及至於在家庭为子弟仆役在道途为少贱负戴在庠序为生徒肄习其劳逸万万相远於古人又未论也已仕者之当劳较於未仕之责愈难也均已仕也仕而为人师长之当劳较於为官吏愈难也未仕者之责止其身已仕者之责及其人为官吏者治人以政为师长者教人以道也嗟夫存博知夫道之难於政身之所忧轻於人今之劳也犹有逸於古其有泰然於心者哉存博行矣异时婺学称东南经术渊府正余所谓师良而法备者也今犹有为东莱之学而不变者乎存博问而求之求之而得其人则以余说质之又归而教余焉

送白廷玉赴常州教授序

古者学无官学之有官盖以居其人而弦歌舞蹈揖逊聚习於其中亦或以兼他用如养老习射献馘听讼之类非若後世置师弟子专以教学为也置师弟子而专教学者古有之矣则必取之於高年退宦穷乡素望又非若後世以铨格调官名一人为师而其余皆如弟子者也夫以铨格调官得古人不能必之名行古人不可专之教问其年不必尊也考其仕非必旧也索之一旦而推而位之衆人之上决疑请益者四面而至此非才可以备三代之司徒宗伯卿大

夫学可以配先汉之齐鲁明经师其谁堪之而三代司徒宗伯卿大夫之才齐鲁明经师之学不常有於天下後世有郡必有学学必有师则取之於何而给於是选者始不详而教者亦不暇皆善江南科举盛时盖尝有议之者其说以通经义能词赋为称职古之师儒教人之法非止於通经义能词赋而已也顾其疎密浅深之有所据依犹足以为无法之法通都大府千万人之聚?高坐者一语不酬则羣喙咻焉至於刮席坐针悸然不容其身而後已呜呼难哉毗陵为浙中文献之国游儒寄士冠摩穀击居学官者以为尤难大德庚子春钱塘白廷玉以公府高选得之江南之缙绅韦布识与不识不谋而同声曰此固才学可以为师儒称职而无愧者也此固取之高年素望可以四面决疑请益者也铨格而皆若人其何不可之有因相率作为诗文以饯其往而寻复徵贈於余余不得辞抑余私有欲贊於廷玉者廷玉本余同里舒文靖公诸孙少度君之子生十龄以孤稚随母寄养於白及今成立自当用范文正刘文节二公例请为白氏置後而身归舒宗乃合於礼缘人情不忘本之义夫为师儒将教人以礼而不先以自为则法不信知其为礼而有不书於党乡故旧则言不忠然则以廷玉之可为言而余尽言之盖亦人情之当然而非私也遂不敢咕囁而摭诸题篇之末

送盛元仁赴吉水教授序

天下之官其愈大者为之愈难知其愈难而畏之不为则道废不知其难而冒为之则官废官与道其废必有一焉废其一而其一不废者亦随之矣天之於人未尝一日弃也寒而欲授之衣饥而欲授之食危而欲之安昏而欲之明则当其时必生其人以须之故贤能之人未尝一日絶於世而其人有用有不用也於是为大官者不幸而非出於天之所须则往往不称之患深而责之者苛其小者才可称一官则事止於一官非天下衆论之所咻也然而犹憚以为难者谓精神臂力必足以检校应接心思智计必足以周匝运掉而已耳无他望也惟夫州教授者责尤轻而事尤简世之所共目以为冗慢而不急若可以浮沉寄岁月於其间大德庚子秋盛元仁以纯儒茂老清才笃学拜吉水学官之命候人趣行於途姻党载饯於郊见之几有蹙缩不安之色问之曰若吾者其敢自谓无愧於教授一州乎哉自吾之能言而受教於父兄自吾之能诵而受教於师友举吾族里州国一善一能之加於我者皆我所受教而惧其不足也自今以往其将以教我者而授诸一州之人矣则一州之人皆不我若也吾安得不愧且惧乎哉且今天下内外百司之官皆不可谓无职而教授之职专以道他日化行俗美则吾职举州诸生子弟有一悖理而隳业者是吾教之授之不至也吾又敢自谓之有道乎哉余闻其言为之面汗内热盖其官也余之畴昔亦尝容易为之而不思其难者也今世诸人之居其官如余之不思而为之者皆是也以余与诸人皆不思而元仁之才之学之可以优为也而独能思之余知元仁之职易称而居之真无愧矣吉水异时於庐陵尤为佳邑衣冠文学犹有与尝从游而存者乎为我物色而以元仁之说叩焉

送杜子问赴学官序

吾乡奉化经学渊源可考者起楼先生文叔文叔与慈溪杜先生醇一时俱为鄞令王荆公所尊礼文叔终庆历中其门人弟子散布东南而私淑於奉化者赵教授范民舒文靖公元质荆公为政以经义设科取士奉化去开封远文叔之徒多不屑仕至渡江久之乃稍稍有以经进

而毛氏诗最盛每试与江浙闽湘之士羣造於礼部若辟雍习诗者望其风不敢与奉化齿主司第甲乙或至榜中连题奉化五七辈然後及他州公论莫不以为当然数十年间名字脍炙藉藉於诸人之口李秘书景平杨博士献子黄知郡义甫杜常平叔范其尤着也四者之中李杨黄尝立朝位望相埒而叔范官若不逮然独有才子弟其名裕字子问者才尤奇奉化後來言诗遂推子问称首又以为诸老先生之泽於此未絕而天之酬杜氏者庶其在是无几何科举罢三百篇之策学者黜为空言邑中故家虽衣冠强盛如李杨黄者亦皆逋播荡析子问不得已攜其耿耿者去而之西会尊官贵客适知其名左馆右谷既而为之荐进於当途假之文学掾之阶而强之仕於是子问老矣曰我无愿於仕也而不能无愿於禄俛首束衽忘数千里江楚之劳而赴焉人或以为子问喜余曰是未足为子问喜也余乡人之所期子问於杜氏与诸老先生之泽殆不止於是也虽然子问之年非甚高而衰也人之於子问其知之亦非曰止於是也然则子问之於杜氏之於乡之诸老先生之泽犹可期也於其行遂酌酒以壮之而文余言摭而书之以以为序

送杜孟传之石门洞序

儒者杜孟传其先蜀人刘氏也於前溪先生巨济为八世祖巨济之孙为文节公德修西南学者因而尊称之为後溪先生者也其家世文学风操余知之稔矣已亥庚子岁俱去乡关侨处於杭一日来告余别曰吾以贫故不能忘尺寸之禄然得一山塾瘠甚恐无以给吾孥而幸前溪公之蹟在焉盖括山之石门洞东距永嘉相犬牙三百里耳其初岩壁险峭草树蒙密人无知其名字者往往不过为山魍木客之所栖托宋景平中谢康乐守永嘉寻幽得之始渐渐以诗传於人至梁天监有中书侍郎丘希范唐大历侍御史丘丹州刺史裴士淹继至皆有诗唐末洞废宋皇佑改元蜀李尧俞守括洞始复复五十年当绍圣三年而前溪公守括有监州杜穎行县过其地觉有异戒从徒持斧斫道见之写图归以相诧前溪公惊愜即饬吏新葺之时米元章守漣平生兄弟交也驰报属书其所为石门洞文於是林泉云物雄词丽藻相为光辉而洞遂为东吴形胜第一前溪公去洞又废废二百年又稍复洞旁官为创塾而不肖孙承人之乏实始幸得瞻余风拜遗泽虽藜羹糗饭犹将甘之余闻其言为孟传喜益赞孟传亟往今人礼法家常轻词章厌游覽是自有说顾如石门者非遇康乐以来数公若君家先大父发明之而使稀奇诡杰之观藏於荆榛狐兔弃於樵苏鬼物良可痛惜孟传官虽卑禄虽寡视先大夫身为二千石徒想像缣素间不得亲往而谢邱李杜诸贤虽得亲往然亦有官府不能久岂若孟传三岁居游其中朝暮仰窥岩林俯听鸣泉之为乐哉孟传行矣他无以为言矣所知襄阳孟侯年方富清而能诗今适为其州焉其又将为石门动心乎

送高虎臣序

古之学者必始於乡七雄以来始有游学然漂流至汉而济南伏生广川仲舒之伦皆以居里着其名行示有本也宣为名州又江南部使者治所简书之宗衣冠之业舟车之冲职庠校者恒多劳而少誉非望实兼茂畴敢居焉南陵高君虎臣醇资清裁隆齿俊业魁然为桑梓称首遂奉省符来正本学为之三期佩衿归良寮来推平官府称贤由是道也岂惟行於乡虽达之天下其谁曰不宜君子以是知高君之学成而将仕也满秩之日驩謠腾兴裒编载【缺】冠

以序引元贞丙申十月望前进士剡源戴表元序

送赵生游吴序

邑有隗者赵生寿父美其衣冠过余门而别曰樵孙生於燕娛长於艰虞年几壮而始知学然而未尝知游之乐也惟家世父兄尝宦於吴今将往而涉足焉惟长者赐之言词以先之余闻而嘉之夫吴古奢国有陆海盐絺稻鱼鰕冶之饶闻於天下其地形介於荆越姬太伯之所逃夫差项籍刘濞孙权之所用也然而有言偃公子札之化故其人多闻而善让有朱买臣机云兄弟之驰骤故其人好词章而长说谒有范蠡张季鹰之慷慨高举故其人机变喜事而无留心其山有虎丘灵岩之崑富峭刻其浸有松江震泽之弥绵浩滉烟云鱼鸟池台苑囿渔帆歌酒之玩日充於前故其居者抚资内足可以不出户限而通公侯其游者轻装空行亦能谈笑跬步转易拱手而居千金昔余之少也当寿父之年则尝游之矣其君子者余尝亲之其故实犹可徵也其野人者余尝接之其质朴犹可治也迨再游之不如昔矣迨三游之又不如再之见矣今寿父之游其得如余三游之所见者乎虽然寿父之游不可已也寿父不可已则有一焉古人之游必择国既择国也而後择所与游寿父其既有所择於吴否乎吴之良大夫以余所尊敬莫先於方处州因处州而吴之所与游尽在焉寿父至吴其以弟子礼游於其门安知余三游之不能得者寿父不一游而尽得之山川风物盛衰荣枯外物之美皆不足为贤者道也他日充囊饱橐满欲而归则复以报我

送贾敏求序

士大夫学成於家行孚於乡而不得食一命之禄以酬其劳而至於子孙三四世停涵鬱勃则往往有清疎秀谨之气外发而难遏君子以是占为将兴之祥若吾贾君敏求是已敏求之先高大父府君为婺州乡先生婺之为州有苏颍滨词章之俗其人喜清言而知理道有吕东莱渊源之化其人务学而敦本风流薰滋鍾於贾门府君既恬於势名即退而考盘一邱诛茅涧冈之上蒔花种木终为寿藏学徒致筑场之慕乡人修祠社之敬至今蔚蔚芊芊云滃雾积甥孙中外重裊列骑时节拜扫以为金华之阙里焉敏求收炊於既获食果於愈熟奋其妙手一出而游东诸侯诸侯嘉其才再出而来为吾州学正吾州之士师其贤余与之游三年见其嗜善如饮食之於正味虽日习之而不厌也恶不善如行路之於臭秽虽人不可违而必避之也呜呼岂非世家习礼问学之所成也哉孟子曰君子之泽五世而斩小人之泽五世而斩释之者曰其人君子矣不幸易世而非君子也者其泽犹可以五世所以厚君子也其人小人矣幸而易世非小人也者其泽犹五世而後斩所以甚小人也使世世而君子虽百世不斩可也敏求行矣可以仕矣天之厚於贾氏久矣先君子之积至於敏求而亦可以发矣故於其行也与之饮酒与之歌诗而复赠之序

送贡九万诗序

学之於人不得而废者非欲以求仕也而有仕之道焉古之君子学成而不仕者有矣则始以其学教於其乡故仕有可能而以其学教於其乡者不可能也後之君子则不然曰吾宁不暇

学而不可不仕呜呼是不亦重其易而轻其难耶宣学他时为江南儒府凡缀教职於其间非才望高美谁敢居之而贡君九万蔚然以乡闾之英板授而来为本学正三年终更士论称善君子嘉其能学而望其仕也咸为歌诗以褒勉之而属笔於前进士剡源戴表元俾题编什之首云元贞乙未岁秋八月望日序

送孔明远序

余儿时闻孔圣子孙有避靖康之乱而南者寓家於衢四世而枢密公由太学发身位至两府余生於单寒长於乖蹇欲修好於其门莫之能也已而其子明远以公府高选被符而来为明学正始得扳缘事分凭托意气缔交游之谊焉盖为明远者居三难而备四有余於是久而益嘉之明远承圣人之宗欲守其法一难也为人师二难也少而孤三难也然明远严於自修有泗侯持躬之愿精强嗜学有丛子纂言之勤当公能让有岭南辞禄之洁见义力争有宁州诛妖之勇以此四有而行三难宜乎诵弦洋洋冠裳锵锵舒英乎圣林发名乎儒堂为家之祥为国之光者矣三年教成怀牒北上凡我同业声为歌诗而谓余也厚於明远且尝从事於卜商卫宏之学属以为序

送唐君儒序

杭学为东南望其来久矣士之自四方万里至者游多於居又多尊官贵僚博士朝暮将迎奔走仅幸不失事故尝不暇数数与诸生接而委责於其正正之为职其任重且难无疑前是典选者於学正阙辄停笔不敢轻注必择学识才行卓然有称於时而为士论所压服者然後授之大德己亥秋樛李唐君君儒秩且满杭士贤其为人而重其去羣谄於剡源戴表元曰唐君学醇行良材通识清自其父兄家势之所振激里巷场屋之所推择则固已当濯纓青云之渊飞居积星之林年运而迈方由诸侯宾掾佐属计日积劳进名於天府此杭学之遇而唐君以为淹也凡我同志既各为咏歌道所以殷勤恋慕之意而子为序发之何如表元不得辞因为之序

送王子庆序

宇宙间清华奇秀之气发於祥瑞者为醴泉庆云珍禽异卉珠玕宝玉之属而在人也为文章才艺殆未尝一日阙於世使一日可阙则天地之气有时息矣然自常情窥之颇若无预於治道而自古秀人才士制作精能之极必待礼乐太平全盛之日而其事始备吾观汉魏以後书学始兴建於六朝士大夫往往能书如是数百年至唐贞观开元中干戈弭宁诸所以黼藻缘饰之具次第施設而欧虞褚陆阎郑王曹等辈鳞比栴拥皆极一时之选此虽人事亦天运有所啓而然与自是浮沉显晦又数百年而得宋之庆历元佑风声气韵大略与唐人无甚相愧而君谔才翁子瞻鲁直与可元章伯时诸公清才峻节雄词盛德照耀掩映有出於觚翰缣楮之外则又非偶然而然也元兴运化敷功比拟唐宋於以开明堂总章之观辑康衢皇极之诵陈器车银瓮之贡展天球河图之瑞神文灵绘岩书壁篆重译而来四面而致所谓书林艺府珍藏秘玩固千载一时之最盛者矣钱塘王子庆多闻而博览以公卿之荐陈轺诣郡遂将汗

竹羣玉之堂雌黄五云之阁平生知交贺钱满道余为备古今难逢之会以劝之

送陈养晦远游序

自余居剡源得一士焉曰陈君曰成字养晦养晦当其时年方二十许而丰姿器识如四五十者每见余狂歌剧饮叩壶击筑为沈酣痛快之适未尝不懽然与余和答以相乐及思极愁生阖门拥衾为呻吟憔悴之作又未尝不怵然与余同忧也然余平生好镌磨後生常自恨涉世太早故未亂而学未冠而游未壮而仕未老而休方气血盛时东南驰骛自许要不齷齪而岂知有今日穷居剡源欲为耕渔樵猎而不可得耶故时时愿养晦辈以为戒而不愿以相激发慕效自为此言诸少年闻者多首肯惟养晦曰不然士患不欲学耳欲学则无不可能患不欲游耳欲游则无不可遂必如公言是世之拘儒愿夫朋友不出保社之间耳目才周於几席之内时然而言时然而趋者然後为可安得聆度外之谈乎昔者孔孟之门固已无所不游无所不学故庄周滑稽史迁驳杂楚原驰骋而忘返扬雄污秽而不慙皆蒙讥後来而自适於当世吾今方将赋招隐歌远游洗尘冠绶敝裘不惟厉吾朝气以尽荆吴齐鲁之观而已闻燕代之南汧陇之北有魁梧奇杰之才自埋於博徒剑客者不可胜数吾将往而求之农桑什一章句兴亡之学不足为吾事也以为公当喜而强之而反咻我为余闻之为之心热不自持盖所谓伏枥之马闻北风而嘶鸣者也属余实已衰惫无所用於世生平有高交友散布四方甚多养晦为我物色而问其知余者亦必有以知养晦焉

送郑若晦游建业序

自言超迈倜傥好游之士所喜谈山川城郭风物宫室技巧之奢丽可以动心荡目无过长安洛阳成都广陵钱塘建业而成都长安以险远不易至惟洛阳广陵钱塘建业平途顺流一拟千里得用舟航輿骑代其跋履攀缘之劳故游者以为便然士非有事於进取与其笃好虽钱塘有不暇至而况数百里数千里之远乎乡友郑若晦与余同客钱塘之日久矣自其始游台閼之贵公方岳之名卿闻其才多礼致之而若晦每得余间即浮沧浪穿巉岩往来南北两山间弥旬竟日若忘归焉性喜作诗以江西葛处士庆龙为师得其法当意酣气适信笔取纸自书山僧道人见之懽欣爱悦更下榻致饌食留连不听去用是益无他人羁栖旅?乏絶憔悴之色已而若晦轻装别余云将改游建业察其势又若不止於建业者为之惊喜过当夫建业固余旧游相去三十年残儒遗老犹有能记忆不相忘者乎旦夕亦欲一诣广陵闻其蝗旱连年民居萧然未敢举足陕洛士大夫近数数接之其人恢疎厚重称其土风者也蜀道决不可登人生何用必入蜀然後为名士耶因若晦行即道平日雅素并以广若晦之意

送郑圣与游阙里序

东南慷慨士大夫异时局於地狭不得远游以为恨自中原道开游者响奔影赴惟恐居後然皆不能无所健羨未有无求於人而往者也余惟见吾里中僧六七辈相约徒步礼五台天台一黄冠思慕嵩高缙岭踊跃既至其地而归皆侈然以道自重问以所遇城郭富贵王公大人如目未尝见盖其心不在是也先师仲尼之阙里在东鲁今为兖州由吴越计之不过三千

里而近而人未有慕而游焉何耶不为儒者姑所未论为儒者平居高谈自命动以孔氏徒相缘饰或至诋浮屠老子二家如仇如不足与吾亢而为智反出其下长纓华组雕鞍轻轂憧憧於燕赵宋魏之郊又益外而远之踰万里不憚而其师之居在三千里之鲁则不暇至岂果力不暇哉以所为从事於游者有求於燕赵宋魏之外而无求於鲁故也江东之贵溪有郑君圣与名沂独毅然勇往余甚异而嘉之客有靳余曰子以为圣与之游理所必应然乎夫今之为鲁者非昔之为鲁者也昔之鲁也以夫子之教止行於一邦今夫子之书遍天下而郡国所在得设庙学建像祠则往往皆阙里也而子何鲁之拘乎且士患不学孔氏不患不能游鲁余曰兹说是也而惧愈为游嵩高五台者笑也古之君子其身存而人为之式其闕表其乡没而百世犹祭其社礼其邱陇甚者爱其所经历山川草木何也为风声德义有以芘存於人而不可忘耳夫子之道芘我如天地存我如父母其甚盛美非独余不能言而穷天下之辨博者亦未能为之辞也而诸人欲忘之乎苟诸人之不能忘则圣与之游为在所取矣圣与名在天官之板他日戴星重趂以求速化乃方徘徊蹙缩为人之所不及是尤可嘉也

送方中全北行序

曩时江南士大夫去关洛远尝患於难仕仕又必须材望虽有家门之行乡曲之誉而非官府公荐公卿通知则不可必得往往尘埋甯伏没世而无闻者多矣三国以来画疆而求尽技而用始有閎閎名字班班见於史册甚者床堆珪组庭业槐棘一门数世连绵而不絶是何天之生材偏嗇於前而丰於後耶抑亦人物之显晦时运之变通有适当其逢而不可知其然也新安之在江南以山为州儒其间者是不一族当贡举法行时方君中全之先大父广西公首以毛氏诗策名乡书登集英之甲科既而君父今通议大夫建德使君复用孔氏尚书为南宫进士第一於是新安道德词章之士致通显於时者虽多而语家世科目宦学能名必推方氏称首铨改举罢使君驱驰之倦既淡无宦情晚岁益贫落魄觴咏自娱以养其高年来仕路比曩时关洛又益加远子孙浮沉里閭间关往来侍养何敢出口言干禄事如是者积二十余年以事势推之则前所云江南士大夫生於秦汉间虽有家门之行乡曲之誉而沉埋甯伏没世无闻者累千百计何足怪也而岂其理当然哉久之中全一日过余而别曰存心今者行仕矣问何以行何以仕曰吾亲之名之贫之久不仕自中外诸贵僚举知而怜之於法上大夫得谢任子许授中士之秩幸而公府予之吾庶几其逢乎余曰是固官府之荐公卿之知江南士大夫愿焉而不得者也方氏家世宦学能名其将复自中全始矣请以为贺复以为勉

送张叔夏西游序

玉田张叔夏与余初相逢钱塘西湖上翩翩然飘阿锡之衣乘纖离之马於是风神散朗自以为承平故家贵游少年不翅也垂及强仕丧其行资则既牢落偃蹇尝以艺北游不遇失意亟亟南归愈不遇犹家钱塘十年久之又去东游山陰四明天台间若少遇者既又弃之西归於是余周流授徒适与相值问叔夏何以去来道途若是不憚烦耶叔夏曰不然吾之来本投所贤贤者贫依所知知者死虽少有遇而无以宁吾居吾不得已违之吾岂乐为此哉语竟意色不能无沮然少焉饮酣气张取平生所自为乐府词自歌之噫呜宛抑流丽清畅不惟高情旷度不可企而一时听之亦能令人忘去穷达得丧所在盖钱塘故多大人长者叔夏之先世高

曾祖父皆钟鸣鼎食江湖高才词客姜夔尧章孙季蕃花翁之徒往往出入馆谷其门千金之装列驷之聘谈笑得之不以爲异迨其途穷境变则亦以望於他人而不知正复尧章花翁尚存今谁知之而谁暇能念之者嗟乎士固复有家世才华如叔夏而穷甚於此者乎六月初吉轻行过门云将改游吴公子季札春申君之乡而求其人焉余曰唯唯因次第其辞以为别

送王月友游华阳洞序

松江王月友尝为余言其先人蟾客翁万里入峨眉山遇异人得道归而授其徒有林生顺衢者以岁辛酉游句容三茅之华阳洞所见奇花怪石飞台涌殿之类庄严闪烁千态万状不可胜纪因辞师友去不知所终当是时月友作诗夸饯之及他士大夫咏歌从舆叹慕者甚衆而皆有世累不可往後四十年当大德庚子岁於是月友亦以其先人之道被聘北游而能辞其官不拜归钱塘城中闲居之日久矣一日忽过余别曰吾之奔驰泥途霜露间虽幸而少休每清晨良夜思之未尝不媿於吾林生也今将泛太湖穿灵岩略毘陵抹朱方遂寻华阳洞而访焉子亦盍有以饯我余骇而问之夫神仙之在人间世其理之有无不可知就令有之则必忠孝豪杰之士然後得焉顾寒暑饥渴衣食之欲不必皆与人同而踪迹浮沉显晦自应去人不远但人不得而窥之自余识月友见其论平生交游至余所畏爱辄谆勤敦笃不间生死官阶俸禄可以荣妻孥眩僮仆名为有识者犹或好之而谈笑不以经意朱幡在前掉臂轻去麻鞋葛袍傲睨当世无枉求无谄谒以此荣其身虽尘埃市井烟火庐落何往而非华阳洞乎不然襟怀气谊有一不自得将望华阳之云霞草树咫尺不得至至亦非吾所得有月友姑少徐徐何如月友茫然而思恍然而喜曰吾非不解此然吾事不可止为子薄游而归幸万一邂逅吾林生则亦以子语质之因书以为饯

送罗寿可归江西序

古之所谓士大夫者少而学成於其身壮而材闻於其国及其老而无志於用则退而以其学徒於其乡是故有以一人而成千万人之俗余自知读书学文以至於今所闻见天下之士大夫略可以举其操若今庐陵刘公其非斯人也乎哉夫江西数州之在东南自二百年来常为文章议论之国庐陵之在江西数州常抗而先之若刘公则又抗庐陵而先之身在而世传其书言出而人取以为法精神气貌萧然偃薄於一室之内而环其州千百里之儒者顛倒倾动虽其怨嫉正色而不敢议焉此岂苟而然哉罗君志仁寿可之居接刘公为不还能以文得公之言而携之远游於浙河之滨浙河之滨之人闻其为刘公之所与也莫不爱之寿可又能自以其诗与文取知於人人叩之而不见其穷即之而不见其矫皆曰是宜为刘公之所与也莫不愈益爱之爱之则必有合寿可曰吾无意於合也吾之居吾乡不为无乐吾犹有垂白之亲吾所为仆仆而来者向也吾之至於斯也而不得尽其交游吾求以尽之今尽矣吾归也吾无意於合也余爱其言握其手而告之曰寿可贤乎盖寿可刘公客余亦刘公客余不敢不尽於寿可为寿可谋凡寿可所自道皆是也窃有以广寿可人之不得安於其居远父母弃坟墓而出者非独以尽交也亦以学也其为吏与商贾也不与焉寿可之游将以尽交乎诚已少足矣抑以学则子之乡既有刘公而复求刘公於他人之乡乎子归而竟其学学至於刘公之年子之乡有学子者如子之学刘公矣譬若宗子之子复将为宗不亦善乎而为寿可谋之乎虽然

学必一於道寿可盛年而时时学於孔子之外不可也若刘公学成而及之可也所谓小德出入者也然亦不可不慎也寿可之归也亦以请之剡源戴表元帅初序

叶茂叔之淮安序

人性之弛张靡凉通塞无不各缘於其土俗之所近故齐鲁多经生而赵魏饶壮士非齐鲁无壮士赵魏无经生也举其多者论耳天下名山大川一一起从西北其纡夷演迤至於长淮之广袤沃美不耕而善植少寒而耐居士大夫严庄重戴琴劒诗礼雍容喜功名谨然诺以为俗余尝官学经从见东南交游中有质直寡言不事奔谒谐媚谈谑者望而知敬其为淮客也兵兴以来几三十年加之以连岁旱蝗饥馑而民不移业士不废学非天之所资者厚而然耶高邮叶茂叔以名家良儒为正於淮安学余既稔与之善而需余言不已嗟乎茂叔往而惟母以见多者取足於已乎哉人有成言自知之为明自胜之谓强茂叔之职今非止於自知自胜而已也至淮安亦披胸倾臆尽出其蘊为同业者讲焉要必有观者茂叔其以余言为然哉

剡源文集卷十三

卷十四

<集部,别集类,金至元,剡源文集>

钦定四库全书

剡源文集卷十四 元 戴表元 撰序

送邓善之序

大德戊戌春巴西邓善之以材名被徵将祇役於京师於时甘泉近臣乘?而致词瀛洲仙官扬鑣而先途友朋星罗从徒蚁奔扳末光附余声之士饒善之於郊者退而无不颂善之於家曰嘻乎伟哉善之其果能去此而行其志也乎哉方善之清修苦学於隐约之中蓬门緼袍笔砚尔汝顾单力不可与饥冻抗则日与其徒歌吟古圣贤之说以自壮至於寒岩永夜声出风雨赤日流汗而挟书不知此其坚忍强志欲何为耶当是时有无故而与之千金度善之能辞卒然而加之连城列乘之贵较其乐亦未易以彼而易此也及乎名成行孚高卧而车马愈喧无求而羔鴈自至然後岸帻迎谒深衣拜聘其一时风规器量雍容谈笑之际度越诸人何止万万而岂一朝一夕能偶然哉虽然善之之志初不止此也今夫人之於饮也有饮水而乐者有饮茗而乐者有饮酒而乐者有俱不饮者不饮者则过矣强饮水者以茗有不能如饮水之安也强饮茗者以酒则往往沉湎醉极而乱习熟之久盖有初不堪升勺而终也能至於斗石何也彼其初自不知其乐之至此也善之前日之隐约也是安於饮水之类也荣途方开纷华嗜慾可以醉人之具不一惟无使之沉湎斗石而乱也哉古之论人也自弱冠而强以至於老老之为言考也成也他日善之取通使上大夫执珪结绶而归而余野人也将贺善之之成而因以考焉三月朔日剡源戴表元序

送贡仲璋序

天之生材犹地之产物随其风气土性虽穷厓僻谷海远野陋之处无不有焉然而非常之珍希有之玩口不能自言足不能自运往往埋藏伏匿积千百年而不得一日之遇而罍丹絺漆贝毛箇栝寻常琐细之蓄在於国容庭实不尽得之亦不足以备物而况於秀人奇士怀不可虚之艺而逢不可失之时者乎大江之南民齿多者以约计之郡不下三十万男子幸而为儒者居千之一而幸能以名字自通於上以取荣禄显仕者居万之一其选可谓至艰而得之可谓劳矣於万一之中钝堕慚急自弃者又所不算贡君仲璋以儒隐宣城南 湖上余尝遇之观其居家厚待乡顺怡亲悌长隆师敬客而余暇攻问学治文词种种不丽於流俗然亦窃怪其天资疏通爽迈可以用世而若未有所营者既而有司次第其庠序岁月之劳以名闻於中都而将授之以郡博士之秩前所谓甚艰且劳之选既可以安坐而得一日囊粮秣骑膝觚篋笔翩翩然告余以远役曰奎生三十有一年矣平居读古传记见才名气焰士必快慕之今纵不得如洛贾生蜀司马长卿吴陆士衡即取印绶节传为左右侍从言论之臣尚当赋两都三大礼献太平十二策遇则拱摩青霄不遇则归耕白云安能浮沉湎忍为常流凡侪而已乎余

闻其言而壮之盖夜光明月干将镆鄡之气将辞尘沙脱垢壤以发祥於时腾骧闪烁势不可止如余之徒则钝惰慙惫自弃往愿为弩丹絺裼贝毛箇栝而亦不可得也人之贤不肖相去若是远哉严装在途酒酣气倾书以为别

送曹士弘序

岁壬戌余初游武林识庐陵欧阳公权先生於秘书之署其人清纯简重虽居蓬莱道山间而布袍蔬食之气鬱鬱然见於眉睫余时年少自衒饰每从其所归未尝不发慙面汗也以杭学博士弟子识拜刘先生会孟会孟亦居庐陵其亦英爽峭迈下笔造数千言不休而蹶之无复近世轨迹至於清谈滑稽四面锋接一时听之略与李谿仙人何远然举足不忘欧阳先生十有八九语称吾师当是时欧阳先生以迂废高卧里巷不出余受刘公之爱於文字间特厚未几刘公亦归而余年长四方之游从日以泛滥其士大夫自庐陵来而喜与余交者则以二先生之故焉最後入太学太学之徒庐陵为多余一皆识之大抵其人之恢中强项敦志业而好洁修者欧阳公之教也其人之英姿高裁多风声而精体要者刘公之法也顾常数数为曹君学可商论及此学可曰子似未足以知吾州乡俗之美也子之称於吾州二先生犹以其名若吾父兄之在吾州而不获乎其名者子安得而知之余闻其言殊自悔以为稍久必当有以满吾志与学可别三十年余遂穷老不可出户闻学可死亦久矣而始识其兄子士弘士弘者於其乡之文献靡不闻於其家之行能靡不习余於是不独知士弘又因知士弘之父在其州即吾学可所谓不获乎其名而人不得知之者也於戏诚美哉己亥三月士弘揖选省户下倦游将西须一言以处别余自顾无以振激士弘而盛意不可虚辱独叙平生不得於君家父兄师友者还以谄於士弘诗不云乎乐彼之园爰有树檀士弘盍归而自乐其树檀乎哉

送吴州判还番易诗序

至大改元之秋七月州判官吴侯熙载秩满将还番易州之士大夫相与祖送於西津之门既而私相与言曰侯之来奉化三年民安其清吏慑其明而吾徒敬其文虽侯之才其槩於吾州如大庭之治小俎几不足劳者而出其绪余不可测之智不可干之威不可穷之辨不可欺之政已足以耸动其僚而为惠於吾人亦已厚矣故当抗旌结辙指挥诘斥风迅雨疾诸葛公之部伍位置取诸其胸中而措之也及乎藏锋歛颡韬潜谨飭冰淳矢直邴曼容之浮沉小官洁身寡过而求自免也迨至端毫振牍周遭整刷春旋枢拨陶士行之勤劳筋体愿有所储以待用而不敢惰也呜呼吴侯持盈而来奉初而还权虽薄俯仰无所忤禄虽嗇身名无所辱视同时前後得志不得志蒙瑕褻玷有幸全者有能若侯之浩然去就之间乎於是代者未至浙东都刺史按州大黜汰褒劝甄侯行能委以谏核符移丛凑侯意亦以愿有所激厉而官期满矣乃相率作为诗歌以发其未尽之志以乐侯之行而慰州人之思也昔者桐乡遗爱踰於家祀襄阳耆旧兼载名宦今而後吾州父兄子弟见山川草木诵侯之篇章经池台馆舍想侯之为人自不能以忘侯抑侯之去吾州其能以遂无情耶其年八月朔日序

送赵学古归永嘉序

古之人有视其世为不足居而忘之者其次有忘其乡其次有忘其家其次有忘其身其达之有大小故其忘之有轻重固也夫物莫着乎天地之运事莫甚乎古今之变今有人言山川之崩竭日月五星之陨蚀生人以来为衣冠为血肉为君臣为鬼蜮兴废治乱之故往往尝试而道之人亦尝试而听之有人曰我能蹈死如蹈生受危如受泰听者必曰是怪人也有人曰我能捐货财远妻子离乡去土而不戚听者必曰非人情也是何达於大而不达於小忘於重而不忘於轻欤盖推其远者易为理处其近者难为情也余於赵侯学古之归於永嘉也尤有以动余心赵侯生於神明之胄长於贵戚之里策名四十年不求人知白首下邑仕违其时不矫不阿陈力遂去尝窥其为人殆非有意於斯世者客食特久悵悵然无所归问南东行者知故庐先墓独无恙而父子兄弟尽矣辄仰天发泣不自禁一日修羸滕约敝篋戒陋车弱仆告行於邑中三四儒者噫呜唏噓悲动路人嗟乎赵侯人生离合之怀他时常有如此者乎余家世剡人幸既得一区於剡源之上筋骸方强法当佣耕以供三老人养具语不云乎人穷则反本势使然也赵侯之乡不得在永嘉而以永嘉为归亦值其穷者宦学可息合并无期赵侯归而自爱强志以光晚景所谓不忘其身者非全之之谓也力业以训子孙所谓不忘其家者非私之之谓也敦义以厚风俗所谓不忘其乡者非客之之谓也虽然赵侯行矣邇侯之心其不可得而忘者宁惟是三者而已三者不忘而曰能忘其大者是能忘於言而已苟可得而忘於言虽是三者亦可忘也於是诸公载酒饯诸邑南门而余为之序

送老甘秀才序

人幸而得至於老又不幸老而穷此人情之所矜而不敢忽然者也故先王之时於其老也有禄与位者尊而优之无禄与位而穷者存而赙之然其人必皆有以自重大之典籍辞令必有可以备咨访次之诗书学问必有可以教导其乡里子弟惟孤穷废疾无所依赖然後始仰食於有司而尽其齿然亦未尝使之生缺其养而死失其归也後世籍无齐民人一老而穷则为人所贱而老者亦气昏志阻不敢与强壮齿儒穷尤甚余来上饶之明年有池阳甘中立以行卷谒余於学宫即之貌枯而行腴学专而思宏与之谈於易书以来程邵二家先後天之义涉猎贯穿於苍雅以来字画形声之清浊轻重推索邃密盖江东之衣冠盛时一种高人奇士之所传授中立尝私淑得之而徜徉山林鄙弃科目其动心忍性之日亦已久矣自余之同业若所常还往皆敬中立而无以疗其穷中立浩然且将入闽余评中立非气昏志阻者闽多故家去中都进趋之途远至必有学徒筑馆重币而相迎於武夷云谷之上益养声实树门户俟着书成藏之名山传之其徒视世间虚有禄位而期颐婆娑黄金舆马淹淹日暮无一名可论者相去岂不远甚哉

送宋吾省序

始余读史记见苏季子出游时洛阳人举嗤之以为舍本业而事游说非其土俗韩淮阴无乡曲之誉不得推择为吏遂去窜於侠徒叹曰此犹先王之遗泽也当其时使有权力气谊者一人焉能时其缓急而驯养其才技以为良能则二子必不至但如今日之所惊异然二子非更困苦险厄何由肯自激发将终身俯伏民伍而已以此知往古士大夫所为多才而寡过者非赋性之异亦有以成就之也信之为州以余所知名贤比比而有渡江来中原故老无不抱恨

长息於此故其俗敦儒而喜义慕名高而重客施鈇山宋吾省自予之息肩无一日不相往来盖家世为儒久矣尝以其文艺受知於名僚贵将强之出因浮沉斗食佐史间不出乡而养亲结友之事粗足是既能清纯自重而秩满当调後无以自拔此非有权力气谊者之责而谁乎吾闻吾省天资萧爽居财殊不吝涩其与於人已多人不当为吾省惜属有行役为略书所闻於古近之故赠之且以为吾党劝焉

赠子贞编修序

天地之气发於山川风土其雄深浑厚平原钜野洪河乔岳之类往往皆在西北而枝条余委散之为清纖峭丽奇伟瑰秀若康庐九华桂林天姥潇湘彭蠡若耶采石之胜皆在东南岂惟山川风土为然世之君子诂量人之才性气质亦或以相似是故有适然而然者矣惟夫通人硕儒强志力学之士则不系於是故太史公生龙门耕牧河山之阳稍长大即南游江淮上会稽探禹穴窥九嶷以广其记览吴公子季札虽早习文学而不憚北游齐晋鲁卫诸国日与贤士大夫讲论以求去其陋固盖不以生而受焉为足而他复有以成之耶余之狷愚生於穷海之滨长於忧患而渐老於贫贱其足迹之所经远不踰荆近不跨越其耳目所悉不过寻常穀穀之内无异通解其平生从游则又可相高者既不吾屑卑下者吾亦不屑之是真自弃而无望於斯世矣独时时俯仰方册见六合外事及间接古名贤人晤语如搔痒沃热聊复少自快意而已庚子之夏有中都官敝轡羸縑过余钱塘逆旅揖之气温而貌严叩其谈引古今绳墨洒洒然数千百言不止质其居居东平谥其官太史氏之属请其姓氏曹君子贞也余惊喜愿交之久而读其文属辞庄屈之洁析理孟荀之达而比事左班之核也噫嘻若子贞者非余之所当朝亲夕习以求成其才性气质之不足者乎抑余之愿交子贞知子贞之於余亦有不能忘情者焉而为子贞难为余易也何也余之狷愚长於忧患而老於贫贱者也陂渠之水瀦之以自濡虽亢旱犹可後涸注而决诸远则不如天雨之泽微服处庐巷人皆异之徙而居高指目多矣愚之狷愚瀦陂渠处闾巷之类也若子贞之道方当行远其势不登高不止而安得不谓之劳於余哉虽然子贞之劳犹能成余余非能成子贞者子贞家有贤父兄而所居东平今为儒府诸老先生方以类相先後进用於朝子贞往而试以余言谥焉无必丰於名必丰於其所可名无必充於其欲必充於其所可欲徐行而敏视多藏而善出是其学也倘庶几乎异於今人之所谓学矣子贞曰唯唯因以为序

赠黄彦实序

自老庄氏忧身厌世有不愿为材之意而世之鬬茸晦昧者托而逃焉呜呼是何不仁已甚耶天之生斯人苟不使材者率之则如勿生耳材聪目材明人之不可无耳目者以其非是二物则往往陷而入水火今日我之耳不愿为聪我之目不愿为明其不为废人乎若曰聪不至於听鬬蚁明不至於烛渊鱼则惧於聪明之过之论也而非遂以聪明为不美而不为也畜马愿其善走畜劔愿其善割者马之材在走劔之材在割也有恶走之骤割之鋸而宁得土马木劔焉不可也余少壮时州之慈谿有黄东发先生以经术行谊政业为江南名卿缘桑梓故每与余评核古近人物以为士之生世诚不可无材盖当时方以阀阅科举取士幸而有父兄之素场屋之目即拔援而试之试之以文墨记覽钱谷狱讼之类俱不可则名之曰道德展臂雅揖

垂绅缓趋浮沉谈笑羣衆中不失绳墨则咎责不加而品级驯致惟先生辈起寒远实用所长取知於人寸量尺叙然後至故其语执之良坚後生晚学化之亦皆矫然有自励之色而先生归而私督其家庭子弟者尤严於他人先生没二十年家单仕絶四壁不立平时炎門赫族势当同漸共尽而其子弟乃於中间方以材着大德辛丑之夏遇宣城校官字彥实者於杭问之先大夫乃东发翁也行藏本末无不习问之古今学问文献无不贯至於雄篇雅章机舂穀奔奇闻异解蹊通部属一一去人远甚兹非天之所生而家庭之所成者然耶以斯人之穷望於吾徒甚急令即用材又可得无耶虽然古人之材因事而见其未有事也如无材然彥实之劍与马惟谨毋使人畏其銛且骤而益务藏聪明以待事至而出之何如回宣城见王敬叔兄弟尤余所材也亦以质之是岁五月既望

送龚子敬序

大江之南土连吴荆当春秋时能以言词问学通名中原者谓之奇人汉晋以来弓旌之聘轩轺之传无日不至山亭野郭间由是功名驰骤之路繁而隐逸稀矣夫岂惟人物悬絶如是凡壤地所生名材异宝犀鱼孔翠蛟纫火浣之币空行人语之畜形容不经见於前世者无不争先自献以充明堂之职贡岂造物者固使之然而势不容不然耶近日之江南又异於昔人物磊落者十数公则皆出於科举科举不足论论科举之得士视春秋汉晋诸所以取之功过犹足以相补而世嗤之不已非徒嗤之且羣诋族诽之惟丹阳龚子敬过予与之商略此事犁然有当予之心者盖子敬之学淹通而缜实据古而少尤今其先人大父复俱由科举出为名公卿贤师帅童卯之年珎璜耳习龟组日履及今春秋鼎盛乃方从於大夫马後欲观上国之光此虽余辈累千百无足数而能见容乎抑子敬与余皆南产儒者浮沉里巷居常自诤不见用故每事退缩若无所解设见用将何以别异於余子言游之弦歌也而慕之者复为鲁恭卓茂屈平之词赋也而慕之者复为子云相如以风土评论天下士几於自狭子敬努力为江南吾党一出亦使四方诸人有所慕学於家庭谈於庠校者非空言矣余虽不能尚攘臂企趾为子敬助喜

赠相士欧阳生序

壬申岁余始自杭归鄞识长沙欧阳生於鄞侯刘朝奉席中欧阳生善相人人之欲问欧阳生者争慕先得之越疆而招排闥而迎幸且至则修衣冠振顔容候其一言以为穷达当是时欧阳生之装未解而他候其门者已若干人矣既而亦从刘侯来谒予予惊而问焉欧阳生曰不然吾技人也吾之技以达许人而心之所不贤多於术之所取者不可胜道也以穷许人而心之所贤多於术之所黜者亦不可胜道也用此虽屡许人人不以为夸而术尝不败余深异之以为生非技人也其言近於有道之言也自是相濶十五年余以忧患困絶佣书於鄞而生适复来当是时鄞之人旧识生者皆无存存者往往病废失业求昔之所依以为光华如刘侯之徒安可得哉人皆为生悲而生夷然不伤於怀不惟言谈趣尚内若有得乃其旅力趋镞矍铄比於刘侯之席轻健似复过之嗟夫欧阳生真非技人乎哉真吾所谓近於有道者乎哉吾闻古之善道术者若巫咸之於卜扁鹊之於医皆能相人得其道而不善用者为京房郭璞生其母数数於行乎生之来杭有学士张邓二君皆因之以书余未有以复也生归杭先以是似之

贈談星者謝生序

余十八九時游杭杭故多技術家其用星曆躔度去來逆順言人災祥貴賤以微名逐利者甚衆大抵重帘復肆業愈售則愈貴重不可?有歐陽可山栖栖自江西來白晝侍官壩設案席夜即篝燈露談市中余間往聽之術與衆星翁異往往雜取五行生剋制化之說士大夫既相駭惑而衆星翁亦共排斥之以為何必乃爾可山翁曰我術誠不能強人然不出三十年必當如我說也余遊戲猶記其語越十年去杭又二十年再過之舊所接識人物一一无復存者況於可山之徒復何從物色於是後一輩談星家无高下例以五行生剋制化為斷如兵法吏律從之則合於算違之則謬於測虽不識可山翁者靡不悉然余驚嘆錯愕竟不知可山翁之語何以如此驗也東山謝生亦學可山翁之術加精審初听似任心輒發及揣摩某禍後當如彼某福後當如此无不應其屢舄所經褰囊握券以候之叩門恐後噫可異哉謝生之父於余為同產兄弟本業儒儒无所售而出於此其意若以余為覆車之戒獨感可山翁之自信不以勞窳廢阻卒能使人尊用其道不疑非近於古之身死言立者耶而吾党何為乃獨不然因為遂書所見勵生且以自勵云

送李公度歸三茅序

余兒時聞江南山之美者曰句容之三茅有鄉丈人趙君蹲字立道年三十以閥閱辭翰志節當得美仕一日弃其家佯狂出門而逃家人莫知所之也徧國中物色不能得一老嫗云是子他日數言三茅試依其言求之使人至三茅夜半見一燈荧林薄間穴窗窺之果趙君即不敢驚問明日益以數輩破產挾持登車趙君不果逃然歸家无一日不恋念三茅怨其家奪其志曰必殺我竟以此怏怏得疾余嘗疑之趙君非佯狂迷惑者其意殆與韓退之登華山不返事相類耳人仕宦妻子岂无足樂必其山陵丘壑烟霞水石之適什伯千萬相遠於此然後輕性命而求之古之達人奇士一牽於世故欲有所建立則不暇得而偶念之者又耳目隔遠知之不深或知之虽深而制於累窳於力与不暇知等耳故如趙君之捐身行志世人往往驚駭以為怪事必若神仙隱逸方外之流无仕宦妻子世故於心然後有暇而深知之余未三十亦嘗以科舉得官道過三茅之鄉望其山而不得入窃有愧焉癸巳之歲於是年五十衰?退惰无復四方之志忽與道士李公度相遇於鄉城問之自三茅來欣欣然令人有駕青牛騎黃鵠之想而公度方以名字通籍金闕平生學力諸貴人頗有知之者則三茅虽佳將亦非公度所得有嗟乎異哉夫三茅之於世有非蓬萊崑崙方壺圓峽如道家所言之恍惚難至也而求之不能得得之者不能有是岂不系於人哉公度勉之歸掃其故居余迟十年之力俟諸兒孫門戶當杖藜芒屨屢訪君於東岡西澗之間尚未晚也

送郭以南為道士北游序

天地清明純厚之氣鍾而為聖賢於世使之自養而養人者皆具是亦可謂幸矣而世不可以數數遇也於是乎磔裂四出散而為異人奇士沉埋隱伏於山林岩穴之間大之或時而名世而小之亦能為高以矯俗吾觀古之崆峒鬼谷之徒踪跡巉峭言行詭譎往往皆是而李唐以來數百年中虽以賀知章姜公輔鄭遨之高才絕識動輒离家弃俗俛首去為黃冠師大丈

夫至於不得行其所欲而纵横恣睢无以自制何往而不可寄其身哉永嘉异时为公卿渊府一閤之聚十朱九紫郭君以南於其中以明经崛强自负朝游严徐之庭夕造金张之邸无不获者年运而老憊然不免有霜露忧则投章甫裂逢掖遂一往为老子役若终身焉既又憧憧然有啸苏门栖崧高游涿鹿之想人皆疑之余独奇之以南者盖余所云纵横恣睢无以自制焉者也资之自养既不足求之养人亦不能有余焉者也虽然以南儒者也儒者之道行如龙藏如龟夫龟惟不食於人故能全其生龙出而嘘百川雨八荒其去也人不得而知之以南去而简其资之以为食者慎其见求於人者其行也其藏也虽微老子其谁曰不宜

送庆上人谒陈使君序

人惟负超旷逖远之志者必有事乎游然而入焉不能无累於身出焉不能无以累於人则虽善游者吾犹病焉斯二累咸去矣徒游而不得其所为游则虽砥行竭走役役於道途之间祇自弊耳鄞为东南斗絕之处壤地相接而山之最名者曰天台曰鴈荡生东南不得一至焉以为阙故凡怀章之吏弹铗之客莫不顾睨轩举指为先登他日羣而质之得至者十无二三焉是非有遐疆絕壤之隔也亦非有其志皆不足以为也以吏游者以吏累身以客游者以客累於人故非惟不能深知之或知之而不暇践也惟夫浮屠氏之徒意往而辄至乐极而如忘彼其捐父母弃亲戚视吾世如附贅悬疣而不之省也粮糗不待须而给役使不待具而佚将何行不可遂而况二山之犬牙吾邦乎是故非吾徒之所能然也虽然为彼之游则易然为彼之游而卒无得犹无游也庆上人告余行将略天台而窥於鴈荡也问其故曰吾志於是久矣曰吾有母养不得出今则乡之户部陈公适为其州焉夫庆上人之游贤於他浮屠矣陈公又天下之端直博毅君子也子行矣必有以教子矣斯游其庶几有得乎

送恩上人归云门序

人之情莫适乎得其所欲耳目之适於游心体之适於居尤人之甚欲者也然至於权足为力足行而有得有不得焉而後可以言命昔者尝怪齐景公以贤诸侯欲一观转附朝儻而其臣有流连荒亡之讽谢康乐韩吏部以名士大夫一欲临山出海一欲离家栖华山而诸人惊惶骇愕防之如触禁犯毒乃若山林避世枯寂之徒轻装徒步欲行而行欲留而留略造意即得纵恣於所如人情之疏通滯碍果各异其逢哉东南之山卓然以名迹着闻於人人所慕游者不过二三十里道之相错远近不过数千由浙人言之云门最有名最近彼其左台右剡前沃洲後天姥游者宜不可缓他日谗其人百不能一二至有觉恩上人字以仁自四明脱髮即往居之为上人喜上人曰吾何为拘拘於此肩一簦缘石桥循鴈荡出金华洞过矢目拂灵岩虎邱浮金焦仰鍾阜沿瀟皖投匡庐二林久之略大小孤挹九华穷其势遂将摩洞庭跨巫峡历峨眉望崑仑然後返豫章经衡岳纵观於苍梧之野无难也已亥秋忽相逢西湖南屏山下曰吾游倦矣吾思之使吾有以自适虽居云门可以遗吾老无所适虽日游万驿未见多贤於吾云门者徒劳苦耳吾行天下有诗累百首平生高交友满江海今亦不挂念顾归而见云门花草树石皆吾饮食臭味见云门风林湍濑皆吾声音器玩见云门烟霞天露皆吾囊橐储餽见云门禽虫鱼鼈皆吾过从还往外此吾何求乎而复何恨呜呼噫嘻穷人世之适有甚於上人之行留无滯碍者乎上人之得於天也厚过於人也亦云远矣若余之区区固非有封疆之责

轩轅之累所居去云門東無十舍鳥道一宿可至秋高山中熱時上人爲我取葛翁泉釀酒列酌數行蕩濯五臟昏垢遂與上人尋大令之故踪歌徹公之遺篇陶陶乎噐噐乎喜而游急而休不亦可乎上人胡盧而嘆余亦颺縷而書以爲之序

送子儀上人北游序

自中州文軌道通而東南岩岷島客无不有彈冠濯纓之想彼誠鬱積久而欲肆其揚揚者也然皆不能無所誘焉其無誘者雖使周穆之御談廣莫於前楚國之卿夸侈靡於後听之寂如也故余窮居二紀以來多喜與山林世外若爲浮屠氏之學者相往還以爲樂庚子之春有越僧儀者訪余錢塘吳山授徒之舍貌甚慈辭甚文氣甚肅曰吾將北游余聞而異之儀公曰君勿異也吾之游無所愿於彼蓋吾居越吾於是泊然草衣木食而已矣長能游游南天竺視南天竺猶越也久而得一刹余姚山中初至之日山焦然爲之五年而山廕然然吾視之猶南天竺也徙余姚得天台之瀑布瀑布吾所未狎吾視之亦不過如余姚山中耳顧爲瀑布則有瀑布事瀑布有當北游者吾以爲如瀑布游且吾聞蓊邱之陰涿水之陽有五台焉因得一寄目以攄吾懷則亦幸甚而吾何知所誘而君復何所見而異乎於是余爲之懍懍自失不獨悔余言之淺且益信夫世外自有所謂旷達知道之士而真不在深藏固閉以爲高也於其行書之以爲序

朱尉開伯求葬親費序

朱開伯承孫在吾鄉爲故家子孫人無知者己巳之歲表元入館下同業生以其居於鄞也往往問識朱開伯乎則對曰不識每問皆然其知者諱之曰開伯學行在其先出宜不相接其少年者見輒啞然而笑表元然後始愧赧羞伏知其學之陋也蓋開伯之先世居桐鄉西漢時名邑者爲吏而有德於民遂家焉曰後世子孫奉祠我不如桐鄉民者也歷千年世緒不墜建炎之亂衣冠播越始有散而入浙者而紫微公新仲遂爲鄞人紫微公文章道德載在宇內聞公之風猶師慕之況其辱居吾鄉乎吾之愛其人也及其胥及其樹及其屋烏況其子孫乎表元既感於同業之言求交開伯甚浹時時從開伯誦家世所聞皆浙中士大夫之未言者其淵源本末可考不誣獨以父兄朴學不肯隨時作纖巧語故短於爭名他人或鮮知之雖然其家世則容有知之者矣表元得一官則失仕開伯亦抱會稽之牒而居惴惴焉窮相似也丙子之禍表元扶三老人走三州五縣犯死道數十越多年賴一親戚物色得之天台山中援之歸鄞久之益困謀居浙河之西又不可則迂而歸烏石又謀還剡以開伯之舊也往別之及門見開伯方儼然負其齊衰經失聲而哭其母却立俟其氣定問之開伯咽而言狀既而曰吾門不開三日矣誰爲吾來者問能斂乎曰幸斂矣問能葬乎曰吾無資也而何以葬問有以殯乎曰吾哭於斯非吾居也而何以殯問有爲子之喪者乎曰吾鮮兄弟也而孰爲之喪問有賻乎曰吾羈旅之人也而孰爲之賻表元聞其言持其手泣益悲之曰若是固朋友之職也爲之留行而圖之爲之經紀爲之告於人而人不知戚也返而告之曰是表元之未至也天下之物苟以其力致之者无不獲也天下之事苟以其誠持之者无不集也天下之人苟以其已動之者无不应也今夫端居而簡重守让道而不求者士之節也不愛其身严其親之終力盡而繼之以死者孝子之義也昔者子之先之居於斯也有其故矣則亦惟我禮義之邦有周於德而恤人之不

获者故轻千里而长其遗息於此今其车盖过子之门者其先人皆紫微公故所等夷者也且子惟不愿知於人人则何自知之今有所居而求焉而有谓不知子也者知子而不能免于於不孝也礼义之责有所归矣开伯曰吾心悻悻然安能为之辞於是退而次第之且系其私於开伯者以为之序

送铅山王亦洗归乡序

物之能为其类之宗者必异世言凤飞而羣鸟从之以万数世固未有识凤而见其飞者也诚使世之人尝见有异鸟而其羣万数从之则岂不骇眩而异之也故其名可闻而其身不可见不然方见异於人之不暇而何以能为宗庚午岁杨子江渔人网江得大龟长一寻桮之以进蓄水聚小鱼千百桮中鱼湊集龟口旁若拱伏聽令不敢言儿童强徙鱼置远处终湊集拱伏如初禹贡荆州九江纳锡大龟以其地考之良近然注家说大龟才尺有二寸虽古人亦未尝见大龟如所遇於渔人之桮者也以龟之易获不可见则其不足以识凤固宜孔孟荀韩之於儒其当为宗何以异於龟与凤然方其存时从夫子而游者去来之大略不过三千人孟荀加少韩之门不叛去仅六七惟其久也人始闻凤而宗之此一圣三贤岂翹翹然欲见异以取眩骇於天下之耳目直不忍孤守已道推而同诸人耳而奈之何人不可得而同也乡原流俗杨朱墨翟释老之同鸟鸢蛇蚓之同也羣然而飞羣然而游又羣然而止而已矣余初学儒时见世之慕利达者宗科举科举初罢慕名高者宗隐逸隐逸之视科举有间也当是时犹各有大儒遗老有名实者为之宗学者赖以不散岁月推迁心志变化昔之为宗者且将销铄就尽而士渐不知其宗吾为吾道吾类惧焉铅山王亦洗远学於余期月归省亲请益余书此说遗之余友李君明通释褐太学第一清修博学高文章亦铄之乡之龟凤也亦因以谗之何如大德乙亥岁十月望日前进士剡源戴表元序

送柳道传赴江山序

古之用人者权尊而法疎权尊则易取人法疎则人得以尽其材吾观周官六卿属吏多出於其长所自命汉晋之相沿三公皆得开府收召名士故薛宣有欲吏朱云之嗟而桓温亦以能客孟嘉为善然初不闻於庠校师儒之员有所辟置惟其学行有称於乡则人自闻风裹粮而从之此非独其人之难而道固不可易而屈也科举兴铨格密其说先裁之以中人以下可能之文艺然後拘之以愚不肖易成之岁月以至江南异时自通守令丞主簿尉若钱谷刑狱诸僚若州县学官注调一决於选部法不可谓不陋而人情往往不难於为通守令丞诸僚而一闻师儒之号虽百里之学亦趑趄畏赧而不敢轻赴彼诚知夫通守令丞诸僚不过簿书胥史勾稽剖析之类而师儒之职有不止是焉者则法之所不及又系乎其人之自为之软属者科举之弊既除诸选犹守铨格惟县学官以其秩卑付诸下大夫之领之者使得专志有志节者或耻为之而官益不重大德庚子岁吴楚闽越士待命於中书行署行署长取其阙升府俸宰士捧牒以次礼进其人廷授之观者以为荣而吾友金华柳道传得衢之江山焉江山固衢佳邑气清而俗简贵僚使客车马之迹罕至道传又金华良士攻文章通记覽不患无以尽其才昔夫子叹十室之邑必有忠信而忧好学之不至道传往而以好学鼓动江山之人道之成也岂惟江山闻江山之风者且将四面裹粮而来於以为明时兴文美化之助以成诸公能取人

之名不亦可乎道传曰唯唯

送郑南仲赴昌化主簿序

合天下之官自宰相第而下之至官於县而卑止矣合一县之官自其长第而下之曰宰曰丞曰主簿曰尉曰巡徼而卑止矣然尉与巡徼虽居主簿下而其职专权行势伸若不与县相混主簿虽尊於尉与巡徼而职不专权不行势不伸劳多而责先处下而辱近故有志节者或憚为之昔者余与友人郑炎南仲相遇於吴楚之间每酒酣谈论此事南仲於时慷慨喜功名不免有干禄意则为数数叹息不置南仲本闽中佳士年甫冠屡用其长技角於有司屡为数万人举首又进为国子生文誉益震至是诸公颇有知而荐之者竟用其力得湖学教授南仲喜曰吾不能忘禄而为此然幸而得免於前者之叹及既为湖学南仲不惟能自轩奋不失已而已及大僚贵客东南行者皆辍车屏从先愿纳交於其门於是人之慕南仲者若蛻尘而仙簿书箠楚之吏欲为南仲而不得者若坐重渊而仰青天南仲益自喜为之数年於法不得不调再謁於天官而有昌化之拜嗟乎南仲今日复欲翱翔啸咏洋洋然以儒者自命如前日湖学得乎於是人皆复为南仲叹而南仲亦不能释然以问於余余曰南仲无叹也南仲前後所居官异而南仲之所自为一也前日之大僚贵客愿交於南仲者亦非必其以官也今之所见劳多而辱近有尉与巡徼之不如者其官之卑而非南仲之所自为也南仲行矣毋以诱迁毋以胁阻余闻昌化山水之窟风淳而土美士大夫非乐静慕奇者不至将有怜子之才而援子於穷远者如湖学之知子者矣南仲平生同志者遂各为歌诗以壮南仲而谓余与南仲最旧也属以为序

送谢仲潜序

始余以文学掾游金陵时年才三十尔性喜攻古文辞每出难义策诸生以观其能占对与否则鼓舞抑扬之同时执简数百人有谢仲潜常在鼎甲中余爱其材而未尝不期其成也别去二十有五年余寄食钱塘市舍授徒於是耳目耗心胆销怯值稠人广席谈辩纵横辄畏缩如不胜况有所挟乎外者尤不敢仰首视乃闻有吴江教官能礼貌旧老自民伍起余太学周孔明於庠校间待以宾客不用官府法为之喜甚已亥秋八月吴江教官者满以謁来见余余延坐问之盖仲潜也曰自契濶来一日不废学然益更事诸变故寒漂暑歊较前为诸生时意气亦不复有其俯仰升斗之禄直欲少避嗇夫亭长诃辱耳故邂逅冠服与我相类者亦稍稍有志扶持之嗟乎仲潜乎始余爱仲潜尚不过相期文墨几案间事由今想之科举子略有器业者之所能办不见二十五年乃能涵养成就至此充仲潜之志所欲为与儒者之职所当为世上何有纪极而纷纷乎孰非与吾同类者居是世也同是人也虽不儒冠儒服而其名德可以临接我者吾父兄类也吾周之居是世也同是人也虽不儒冠儒服而其年辈推让於我者吾子弟类也吾柔之居是世也同是人也虽不儒冠儒服且不可皆与父兄子弟也而不幸饥渴寒暑之情若待我而获者吾比隣里巷知识类也吾忧之居也则曰吾必有以为之教也行也则曰吾必有以为之政也嗟乎仲潜乎儒者区区之一身而何以当衆人纷纷之求乎古法四十而禄五十而爵年愈高仕愈贵者人之望之愈详顾余之贱且衰已非世所齿及幸尝爱仲潜而期之而仲潜亦幸不负余之知也故於其去吴江而将受民社之寄且将进备乎郎大夫

论议之选也而望之以详焉仲潜愈思充其类而尽其职也乎哉是岁大德三年季秋朔日前
进士剡源戴表元帅初序

剡源文集卷十四

卷十五

<集部,别集类,金至元,剡源文集>

钦定四库全书

剡源文集卷十五 元 戴表元 撰墓志

安阳胡氏考妣墓志铭

大德壬寅岁余来钱塘授徒且五年识安阳胡士谦於中书行署恂恂然儒也於是诸公怜余老而加穷荐授之一官将行别士谦则方圆其齐衰經在苫块之中越再旬介友人以其母夫人行述来谒铭且曰今将奉柩归以明年癸卯岁秋某月某日合窆於安阳柴库村先府君之兆惟先府君之死与葬处盖不忍言幸哀而并铭之按府君讳泰字通父胡氏夫人王氏俱彰德安阳人胡氏世长者至府君父讳仙当金时选充行军副统壽九十而终生四子府君於次在三资特粹厚幼好学遂通贍经史居家庭乡閤以孝谨闻尝典掌本郡财赋有贷府君私钱踰期不偿者一不问比其死携券对几焚之至元十一年以差籍从军南伐道遇士卒急难常挺身救护全活者甚衆谓人曰此辈皆此方良家子弟设不幸不以正命死将何面目见父母妻子乎十二年守镇黄州充管军总管府知事十四年夏五月司空山等寨贼发劫黄州吏民惊散府君独誓死不去仍以义倡其衆力战拒守少顷贼来益多遇害夫人父讳聚清慎无余资夫人当笄为择良对得府君壻於家府君死黄州时长子方十六处益也次子处敬方十三夫人当盛年以贞节刻苦自励日夜力鍼纫机杼取其赢供师资费二孤赖教督皆成人处益今以行署秩满授从仕郎淮东淮西道宣慰使司都事处敬浙东劝农司书吏意天之念之幸而及於官禄得以婆娑壽考酬其前勤而夫人苦风湿疾以去年辛丑岁十一月三十日死矣呜呼兹岂可不为嗟痛惋慕而慷慨引义节如胡氏考妣者侪之古烈丈夫烈妇畴不谓宜哉府君年四十四夫人年六十四孙男二人曰怡曰默孙女三人铭曰妇义於後夫忠於前呜呼此安阳胡氏一门二烈之阡尚百年千年无震无騫

曾君墓志铭

江西之曾以氏雄者三南丰其甲也有居金谿之眉东山曰曾君叔翔父其先由南丰徙余远不及识而读其状识君所从游师友若周义山吴允文之属皆东南知名士即君之器业渊源风采固可以次论焉君讳一鶚字叔翔父少亢爽有奇骨曾祖琳祖次点父东山居士洪世以问学相授居士既蚤夜勸君於家稍长遣出使纵交声渐气摩靡不通究时方崇进士举顾於此不得志虽豪杰无以自振侪辈十五六通显矣君浮沉其间不倦不愆然性明决常高持风裁见乡人过误多面折少容贷及有不能可否事质成於君是是非非应口剖析闻者犁然而服也母胡氏卒居士年浸高君承荐寝膳冬温夏清晨昏起居无违礼居士壽考令终而季父病奉季父汤药如居士时事兄顺家事谕而後行抚诸弟友爱有善獎之少不谨警之患难则扶持之延良师淑二息族子弟有佳质亦纠收之治家严内外而好客恢疎乐易留连诗酒颓

然竟日人莫测其雅量邻有急难赴之恐後至賙穷赈乏尤不靳丙子之潰所在无寧居或相
譟张为閔君以静镇器衣冠细弱依而全活者不可胜数他日居士葬送车缟素倾村空郭出
累累百余里不啻皆前日受恩客也其闲居不言而教成无权而惠行往往类古义烈士去家
五里所得万石塘林壑盘蔚有鹤巢龟峯之目君筑室其下扁以龟鹤随隐义山诸公尝为赋
诗甚奇并溪种梅亦号梅溪翁琴书壶奕将婆娑以延老至元三十一年正月二十七日遂卒
卒之日远近士大夫知君者举痛惜之嗟乎使翔父君当诸公无恙时亦策一名不过循例如
是而止今诸公所成就几何叩其颠末有不忍言而君生有及於物死无愧於已诗书满门哀
荣称情非天道有以伸之而然乎君前卒以岁除夕得疾越一月少间家人以为喜忽索笔疏
遗言戒子以不可忘清苦亏友让意及勿以緇黄乱丧礼凡累十言又三日而瞑年六十有一
娶陈氏先君三年卒子男二起东起南女二长适承务郎庆元路治中张与绍次适倪清孙男
五鏗钺镇錡鏞女六长适倪诗次适陈圣广次许适吴相孙余尚幼诸孤以故葬缓大德六年
十一月某日始克窆於里之流光亭陈夫人祔铭曰鹤以羸存龟不利走奔予与偕藏兮今复
奚云昭之息潜之获既坚既谧惟兹幽宅

吴君墓志铭

君讳荣字景荣吴氏饶德兴建节人建节之吴唐末逃黄巢兵由歙徙美楼居号楼下吴家环
楼下数里间至今祠所谓吴尚书其远祖也曾祖俊章祖次佑父应辰赠承务郎承务公性冲
静生二子长安行以词赋中甲戌进士科调信州贵溪尉次即君少警敏甚母刘夫人尤爱遂
早授劳事以逸亲而纵其兄使专意文学家本儒俭自君为之垦殖日增纲纪日饬奉养日具
迨於晚年遂成高门簪裳轩骑熙恬往来诗书豆觴谈笑办集悠悠然令人忘死生之憾兴废
之戚才乎哉楼下居皆毁改筑栢水栢水者承务公本生家徐氏丘陇所在也於是君年高经
营滋疲诸人质成徼施者四面而至然平居最急义伯姊难嫁倾其私装女甥无依鞠如己息
他恤孤抚弱事闻无不为尝自书一编述大意示子孙曰栋宇不必华庇风雨足矣田园不必
多了伏腊足矣宾客不可踈在择交声名不可贪在立已施予不可吝在随力此其施为蘊畜
之可窥者也年七十六以大德壬寅秋九月二十五日卒於正寝卒之日人哀惜之娶康山许
氏子男三长大本次端本早世次建中为承务公本身家後女一适同邑苏涛孙男三长德馨
次德昌次德宏女三长适同邑张诏余尚幼初贵溪尉仕成而倦游间以郡檄起领乡校讲道
授业无虚日君又恢仁山之塾丰礼币美庖膳以招延名师江乡称世家多宾游文雅好礼者
必推仁山居士子弟居其间欣然渐於学问大本既精孔氏尚书复授德馨周易曰吾不能以
罢举废业也惟尝诵道书一夕梦神问南斗经中何脱二语耶明日以质诸所亲取刊本校之
良是丙子岁危病恍惚见修廊广厦有羽衣人拾刀圭药授使服之觉而牙頰间犹隐然丹砂
气疾亦随愈呜呼世议之隘士大夫天资高迈者人人思飞腾高举脱尘嚣机械以为乐将自
不可测邪癸卯冬十月某日大本将葬君於乐平州公墓塢前事奉天台主簿程君之状来丐
铭铭曰劬其功美其宗天不恶其丰深其居敦其初人不疾其踈惟兹新冈孝友之藏後百千
祀其固其康

杨氏考妣墓志铭

信弋阳杨君应桂既葬其父府君永年乡蒲鵠寻丧母夫人张氏又葬密石及是陰阳家胥不以为吉乃追用治命改卜於二莹之间得吉将合窆焉书来属表元铭之始表元年未三十客於金陵君掾当涂有能名才长一岁耳间以部使者檄同考试补太学弟子员一见结兄弟交於时两家各奉重亲安輿就禄养意气相顾驩甚濶絕三十年再来见君乡州问前事如梦寐忧患病惫憔悴亦具成老翁於是又相吊以悲铭何可得辞按状信弋阳之杨由建徙????出祥符内翰文公府君讳熔字子成曾祖和祖崧将仕郎考春廸功郎妣叶氏府君幼警秀不羣比壮信乡先生王伯羽学问行谊出诸生徒右迨二子能受书即择知名士为师而日以一编程所业既而应桂遂中乙科人为府君喜府君曰吾期吾儿不止是也饶信为江东士大夫窟藪景定咸淳中汤尚书以耆俊谢礼部以忠鯁徐正言以隐逸风采耸然临一时应桂东濡西染出闻珩瑛之音入瞻盘杆之戒不言而成良士至当涂傲僚宿师胥惊怖叹服以为少年安得乃尔不知其有所受之也襄师溃当国者悬高爵诱士士来如麻府君曰是尚可为乎应桂仅以文林资调括苍元僚以归聚宗戚保卫赭亭山乡民依而全活甚衆久之蓝山塾闕长儒望归应桂不得已许赴之遇是不敢以请府君天资高迈事不可忤而无含怒蓄怨馭家有法睦族有爱待宾有礼隣有义谢礼部之谪富川交游畏祸不敢造其户府君独持赆远钱至漚泽语之曰此陆敬輿忠州注本草时也愿自爱礼部归先寓书道谢语甚切至晚岁以家政付二子时时饮酒而不至醉以适性吟诗而不伤汙以适意盖乐天知命忠厚笃实君子也母夫人之状曰张氏讳妙静祖维两充乡贡进士举父孝友世为弋阳儒家夫人归府君相尚勤俭叶夫人性严少假借礼部铭其墓所谓治家中礼者也夫人承迎左右无违顺而正慈而节常举外家所闻见督二子以虚心好问自诸老处归闻得一善言为之喜见顔色府君没家迁於铅山之何田以气疾竟死何田府君年六十六生嘉定癸未七月十二日也没至元戊子三月二十六日夫人年七十二生嘉定己卯十一月二十日没至元庚寅十一月十八日今葬以大德癸卯某月某日子男二长应桂次应得子女二长适进士赵嗣惠次适进士游味道孙男三公审志学宏孙公审早世孙女二长适进士黄进德次幼曾孙男一爱孙铭曰既有为之华孰得而羸其家既有为之终孰得而凉其躬惟安惟穆归兹新卜斷坚书良永閼陰石

游县丞墓志铭

君讳子贤字俊伯游氏其先世居建之长平历汉魏隋唐官绪不絕详具族祖文清公倡所为谱建乱徙信今为信上饶人大观中举八行有以长子中其科官升朝积封至中大夫者君七世祖也曾祖某祖某父某俱隐不仕妣张氏君幼爽敏读书一目辄成诵十二三作诗赋惊人寻丧父孤苦树立卒以成学教授乡里养寡母嫁二妹虽环堵之室困庖屡空而时节设施展叙曲合礼度尝领乡贡进士举泊上礼部试成均同业及所受教者滔滔先登独坎轲不售辛未岁遂用累举恩授容州文学改廸功郎转循职郎调贛州兴国主学会文丞相帅贛一见奇君檄主贛县簿贛令倚君办其县事俗好讼有墓狱积年不能决一點胥一譁儒君承牒诣墓所徵讯得实传以经律具牒上府决之闻者相戒毋犯主簿教贛苦淮盐远不能致帅委君度岭运南盐至则为乡人徐经略留摄新会丞司其征赋盖当是时兵事新起官府奔播人无寧怀君佐新会廉恪慈恕如平时公帑之美不归私装商榷苛比减从其寛邑有谭氏林亭为登临佳处休暇则与寄公侨士观风访政其间广破乡民争迎致藏免君如慈父君亦以耄辞不复出矣并海买田宅婚男嫁女若将为新会民而终焉初君之由贛入广也属长子应梅居守

而次子斯道从迨弃官新会斯道以崖山巡检前死越一年君亦死女子嫁新会者与壻相继皆死十七年应梅始自上饶间关数千里跋涉物色问历得君殡於新会泔水里之?头村於是发土撒茨奉余骨归葬上饶某山之原以巡检衣冠祔兆域焉人尝疑科举士无实材予夺得丧若有鬼神焉戏之君起衡茅用文墨得一邑佐吏不为通显然所就落落出人意表上饶人能言布衣时淳佑间徐侯为礼行经界景定初黄侯蛻招义勇皆君画策建议临大事慷慨有马周张齐贤之风晚岁流离仓卒身羈家散竟以客死祸福果何如耶将事出适然而鬼神亦有所不能尽知其情耶闻义而行知难而退孤老穷蹙仅免兵革天又遗之贤息使游魂寓魄归妥莹庙然则君之於此自可无憾世不必皆知君也君尝种梅於所居南荣称君者有梅谷之目年七十五生嘉泰甲子十月卒至元戊寅正月葬以大德某岁月日配赵氏继王氏子男二应梅两请乡贡进士斯道女二长壻将仕郎济南辛衢次故廸功郎新会尉昭平周可翁孙男二长肖龙次肖鶉为巡检後曾孙女一铭曰生为劳儒死羈客腥风瘴霾魂焉簿不如乡邱安可乐嗣续展省延遗泽绵百千祀镇兹宅

故玉林项君墓志铭

君讳天觉字希圣项氏徽婺源人项以国氏後叶子孙散处荆扬间扬之项徽为盛所居婺源有山曰?崱嶠拔奇秀聚族负之而庐且累百年至宋绍兴中乡先生利用始以文学显有司三上名礼部虽不仕而其甥月湖许公锡用所受学去为名卿淳熙中安世父子复发闻於荆而族相望隐然为东南华门君曾祖童仕尚书省属於月湖为妹壻祖维寅浙西提刑司干办公事从外家学以诗鸣父一夔累试补太学不幸早世干办公亦相继迁谢雀鼠之讼惊於家庭君才七龄二弟襁褓母戴氏夫人跋涉挈攜以求直於郡县於台於部犹未免君年十四一日诵鲁论至死生有命富贵在天忽蹶然有感曰吾丧吾父丧吾祖又几丧吾家非天乎割壤以和母败吾温清诵弦事戴夫人喜且泣从之自是躬帅二弟承师稟学日记千余言援笔为文俊气奕奕不肯休未几母夫人以疾不视家政君独持门户而游其弟於塾当是时徽婺源与饶乐平德兴相犬牙号多明经生如吴君遇龙许君月卿沈君贵珞李君睦齐君兴龙梦龙之伦皆负场屋重价皆喜从君游每进士三舍榜出金铃彩帜霆轰电驰华轩苍盖鸟集蚁附项氏塾必在指拟中於是君兄文荐既登甲戌高第而弟若子迤邐以次充贡方增创玉林精舍益延师招友聚书讲学魁儒胜士四远如流而来玉林之西有别墅池台修洁花树秀蔚幸时节闲暇采芳钓鲜以供觴咏於其间一时规模风致使人娓娓如欲绘画君少历艰险长经离析精於人情世故华皓康裕以造物者怜其愿而娱之然性不吝滞见义即为遇急张弛尊幼贵贱贵无巨细得其一言而解仇释憾多矣戊戌之岁以七袞称庆膝下斑斓彩舞者几三十人羣从姻游可千客君饮酒谈笑应接累日夜不倦最後夜半执酌言曰吾辛苦树立偶不坠先业田园虽薄足了汝辈耕织即死亦不为不壽万万无恨因出手抄处置家事条目示子孙且顾次子之祥之为徐氏後者曰明年今日能复见吾子否乎心期何所不至恐天不我与耳明年及期复为壽无恙不越月疾动诸子拜医请药君曰天不我与医药何为嘱治丧勿用浮屠老子法言毕而逝大德己亥十一月某日也君生於己丑十月某日也享年七十一初配同郡张氏检校公孙女生子男渊然之祥起元德元继室康山许氏生福翁吴氏生采孙为宗人斗南後女一壻番阳教谕徐岱孙男十传孙良孙兰孙平孙咸临德善性善友善文孙拟孙兰孙为之祥後孙女二君尝自卜地於里之五葩坞以故葬缓及是将用甲辰十月某日奉窆前

事以乡贡张君之状来谒铭铭曰逊也而强约也而康吾观其人玉雪春阳言行志酬归藏兹邱呜呼永世无震无譴

故礼部进士徐君墓志铭

取士以明经设科垂二千年其法详记诵精传注使人崇本勤业不虚为浮藻而已王荆文公行新经义始命举子昉对策依题为文多者遂至泛滥累百千言呜呼取士明经授题限晷刻仓卒至累千百言而求上不畔先王之教与老师宿儒相传之说下不失有司之程度岂不甚劳且难哉余来江东闻饶士徐君志禹未弱冠以尚书应乡贡进士举入院日未晡不点膏已篇满成文复纾余思拓别纸纵笔滔滔成篇同院生仰视交口惊异比揭名君与兄尧龙聯翩居前行再作者亦冠二榜时饶士以尚书为额踰万计充贡者才十五人君方妙年逞高才能捷取奇中如是世所称贾谊陆士衡何足多慕既而其从子之祥以君将葬状君行来求铭按志禹讳子邓字志禹徐氏饶德兴人徐之世出伯翳传偃王以慈弃国民为立祠龙邱依而居者代不乏显人唐季有成避乱黄顿子盘游学於饶因家焉是为君七世祖曾祖允武祖次陈迪功郎循州长乐尉父公着迪功郎致仕辟东轩数十楹以琴书娱闲自号东轩翁君少聪穎其学尚书以乡先辈舒君成大余君木为师宗人节甫为友间塾栢比书灯荧荧君雄其间乡举之岁在乙卯人谓明年南宫试乘锐可平掇既不售益自刻厉曰天将徐之以大吾成乎先是东轩翁以好客闻乡里之客有器识能文章者往往聘致结约恐後君继其志礼鉴有加如程君显甲洪君以中平生游从最厚自余吴君安行曹君应龙张君应霖方君清之流以姻以旧朝熏暮摩久而益亲晚岁学成行尊世念踈落而故相集贤马公退休於家时时相过访道德之遗言考古今之故实翛然非复少年场屋时徐志禹矣所居西偏旧有会文之斋曰化龙至是增葺改名雨轩尝谓子弟曰孔孟之道昭如星日学之者可以修身缮性可以康时济物秦汉以还异说朋兴其慎所习勿为虚诞蹇浅者所咻庶几有益於世闻其言者知君非科举士且悟雨轩之云将有所润泽也君承亲孝抚弟友处族婣和虽不显融充裕而天与公多男子有田可食有经可传於世未为不遇生以戊戌六月某日卒以大德庚子六月某日享年六十三娶张公廷评公孙女子男五大中积中敏中允中高中女一适同邑张涇孙女二其墓在里之塘源葬缓有故以甲辰九月某日铭曰虽衡且角云族而不泽吾藏吾斲以还於冥漠是之谓真宅

游乡贡墓志铭

余至信州之明年於是上饶游叔大既踰岭返其先人新会府君之殡且葬而属之铭余既哀而铭之越二年叔大卒其子又亟俾铭焉呜呼余之不腆其审能信然於游氏父子之间乎按游氏之谱远自汉魏隋唐以来不乏显者五代避建乱徙信大观中八世祖以子应八行科登朝积官至中大夫详已具新会府君志江南之族贵进士其法每州率四百人拔其一谓之乡贡信多词赋以词赋充贡为尤难新会府君起清门挟俊能同业既让为先登叔大甫弱冠随羣授牒辄复得之旗铃踵门冠盖属途州闾以为荣然叔大资严重不切切於卑近之获早即从徐岩为陆氏之学者游於时汤文昌黄台州皆以显官领祠象山寒鑛暑研颇见条贯遂归筑室於翁山之阳自号翁山翁癸酉岁以举首再贡於乡将试礼部遭所生父丧不行而举罢

矣初科目士厌词赋雕篆无益故试之明日加试论一道又明日加对策三道以观其真才试者殊不能并焉叔大自为童时举笔已峥嵘惊人迨於成立诸大家不惜礼币聘致以为宾师楷则雅善教诱欲学即授以捷法听受者无留难晚涉忧患家事日落饘粥因赖以粗给尝有推毂为婺源教官者辞不赴惟为郡博士一出当其计会兵毁後殿庑舍次藉之一新新会府君之入南也叔大居守而弟斯道从隔絕十七年不得达乃刳心鉞形忘饥渴瘴潦数千里而求之则皆已死发哭踊擗如丧得二鼓於泂水?头村负骨以归士大夫闻其事者举为诗文以感叹嗟伤之叔大於人惓惓说直多忤少合而人矜其情不为怨宗姻交友遇有所疑必来询谋燕游谈会经酣史薰琴怡奕畅恢恢然通儒达士也喜为诗以邢居实之名名其集曰呻吟叔大讳应梅字叔大曾祖讳曰新祖讳敏父新会丞讳子贤先娶余氏继周氏子男二长肖龙有偶质先一年卒次詹为弟崕山巡检後子女二适余烈周某皆业儒孙男一隆弟孙女一生辛丑四月十五日卒大德乙巳二月十八日年六十四临絕不嘱家事诸孤奉其教居丧不用俚俗礼十一月某日葬谢郭铭曰生无悔於身死无愧於亲吁嗟乎斯人斯人

剡源文集卷十五

卷十六

钦定四库全书

剡源文集卷十六 元 戴表元 撰墓志

吴孺人江氏墓志铭

大德丙午岁之季冬余将发上饶有儒生吴自徽婺源不远数百里来请铭问其葬大母孺人江氏也读其状塋浮梁文学掾操君茂之为也余以礼辞不可则据所受状为之辞孺人讳秀字静贞江氏世居徽婺源之虎溪其先有讳云者仕至银青光禄大夫五世而至参议公振於孺人为曾祖参议生三友举进士於孺人为祖进士生一龙於孺人为父虎溪之上二十里有山曰冲峰嵒崿峭厉盘绕而为村下有大族吴居之江吴世为婚姻家初孺人之大母汪氏送女於吴识帅厉公之子克珍字贤翁於稚年语其内子齐曰是儿硕貌寡言重迟不讷异日必受成福吾孙女一甚爱择於他族多矣必嫁是儿媒者曰然卜者曰祥而孺人亦归於吴孺人性沉毅闻义即从其始至亲馈之次姑诲之曰吾家闺阃以柔顺为法柔故能持刚顺故能处逆尔谨识之自是於吴氏之门承亲相夫接族馭隶一準其轨以至白首嗣主家政吴之上下内外无不悦喜惟训飭子妇则严不可犯岁时节朔有进新衣者曰吾适体足矣文绣非所爱也有献美味者曰多杀而伤慈亟食以易疾不若蔬食之安也晚岁貲筭益丰不以为意遇穷乏必思施贷里中多阻溪涨创杠梁以济涉者尤重儒业文士诣门朝夕为亲视饌膳有加礼坐闻诸孙讽书声喜津津出眉间或躬携枣栗以示劝赏每叹曰吾吴氏积善者累叶矣天不违人必有以诗书显其在兹乎辛丑九月十八日以疾竟卒年七十五子男二应杨应燠女二孙男五璫玮环玼孙女四曾孙男一颐女一葬缓有故丙午十月某日始窆里之善原铭曰兰幽而薰玉韞而氛吁嗟贤柔作则吴门後有君子尚考斯文

单君范墓志铭

吾剡源有为明经之学者单氏讳庚金字君范君范初与余俱以词赋行州里间有微名既一再不得志於贡举即去而他游庚午秋予在钱塘叨太学荐送两浙漕运使者亦以君范名闻明年春予成进士君范竟守母丧居庐迨甲戌岁始来就南省别试所乃见黜免於是遂归隐剡源晦溪山中者三十年日夜取古圣贤经传遗言洗濯磨治家无赢余口不道营殖面不带忧愠饮水茹蔬客至开门清言款接忘倦盖真以德义自给者而予解弃官守携持老稚晚方徙依君范同乡而居每见之未尝不内愧也君范卒且葬其孤函裹父所着书及事状来徵铭按单氏之籍自婺迁明奉化凡三枝居湖山枝称会稽理曹掾德旗居下郝枝称乡贡进士渊而晦溪枝称君范曾祖光喆祖大年父钦字崇道世醇儒君范知读书崇道公辍衣食用以供其师妣龚氏尤贤明游学资费取之簪珥无吝惜其书已脱藁有春秋三传集说分纪五十卷用吕氏程氏所纂自左氏公羊传谷梁传以来诸家之异同定於一书後学得以依据又解春秋正经题为春秋传说集略者十二卷又读论语去取诸儒本题为增集论语说约者若干卷杂着五七言诗拟古乐府题为晦溪处士余力藁者又若干卷嗟夫君范惟无利禄得丧於心

故能善其道全其身若令得一下士之秩碌碌驱驰尘土中终复何所成就令居产能致千金装孰与清素传子孙之为安然君范性谦旷非若他人能商略利害为避就往往大山长谷故家遗俗风声气泽陶写停积而致然乎生已亥十一月十九日卒大德九年乙巳十月二十四日壽六十七娶鄞县西山吴氏子男二涵池孙女二素心如心以十一年丁未十一月某日葬嵊县忠节乡葛竹山之原兆域手自铨制盖於地理家亦臻其奥矣铭曰大山嶙嶙长流沄沄是为晦溪明经处士之坟百世之下寧无智者勿躡其石勿剪其櫟

赵君理墓志铭

君讳与葺字君理赵氏明奉化人赵之先皆汴出逃靖康乱始南来而君为燕懿王德昭十世孙曾祖伯璵宋通奉大夫妣王氏硕人祖师简朝奉大夫知澧州兄弟凡五人俱擢进士科贵显里人号其居五桂堂妣陈氏宜人父希耘从事郎嵊县丞妣史氏孺人君生而贫长而兵其持家赡亲以犁鋤笔砚余识君当十三四时清羸秀削不类贵家子得钱即置书研猎奇异广蓄精取每见必有叩诘审阅幽宏奥妙若有鬼神授之者一日访其讲庐不遇遇诸郊途问何适曰闻二十里外社庙有古碑往寻之果然得以证某误也因喜不自禁尝示一文戏以少史汉气明日复示笑云较史汉气何如其苦心慧悟非寻常才子所及而善生殖世墓在州东白水村买山及陆地开田堰水课僮丁某所种禾菽某所种枣栗高卑位置具合绳度然平时卷帙不离手初未尝见其喜为农圃事也三十复一出游吴时僚才士举慕与之游以病归竟死白水村不娶无嗣以其兄之幼子衰經主丧遂葬世墓旁而弟与声来乞铭呜呼余实村居厚君而忍铭君乎而忍不铭君乎君所为杂诗文散落仅存者若干卷於氏族有姓源於州里有鄞城志於字书有汗策於諡法有諡谱於古今有圣贤羣辅録生甲子十二月二十七日卒大德丁酉七月十三日年三十四铭曰生之奇曷不益其羸成之疾曷不舒其逸郭门之东有桂丛丛有麓隆隆聯城异宫祖孙是从

陈府君功父墓志铭

明奉化之陈有自闽来者开族於海陰海陰後名忠义乡而陈以文章科目遂为乡大家余弱冠客钱塘姑苏即及从之游一门羣从东觚西檠左觶右璫轩轩然而趋嫋嫋然而休也功父君在昆弟间独诙谐脱略若不屑意时好者余甚异之功父君讳晟伯字功父一字止善曾祖讳聰谋故不仕祖讳师稷善词赋尝试进士举不售去试武举絶伦又不售辄归而问道於乡先生杨文元舒文靖沈端宪之门里间推尊为仪范壽八十三以子贵为宣义郎致仕贈朝散郎父讳育孙韬潜笃厚绣衣公即其伯氏一出仕亟为当途所知用麾驰节奔不暇私顾因尽任其留事辟广厦几千堵瞻同堂数百指娱适朝散公无亏容每曰仕者养志居者养体其为孝一也斥余资倡义於族党至今岁时序拜樽俎犹守其遗意晚岁以恩补迪功郎致仕功父君幼习孙吴书有祖风疎财好义用父道岁丙寅以有阶注铨调隆兴军使转承信郎辟殿前都统司干办公事右司梅公应发一见奇待举【原缺】任使制词有借迺发硃之獎至甲戌多事急材超转武节郎将有授任而府罢矣筑一区於所居山之左榜之曰东塋耕舍日求异人元客与之讲驻形链气之说亦以其术求人疾患时验虽重费不计惜既而慕龙虎山清妙徒步往谒寻受其山中师号以归晨蔬夕脯午饮三行不至醉曰吾饭用清猷酒用康节法也

迪功旧刊解氏义居图教戒子侄君继其求施者纷然性笃孝母病不解衣扶掖者数月父病有加焉既歿躬负土合葬事毕益厌尘浊有长往不返意以大德九年乙巳八月十日竟卒生乙亥九月三十日年六十七夫人赵氏讳与康燕邸诸孙先卒二十六年子男五绍宪绍恕绍俞绍弇绍俞为仲弟後女一适汪恢春孙男二宜宣於是君所自卜壽藏在耕舍西巳山之原绍宪等将用某年某月某日葬其兆并附赵夫人而介世好来请铭铭曰曰独而独曰羣而羣不离其人曰左而左曰右而右不失其我林木之苍然风谷之琅然缥缥缈缈归来乎兹阡

伯妣袁氏夫人迁葬志铭

呜呼我伯妣袁氏三八夫人之谱由奉化城西管山居鄞城南世远不能详其始所仅可知者外曾大父讳珏外大父讳伯显皆不仕夫人归我伯考拙道居士府君时家方贫政出祖妣郑夫人持综严急居士府君惟豁达好饮酒寸丝勺米心筹手量然後经用犹时时阙絶又多生育初得女曰凤娘嫁同里连山王之礼长男表正次沂次庆孙次表元沂以後鮚埼谢氏姑而表元以後仲父伯妣夫人慈甚见人穷窶忘已之乏必予之乃已常被遣出治南山下龙潭村别业村中媼嫗闻夫人来懽忻服役至有所须不言而如约用此生理少振然累日重竟悒悒以病归卒於家乙卯岁九月七日也生丙寅八月十五日子时年五十时新遭祖考府君忧坊郭庐舍不能数堵大丧在堂小丧在户仲父负重衰力贫以其岁权殡夫人张山下陈园旁以待他日得地而迁焉表元生年在十二越十四年入太学又二年成进士又二年仕建康又二年自建康归累徙遂定居剡源榆林家始极贫何暇议迁葬事又七年居士府君卒葬榆林中枝山可以合祔而有所碍不得迁又十七年仕信州又五年自信州归於是表元年已六十三扶惫往谒陈园之殡不得封树荡析耕犁侵之麦芄芄然几无以容拜展为之心震神悸窃自痛念先大父勤劳多艰生无以奉一日之养死又不得中壽所遗诸孤同气时零丁夭折无至五十者独表元移承旁宗偶幸未死荒莹车寄沉绵五纪以吾世能念之尚不免弃捐荆杞如有如属疏事远何所不至且吾年向老早暮不可知而贫势未止不得尚以力薄为解居之东北有山曰绍地近始爱而蓄之亦既卜吉规以为壽藏於专葬无所碍乃以大德十一年丁未十二月二十三日啓殡陈园奉迁而西二十九日改窆绍地中壠壬穴丙向趋迎稠重环卫秀密望居士府君中枝之麓冠襟而屏机也古者子不敢铭其亲惧以爱溢称表元铭伯妣夫人以舒幽怀以期永久铭曰生为劳母而不及承一日之养死为慈父而不得与同穴之藏日吉辰良作兹新冈凡我剡源子孙其谨勿忘

故道録章公墓志铭

章居实法师在钱塘西太乙时余以授徒余闲常相周旋见其黄冠羽衣而耽章逢之趣深贤之别去数年当大德乙巳其徒走状来江东言居实以去年十月十日解化於西太乙宫矣某月某日将窆洞霄山中敢请铭余知师铭何辞按状师讳氏字居实章氏台黄岩人章之世多达者至师曾祖某祖某父某俱隐德不仕幼敏悟总角入乡校有奇名岁戊辰侍父来杭居纷华之场而读书一室端凝如愚人已巳春竹宫繙经往游观焉仪止修雅应对开爽衆目为属时大涤诸老咸在遂携以入山一山郎公专意育教十八岁为道士命礼四世孙李某为师至元戊寅擢西湖崇真观上座兼书记辛巳充元学修撰西太乙宫焚修丙戌转台州路道録以

一山公委寄之重不赴庚寅进元学提举住持龙德通仙宫元真丙申提点佑圣观事固辞之继为凝神斋高士兼住持元洞观大德改元提点元妙观戊戌充西太乙宫提点知宫复辞明年正月洊被是命辞不获始就职十一月授杭州路道録辛丑陞提点知宫力丐仍本职壬寅拜玺书护持师内飭风裁外接光尘所居而理所施而悦初西太乙之失其庐也道侣栖栖然侨寄湖侧偃隘单寒有不堪之色一山公与其嗣逸峰杨公相继极力补缀渐见端绪师承其後必欲改为以成先志相攸其宜凡杭之中外远近靡不涉历乃得一区於杨氏之废圃面势而原麓称卜吉而龟筮叶要成而书契备於是发撙节所余之绪裒材役工心计身督忘寝食而为之未期年库舍斋堂丈室即成而师以劳勩致疾然犹不自悔隆寒盛暑蹒跚木丛几架间曰命之修短天也西宫吾家世事不可不竟性通豁与人交无城府在元妙元妙之人惜其去在杭録丽罚者自以为不冤将迎之需应贷如已责简文移省勾追代期未滿而退人高其勇故事饯行有彩帐师以沽誉无益却不受事一山公三十年驱驰艰险无倦容丁亥入覲宣勤尤至一山公仙游与逸峰之丧营奉如礼在通仙建层阁辟公帑翼侠庑宏外门在元同则巨构一切鼎新之钱塘使客中都官往来如麻师未尝?与之覲初若不可干久而弥敬酬应稍空骚儒韵士弦奕觴咏潇潇然清事起矣世人言仙不可学以为去人道远故求之茫茫以余观之古之名能为仙者其人必皆孝弟清明忠厚然後得之去人道殆甚近观师之为人子孙为人师长为人交友一一无憾使为仙者不絶於世非师辈其谁宜师将化命左右掖以坐知旧问疾有洒泣者张目视之曰死生如寒暑昼夜何戚为复就枕遂化尝名修真之居曰耕隐人称耕隐翁号明素真冲妙法师生於甲寅十一月二十三日及是年五十一为之嗣者吴贵德胡仁方水邱浩然等也铭曰以道为樊以气为馭其形甚劳而心甚豫天目之阳云庭雾台师乎庶几冥冥去来

康济甫墓志铭

番阳康济甫卒既敢附於新兴乡查勾源祖莹之旁及是将别卜窆而其孙吉州教授彦博奉族前乡贡进士南龙之状来请铭曰吾康氏之世出卫侯封有邯鄲太守谊集卫侯以来至宋初几百世者为京兆谱陶谷学士为序其徙汴可称者曰澄唐大理少卿曰保裔宋彰信节度见吉州太守观所集为开封谱济甫之生在浙亦由京兆徙有曰翼晋左将军吴兴司马十世至义诚唐太子舍人密州司马密州之【缺】子子元以通易老庄侍读後乃徙宗正卿事具密州墓志及唐书儒学传子元之曾孙克遭巢寇乱避地黄墩因侨居浮梁之曲溪卒遂葬曲溪其子新家祁門武溪四世有守荣析居板石板石距武溪十里许又四世至澹轩府君景杰登绍兴丁丑乙科调忠南教授桂阳令年未七十以奉议郎致仕始居番阳是於济甫为高祖曾祖胜千祖必和父震之俱不仕济甫讳燦字济甫资性静慎敬事重亲无家庭之过抚弟妹有恩浹宗姻有礼交隣曲有道从祖茶陵主簿必厚礼部进士梦荐以乡先生教学尝往受业词藻记览为同辈推许然试场屋辄不利济甫一无沮容浮沉觴咏陶写图史充然若它有所获者生平足不履官府中更徭役峩冠博带与尘土相持终其身家敝犹招师好客不少废有司采能名檄授徽州紫阳正不赴郡校延为耆儒吉月必黽勉一至焉所居南荣树橘成林里人称之为橘林先生生乙未三月二日大德癸卯婴风脾疾明年三月一日遂卒年七十有八明年十一月某日耐查勾又二年丁未某月某日窆某乡某坞娶李氏子男二朝瑞朝贤女一适进士胡安荣孙男五彦博彦才护孙月孙图孙女孙三曾孙男四洙泗沂泰余不及识济甫

而嘉乡贡之文教授之请知其世之多贤而教行於子孙也乃为之铭曰维橘不迁郁而成林後有闻康叔之风而讯其牒者虽去之百世其独无心噫嘻乎斯今

故浏阳教授李君墓志铭

君讳梦登字仲实李氏越余姚人余姚之李自远祖唐相国绅帅越迁其籍至君曾祖润廸功郎祖章承务郎皆附鄂相承父硕以太学词赋高选中壬戌进士鼎科仕至从政郎台州教授早卒母黄氏安吉州归安令申女也从政初壻黄即授馆其宗归安见从政有成甚喜既不幸而君与伯氏午发髻齟能斩斩刻厉孤露中已爱期之以为李氏之不亡庶其在此当是时东南士大夫席声望凭膏泽以官学相薰李黄又余姚高门语少俊者必齿二孤然常小试捷大试卒不偶年迁岁移而举罢不及售矣至元丙子乡校毁帅乡人新之於是提学赵公孟至闻其才檄充徽州月泉山长不赴郡别驾温公廷玉行县访遗佚得君荐於浙东部使者部使者核覆得实移有司上名中书行署授明学正明於余姚为隣州明之儒先如内翰深寧王公犹无恙闻君之来动色相庆内翰即从政仕台时员外司马也君虚心事贤直躬赞长肃客合羣有蔽通之有忤调之有危掖之仪门书阁礼殿论堂斋庑诸役有烦任之钱谷会计有籍公之寮案愤讼如溃河而庠校赖君不废郡遂以学事委君主摄既而秩满扁舟赋归蒔花树木为休闲之计所居之室曰云心并西一轩曰带经客至瀹茶清言?盃浩歌类古之乐天知命者大德丁未孟春有命授浏阳州教授五月二十六日以疾卒於正寢生甲辰十二月二十八日年六十四娶赵氏先二十年卒子男二长文龙早世次德麟女五长许适孙氏余尚幼孙男三昌孙昇孙昺孙女三余之生长君十月为同甲尝入太学於君家世为同舍比来明同游相好覩公谨重缜畅疎财急义未尝无思齐之想君平生以门户邱垄为重既幸脱民板裘儒?戒子孙勿轻举动慈水之招提曰金仙与祖塋相望捐田租三十斛以奉香火族故稀少岁时会集必尽欢洽有不给者亦贍周之呜呼贤哉德麟将以某年某月某日葬君某山之原而请铭铭曰嬰幼耆皓尘劳清素幸完而归以面祢祖英英新邱龟从筮良勿震惊之视此铭章

楼府君墓志铭

士之闲居有能以家世积累自重而不系於荣名势禄者吾闻诸乡并得一人焉曰楼君与夫君讳师默与夫字也楼之籍在明奉化忠义乡自十一世祖银青光禄大夫茂郑始奉化之壤本为鄞鄞没改名奉化而鄞别为县银青徙自吴当唐季佐吴越王为镇海节度往来驻屯二县间诰词有公忠奉职信义修身之褒晚岁爱奉化鄞阳乡山水卜筑而居之乡人感其惠死庙食於鄞之横溪至今而乡名遂易为忠义盖取诰词云曾祖先哲祖纪父奎皆不及仕君世业儒天性恭俭慈孝尤乐於施予里中有鬭讼者正色语以枉直往往愧止治生无鉤距余暇歌酒自娱宾朋故旧过门从容燕款人人得其欢心齿髮衰暮翛然如欲脱去世俗机械遇山林物外云簪雪屐之客意相投而色相喻也一日命家人曰吾死期至矣汝曹勉之时大德甲辰五月三日明日遂不起生以丁酉十一月二十二日壽六十八娶董氏先二十三年卒继室陆氏子男二复翁全翁女二於是诸孤将以某年某月某日葬君鄞丰乐鵞东之原而来乞铭铭曰孰有能分宗累百祀而不替其家之人也意行而不蹶道隐而无华悠悠乎其又何嗟

孝善胡先生墓志铭

元贞乙未岁冬十月十有七日徽婺源考水胡公卒闻卒之日自公州里宗党知识若远外学士大夫皆嗟叹失声以悲其门人弟子俞洪等一百十五人相与考次公平生言德用古隐君子私谥例尊称之为孝善先生公之世本出江南李氏金陵围急逃来寄姓为胡因籍焉其子昌义遂以明经中科九世至国子司业仲与同郡汪内翰藻齐名元符太学所谓江左二宝者也弟?亦着书有棣华集存於家自是又三世徙考水居婺源郭东集贤里者以学行推择为乡校正讳允济於公为王父四世有通五经尤精易传史纂者易简居士讳师夔於公为父一门十余叶缙素相传故徽之他胡虽多而独考水之宗号明经胡氏公讳斗元字声远少孤师朱文公从孙小翁受书说年十四始从小翁闻居士所授易学刻意探述日玩一爻至七日则通玩六爻循环习之无穷白首以为常亦以此教其徒当贡举法行徽士橐櫜笔起山林出与四方英俊争进趋往往高捷乡国每三岁上公名成均有司不足以知公至辄闻罢乃径归闭门养志以自乐然慕从之游者遐迩如归餐华茹实人人去为良儒尝曰乾专言善坤兼言善不善乾之善世吾无及已坤之积善吾庶几勉之尤以不逮养为终身憾春秋朔望拜祀像涕泗不能已莹壠亲躬拜扫老不避劳人谓年弥高而慕弥深者於公见之噫公诚可为孝善也已年六十时忽语诸子吾筋力觉衰游人间世当可余十稔顾吾本怀常在考水念之不能一饭忘吾死汝辈必葬我考水高仓至是临诀复属诸子我家明经胡氏子孙汝辈幸力学积善毋辱我享年七十有二诸子以丙申秋九月十九日葬公高仓太守涿鹿翟侯大书孝善先生胡公之墓娶鱼氏子男三炳文焕文灿文女一孙男四念祖进祖光祖德祖女四於是炳文以前进士程君龙江君蠹胡君次焱之状与议来丐铭铭曰燕其独轰其伏既安既穆是为孝善之卜

张允甫墓志铭

往时江南以太学养士至累千人业六经若词赋者虽不特置博士而常往来通洩之然词赋独多其数常不与六经等於独多之中业之而精者自闽浙江湘岭蜀诸生甲乙可一二数开庆已未岁混试补弟子员吴门张允甫与焉又明年春自外舍试中优等升内舍为太学词赋第一於是声誉陡起允甫又谦粹修重凡同业无不愿与之游而先生长者尤相敬厚自是十年再试中国子监举又试中平等奏名遂自内舍上行上舍事为诸生长贰领袖旦夕解褐赐官而太学废允甫恬然无得丧意谈笑浮沉里巷又二十年而终始余於允甫同业中年辈差晚每堂庑间望见仪观整整私心叹想自失既先窃一科去癸酉秋被傲考校两浙进士同寮陈文林方叔为余言允甫贤行甚详尤恨前时不得数数相从也及余晚自金陵归鄞文林亦自合肥趋杭竟托孥允甫家允甫优廩廩之文林病死允甫医药殓窆如私丧文林盖畴昔太学闽士所与同业尤相敬厚之一也余愈益慕允甫有气谊真能不负生死缓急如此欲终与之游而其子观以状来谒铭允甫以至元癸巳冬十二月四日死矣嗟乎伤哉按其状允甫初名公显避讳改士元曾祖彦琦朝奉郎祖仲父孝德迪功郎世为平江常熟横泾望族允甫之季年始徙居杭死遂葬杭南高峰下麦岭横泾之居初才中产迪功君单传承家性坦踈无鈎距货业不营而裕允甫遵用其道加豁达好施与平居一衣不轻服一膳不过殮至移於师友馈谢间里赈贷学校营缮驩如也事亲孝内舍奏名时迪功君见之喜曰吾教子无憾矣寻执

喪服闋即不汲汲進取以母陳氏年耄謁假歸養既乃艱關跋涉扶侍風雪中得股膝筋寒疾天陰晦輒發動良苦他日杭居有火警盡棄積貯急掖母行止與俱如初無苦者人以為至誠之助無幾何疾復作竟劇劇且絕獨力急訣母囑治斂必以儒服年五十有九葬以甲午某月某日子男一觀也銘曰不為之鬻亦莫疵吾玉不為之趨亦莫跌吾車其丰吾存也吾發其余其洁吾歸也吾復其初噫嘻吁乎後百年千年尚勿震吾幽貞之居

李思宣墓志銘

君諱洙字思宣李氏饒浮梁人浮梁李世為江南明經高科聞家贈朝奉大夫諱誦者君曾大父也太中大夫刺諭制四蜀改刺潭安撫湖南以寶謨閣學士致仕特進諡忠靖諱遇龍者君大父也奉議郎刺信嘗入知大宗正丞今以老屏居於家名雷初者君父也宗正公初娶某氏後娶朱氏封孺人敷文閣學士天官卿諱貔孫之女而君妣也君生之四年以特進遺表恩授將仕郎又五年以覃恩循資擬轉修職郎又六年始冠又三年授室新安康氏又二年生次男樂父又四年當至元甲午以荐上江浙中書行署板授饒學正又四年考滿詣吏部格當注州教授垂仕矣明年死燕逆旅中大德己亥秋七月五日也年止三十五前死托其友貴溪張君時舉必歸我骨浮梁葬必筑亭曰存亭豫自書存亭記孟子修身俟命不貳而歸於張先生存順沒寧之義凡二百余言皆有条貫既自寬釋冀病少愈亦可慰吾親使知非如他人輕生徒死者以捐其忧嗚呼傷哉始君自垂髫而目厭朱紫耳熟珎瑀稍長連貴婚兩家所與賓游談論皆天下大人長者豈屑躁意名祿憫親年高欲代門戶事勢不得自逸故盤薄遠出然不意竟至於此殆真有所謂命邪死之明年春二月君之喪至自燕城衣冠士大夫識與不識嘗為出涕又二年壬寅冬某月某日葬浮梁某山下存亭在焉銘曰生不盡其躬死不沒其名去兮靈騫歸而颺奔斯人也殆庶乎存存

剡源文集卷十六

卷十七

<集部,别集类,金至元,剡源文集>

钦定四库全书

剡源文集卷十七 元 戴表元 撰墓表 墓碣

宋氏墓表

东昌莘宋氏有为信州推官者嘏蹙而谓其僚剡源戴表元曰吾宗之先郛人也郛今为东平府吾宗之居东平阳谷十八都狮子堂其西北曰石佛堂者葬域在焉金之季年兵毁漂摇士大夫家莫能知有谱牒世次而宋氏之可闻者断自吾祖尝为军千户千户府君娶东昌莘姬氏生吾父府君後娶莘孙氏因居莘为莘人初千户府君昆弟五人同时死其四惟号五公者在五子传一子承阳谷之业千户府君亦死葬阳谷死三月而吾父始生姬夫人抱遗孤居阳谷两年会难作徙莘姬之父母怜吾家单子又不可托数数欲夺志改适吾祖母誓死守节者十四年乃以病死莘而归葬阳谷吾父府君生长莘性温恭惓惓无机弃莘人至今称其行生庚辰四月八日死戊午四月二日年三十九死之岁吾母孙夫人年才三十六袭姑之化却铅泽服素缟以严俭持家终其身虽比隣无故少游接而乡闾姻族岁时庆吊无阙礼吾赖教育微幸成立至元十六年以尚用监史值进俘宝随监长忻都廷见蒙赐白金炉合等器五十两吾母见之喜曰此汝家先世遗庆汝何以及此宜自爱十七年劳调充征东行中书省掾寻改充江淮行中书省掾二十五年调承事郎镇江金坛尹满再调徽祁门尹吾母皆及就禄养凡莅官行事朝夜警督备至馭下慈臧获有过谴逐必痛责子妇使复还中外母敢犯教年七十四死祁门生癸未七月三日死大德丙申十一月十七日临诀呼诸子前曰我起艰窶至今日死不恨惟尔祖墓在阳谷尔父遗体寄葬莘城北恐散远不得展省以为念汝等岂能誨吾言乎言讫而瞑祁门归吾不孝不获亟遵吾母言姑藁葬吾母扬州以俟後归今信府秩且复满年加髦衰如有不可待及於大故将何以见吾母地下既卜吉於莘城西三里新张保将用大德某岁某月日阳谷迁祖考千户府君祖妣姬夫人之窆并奉莘地扬州考妣合葬惟宋氏存亡继絶实凭二妣妇节母范荀延蒸尝为衣冠家诚不忍遗负先德按士礼子孙追荣其亲得植墓表刻石器子宜为文辞以慰吾志表元辞不获命谨实録底里镌载琬琰揭之堊上使人知夫世之为善无不报而幽闺穷巷孀嫠寡弱服劳秉节於冥冥之中者天必怜其贞苦荣之以贤子孙使之康强壽颐而享食其效於以旌孝思劝厚俗非曰褒饰而已推官父讳衡母孙氏讳妙贞推官名彧弟仲某早世季彬推官之子万里彬之子万钧万美宦学盖方兴未艾云

徐使君墓表

信上饶徐公卒於员郎二千石既葬其县之石桥乡南徐大塘坞者三十七年而墓碑不立承学之士以为公名蹟在史册行业在乡闾诚不待是而显着然愈远亦恐坠逸无以异观瞻昭永久乃相与来谗於剡源戴表元颇有以纪之按徐氏世绪远出偃王居信者尤多显人公讳

子卿字奇仲少穎悟日诵数千言族父忠公元杰每曰是子必亢吾宗嘉熙丁酉遂以词赋魁乡贡戊戌试礼部中进士科人为公喜公曰时方以此取士吾不得不尔耳授迪功郎隆昌南昌尉尉治左有南州高士塚荆芜没人一日命薙去筑思贤亭以见志转运使何君处久倾盖器重檄摄郡文学寻檄分司抚州小事许专决州苦和籴斛面及田宅税契钱为民害立罢之再檄瑞阳如在抚考满未谒选会赵信父视师江上欲屈公而淮西总领所辟监凤台酒库因赴其聘而兼赞赵公幕府当是时军兴事烦公年少入预筹画出理鞭筭精采猎猎诸公间用赵公荐特差充两浙转运使司准备差遣荣王府夺民田公断归民田王怒语侵使林使公改断公曰吾职可削笔不可改也犴下供亿重岁入不足以支樽节出纳作漕计本末一书示来者癸丑春以考举及格改官授临川民喜见顔色问是吾分司公耶至则兴学立黄勉斋先生祠清版曹宿负核经界隐籍邑以大治有杀人委於隍者吏执王应亨奴主七人鍕链诬服公白郡改鞫杀人者常平司都吏冯汝能也事闻转一官旧例试院未揭名许健者疾足报捷以邀厚犒乙卯秋举禁卒与马营争其利致闭郡守主兵官不能制且乱公单车往谕咸听命广县廨创莲华漏建相业堂成皆自为记包枢密闻其政谓人曰江西五十余县临川第一丁巳除尚书检阅官书拟右司文字初立朝感激欲言事辄割入乞建储不报戊午出通判平江改嘉兴守挟同袍为执政傲愎甚公极力规正不可则以监州不职自劾守为斂戢悉却俸外无名事例作一杯水亭暇日啸咏其间愉如也除太常寺丞就守嘉兴命下丁母忧去家食不通贵人书疏婆娑东山下自号东山翁文酒耕渔相娱数年以疾卒生壬申八月四日卒甲子八月二十一日得年五十三曾祖功懋妣王氏祖思聪妣陈氏父质通直郎两浙转运使司主管文字妣张氏赠安人配华氏通直郎建寧嘉禾令君女性端淑俭恪佐公居官无纷华意公盛年思退赞其决尽义嘉兴归相张安人丧尽礼公疾侍药尽劳卒持制尽哀通直公在堂华【缺】通直亦老迎致相驩养尽诚宗姻乡党急乏賙贷尽惠既贵不忘蚕桑常夜绩课儿诵书教尽方生壬午三月二十六日卒至正壬辰十二月丁酉以遗命葬郑坞距公墓八百举武而近子男三忠甫历上饶南城建平三尉有能名次迪吉登仕郎出为外家後先卒次志甫以军功补官垂换授州教授卒女道韞适池州教授管茂孙男二拱辰徽州教授次宿老女二曾孙男若干女若干公生平为文有体裁自举子时声撼场屋及宦学东西师友益广如袁广微兄弟汤伯纪父子徐景悦蔡仲节诸公俱以刚介廉静见交在淮西葦年增饷额十一万有奇奏减磨勘十一年耻自陈并他赏皆不叙吕节使文德举亲民却不受在两浙吴谢二相贤公争致门下两辞之在右司当宁顾辅臣称信有三徐可进用指公与忠愍公之子直谅台守宗仁也丁大全贪其功诱公监察御史且囑以林参政弹文公曰台官可为当路私人乎即日告假出关去里居服阙有荐於朝予江西一州不拜予归班不拜翁祭酒冯舍人皆同年在朝屡道贾平章意将处之清要以父年八十不可出力辞终父之世不过朝奉郎赐紫鱼服呜呼科举法敝久矣敝极则可废然由隋唐以至近世所得名卿材大夫不少其人必皆沉潜好气节疏通知体要无有肯遽然鬬茸不振者而风骨稍高即成奇杰盖其获之也不以求而以知责之也不以役而以礼故人人得自持重而尽其材余生晚虽不逮事公即公之渊源趣向皆耳目所睹记贤者不必以不仕为高仕矣天下共名为奸邪者嫉之不可主天下或名为奸邪或名为忠良者疑之不可主至於天下共名为忠良可主而亦不苟就焉若公之落落於吴谢丁贾之间所向偃蹇盘旋孤行直立此非可徒以科举士论也昔者延陵义死墓有旌题仲舒贫葬行路展礼庸敢窃附二贤之例揭之塋端使百世之下想遗风谈故事者犹有所考不亦可乎

五山陈公墓表

呜呼是为信上饶五山陈先生之墓公之世本籍玉山後稍徙上饶沙溪之旁有五山公晚居其间学者因尊称之为五山先生焉方公少年上饶多名士大夫徐祭酒父子韩直院兄弟诸贤为领袖叠山谢氏城山林氏蓝山张氏之徒为羽翼风采扇动东南而公生世家能以义气招致衣冠俎豆不彻於门篇章笈翰日积其席乙卯秋寻用诗赋充乡贡州人谓一蹴且蹶通衢云游矣春官失之恬不以介意益广问学筑室聚书辟馆聘客笑谈步趋皆有法度久之名成行孚乡邻有争则听之决官府有急则倚之助盖古之善人君子布衣韦带而尊於王公重於专城者其道类如此也丙午兵起始避孔道入深谷茆舍相依者至数百家药病饭饥全活甚衆事定起领邑校扫烬地立讲庐於是大会民数郡博士以儒籍为忧托公扶之闻命不辞殫劳罄资凡留连省户下踰年迄脱同袍於编氓而归会广信阙长长广信州将部使者闻其名方议荐擢而公竟还五山遂终身焉喜为诗有古近体并杂着若干卷藏於家性笃直好义重然诺见人善称诵如已出及闻其恶一不挂口待交游能始终犯不较施不伐由是无丝粟怨嫉於人美须眉耆年华皓意行郊?间识与不识望之知为吉德讳尧龙字继臣曾祖伯运祖德寧父良才世为儒娶郑继张皆先公卒又继施氏子男三公美舜懋早世次舜清婺州永康教授女二适徽州婺源学正祝廉次适赵谿皆郑出孙男六禹畴禹锡禹远禹范禹谦可崇女二曾孙男若干女若干年八十生壬午正月八日卒大德五年九月十日葬五山西十里双峰以其年十二月庚寅公事亲以孝闻居父丧治葬极尽力至是双峰亦自卜余之来後公死才一年每临事接物兴扳援不及之叹尝作诗哀伤之又以事尝至五山亦及拜双峰阡婆娑松桧抚问泉石遗风犹存顾安得复有斯人乎而其子孙多善文雅喜从余游爰采家乘订以乡邦公言揭辞植表双峰之下使後來为者知劝慕云

徐耕道迁葬碣

岁甲戌乙亥余客金陵四幕文武掾佐浮沉往来以千计徐君耕道在数中余接之不及稔也尔後三十年来上饶於君为乡始获知君之家世出处及诵君词赋盖上饶之徐自衢徙而居世黄塘讳元得字耕道曾祖赐迪功郎祖植礼部进士父华甫自号橘隐翁世以儒素科级自重至君从兄忠愍公遂为壬辰进士第一人仕终於大司成冬官二卿当忠愍公时四方宦学之士无不愿登其门君携超穎之质入则与二季端友龙图立大侍郎调理书疏出则与赵茂实尚书徐景说秘书辈商略义理及既不得志场屋而游则与扬州李制置江州赵安抚之徒讲画筹策游倦而归则与蜀郡杨参预天台叶集贤诸公考问故实声渐气摩意谕色授不劳而成良器江淮旧称功名驰骤之地尝奉檄筑怀远军城补进勇副尉升授滁州散祇候移淮陰文家峰巡检淮陰尉进保重庆转进义副尉又剿广益盗湘南转进武校尉又五转自承信郎至忠翊皆身犯矢石得之非他书生用空言寄功幕府之比然盘旋曲折亦不足尽其才而岁年老矣於是归傍乡井既而避地於饶德兴之宗儒村宗儒有王氏故大家能以礼馆谷君学徒为之填委会李制置弟宰祁门於德兴邻邑也复招游祁门为刊所为诗词曰横塘小草一笔二笔者若干篇君平生轻财有俸饷即散以周人之急故晚而益贫三年不得已遂归黄塘课子读书督奴灌畦殊不为前时意度闲暇惟去宗族乡党相倡和命诗社曰明远并主隣社香林社友又为刊小草六笔者若干篇癸巳夏感疾至秋加剧索纸作书别所尝交往有此

行遥指柯山云云数十字若寓升游洞天之意书毕而逝十月某日也生庚辰十一月某日年七十四葬之新卜在祖塋白土山侧子男四长某次某皆早世次某出为衢官堂宗人後次直谦铭曰不局於趋亦不失吾儒不急於营亦不害吾生大袖长绅魁颡豪膺閼此佳城

周府君碣

饶安仁周君讳文清字清之年六十四以至元辛卯二月十六日卒乙未二月二十七日既葬於附郭之譚山而石表未立其孤惧无远於刍牧持武冈王侯之志来请铭按志君曾祖讳某祖讳远父讳志家世循良君早从乡缙绅问学恬於进取而训儿女一以孝悌忠信邑大夫推其贤尊为耆宿常礼貌之岁饥荒力劝赈恤人有鬪?为质决是否皆喻而止安仁路当孔道每观风问俗之使至纳其雅言民受宽赐晚岁益屏人事灌畦种蔬以自乐号爱圃翁文士赋诗盈编君不介意颇好西方之书繙诵梵译若有深得者迨婚嫁将毕遂感疾命家人衣周身棺周衣翛然而逝世之谈儒者尝诋释氏为诞其弊也华言雅趋而少诚慤观周君之於出处死生之际不近於有恒者邪君生於戊子六月二十四日先娶李氏继夏氏俱先卒子男三宗屋宗懋李出宗允夏出女一嫁支以良孙男三女四铭曰吾闻适邱墓道不施哀而哀生呜呼兹冈吉人之藏其固其康

剡源文集卷十七

卷十八

钦定四库全书

剡源文集卷十八 元 戴表元 撰题

题缪氏族谱

中世士大夫专尚谱牒以为宗法废所赖以考订昭穆而知氏族之所自来惟有此耳然亦有不幸兵毁荡析漂寄荒远并遗故老不可物色者其势无如之何则往往谨藏诸心遇官学所历博问而精核之万一或庶几焉信州之缪为儒已久其族聚居上饶灵山之阳谓之缪源今犹及与沿江机宜讳君珪字振玉者交游江东呼缪作穆不闻其复为他音也而信州之俗承袭浅俚乃犹以为缪戾之缪至是机宜之族子若凤教授天台又得合黄岩平阳长溪之谱其世次由江南之近年上溯战国以达於鲁穆曰史记孟子书穆通作缪定其望曰琅琊兰陵东海而三郡皆近於鲁吾家彦肃秘书又题文谱端辨秦穆公书録秦誓蒙毅传不应罪其杀三良弃百里奚鲁穆姜书於春秋列女传不宜讥其性慧行乱而皆改从缪戾之谥秦鲁臣子亦不应以恶谥加其所尊谓宜於谱直书穆氏为合於古辞严义备可以一洗千古之惑览者其慎详之

题新刻袁氏孝经说後

右袁正肃公广微孝经说三卷前一卷已刊在宣州学官有知州王侍郎附注行於世余二卷引论语孟子而发者余未之见也正肃於余为乡先生先伯大父云台府君托同甲戌进士第为通家尊行余言绪论讲问为多盖正肃公之父正献公叔和学於象山陆文安公正肃公虽不逮事象山而家庭承袭深有源委岂惟正肃公自洛学东行诸大儒各以所闻分门授徒晦庵朱文公在闽东莱吕成公在浙南轩张宣公在湘象山文安公在江西其徒又皆各有所授往往散布远近殊途同归而象山之传独盛於四明正献正肃父子若文元杨公敬仲文靖舒公元质端献沈公晦叔其尤着者也正肃公既贵尝持江东宪节数数为士大夫讲象山之说行部之贵溪乃为象山改创祠塾故江东之人自正肃公而尊象山之道益严贵溪姜翔仲之先世故当时讲下士大夫一人之数翔仲今又为侍祠诸生能取家藏是书并刊之塾中可谓鹤鸣而子和之矣余实不敏区区家世亦有与翔仲同者遂不得让而系名其编末云大德十年丙午岁後正月既望识

题徐可与诗卷

雪窗先生张武子讳良臣自洪徙鄞高才博学妙为诗为吾乡渡江以来诗祖凡後生操觚弄翰而有所於篇什者未有不出其门者也天性清旷不营生业子孙未再世即弃丘垄庐舍去而它游诗事遂如赘疣有一女嫁上饶徐氏其子是为忠愍公以进士第一人得名於时忠愍公贵不知能收恤张氏子孙与否独尝见其板刊雪窗诗一编则出於忠愍公家所为刊虽不

多然相去百年江湖名字寂寞犹赖此得在人目睫耳大德丙午岁余来上饶且四年访求忠愍公家犹张氏之於吾乡而公从子可与名九龄数数辱以诗见交余读之波澜渊深音节韶美於是不但喜是邦故家典刑之未坠而吾乡诗祖气脉沿接所谓适空谷者闻足音而欣然非邪

题陆渭南遗文抄後

右陆渭南遗文一帙用王理得本传抄帙後有庚饶州系谱饶州端士惜放翁所作韩氏南园记无甚谀语而子孙讳之不载於家集其论厚矣自饶州以下又诋其阅古泉记及贺平原二子除秘阁等啓以为不当作余蚤闻好事者说谓放翁晚岁食贫牵於幼子之累赖以文字取妍韩氏遂得近臣恩数遍官数子此说既行而凡异时不乐於放翁之进与忌其文辞者同为一舌以排之至於死且百年同时争名角进之人亦已俱尽宜有定论而犹未止盖其事可伤悲者焉渡江以来如放翁可谓问学行义人矣谗其放厄而不伤困窶而能肆不可谓无君子之守就令但如常人之见欲为身谋为子孙谋当盛年时知已如麻何待七八十岁之後始媚一戚里权幸而为之邪虽血气既衰圣人不免於戒不可谓世之君子必当然也谓世之君子必当然者其自待亦不厚矣然放翁固有不得辞者穷不能忘仕为文不能不徇人之求顰眉皓髮屑屑道途之间而曰我意非有他也人谁能谅之哉此编取饶州之意於南园阅古二记存而不去使世人知放翁不絶於韩氏者其语止此其贺除秘阁等啓絶不类本作余於文不敢谓知之若俗雅四三人望而能辩其为放翁与否也并告理得使删去云

题吕复初所藏大父放翁二诗卷

丞相忠穆吕公以勲业为渡江名臣而常耽悦文藻云得法於李邦直复初之大父於忠穆为孙亦承学於放翁非称其家儿耶近世负官簿者自贵而捐问业之谦名师资者自贱而失守道之高皆不复中原遗俗矣披味此卷令人恍然

题宝叶真

身不待帛而温名不依权而着此吾所见於源公者也及乎苦心密行忧万人之失乳而不敢私其形者吾亦不得而知之今乃见其真有古墨氏之风也

题獎孝诗卷後

右獎孝诗一帙骚坛名公獎康彦中公庐墓之孝者也公讳敬字彦中鄮茅山世宦裔也其伯兄万石君馭奇吾剡源山水购茂林通冢张氏山窆乃考迪功郎维翰府君公以成童之年自扶柩至兆既葬别间泣曰吾不忍远离吾亲也遂独留庐墓读书张氏嘉其孝且俊妻赘之因家茂林为奉化人今其子姓诜诜门昌资裕孝让之风蔼然为乡族望有繇也一日余访公後安时先生於读书斋适见是帙读之慨曰是诗也所谓树风声表宅里者也家庭之范在是乡党之则在是国之忠臣必有出於是门者矣康氏子孙能宝藏越今而时阅之亦可谓宅心孝

让而尊祖敬宗者矣表元也幸得以稽孝子之世而谱其行庸附名孝子之錄以托於不朽大德十二年仲春望日題

题董彦醇诗後

始余过竹溪董氏舍见诸少年讽书林樾间童冠相错笙和玉明时兵革新息肩文献散落私以为故家遗俗适当然耳越二十年复来前所見子弟皆肄习修饰咸伟丈夫而余年浸倦衰交游益荒为之惊喜过望有名儒金字彦醇赋诗一小编阅之则其气士衡入洛之雋其趣仲宣游邺之畅也於是与之语累昼夜娓娓皆起人意而每及诗辄求益不置嗟乎士之生患无以为之家有家矣患无以为之徒有徒矣患无以为之志彦醇内承贤父兄积累之资外收良师友殫洽之助觚铅绋素不絕於席衣冠轩盖日盈其门所以开彦醇而迫之以必进者不遗余力此其志岂小小顾余之不敏何足以慰酬之抑学者之为诗犹富贵之求丹然世以为无丹不必学又以丹为自成不待学皆过矣若必待学而成则当捐纷华鬻草衣木食轻寒暑忘饥渴以求於深山大泽之中万一或遇其人而得其法而世累不可尽弃人亦有自能清静淡薄不出户庭而致其人与其书者是盖有数不可以一槩论然亦必其受道之质去常人远甚然後可得彦醇之得於天者丰矣其益修而俟焉

题赵考成遗事後

益都赵昌甫讳成以国信使属官随其父南使事在淳佑辛丑是时当蔡破蜀潰之後淮汉创残甫息南事亦甚岌岌行人玉帛好问往来无虚岁不知赵君等何以拘繫如此之久也史子申虽非良相然熟於料敌能得人死力又善置耳目侦候非後來当国者比当由境外结约先有私许通变事宜及使至而国论异同不得如请展转迁延伺报不决它相继至幸谋不已出置之不以为意以故留滞至於三十六年乎正使月吕蔑思偶以中毒死其余者十四人散处不知存在而赵君徙宝庆得及兵至城下生还呜呼匹夫杯酒意气许与尚一语不忍负朋辈而况国事握节衔命如赵君可以言使臣矣得一令长归见天日而死万万无恨功赏厚薄不足置齿牙也而兵交受人使问至於三十六年不得报死者且尽而谋国之人不知此不可以为寒心乎余不及识赵君士大夫多言其诸子世显者能诵事实於人以揭其先烈然则仁者宜有後赵氏之泽殆未可量也

题姚秀实家藏陈所翁画龙

所翁画龙虽近出真者世不多有其法当欲画时游戏取人缣素用墨澜泼有及有不及乘快隐隐数笔龙藏其中矣凭陵突兀恍惚变灭盖君自以寄意为乐龙成傍附题述辞翰散朗与画相入真奇物也世人见其易就辄亦造次拟为之不满一笑此卷微澜细霭弥漫通幅前冲後拥略具鳞鬣点染精致殆非一时信手之作姚氏谨藏之

题坡书欧阳公鸛鵲图

右草书欧阳公鸛鵒词一卷建业翁舜咨得於姑孰士大夫家从来以为山谷书渔阳鲜于伯机以为东坡草书世人见者絕少余尝见所书秋声赋笔法与此略相髣髴盖皆书欧阳公所作一时师友心相乡往风流映带自古未之有也夏鸡者京西人以名鸛鵒南衙捉仗事出唐书南字不作两今人以捉字为促字之误皆非也

题蜀苏氏族谱後

人情之望於天者其为福不一端而莫良於有後然非可以容易言也蜀苏文忠公论扬雄之无後以为有其名而无实之报夫扬雄之贤而文非可例以无实断也公之论雄如此决非敢谓我为安然无愧歉於心而有所觊於他日者然其家屏处荒远郁勃几世至宫师公始以名字动於京师不过得一编太常礼书而卒至文忠公兄弟大科异等名官美爵若仅酬之者然荣华几何忌嫉不少因而逋流分窜於蛮烟蜚雨之域汹汹至身死而未定人以为无天道矣诚不自意时移事换之後子孙幸而存者皆以家世録用其星居他处谱牒不可详考乃若二公之後皆尝守婺而留居婺者皆延二公之赏班班预於天官之籍余辛未岁主太学闻有六世孙埜字伯清方以是时入为弟子员而未及接越三十六年乃相见於杭出所叙次昭穆整整不乱为之惊嗟喜詫当二公之与诸贤得祸也累然在机穽之中想望章蔡威严何敢仰首视死骨未寒而彼二宗衰微销灭言之令人颈缩尝见建州章氏家登科题名记惇虽位至宰相丑其人削而不録莆田姓蔡士人书应举卷首明称不系罪人京卞子孙士大夫能不没其名则百世之下它人亦为之惊嗟喜詫一辱其身虽子孙犹知羞而讳之可不惧哉伯清疏通有醞藉少余年数岁拳拳以文章词学自重盖不愧苏氏家法云

题天台吴康肃公家所藏朱文公遗墨

吴康肃公以清纯说直为江南名臣朱文公铭其墓谁复有异评者今又获观文公亲书为公所作唁疏挽歌二幅弥可珍尚其时士大夫人人爱惜自重不敢弃其身为不肖者不但名义当然亦惧端人正士之不与而或议其後尔呜呼严哉

题贯休画罗汉

此老禅津诗液流布缣素乃作此变幻诙诡相耶

题邓秀才临兰亭小本

古人临书临意不临形若长短阔狭规规求似强勉而不自然乃优孟之学孙叔敖耳邓君临兰亭此卷改用小字絕不用旧本而规模法度皆足俊哉

题秦景山遗藁

余尝爱秦汉以前士大夫慷慨多奇气为人排难解急而不居其功若鲁仲连虞卿张孟谈皆

是虞卿号能着书书不传自余无所着然三人者虽不着书或着而不传其言议风指犹表见於世也余中岁更涉患难偶幸不死晚始及闻广陵秦景山之为人景山与余同太学任在後其佐幕淮南尝画策全城及论赏优秩辄拂衣不受去竟以贫死胸次贤於人远甚既而其子弟出遗文相示阅之春容醞藉雍雍然周乎人情而达於世变信乎其为有本之言哉

题曾道士祖师诗卷

信之为州东连浙南接闽西达江楚山繇水迤居可以养真全身出便於驰名遂志故其地常为高人奇士窟宅余平生所尝交游名字班班可按也泊余之来流辈俱尽而惟深岩邃谷能从事於神仙世外之学者翛然独盛为之徘徊太息州南有贞庆宫当郊关之会而据溪山之要道士曾法师居之每岁时休沐讲肄之隙必一往临眺法师又气谊深古至必绸缪倾尽一日出其祖师无无薛公钓隐岩公诗编相示读之有南华鹏鷖之趣薛门鸾鹄之韵不但葩华摇落之余以归根反本为慰而衣冠故家门祚荒絕如法师之为人子孙能扬先誉起遗业尤絕无而仅有也

题王秀才灵山籤诗

人情之於吉凶避就有不能自决者必决之龟筮然後行事虽古圣人皆然後世祀愈瀆卜愈繁乃至筵筭环玦之属亦在所取王秀才作灵山籤诗复据易卦为辞近古哉

题赵几仲诗编後

赵文昌几仲自钱塘赴东嘉守时余方在太学缘余仁翁胡国器交游故亦及造馆下文昌以诸王孙奇才高等名为诗所与相倡和者刘养厚柴景山为多二君皆布衣颇以章句自负仁翁国器终有名宦心不敢与较高下也至余则从旁传赏叹美而已然其音响气趣未尝不熟询而详叩之故於时虽科举俗学之累多若诗之古近兴废本末不可谓不知其槩矣越数年兵火奔播偶有天幸不死俗学於是尽废诗亦不足以为名近忆旧有从游姓氏茫然不知谁亡谁在来上饶有闽清赵主簿携致轩诗一编见示读之文昌所作也自唐宋以来诗之存而传者皆其人手自科简或家有贤子孙能珍鉴之故不致冗杂散逸主簿君於文昌为的嗣所编既一一精选博载而卷中养原仁翁之徒斓斑在目为之喜而感感极而继之叹也文昌诗袭清於放翁潜夫资爽於尧章季蕃其襟怀学问远有渡江前诸老端绪非近世单闻陋识所可窥议主簿君更为搜访彙聚以俟知者出焉

题画

子昂作画初不经意对客取纸墨游戏点染欲树即树欲石即石然才得少许便足未尝见从容宛转如此卷十余尺者昔有送长缣於郭恕先恕先意所不乐而不得已为作小手轮牵一丝劲直终幅系以纸鸢还之其人愠不敢言然不害为奇笔子昂才气不减恕先乃能为求者委曲至此殆其人有以得之耶

又

吴兴钱选能画嗜酒酒不醉不能画然絶醉不可画矣惟将醉醺醺然心手调和时是其画趣画成亦不暇计较往往为好事者持去今人有图记精明又旁附缪诗猥札者盖贗本非亲作设亲作亦非得意画也此卷烟林水屿伸纸数尺自非须臾可就想见经营布置时累醉不一醉祝提学云有人仕吴诣钱生值醉得之良是

题卢鸿草堂图

古之隐人多枯苦简薄安有美池苑台榭如此图所传者盖开元间官府就嵩洛佳处用公库钱营饰以赐之又於其中聚学徒五百人非独居长往之比也画本通幅今改作十段不失元致览之令人精爽飞动

题陈留仇公训子诗後

大德辛丑夏余寓钱塘张检校招归其家池亭饮於时隆暑会者数客席端仇廉访微笑问是亭宜何名余名之曰清风廉访公大喜称善因娓娓欵论移日酒散各别去不相闻然心知其人中中原故家君子也越四年留信州有妙年书生携其祖云轩仇先生训子诗卷见示叩之即廉访公尊翁所作嗟乎有是哉诗三章皆有所指切而辞情温厚音韵闲适可以优游起发无急迫苛厉之气想见其居家无言而令行不怒而威立士大夫轻穷达忘贵贱所至有以自养亦不遽隕其家声者用此道耳仇氏世世谨藏之

题画卷

此卷修颀深目衣裳而拱者一人服同而貌微瘠肩随於旁者二人题者皆以为孔氏师弟子似矣投器地上袒而舞者一人或以为楚接舆或以为荣啓期则余不能知也余又有疑地上所投近饮器而此一人立饮而无席古又未有小冠及加巾而四人冠皆小而加巾则俱未可知也然笔制精妙自非近物必有博识能定之者

题十一子像

昔吾尝论太史公叙孔氏门人不当有七十子之数文翁又图七十二人者於庙皆非所以尊夫子夫圣人之生於世其道之及人如天地之成物大者大成之小者小成之而可以数计乎与孔子同时人虽尚多贤窃计未有踰於老子者夫子且尝问礼今礼家杂记其言多本老子则老子之贤在其当时所尝学道而去为君子者何可胜筭岂止如今杜君所举十弟子而已而杜君学仙谓老子为仙祖十子者皆得老子之道而仙吾友赵子昂画不易得乃为之十一像像系一传其於老子也是犹不免作汉人尊孔子意耶

题胡瓌报尘图

胡瓌报尘图事具画史此作腾趯精迅毫缕罅缝间俱有动意是其真迹无疑报尘者异时边
堠以尘起计马数多寡数骑疾驰东首鸟举电抹前无行羣後脱追者壮哉

跋刘文节公帖

嘉定初诛权奸以旧老召文节刘公於泸垂入国门出之襄阳其惓惓之心出处进退之际有
美於陆生何足怪哉陆生不知何如人吾闻唐宣公谪忠州无所用心惟着方论医家至今赖
之近世放翁废居山陰往往野服行山蹊背囊施药活人无数生儿多以陆为名者人名迹晦
着不足论陆氏世有贤达不得志则隐於医药事适相袭如此皆文节公意也

题温上人心经

温上人面目严冷人欲求一笑不可得亦不肯轻谄人而遇其性所喜悦驩然自留得钱出户
即散施贫者或多则袖携以访失职贤士大夫而与之布袍葛屨放浪啸傲於西湖三竺间五
十年吾观其人视策名货利为何等物故其翰墨流落人间足堪把玩又善以意写蒲萄游戯
遇物立成至有气力者具纸素邀之辄又一笔不与闻东昌徐仲彬云时时过其家倾怀尽兴
淋漓挥洒皆不求而作此卷心经乃其行书尤为难得徐氏幸宝藏之

书张浮休郴行録後

元丰灵州之役士大夫不得其位而不能谏止则有之矣又可攘臂踊跃於其间哉余读浮休
公自序此篇之辞轩轩然如喜事少年不以三数万不得同归之人为戚而以其身得周游纵
观为快初甚疑之久而知公之为长者人也师之初出朝廷贵臣自吕公公着孙公同而下皆
尝引大体争之不得张公於时一陈留县令耳被敕从军辞受之节行留之责皆非力所能及
及既在行实隶高遵裕帐下而灵州传城之战沮刘昌祚军使不得夺关而入者败形自遵裕
始遵裕固非公所素事然乘其败而诃之则亏为人僚属之谊且既皆受罪於朝疏之则近怨
故一不敢置辞而但载经行交际寒暑变迁风土异同以为好事之助西羌为中国患几数百
年患不善攻不患不可攻故又激发言之以啓後來者此仁人志士之所喜闻者也世之人食
焉而共其禄胜焉而分其功小有戾责揭於书暴於人曰我不与我不与是尚可立足於公之
下风哉

题梅庵柴君自书所作诗後

吾乡汪村有隐君子曰汪度仲容朴学而好修当魏文节公家无恙时仲容年少及以布衣客
於其父子间文节家固多士仲容又特喜交结四方知名人因而不远数百里千里与仲容过
从者不絶余生晚不及识仲容每过其间为之徘徊仰慕肃容致叹而後得去袁氏兄弟与汪
有?一日从汪村傍近小民家梁度间得故纸一束拊拊而缀葺之知为梅庵柴君为仲容自书
所作诗柴君讳厓字张甫梅庵其别号也计当与王季夷张武子一辈前後在文节公家文节
公家数世邱垄皆在吾乡岁时往返不一柴君岂非从後车载来耶抑或如晋宋间人相思命

驾乘兴泛舟而行也一时溪山草木辱其顾盼或发於谈笑赋咏亦甚光宠矣柴君诗极佳字体奇崛纵恣读之不能尽悉卷中所与人达者如真舍人宋眉州穷者如葛天民白玉蟾间往往度史丞相家羣从相去未百年向来功名富贵忽然如电光石火之过眼而废笺败墨出於尘煤虫鼠之余者令人爱惜如此古人轻齐景公千驷而高孤竹君二子之义岂不以此哉汪村人尚能言柴君??然一狂酒徒耳来仲容家家人厌其索酒不已不无倦色而仲容礼之愈勤夜分醉极不能引体即睡拥被曳席明日四壁皆有吐迹葛天民名行怪浊世言白玉蟾事尤可骇而柴君与之相好逃形变迹亦相类世无神仙则已果有之大丈夫不得志於俗子中则飘飘然凌云霞鞭鸾凰而游於垓圯八极之表以逞发其所欲适何足怪哉前辈风流日就泯没祇如仲容本末言者亦少後来益不得闻此卷幸袁氏兄弟宝之他日更会粹柴君他事相发以信其为人也

题孙常州摘藁

孙常州天资笃雅潇洒人也晚岁归卧四明山中即园池之适易轩马之荣用篇翰之勤寄簿书之能而尤好哦白乐天诗意至辄效其体为之得之不劳而神全机纵坐客往往服其敏而慕其达也余以连姻往来屡预其集每见琴樽杖席之间诗行酒起酒倦诗止名谈势语终夕不及私叹一时风流略与乐天何异亦由承平士大夫气习薰摩沾灌之所致而今岂复易得斯人哉公既没其子将版刻家集以传而所作极多力未能及遂先摘刊一二以答求者此藁是也余读而潸然昔乐天以无子为恨垂老手自编次诗文寄藏浮屠之室以求传久其言悲伤之甚而公有子如此又可敬也

题赵郎中诗卷

宝佑景定中山陰赵郎中以清材直气不容於时退居山台而四方士大夫从之如云余闻其家客至日以累十数至辄留连竟夕东琴西奕南书北画谈笑纵横人人自以为得尽其意也晚年卧病事力益衰然一日无客则为之怏然不乐其天性如此雅善为诗规模风度宛然在陆务观高续古之间而尤精行草每一篇出师於好事者幸而得之尺笺寸楮不翅重宝今蔚公所收遂至百首又多有涂窜点定踪迹不作意而甚谙理殊足珍也剡源戴表元书

题汤仲友诗卷

汤君仲友兵後犹在吴中余屡得其诗读之盖年七十余矣深沉酝藉足称遗老此卷固是其少作耶旧时江湖间诸公以诗行不少谓之诗客公卿折节交之自华子山敖器之刘潜夫前後诗祸作士气稍稍摧沮虽不絶然不得如昔矣剡源戴表元书

跋史和旨诗卷

宋时宰相世家多言韩吕二氏之盛皆蔓延至今然问其人之贤必多言吕氏夫吕氏岂能皆贤而无过哉君子爱之也从而为之辞至於韩氏忠献之後一跌而不可支遂使不得容於世

论他有令善者亦若分受其辱余尝疑之盖韩也多敏於才吕也多逊於学逊而学者人常进之敏而才者人常退之此人事亦天道也渡江以後世家之盛独在史氏遂欲与韩吕为三丈惠开国淳风粹猷载在方册生其门者人怀卿辅之望两制以下或所不屑然及文惠之存乃有同产弟删定君独能辞其官不拜而恬然用累举恩致禄以终其身删定没授官者必欲以貶其子其子和旨君又辞不拜夫生而贵有德而禄命也不必以不仕然後为贤而况富贵人之常情二君於此顾能有所不为辞逊之节植於一門非讲之而习履之而察有以养其心而不乱殆不至此此固尚德君子成人之美者之所愿闻也戊寅之冬和旨诸孙景肃出所藏和旨遗墨相示诗若干皆清纯典密有诗书仁义之味笔墨超劲可以想见其人景肃好修强记诵前言往行本末整整云自删定以来父子祖孙人人有集世家学问之泽其不在兹乎经有之曰不恒其德或承之羞景肃归而倡其诸弟者思所以承之哉

题万竹王君诗後

吾乡万竹诗种发芽於高公端叔端叔本中原将家右族扈从南来以邱垄在万竹察廉冈爱而居之学者因尊称之为万竹先生其诗醇委婉出於离骚号茶甘集然端叔实未尝得久居万竹居万竹久者大家惟王氏而不为端叔之学非薄其学不为大抵异时江南士大夫发身亢宗必须由明经词赋进士业而端叔虽名高道尊往往不得志於科举余闻之舅祖郑公善父乡贡尝假馆王氏秀发诸祖家言端叔岁时一归上冢必诣王氏流连歎笃如邻曲王氏先世待之如奉贵官及退而辄相与叹其无成而惜其徒老以死如此何缘肯为其学至秀发之子蒞居古桐始为诗有茶甘之风古桐君死三十年而羣从某以棠墅稟传棠墅之视古桐直肩随之其闢茶甘亦可翹足及也传不云乎居必择乡游必就士今科举学尽衰士得返本趋古万竹之世家不患无古桐棠墅之好故余於题其遗编而为详具文献之渊源如左以俟闻茶甘之风者考焉

题萧子西诗卷後

萧子西诗若干篇已经其姊夫王丞公达善校定者一一可讽咏未经者属余评之始余与丞公往还时居相邻虽说诗大抵各以承平世家学问相荡涤譬如饮食之於庶羞肴饌以为不可阙耳未知诗之隽永极味也年俱老苍加之以世故兵革羈旅炎凉之忧攻之於外田园婚嫁朝暮之迫挠之於内於是诗味之酸咸苦辣煎煮百出如膏糜果蜜力尽津竭而甘生焉故平生与丞公倡酬之日惟避地天台时为多又方其时同游佳朋友皆无恙舒舜侯在马谿刘正仲在雁苍胡元鲁在峡石每兵休事定辄一会合必有诗邮急於百返危韵或乃共和争奇鬪博下至传稟生徒执砚童孺欬唾相熏亦有法则今一辈衣冠悉皆凋谢而惟老夫凄然孤留人遂无从余问诗者窃自快快慨叹谓不复谈此事矣里閭之间乃得子西山阳笛声之感黄公酒垆之忆为之悠然上心抑余评子西诗气清而能不枯趣广而能不埋其模拟造诣处不愧古人犹当在丞公伯仲之间乎使舒刘诸公在必以余为知言

题王氏寓庵遗藁

吾乡王氏自伯伦季嘉两先生不但以文学科目起家其发言制行足以仪范闾里涖官行志足以润益政治事具山陰陆放翁所撰举词墓志余为儿童时犹及识其诸孙行十数公皆修衣冠高风裁人人能言家世本末盖可谓桂林无恶枝蓝田少凡矿也投老火毁百折之余乃方得见寓庵遗藁於其孙得涂寓庵名密字抑之於两先生为从子尝以词赋再贡於有司七上礼部不售仅晚授南廊一秩丞佐小邑权虽卑不肯龌龊苟禄屡与上官争役钱辩水利列边防形势欲以经济自见言既不酬即和渊明归去来辞弃官归养洒然有近古豪杰之风亦不负王氏家法矣然死未百年宗绪单落残章断简平生辛苦纘述而欲存者几不自保而其孙偶由甥馆宛转得之自古文人才士学成言立而不传者何限寓庵之传似有以相之而然乎因观藁中同时还往若端本李淳伯吴伯华之徒异时皆峥嵘名辈杯觞冠盖笑谈无虚日而今问其子孙一无在者可为惋叹安知吾党无能赞汝南先贤传襄阳耆旧者其以此藁补之剡源戴表元书

题袁通父词卷

姑苏袁通父示余长桥秋夜词题为怀汤师言张叔夏诸人而作余少年时屡过其地揽慕古人风流遗迹俛仰太息亦知为游行快心处於时举措轻捷交游易得不知世间离合之苦顾今此乐既不数数而同辈友朋消烁且尽幸而存者复憔悴无聊赖故读通父词而悲又羡通父之襟谊能文而好礼皆余所欲为而不可得也

题京兆刘侯事後

人之生世其壽之大都不过百有余岁百有余岁之身寄於无穷之宇宙其间不翅旦暮纵使殫膏粱之养穷血气之乐亦复能几何哉而有夺於旦暮无几何之不忍至於隳名败节以遗无穷之恨则可为痛惜甚矣故顏真卿张巡之徒之不得死於牖下君子荣之也谓之考终命季陵孔光之惜身顾?君子惭之也谓之媮生吾於京兆刘祥卿之言其父之事亦欲有以慰其心而荣之祥卿之父死於邛部川邛部川者西南蛮夷种所居异时边吏以恩信羈縻之不尽用内地法然犹时时桀骜不可猝定祥卿之父以招讨深入其巢穴既受约束而变起不虞力战死焉祥卿於时年尚幼殆长大从人语及本未必悲伤感愴不自禁呜呼孝哉祥卿勇哉其先公乎然祥卿将家子方好文墨谦谦士大夫间行身扬其先美此殆刘氏义烈之报时方念功岂无知之而为之言者祥卿静俟之

题双溪王晦仲读易笔记後

易以象为书而理附焉亦犹人之有是耳目口鼻四体然後可以论其视听言动云尔而世之言理者先去象不知去象则理於何所附而存哉汉之易林存者惟焦氏一家士大夫占筮多用之其余京房孟喜诸人之学窃意王弼注未行时必且家有其说一时以好恶废弃而千载之下遂茫然不可复考余为之恨恨久矣然亦疑古圣人之为此书何缘止於卜筮最後乃得新安朱文公本义启蒙於程邵外时时出入沙随汉上而一断以占法上不失洁静精微之教而下可通吉凶鬼神之变於是尽舍他学而学之又得今双溪王公笔记其说以书起象以象

明理又谓杂物撰德兴於中爻而互体不可废又谓麻衣非直河图非错之类讨论讲贯其在文公乡闾师友间几於鹤鸣而子和也语曰屨不必同同於适足味不必同同於适口语不必同同於适理学者取其大要而姑置其小疑云大德己亥岁仲夏十日後学剡源戴某书

题婺源武口王氏世系

氏族惟王最盛最难考盖自秦汉初则既淆乱王子朝之後与齐诸田改姓者人莫能辨元城王家有欲以古礼取名而身娶於王他可知也士大夫又远二千年乱离窜徙谱牒散亡乃欲追补渺茫无据之昭穆亦甚劳苦然自吾耳目所可知而又不即纪则愈後者愈无若之何婺源武口王氏独能知其出於齐大夫王子成父为太原王氏其次居祁县可知者为东汉隐士烈其次见於韩文公所为墓碑可知者为唐尚书郎元□自此下凡十五世其所以能然者以宋嘉佑戊戌岁有七世孙左承事郎国子监主簿知抚州崇仁县汝舟尝为九族图嘉定辛未岁有十世孙中奉大夫婺源县开国男炎尝为世系録而其宗遂因之而不散録成後迨今又几九十年中奉公之曾孙传又搜讨缀缉增为五卷而徵言於余余既嘉王氏世德之长义风之美而前後贤子孙能为人之所难知尊祖合族之道遂喜而为之书

题周氏先世书帖

余初来杭即与周子一同游同杭学同治词赋相善也余先仕数年归而闻子一领江东学事甚恨不得见子一既死其弟以家藏书帖见示盖子一戊午岁秋赋初出其父喜其所试如格而书以与之者也是岁子一遂充乡贡阅之令人凄感又以见异时虽科举学父兄子弟於平居造次必以成人相期者其事如此而岂可尽废哉

剡源文集卷十八

卷十九

<集部,别集类,金至元,剡源文集>

钦定四库全书

剡源文集卷十九 元 戴表元 撰题

题子昂摹龙眠飞骑习射图

右赵子昂摹李龙眠飞骑习射图一卷子昂故诸王孙家无画种其艺之至此盖天机所激一学便似非如他人疲精竭力而能者也每画成子昂亦自爱重张景亮是其外甥人欲得之者多从景亮索覓故亮虽朝暮见画而未尝得留此卷初本龙眠元丰间试院所作子昂摹时犹未涉世故学问之气可掬开玩数四令人洒然

题明皇听乐图

右龙眠李伯时画明皇听乐图一卷乐坏久矣至於新声异曲衒耀动荡未有如此图者宣和诸公凭陵富盛祖述梨园霓裳遗制而为之伯时不得不任其责此图岂平生沉着得意趣耶

题洪厓图

韩仲文示余画一卷云洪厓图洪厓之真若是与否余不可知然观其裹装鲜华徒御辉赫乃如虞卿蔡泽之容辞诸侯过相国而归者岂若草衣木食泥饭水饮之为安乎或曰神仙家何所不有彼不舟车而速不供具而佚不馆置而能不乏使而子欲以世俗耳目料之过矣玩咏累日颇令人增烟霞栖迟之想

题怪木踈篁

文湖州墨竹世所通识不闻其喜作它画也州倅番禺吴侯熙载家世雅素乃能宝藏怪木一纸湖州自是日尝并写踈篁而熙载偶逸之矣蓊邱李侯仲宾作竹来自湖州笔力足以追配因请为补遗而合刊於奉化学宫以与好事者共之异时风流润泽衣被照映於是邦文献为有助云

题石鼓考

石鼓至临川王顺伯之说尽矣其驳郑渔仲以为非秦篆然许叔重说文解字本出小篆顺伯信石鼓非小篆而取以为据何也俟博古者更考之

题苏氏三帖

蜀学无工书者东坡以高才余事为之化其子弟彬彬然皆有家法必有得於墨池笔塚之外今人胸中无十卷书辄欲假借眩惑以为坡蹟多见其不知量也此卷三手是其真作无疑子由真当为弟叔党真当为子矣

题李端叔帖

往时文士尝经欧苏二公门下者谈话皆有模楷其不然者虽立名字往往不能成家姑溪李端叔从苏公晚在秦晁张陈诸君後而受知不浅人品潇洒才藻精赡人尤珍其尺牋几有汉人藏弃为荣之慕观此二帖信然

题赵侍郎诰

赵侍郎书法在欧阳率更柳诚悬之间楼宣献公所评谁敢异者尤称其在吏部时告身书名端重劲直以为有体此诰乃侍郎自书以开国於高密者固是赵氏家宝余尝见唐诰书往往多用花书草体不知於何时以楷为体也侍郎书帖在其子孙甚多超扬纵恣如骞龙蹕凤不可名状与今学书家所言欧柳异其书名一节出於偶尔观者并详之

题渡江诸贤帖

渡江以来人品如李伯纪丞相固当第一张魏公李庄简固可相伯仲然皆流离困蹶百折而忠纯骨鲠之气滨死不衰吕元直附会其间优游取容比同时诸公盖差少遂意由今较之所就亦复几何哉山楼初寒繙阅遗墨为之毛髮森?

题方公删定家藏诸贤墨蹟

当秦桧专国时士大夫嗜进者蝇奔蚋集有自庶僚谈笑至政府权焰可知也然亦往往未久而败盖有自桧予之自桧夺之所得富贵几何而名字污人齿頰为千古叹辱不少四海九州共知其意见不同者莫如张德远赵元镇胡邦衡张无垢汪圣锡数公由今观之人品超桧几等而一时遇合俱不如桧人固不可以目睫浅近断也困斋方公耕道起弋阳布衣得一科即上书陈宗社大计欲攻桧去之遂与前数公同党官卒不显终於金陵通守此其升沉壽夭非缘忤桧所致命偶当尔耳余来公乡见公诸孙出诸贤往还翰墨读之不胜故家乔木之感

题王初寮家帖

古人往还寒暄庆吊尺牋不作浮语魏晋以来法帖可考也北岳王氏藏其家右丞检正提刑三世遗墨典刑文献前辉後映良为故家奇宝然习俗相仍日非中原之旧矣嘉叟为陆务观所作渔隐堂诗清纯醞藉读之令人心醉

题晦翁书坤六二文言帖

晦翁先生平生未尝留意笔札而笔法端严简劲如天球大璧不劳雕琢自然辉润此帖举坤卦文言敬义以警发学者尤可宝也

题陈了翁合浦与弟帖

此书陈忠肃公崇寧间由党谪廉州编管时归诀其弟珩者也公见二蔡凶威叵测自分必死廉州然偶不死观其只身万里流离颠沛死生忧迫之际於家人骨肉事一语不及而独不忍史官用王安石私家日録污蔑正史既作此书外别有自撰墓志文及追荐国忌疏文若干言备载辨诬论等嘱其弟密藏之以为不幸身没而他日蔡氏败国论明则万一可以为吾之证而已无他想也呜呼其志良可怜哉然当是时尤以日録诋诬归罪蔡卞而不及安石及来吾州作四明尊尧集始明白痛斥王氏而悔合浦之支离回护以为非矣然则此书於忠肃公固尤为未定之言也公自合浦崇寧二年至宣和六年凡强健几二十寒暑始以病死蔡氏何尝能杀之而国史朱墨本是非竟不行王氏録者公之验也公死之明年蔡氏大败至今道其姓名如粪秽闻之必唾而公残笈废墨脱於尘煤蠹鼠之余者令人宝爱如此士大夫可以知所择矣至於一时诸老渊源学问之余蔓延及於释氏此盖喜其庶几於孟子所谓不动心者学者不可专以为据也

题翁舜咨所藏文丞相梅堂扁

近时缙绅先生以梅堂名於世若东武赵侍郎粹中毘陵蒋忠文公重珍其最着也建业翁氏亦有梅堂庐陵丞相文公天祥宋瑞题其扁亦为人所歆重呜呼江南士大夫吾见其禄苟充宦苟达即崇园池饰馆榭佳名美号以相标者十人而十百人而百也而乡闾修饰之夫欲自托於好事者一有营创辄从当时有声势者求其翰墨以为光宠当其盛时大书深刻金碧辉绚輿台阜隶之徒嗟夸而叹诧然其为人卑污齷齪虽复巧施为高布置盖已不胜俗态丑状不过反为林泉草木之辱有识者往往含笑弃唾而去然则人有所传於世其行止进退何可不先自重哉文公之书点墨今成千金而翁氏数百年世家舜咨又坚苦好学择粟而餐审泉而饮有贞儒硕士之风余也幸它日童稚成人门户清立或轻舟道丹阳上三茅因寻建业以来旧游而得登舜咨所谓梅堂者羹蔬啜茗相与仰瞻文公之清风而为舜咨详论赵蒋诸贤之遗闻绪行固一快也

题王希圣续汉春秋後

始余考论古今统系於周汉絶续之交三国南北朝五代离合之际未尝不反覆疑之也乃至於今承学之士皆能黜魏远吴尊蜀而进之则以子朱子通监纲目之作有以补司马公之未及焉然自朱说大明学者遂谓司马本书为不能出此而訾之者何不谅其剏之之难也盖司马公之於系魏也既言之曰吾书起威烈迄後周记事不得不属纪年纪年不得不承旧史故乃传述为文而使观者自详焉非立褒贬之法拨乱反正如春秋然也朱子之纲目进於是矣

又不过曰通监也目錄也举要也补遗也详简之不中也记识之不强也缘本书为之义例焉非断断然自名一书曰我行春秋之事也余读其书而感之昔者夫子曰吾犹及史之阙文也其於春秋固鲁史策书而自孟氏以来皆谓夫子作春秋盖当时夫子老矣虽作春秋可以无辞也通监之事宏於鲁史纲目之心俭於春秋而二公敬古尊贤谨重忠恕藹乎有君子之道矣然而详焉者以使择严焉者以使守生乎百世之下闻乎二公之说其为幸也不既多乎王君希圣与余年相伯仲才敏十倍於余示教所作续汉春秋若干言不特发陈壽之膏肓助凿齿之墨守严辞正气真司马公之忠臣而视朱子又所谓於汤有光者也病困剿瘵之中讽读并日为之作兴顾辱不鄙见需序引歉缩再三莫知所发独其钝质有於通监纲目之书惓惓不能遽释者题梗槩於卷後而归之虽然余与希圣有朋友之义资多闻以蓄德俟余力以学文方愿相以勉焉

题茅生刻字後

古之书家无不能刻其谓之书刀後乃用以书丹入石则愈劳矣余尝行金焦间见米南宫题诗厓壁间锋势飞动遗老云皆其所自凿今人名能书以刻字为耻殆非通论

题王理得山中观史吟後

余尝评太史公书近於夫子春秋之义以十数而学者徒玩其辞拘者又引古异用攻之过苛虽不害於书之传而後来者耳目益以陋矣会稽王君理得当书散学衰之季不弃其世守橐史记若干卷入南明山中读之自列传以下篇为一诗显有所规微有所表缘其多闻而精识故人研字撚举得其当非临文创意为侥幸一中之说者也君又早工诗妥律流丽足以笙镛是书其自太史公视春秋庶几骚人之於二南哉然余闻之作史如法家详文着义而使人自避论史如礼家辨驳衆难而一归於是二者之道可相起而不能相为也君尚有以教余者乎

题陈强甫乐府

少时阅唐人乐府花间集等作其体去五七言律诗不远遇情愫不可直致辄略加櫟括以通之故亦谓之曲然而繁声碎句一无有焉近世作者几类散语甚者竟不可读余为之愤愤久矣山陰陈强甫示余无我辞一编体用姜白石趣近陆渭南而编名适与其家去非公无住词相似是有以爽然於余心者哉

题陰符经後

右陰符经相传其书出於黄帝盖养生家为黄帝之学者之所作耳而言兵者亦咸稽焉古学散裂诸氏百家如蟬毛而起然未尝不托於古先圣人以行其说至言黄帝尤怪妄不经更阅明智讫未有深非之者要以资於近用非所可废而已如此书舍曰非黄帝所作邈世学道之士得而习之固不为无益也

题赵子昂琴原律略後

赵子昂好音凡古之言音者靡不知也知之靡不能为也为之而示於人人习於今之音也骇而避之既又相聚非訕子昂子昂抱其器与书发愤以悲余始闻其然亦以为子昂诚高絕其成书似太锐且当虚心尽人之言数千百年间争音乐异同甚於聚讼独今人纷纷哉久而得其书琴原律略等读之则知今人所为非子昂者持今人而非之非持古人而非之也呜呼岂不真可怜哉子昂为音始於琴子昂之琴子昂已自见於书吾举今人琴以明之今人学琴者推杨司农司农之琴不用律以手指抑按弦间得其碎然者传於白云之曲曰此折竹声也得其哑然者传於夜乌之曲曰此投林声也诸为曲皆若是曲成而合其谱然後曰某主某弦为某音为某音而琴成夫司农之琴才近於庄生所言籁声而安得为乐音乎将司农不以乐予琴而用无律之音乎将司农圣於伶伦后夔律成於心而无所事器乎呜呼何必子昂虽余之愚岂不能非之然当司农时犹自谓之新声司农每一谱成而尸琴祭於寝曰吾安能为是声吾琴必有祖吾祭祖余尝私议之是司农琴当司农自为祖而食之琴祖不食也尔来司农琴擅天下投林折竹之声儿童妇女闻而喻之则咧然而笑始也儿童妇女习之久也缙绅大夫之安於近者幸其声之托诸古之器也随而习之呜呼何必子昂虽余之愚岂不能悲之然余虽知不当为司农琴竟亦不知当为何琴虽知人之学之非而自无以语人今得子昂书始豁然有以实於余心以子昂之於琴不诬也推之於他乐知其皆可徵也顾子昂穷余知之又穷而人之好司农者方盛姑私其书而劝子昂自重以俟其定焉

题王微仲孝弟类编後

人有常言穷则独善其身达则兼善天下呜呼君子之处达也其道必有以及之而能兼善固也至於处穷而欲私善其身岂不隘哉古先名贤不幸偃蹇颠沛无权以达其志则退而政行於家俗成於乡近尤能使同时不善者有所愧远尤能使千百世而下闻其风者有所慕正如溪涧沼沚之浸虽狭於江湖而其势皆足以润物惟盗名无实之徒精神气韵无所振激乃类於断潢胥井未渫而先竭耳余自屏居以来常以自励亦以励同志至上饶得穷者一人曰王宏微仲以孝弟类编示余余读之有味於其言使好事者人传一编置坐间朝暮熟复而感发焉虽官府不立可也

题太学登科题名後

余为咸淳诸生时杨鹏举去太学久矣然以乡里前後辈见余辄说太学不休口此其天资笃厚绸缪旧故岂如他人朝游暮忘若逆旅相逢之为哉去仕各二十年始以所编太学登科题名示余余为之重慨盖余家自余以上数世皆在太学习闻父兄时议耻於不入学而不耻於不仕故虽江浙近郡亦有逢举不赴得恩不陈以为高者时三舍法严又不易出仕虽当仕之人俊才高等亦须盘薄掩抑待年久之而後解褐以陈同父刘潜夫声望卒不敢假借他途以出余人从可知矣故当是时宿儒老生既无利禄得丧於心国有大事则不顾鉞钺羣起是非之其理明其言重往往令人悚息畏听退而歌吟庠序间有以自乐亦无不遇戚戚之叹自後一相进一法改恩数益寬禄仕益易而太学不得如前日之重矣今使鹏举与余辈复为诸生

相从顾不媿乎

题唐师善谈乘

往时木石尤先生居吴中每朝膳毕四方之宾游云拥其门先生幅巾野服出见客薄茶一啜坐中谈说典章仪注经术吏事以至巫医筭奕之类无所不有日且中又茶一啜而散以为常郡子弟载笔札从屏後窃记其所言虽未尝执卷问学而人人谈吐各有本末无白丁之媿於时陈端明居崇德林直院刘南兵居莆亦然丁巳岁尤先生史祸发此事俱废表元生愈晚又居穷乡白社然犹及识老先生十数公时时衣冠广席必援引前言往行以助谈柄故亦不至虚为年少一二十年来无复此乐欲略闻嘉定端平前後成败曲折嚙口瞠目有茫然之叹每羣居燕聚举间巷牀第猥近事则相与哄堂絶倒而已可胜言哉临安儒者唐师善深潜而骏发出其平生所着谈乘十二卷者见示於尘埃羈旅风雨呻吟之中读之快哉寻常杂书多重重复抵牾而此编一一精确可以补亡决惑者甚衆固幸迟暮之犹有所遇而恨师善亦有衣食忧旦暮且去而不得款曲相成也於是为题其梗槩於卷末云

题沂州先贤考

世人所称五福宜若皆听命於天余考洪范之说壽富康寧考终命四者容或天可为之至於攸好德则在人而已於天无与也余自知读书以来见古人名贤盛德君子为之欢欣慕悦及江湖道路邂逅交接闻一嘉言善行亦愿执鞭捧谒如恐相失此岂有所驱迫美诱而然哉以远者犹然若使乡邻里閭而有其人焉则慕之当何如故古者乡先生没则祠於社而其久也百世犹纪其遗烈如汝南先贤襄阳耆旧传之类皆足以起人之敬思而风俗名教亦因之而增重且又人无穷达贵贱通得行之而法所不禁则何为而不为沂学旧有忠贤堂刻乡贤名字於石兵火毁灭矣海漕万户王辅臣名君佐创意蒐讨续之增旧之数起自周太公望至唐末已得二百九十六人犹恨近世者有阙而文献不可问也来江南以谋於吾党余嘉辅臣有功於风俗名教又与吾所谓攸好德者合既力赞而成之其古琅琊与今沂州及沂水所沿名迹相聯甚广故采取寧过於寬惟夫虽居沂州而生无益於人死无传於世者当稍厘汰之使有劝云

题雪窦行纪後

四明洞天之麓有三僧刹其陰为梨洲杖锡而其阳为雪窦比二刹稍寬敞又近於人境游览之所易及然骚人胜士有事於雪窦者间涉笔墨往往不过单章只咏以相酬答未有囊括本末而为一书者盖志书荒唐行役匆遽其势不容不尔虽余之居近游数亦莫得而详也番禺吴熙载以故家名儒来为州判官奉公檄经过留不暇久犹能采摭询访作雪窦行纪一卷事贍而辞精趣谲而理核不但可以尽本山之故实而梨洲杖锡俨然如在目前人之材力相去乃若是悬远哉闻山中僧多好事熙载宣布施此文使刻藏本山以示能者

题李太常试稿

江南多故家以余所见干戈以来有身为名人子孙问其祖父行事而不能自言者矣至於衣冠科目声华词藻相掩映数百年不坠若宣城李氏固不可多得也李氏自唐已着入宋太常公以太平兴国五年登进士第此卷即其试稿中更散轶六世孙宗正公能搜考访获遂复为李氏物今又再世凡两经兵火而其家装潢如新良可人哉太常公廷试时犹用词赋未改对策士大夫廉耻自重无挟书假借无冒名请托人人各以所学着见故动辄得士云

题提学陈侯讲义後

古之为儒惟其传写之不可已者乃有简牘至於师生讲学必口授耳受今之鲁论载记问答汉儒之师说康成之郑志皆其物也後世既无专师为师者以故事不敢废则书成文累幅时节临诸生高坐读之谓之讲义彼此漫不知何语因何能有所感发成就然尝闻临川陆子静在鷺湖讲君子小人义利章坐中听者为之流涕吾乡袁广微使江东讲孝经数日官属有弃禄归养亲者是虽故事而言之轻重又系乎其人哉提举学事永嘉陈侯示教平生讲义若干篇纯笃精实机无虚发盖其文献问学渊源有自来矣

题徐山长讲义

讲之为言义兼师友主於反覆辨难以成其说余犹及见浙闽诸老先生开讲不用写本直是据案口说後进者质问於前随机应答粲然可述讲退各以所闻载之方策而写本出焉今之讲师朔望抽方尺之纸书陈说累百言忽然临高朗诵听者漫不知何语以为故事不可废而已固不敢望有所激发开悟徐则高为长於饶之双溪见示此卷皆与诸生月讲之作如天人性命纲目该涉既广而名物度数官守世次地理之类考据思索俱不疎漏古称教学相长诂不信然衰老废放加之以驱驰形神惘惘何由频闻至言乎书此以识媿慕之意

题王教授清湘讲义

古之经师与其门人弟子羣居有辨疑问难授者无强聒之烦而听之者易入非如今人书盈几之纸临容丈之席无疑而游谈不问而寝语者也然诚知其无益而岁时朔望庠校之间有不欲废以为不尔则益无所事而已乡前辈全州教授王君守之由太学决科余生晚不及识而其家子弟从游甚厚因得见其在清湘时所为诸生月讲若干篇粹然君子之遗言乎既感慨系之以辞遂归卷王氏俾宝藏之更数十百年览此又为古矣

题陈献肃公邦彦遗事後

昔孟軻氏称能言距杨墨者以为圣人之徒夫圣人之徒岂易易然而一言距杨墨即与焉推是以论人则绍兴之末乾道之前能言主张魏公排秦桧又不肯媚大渊者可谓之君子之徒非邪然不媚曾觌其贤易决魏公虽终始不道和而轻信累败罔功又尝沮忠良相李纲使不得行其志是虽欲尽贤之而人岂尽信之乎曰魏公轻信取败诚有之最甚者富平之役及与李纲不悦皆在少年轻锐时晚岁识鉴精明纯诚劲气不挫益加遂与伯纪倾怀相驩期有所

济而伯纪且死朝廷内外更呼迭啸无非秦桧余党四海所倚以枝梧三纲五常者惟魏公巍然独存而陈应求胡邦衡王龟龄若献肃陈公邦彦六七君子附之摧奸抑幸扶正培本一时朝望山立焱起呜呼壮哉大德辛丑春余与献肃四世孙处久同客钱塘出行状志铭謚议及省牒名贤遗墨之偶存於兵火余者以见示瞻仰慨叹凄悵久之剡源文集卷十九

卷二十

钦定四库全书

剡源文集卷二十 元 戴表元 撰跋 铭 箴 赞 述 碑

跋濂溪二程谥议

濂溪周元公初未尝以道学自名而精修妙悟上接邹鲁其衣冠言笑雍雍然与人盖无异耳大程先生亦用此道至伊川先生始以轨范肃物之论有所不屑然当纯公既没衆说纷纭卒能坚忍植立而不坠其师法者伊川先生之力也夫由前之道则广而难窥由後之道则高而易疎知之尚艰况从而名言之乎加之渡江以来世故之所消磨时尚之所摈黜吾乡考功臧郎中为此二谥议时去党禁之开岁月才几许而剖析精微搜扬幽眇绘画铺张委曲各当非知之真其孰能为此之言哉伏读遗编不胜故家乔木之感

跋宋元宪韩献肃二公流盃小饮倡和诗帖

汴都诸公风气浑厚初未尝区区以诗篇字画名家而余事为之亦非後人所及今观宋韩二君子流杯倡和诗帖如泰山乔岳严重不言而云烟草木自然辉润人抚卷三叹

跋吴侯二蜂说

蜂之於虫以螫闻利害休戚与人宜不相涉今以不堪其类之强攫忘已之螫而赴急於人人宜不直其类之强攫忘螫之恶而助之此人心天理之自然不可泯絶春秋存小国者进其褒灭同姓者甚其罪殆与看云道人此文同义

瓶城轩铭【并序】

吴兴凌德庸规寝旁小轩为习读修省之所而摘先贤法言守口如瓶防意如城云者名之瓶城剡源戴表元为二铭题其楹曰

物生於土而散复为土然陶人得是土也濡之炊之而为瓶则一成形以终古至於收藏卤莽缺破齟齬亦不能以复补不如为土之为愈也惟口亦然善出其言则玉帛歌舞不善出之血流漂杵喜为福主怒成祸府故明者慎之与其违时而伤义宁且默而无语也

上谋依情中谋依兵下谋依城依情无倾依兵无惊依城无争意之兵人其来无形其去无声有寇之祸无寇之名至人忘意尧禹之征贤士制意桓文之盟上不能忘中不可制惟城斯凭故必无喜而清无怒而明无惧而平然後可以居无危之乐而收无辱之荣以庶几乎君子之城

周氏彝轩铭

凡人有灵莫良於心存之圣贤违斯犊禽拱把百寻咫尺千里叩其造端不越常理常理伊何人之秉彝父坐子立兄行弟随夫妇礼睦朋友义正放乎君臣曰忠曰敬言之未出童子能然言之既出壮夫所难端木费辨季由伤勇恂恂充公藏珍自重徐行无惊善养非钝亨心在坎致命惟困我友天锡周室之望刊铭彝轩用永监观

昉轩铭【并序】

日初明为昉日之明无时而不有也而且也人始见之人心之明人惟不见其用用则见於威仪辞令政事而人始为之瞻仰叹咏故观人者不可以不见其明而期人於闇自观者亦不可以人所不见而不用其明里友萧子西春秋高矣方治昉轩以为藏修之室而请文於余乃为之铭曰

群动夜息人方安眠我视闇室烛龙在渊亦既旦止东方载明乃见旭日心虚日清昔晦非没今明非出动作光虚灵其质外物之来日千万趣嗜欲薄蚀纷华阴雾敬谨保毓勤劳运为上天之载我惟新之人言中岁如日将晏萧子勉哉常如始旦

朱漆印匣铭

彪其鞞日见而不铄黜其中静乎有容处不失方出不近迂杨朱氏之徒坎漆雕氏之徒坎

复心斋铭【并序】

复之彖曰复其见天地之心乎里士陈景惠取以名读书之斋曰复心而剡源戴表元铭之其辞曰

阴六之极是为寒冬天道当复雷行地中我有笃友於焉观心不出户牖明神照临方其未复天地悬隔乃既复之如还故宅父命子诺夫言妇随行行伍伍无阙无亏无阙伊何其先本全无亏伊何游乎自然惟兹精微不能丝毫睨则愈远抑之滋高勿谓既复返亡逐奔守者少怠寇窥尔垣束尔筋骸摄尔知觉百尔所思不如善学桓桓斋楹爰扬良箴先哲实然匪惟斯今

逊斋铭【为简池刘氏作】

逊食不噎逊步不僵逊获者鬼不得啸其堂逊言者玉质金相我行四方求道荒荒归治一室芟缟锄强义以为疆礼以为隍慈以为梁德以为航盖不但却踵英雄之林折肱纷华之场方将幸婴儿之三舍辞思父之五浆又安得以今之鲁狂拟昔之蜀庄者乎

寸屋铭【为时上人作】

我闻黄庭治田以寸治寸不劳而收千万四方之流出自金仙乃有寸屋其法同铨惟人一躯不能数尺心居殼中如苞系棘厥苞几何才寸而方靡至不受有闻皆藏道义辘轳重事为铺设父爱子恭师和友悦人求容实我独容虚实计不足虚存有余卑俭为楹清浄为梁载以正直覆之慈良燕处横肱美寝便腹六合为胸八荒在目广居虽广以寸为度寸寸不已莫穷其数剖尔肩鐻彻尔藩垣冥怀信踵以据无垠

君子轩铭【并序】

蜀牟先生名其婿秦张模授徒之室曰君子轩取孟子所以教者五之辞云剡源戴表元为之铭曰

维古君子有国有民德符命圭化行垂绅王风之陵贤不必贵乃有专师以名抗位舍尔洪荒从尔浚沟八荒茫茫云兴於邱哇收经鸣榛夷道开素王之门三千其来嗣者邹公拓孔之疆舌舐杨墨气麾齐梁逆拂顺磨明滋阴润力施一夫功踰千乘我闻至言厥教虽五泊乎有成一似时雨肃肃轩楹雍雍佩衿哲人嘉谋如玉如金莫尊匪礼莫善匪文咨尔君子各敬其身

奉化州庠小学箴

维人之初其天浑浑有识而争能言乃昏方其未然揖逊折衡习之既坚严诛莫从於昭先民厥重小学用耻兴畏因恭道觉童牛受穿负载千里良驹服羈以配君子有一黠悍窃轡毁车御者恶之甚於猿狙记诵蕴蓄词章润饰专精弃时矜能败德姬父翼翼虞舜蒸蒸任如鸿毛举莫能胜噫嘻州儒聚讲有庠髦彼群髦亦步亦趋我作训辞爰警傲偷匪我则然维圣之猷

袁氏字箴

国袁氏子瓘字敏存请言於剡源剡源为之箴曰瓘玉之生与石同族缘有其文以追以琢厥文伊何外润中明润溥阴施明涵阳精惟礼有瓘取材斯先纯和鬯通芬香洁鑷目持踵从息视心听临之孔威曷敢不敬堂堂袁宗累世朱紫政流岳牧名在图史迨尔贤祖沈厚寡言孝通神明信孚鱼豚鍾庆於子是为名父培壅菑耘勤劳纂组为兹嗣续厥惟艰哉负重惟德致远须材有一怠傲如器斯捐奢浮沉湎取仆招顛宾老在席恭陈训辞兢兢惟瓘敬以存之

真赞二首

游戏夷惠之间雌黄管葛之上盖其愚近达慵近放戇近直迟近让至於潜光返独澄源观旷审一区之易足悟两岐之皆妄固不害其为风平川浄天融云盎也此翁足未尝出门而心游万里言不能脱口而手评百家故知之浅者以为江湖朝市得其真者许之泉石烟霞噫嗟乎其无他乎抑犹未免於夸耶

仇仁近真赞

广袂长裾纓猎其胡素丝以为绶尚为是雍雍于于非平时慕作洛咏而歌吴歛者乎

鲜于君真赞

不可以为山泽之臞亦不可驰骛於功名之途夷乎惠乎鲁狂之徒乎

周义乌真赞

娉娉乎若无所为咿咿乎又若有所思颀颀乎若气盛远驰累累乎又若老而将衰归来乎吾谁与为归後有作者则不可知欲同世莫我瑕疵莫我为宜为无町畦乎为婴儿乎噫

徐仲彬真赞

吾观斯人胸襟漫汗如能吞八九云梦之寛眉睫郁勃有曾活十万生灵之绩可以垂绅佩玉规行矩趋可以飞书走檄纵横应敌者也

单吉父判官真赞

吾观其人须眉耸修巾屨整饬翛翛乎似不欲一物之干其灵台而焦焦乎常有疾奸豪忧黎庶之色殆可与为祥风庆云可与为雷霆霹雳者也

韩仲友真赞

谓子质邪锦心绣肝谓子达邪草衣卉冠盖世之畸人天欲完之而姑试以世材之难不然宅於荆食於韩宜可以偃仰盘桓尚何为饮馔纵横之林而遡帆功名之湍邪

任仲端题真

衣冠礼逊以为雅饰诗书意气以为清腴望之俨然知其为东鲁之徒

蟾上人真赞

此老以清峭为骨故於物无所屈以慈和为貌故於人无所较至於纵横翰墨浮沉谈笑则又庶几乎棘端之戏猴管中而窥豹者也

东坡雨行图赞

玉雪心肝泥涂巾屨赤壁矶前褰裳徐步宜乎马吕诸贤援之釜坡禁苑而不为荣章蔡二子投之蜚烟瘴雨而不加惧也

赞兰石

风柔日暄不自以为妍崖枯水缩亦不自以为恶此之谓生刍一束其人如玉者耶

赞画鬼戏

水息轮停风休綫偃有何烦劳作此舒展

一球在肩衆鬼惊讶不闻施为以目相语

鸟飞於天与汝何毒阴机激之为是反覆

葫芦在手箕箒在口自居其娱不觉其丑

冥行意坐不害为嬉枉矢哨壶从何得之

削方紫毫周代蹴鞠婴儿之心百死不黷

赞画龙

沟江湖吾窟宅喷云雾其裳衣诚无求而不得嗟无出以何为

千户高君行述

人有居微履约不择已之便安而急人之艰穷又能当忽然之惊而不惑於鬼神死生之故此学士大夫有气谊敏决者之所难也而或谈笑造次兼之不既甚可称乎然其名字不幸湮沉泯灭於稠衆之中没齿无所表见仅幸而天报之以贤子孙尚德君子惟论福泽之所由来而因得彷彿其为人若干户高君者可谓希矣高君讳忠义族世出肃慎氏当金之存世袭千户君父自辽东分镇洛阳五桥寨於是君生方十五岁父以调发至庆阳病死君仍其职管掇军伍有能名金亡居大名为民有权豪张宣差占据新附户四十余君引义诉列夺而还良蔡罕公开行中书省于三河之上带银牌为其府参谋军行累囚如麻君一一审録疏理免者以百计虽受罪自以为不冤至元师南兴充军所储和雇运粮官漕挽百余万石襄汉间接饷军回犹有余积以功最当峻迁十二年十月七日竟死年六十七娶吴氏生子男某教习儒业不仕孙男天佑今为浙江等处行中书省问理官君长於弓马射猎百步内不发虚矢性质直不好浮屠老氏见贫困者即解囊赙给无吝容渡江之役汴梁多逃军黄河置禁甚严不得脱则往往於民家雇佣或乞食市井狂活君辄饷粥之且喻以理法勿为非客主皆得其便在江南遇俘掠男女骸骨暴露道路间出私钱收埋不知数尤不信神怪尝督粮经汴梁西钓州暮当宿驿驿吏告有妖不许宿君径入篝灯至丙夜据牀瞪坐须臾有扣门者问何人不答再问又不答遂问汝宁非鬼乎敢入即入其门忽自开形状一似小婴儿而不见其的君呼前使取足下

屢稍近因手擒之亟竄走出稱官人我再不敢來矣次夜又聞牕外悲啼聲問之云我即昨來取屢几見擒者且吾本欲伸冤非妖也吾本州家庖夫為前驛吏箠死埋竈後每官來出告訴而官反怖我故不得听我語耳君恍然明日為白州將理其事掘所指地得白骨一具改瘞之驛遂無事余嘗涉獵史傳凡君數事皆數有而求之今人無所見以為恨殆風氣日不及古而為流俗汨沒以至於聞君之舉謂之近於豪傑特立獨行之士非坎金兵潰時君孤行茱陽道中一人對面張弓欲射君弓自折竊意天地間善類常自有物扶衛之射不得侵賊不能害世謂沾沾沽名行險之人禍福可以智計避就又非通論也謹述

東平趙氏述

東平趙仲文繇浙西臬掾遷江東乙巳春以刑部至信州余備官屬得上謁見其貌甚溫氣甚清而言甚文心賢之然舉口輒不能忘其鄉若無意於出者余疑焉曰吾家壽父年且七十有四母閭夫人亦六十有九凡仕欲以行志吾於仕几何志於何行而先廢人子之養乎余聞而重賢之既而出其家乘一通曰吾中原士大夫遭金季亂宗族世次俱莫能稽考而趙氏所及才止此往者不敢臆補失今不圖恐愈無以語後嗣傳永久幸為我述其槩謹按趙氏自諱海府君以上皆籍東平汶上縣泉沟村累世累累墓域在焉惟府君父避難暫徙郛城縣死遂葬縣東下馬頭兵定子孫復還居汶上府君生瑞字祥卿是於仲文為父嘗為浙東處州平準庫大使考滿不復仕而耳聰目明膂力強健無異年少所居雖郭園地樹別業悉在郊外軒車騎從行留自恣足以娛老時時為仲文一游江南不久即歸仲文與二季咸有子息讀書應門含饴繞膝足以承養噫乎仲文誠如公言人生至樂孰有踰於父母兄弟及時無事春秋序展省邱塋烹羊炰羔燕洽宗黨綢繆姻友處有文酒弦奕歌笑之娛出有弋釣浮游登覽之適其與離鄉棄土冲暑潦冒風雪以規銖兩之榮尺寸之積者相去何远远哉余不及識平準公東平古為聖賢宅里名儒鉅卿今猶林立觀公之行藏進退及居家教子可以知鄉閭風俗之美師友學問之益魯無君子者斯焉取斯詎不信然叙家世竟因附見區區嘆羨如左仲文名煥弟某某是歲大德九年二月四日剡源戴表元述

知奉化州于伯顏去思碑

奉化之為州山疎而水迅疎故土居者清勤力業而少余貲迅故仕游者僥僥外顧而無留心鹽蔬米粳冶果植器畜之饒不通於四方而衣冠文墨閎閱意氣之交異時常與形勢相為長雄故其民亦或號為難治大德癸卯冬荀丘于侯以九卿世家來為守專用忠厚文雅廉慈撫柔興弱銷沮噐竟一年答榜輕再年符移清三年科擢平逋流還鄉凋瘵完復吾與黎民漸漸知為生樂矣秩滿久不得去而天災作於浙東飢餓疫死者相枕侯日夜與其同寮謀所以拯之官廩有給隣餉有勸野刼有禁道殣有葬至於力不可施則以降貸減征懇吁于上蒙麾犯怒必得請乃已迄于今荒墟廢塋間猶有談笑炊耕以齒人數者皆侯之惠及州民既更生益孚侯誠熟侯教呻吟按摩動相聞知亦與恬然若安居其鄉而忘去者今人常稱近民官為父母父母之於子寒也常恐無以覆之餓也常恐無以哺之危病也常恐無以護之比其既成立也有禮馭之有過恕之然後父母愈嚴而子愈親若于侯之於吾州安能使人不親而懷之乎懷之不已爰發於言言之可傳必載之碑系之以詩曰維明有附庸負海西南名張實楊

民不胜堪孰返其逋有侯氏于郁郁舒舒清言雅趣亦既构宇乃疆乃理天降饥荒夺其乳哺
葺墟作家续骸为人呻吟笑歌繫侯之仁侯性无怒侯躯无欲驱攘疾病扶导饘粥民曰侯止
侯毋我遗侯曰勿止我非尔私凡人有心以已为则无穷之瞻系此贞石

王氏子葬述

人之常情莫美於久生莫不幸於夭折而孔光冯道之长年人之丑之也以为不如包羞而疾
死顔渊伯鱼扬家之童乌得於天者劣矣人之念之也以为其身虽死而名存是何区区无常
之好恶若是乎相悬邪盖幽明善恶祸福之辨至於无可奈何而後不可以无君子之论濮之
王氏子叔愚甚慧而贤余与其兄伯温游其兄屡称之既而其兄之友又皆称之既而叔愚之
友亦来与余游叔愚之友又皆称之既而非叔愚与其兄之友他与余游而知叔愚者往往又
皆称之余奇焉而叔愚於其间亦自多与余游余因人之称而察之良信无几何叔愚以大德
四年某月某日感疾死钱塘城东客舍年才二十一於是叔愚之兄哭而悲之曰吾失才弟矣
其母悲之曰吾失贤子矣叔愚之友若其兄之友若乡里知旧悲之曰吾失佳士矣吾党识与
不识同声悲之曰国失一良士君子矣亲者既伤摧痛楚无以自容而疎者亦复嗟怜叹悼不
能为怀夫斯人也天既生而材之骤焉而夺之何居呜呼是真不可以无君子之论人之贤愚
材否可以力为而死生寿夭之不出於已者当姑置之使勿乱吾意故夫子慎言命耻无名讥
老而不死而以朝闻道夕死为无憾叔愚年虽不高今观高明之家处贵权通显一人百年之
间谁能不死一日輶车出门柳絮载道亦有能使人嗟怜叹悼如吾人之於叔愚者乎世之名
誉或有能以矫取而至於行衆致远则必败叔愚之势非能致人以自厚也而自其家庭自其
闾塾推而至於远且衆举皆称其名而信非有所闻之实而能然乎是则叔愚虽死而贤於人
固远矣而知叔愚者其何悲叔愚讳友贤其先世本居东平祖仕濮因徙濮父演卿尝佐靳宿
帅府典籤家世敦雅清素故叔愚生而凝重寡言笃学韶亂能文章其渐染服习然也死之年
某月某日葬某州某原前葬诸公诔文挽歌之类哀为一编属余叙次遂为略具梗槩而详其
慨然者以释叔愚之亲之悲而亦以风励吾党云

剡源文集卷二十

卷二十一

<集部,别集类,金至元,剡源文集>

钦定四库全书

剡源文集卷二十一 元 戴表元 撰赋

可竹轩赋

山阴王理得静人也尝筑一轩竹间取晋子猷语既名之以可竹而请问於剡源乃为设客主人问答之词以广其意

客有问可竹之义於王子曰昔子之先琅琊黄门厌历兵革颡颥世纷捐家勲而弗绍欲投好於此君寄庐於东土譬之一壺之波流然而侪车代翳弛担挥耒宁馆庖之不继阅苍蒨以消忧此其达生几於柳下忧世近乎庄周者也今子袭旧德之箕裘耕素封之稼穡傲睨徐举优游内息出无萧朱许史之荣入无研桑陶顿之役浮毫泛颖沿典遡籍油油乎顔充气盈华春盛而方敷脩脩乎材坚气良兵朝餐而待击虽徵名於古贤亦取妍於幽植所为几案之玩阶除之饰或可有而可无非至人之所溺王子闻而叹曰於乎嗟乎是何伤乎盖闻事有不期而相役物有适至而为娱客不愧夫重龟叠组之世崇台广榭之区輦千夫以斥苑囊万金以聘姝歌喧管咽钟奔鼓趋乃有下舍一朝之费而耗中人十家之须观其睫晕欲寐体疲索扶意昏昏然不接弃咳唾於须臾至此穷厓之颠絶岛之上惨天荒而地寂四无人以惆悵忽见奇丛异干瑰质?状至恋惜以忘归为游扬而咏唱使客评一境之异同较一时之得丧果孰为之贤愚将悠悠而无当粤吾来於兹土姑无论乎古先今夫残墟断础废圃荒烟因前时之鬱鬱常栢比而云连虽蒲萄分根於遐徼珊瑚移植於深渊可成林於谈笑何是竹得而侔?而吾一夫之宅百楹之庐本先人之遗构匪东郭而开墟赖清阴之见覆幸斤斧之相疎风春雪腊雨晓晴晡吾试与客振衣坐石携琴挈壶醒则行歌商山首阳醉则卧游无怀华胥竹当輶尔而笑色勃而吁当此之时人可竹欤竹可人乎於是客主相喻颓然忘言但见脩脩之凉月若迎顾乎前轩

耕寬堂赋

孙常州既纳印而归筑堂於四明山之阳命之曰耕寬其说曰吾畸於人而完於天介於世而通於独与其盘旋蹙缩於势禄之途数惊而多慙宁自放於耕无适而不足焉且夫拏腰展髀野慢以为礼吾得以寬吾四体行歌散矚多取而无辱吾得以寬吾耳目作止信期饥饱系时而不自为吾得以寬吾心思岂与夫摇唇触罟动足蹈机驾载疾之车拥鼓谤之旗憧憧然犹疾驰而不止者比耶客戴某闻而叹曰先生寓言哉今夫千金之子居与人羣有徵稼於器而菽粟不分冰耕露斲水种火耘彼服田者或愁乎勤嘻乎先生亦既裂千里土而君之何用躬耕畎亩真若野人之云哉乃其风指则走窃闻之走与先生皆越产也而尝官於吴楚繇所既

知而不知者可以类举彭蠡之瀦震泽之区由其滨者饶於壤而蔬农其上者暇於力而渔故其君子俨俨舒舒小人则雍雍于兹非以寬坎越农则不然穴野而渠粪山而畚弓培寸垦岁无赢储盖用寬者不劳而尝给处狭者愈急而无余今先生封疆道德畦畛礼义播治羣籍壅崇列艺岂弟闻望以为嘉谷优游笃老以为乐岁方欲发廩庾洽春秋迹无邻之不恤远无乏之不周耆年胜客以燕以游乃操南风乃歌白驹文孙愿息前挨後扶严良日进迎猫虎也雅素时饬尊田祖也清伤和之水旱远败类之雀鼠若然者粢盛焉而神莫予吐盖藏焉而寇莫余侮不竞不婁不莠厥土亦不稂予宇藩墉牖户以保百世之风雨抑走又闻之能劳者不居善施者如忘故自古仁贤之居位其为政也往往可以驯盗贼驱螟蝗必不得已穷居而野处犹能使贪夫吝客愧耻於其乡嘻乎先生逍遥兹堂想见邻曲闻风而逊畔交游熏德而称良人怀阙里之训家哦召南之章然後道路歌惠穹只降康门比申吕同大寿等松乔并长回视世俗区区祝豚蹄之多获夸鼠壤之余粮何翅乎沧海一粟太山毫芒哉於时农祥丽天东作胥动先生方清斋啓关徐行屏从有持善言顺风三诵先生听之忻然以为贤於张老之颂

寄安斋赋【为广平舒君作】

智安於无疑勇安於不怵廉安於敖贫让安於不屈内恕者安於寡言达权者安於简出乃有至人行无朋徒止无居室忽焉礼之以衣冠钟鼓而不知为衣冠钟鼓猝然辱之以泥涂袒裼而不知其为泥涂袒裼故能除藩去蔽剖觚破鐻动如大鹏飞扬振迅寄迹於八荒静如神龙收潜变化寄形於一物彼拘拘者方欲与之商行藏筹语默宜乎叔孙见笑於两生楚龚之徒闻老翁之风而自失也

一大庵赋

宅佚师与水晶宫道人游道人问其居曰无居既而有居问其名曰吾之居姑为一大庵焉而无以为之名庵之大若何曰吾之庵以鸿蒙浑沌为盘缘崑仑蓬莱为枕托羲和光景为啓闭山川烟云为联络春秋花木为游观江湖鱼鸟为宾客出无扃鎖入无住着聚无守束散无部落若是何如道人曰异哉庵乎吾无以名之名之一大庵宅佚师归而言於剡翁剡翁曰师之居之所寄则诚大矣惜乎其犹有大也道人名之所指则诚约矣惜乎其犹有约也师不观於南崖之鷗鸢东海之鷁乎夫南崖之鷗鸢朝闯枯虺暮伺田雀投危抵隙穷虚瞰厄极终日之经营寄一饒於击搏彼其区区之志自无望於腾天池而冲云 东海之鷁则不然神清气迴欲鲜味薄萧森亢爽摧挛卓削饥餐沆瀣倦倚辽廓若可以游溟茫夸冲漠而名犹登於流俗之绘画用不免於飞仙之羈勒若是者皆累也今宅佚师日诵先民之言以潜西竺之学既自以涵玄茹妙除烦去缚弃世丝如蛇蛻擅天和於龟殼固当捐忘名实消融知觉据逍遥为安堵泛无何之空宅犹复凭无较有夸宏眩博前蹇後罩东览西略达者闻之得无有笑列子之御风齐侯之糟粕者乎於是宅佚师闻之微笑取茗更瀹翁亦輒然振襟而作

竹坡图赋

润韩仲文所居之竹坡蓊李仲实图之剡源戴表元赋之其赋曰吾闻楚江之濱修竹如云盖

扬州之土植从古昔而已云有一隼人宅居其隈风烟微遮云霄去来骚骚乎若环群自束前麾幡而後羽骑翛翛乎又若离尘远举凌贝阙而登琼台於时雪止筵敞风微帐开接鼓吹罗罇罍抚群阴之婆娑眺故邱之崔嵬吊古人之名园茂苑穠花靓卉皆已声消而迹灭而吾区区之所玩悦独鬱然高出乎氛埃则岂不可为临文感慨顾景徘徊者乎或曰是亦寓尔物之於形久无不化金销石糜川堙山罅而况工力之所转移尘土之所覆藉曾把玩不能须臾而君胡为乎欲寻岷首之留连踵牛山之悲咤乃有倜傥奇士恢疎通儒洒以秋兔之毫写以冰茧之腴寝玩食阅津携张趋内不爽身心之安而外无废耳目之娱观其乍起忽仆如顰复笑欹烟偃露涵阴吐照紫纒历落曲尽其妙诚可以舒襟绅窥道要何必拟崑仑以访药慕苏门而闻啸然後存浮居之胜观快长年之清眺主人於是斋形返息頽然如醺赋微言以三作期托老乎此君

缩轩赋

戴子既为缩轩於剡居之西有客过之哂然而叹曰戴子将隐乎抑将以为德乎何其志之高而言之谦也戴子曰不然吾三十年行乎功名之途而涉於是非之林及今年渐衰而始休业无成而多悔进不能有为於时以光宗姻起门祚退不能资其所自力以树田园活尊稚七暑而一葛十晡而九糜皇皇乎徒勤而无所施荒荒乎内忧惕而人莫之知支隙巢以窜伏聊憩惫而逃墟盖不武以成怯非能高而为卑而何暇於隐何以德为哉客曰子不观於南山之熊东海之鲸鱼乎夫南山之熊人知其勇也然而未尝狎於郊岂不知夫郊之获为饱於麓如使日月而见之则人得以轻其勇矣东海之鲸鱼其怒也能覆千斛之舟习於海者未尝遇而覆其舟也今夫能言之士听先生之说以游於千万人之都与操利业以闯伺於四通八达之市人人志於取也趋喜而违怒据安而逊危其事良苦矣有一不当意而无尺寸之地以居其躬子不匿避之而欲以常盛之名揭乎必趋之冲此岂徒无得而已殆难知其所终故曰寡求而少愿者守身之宝也不争而善让者远灾之道也且夫华鞶者老而归根饰美者劳而返素火以晦传烬历以退合度子母以昔之揭揭而病今之齷齪安知非子德之将就而乐其夸耶官虽薄犹贤於无名居虽隘犹愈於无家三遇兵而不死一谋归而成就心怀贞士之操身漏闲民之征一以子为佣胥亦或以为夫一以子为羁雌亦或以为雄熙熙乎蚩蚩乎无誉无谗人不得以诘子之衔无势无辱天不得以制子之桎子於此犹不足顾今之侧肩曲项擎拳累足以求伸者宁得如子之缩乎察子之介介诚有所缺然子且自视孰与古之黔娄莱芜贤黔娄贤而死不衾莱芜贤而生无炊子敢望丰衣给食乎哉姑务缩而图之缩於贵者康缩於力者强缩於名者良缩於德者百世不忘故今登子之轩嘉子之谊将濶略乎隘夫曲士之节而荡摩於大贤君子之事於子何如戴子闻其言始而蹙然若无所容既而涣然以怡矣久而恢然於中忘其居之约而身之穷也

喜友堂赋

梅林先生家於海隅柔兆之岁失其先庐先生携孥东西窜奔三岁而归蒿蓬没垣有季累累亦倦於行顾瞻嗟伤漚然不宁嘻彼行旅道途之人望屋而馆心援色亲鸟巢於林兽穴於麓日暮相求各以其族先君之息惟季与余出此万死乃不共居是曾行路之人于二物之不如

也爰议筑堂龟食其旧除荒疏秽以户以牖先生左处其季在右雍雍于于子姓先後徵嘉名於陶诗命是堂以喜友名成益喜与客饮酒酒半有客离席而叹扬襟振弁粲齿舒颜曰子所谓喜吾能言之凡人喜幸出於忧患病者喜愈客者喜还困者喜舒危者喜安又有人焉缘物而喜夸者喜权譁者喜市荒者喜色贪者喜贿今先生羈旅之余藜藿之伍行无轩车居无妾圉退无货财进无官府於彼所喜既弃不取脱鬼为人化墟作家惊还痛定未遑其他恂恂骨肉感叹咨嗟遂团圞於一室深慰喜而无涯此於人情相去几何哉且子不闻之乎有庠放象舜实为兄周公管蔡不免相去兄弟之间圣贤所难下至汉文淮南斗粟魏邱急语唐宫飞鏃贵极万乘富兼九州岂曰无家兄弟为仇先生之居虽陋不完我行其庭尔箴尔坝先生之身虽穷不偶我覲其私尔足尔手食不待奢分饗并餐衣不待华同温共寒霜露之晨风月之夕行吟接屣坐讽聯席昔也斯墟风栖雾泊今也斯堂啸歌燕乐昔也斯墟萤飞磷走今也斯堂图书俎豆且先生自以无愿於人而道伸於闺门自以无用於世而政行於邱园三亩之宅十亩之原弟耨於後兄耕於前既孝既友从容笑言醞此醇醴盎如春温凡登斯堂与饮斯醴归视其家谁无兄弟是先生之喜不私诸已将令吾徒闻风而起将令吾居胥为孝友之里也於是先生欣然环坐皆喜衆客醉酒先生起舞而酌其季曰岂无他人不如我同父兄弟更醉衆客欲行先生又起而酌客曰虽有兄弟不如友生

息斋赋

蓊邱李仲宾郎中风流博雅经济人也而好世外之学盛年华士风度潇然异时尝以息名斋属剡源戴子赋之赋曰

蓊邱之阳有一人焉非隐非吏不儒不仙手握昭回之章口诵逍遥之篇跨鸿蒙抗青云同游星辰动摇天钧盖其道术既超乎物表而名迹未离乎人羣者也玩大化之所趋悟浮生之无穷寄百世於须臾期已息乎心躬曰何行而非家虽器隘而能容噫嘻乎子独不观之水上之沤乎谓水息而为沤则浮然而流不知其休谓沤息而为水则波然而起不知其已是水与沤皆非所以息也又不观之木与风乎风欲息而木籁之鸣木欲息而风挠之零谓风累木风无形谓木累风木无声是木与风皆非所以息也今夫人之居世何以异於水沤风木之相遭鸡鸣而起百体皆劳彼求息乎梦寐则有误饮食於田猎惑钱财於糞秽彼求息乎老耄则有闻鸣钟而不休思秉烛以继照志燕者息燕不息燕者益北其轅志越者息越不息越者愈南其轍人有常言贫者欲富富者欲贵贵者欲不死彼達者姑舍是无辱无荣无死无生以入於不争鬼神莫之敢撓若是不既息乎而山中之鸟或以暗烹潜居渊观或走而惊彼犹未逃乎实与名耶故有南华憺恍之裔西方奇诡之伦捐有说幻梯空谈真凡皆客所未喻吾将叩之其人

静轩赋

东平阎公名某居静轩剡源戴表元为之赋曰

世有欲静者问於其师其师教之以学坐盖屏居久之能安於足而不能安於饥穷之水火於

是教之以学然又絶语久之能忘於口而不能忘爱憎之荆棘於是教之以息交则不能螫穴而栖巢教之以寡求则不能餐松而饮流故嵇叟以慕仙伤生杨卿以忤物招咎暗鴈先尽柔木速折恶影者走而滋多逃声者除而愈有呜呼悲夫事有适至理有固然子不观於空洞渺没沧溟之渊方其决阴谷泻层巅经苍莽而始激触紫纤而弥喧迨至乎钜海则沉沉湛湛人莫测其亏全又不观阴阳四时之去来前者谁挽後者谁推但见河汉乌飞而兔没草木实落而花开人之营营与识俱生识步而驰识取而争穷血气之所趋虽贤愚其同情惟夫大静之士得智遗智居名避名用能玩外物若蝉蛻戏世好为孩婴时然後出不得已於出则山摇而岳动时然後处不得已而处则鹄峙而鸾停时然後默不得已於默则风收而霆息时然後语不得已於语则玉振而金声彼沾沾之小夫与硜硜之俗子勺水盈缩杯羹慍喜间有闻苏门而习啸望箕山而结轨岂不贤於其徒语诸大人先生之门是犹过蓬莱而夸海市也

容容斋赋

东平徐公书燕居之斋曰容容剡源戴表元尝过之问曰是非汉人之所云白璧不可为者耶公曰不然因拟其意作容容斋赋久不即就而公归东平怀感旧话不敢负言乃为赋曰

大智幽小智仇机鸣轍奔万类一邱厥有黄髮真逸青云隼游偃驾於希夷之林濯纓於清泠之流笑衆雒之相役弛然示之以无求始其昂头瞠目骄面怒腹咸崢嶸以思逞如不行其所欲既静埃以自休亦逡巡而心伏故力敌者攻势兼者雄才十百者不强而从量千万者容之又容升容於斗釜容於庾举而投之太仓不知其有润容於谷湖容於渎输而泻之沧海不知其足丰狐之择燠乾鹊之违风知陵阿丛薄之功而不知托气於太空海鹏息以六月泽龙神於勺水翛翛乎知太空之容已而不知太空之所倚物之相容何有穷已昔者周公端揆日容千士仲尼闲居容七十子当其垂绅端委擎拳曲跪前俞後唯而不为之喜及乎危疑转徙诗鵙歌虎兕风披雨圯亦无所毁第泛泛而容之遗簪坠履残筵賸簋或闻风披靡或承流迤邐不知其几盖何必家陈羔雉之贄人拥轩车之华而谁不曰我尝趋明堂而游阙里彼有托一时之喜事夸四海之龙门侈公孙之华馆开文举之芳罇唾面教忍佩韦矫温所谓拟富於聯珠之室銜明於扶桑之暎吁嗟乎获容於人则幸尔乌足以尽彼我之所存

胡麻赋

六月亢旱百稼槁乾有物沃然秀於中田是为胡麻外白中玄嘻微心之良苦徵日御而周旋朝舒翹以东向夕偃媚而西迁若钱迎之有节阅旦旦而不愆有一儒者睹而异之曰是物其有识可比义於戎葵惟太阳之委照畴一物之得遗彼茆然以自遂有得气而不知独输勤於畎亩致展转於遐晖迹其华粲粲以淡成干亭亭而直致阴回翔以盖属膏湛渟而珠媚疑本质之过清常凝温而抱粹庸遇嘆以不伤表孤妍於衆悴且其茆本近仁向明近智蹈约而不移近信在困而能恭近义故论胡麻者以为君子之道四宜乎以尔登良医之篋衍佐飞仙之服餌也

蝇虎赋

有虫翼然既狞孔武若腹而丝若臂而距跳跟振擲是谓蝇虎搏蝇甚智狙伏壁间群蝇避之如虎於山我玩诸掌以弄以嬉惴不敢动蠕蠕蚩蚩先生忻然笑而置之我闻古人龙犹可豢惟虎必诛与民除患或生得之用之於战盖与死而为邻嘻其危而敢玩乃有至人以道豢虎居以为徒出以为御又有人焉虎至不怖曰我不尔恶尔无我怒与虎相忘其道甚恕嗟尔蝇虎何为者耶谓非虎耶於蝇不仁谓诚虎耶遇我而驯或曰抐人所憎不为不仁故见畏於蝇其所以见狎於人或曰是亦虎类驯之有道蝇视之大我视之小藐然掌中以驯易暴亦如彼虎雄跳躁扰极衆庶之所惊才至人之一笑呜呼噫嘻物之於人嗜欲血气鲜有不同意两锐者必夺力俱强而乃攻此其无齿牙而忍不爪距而凶抐善良以为食腴膏血以自丰其名为人其实有远愧於尔尔者矣诚得道以御之彼虽暴而莫动故有谈笑而仪衍挫谋拱揖而孟贲失勇索而言之理无不然一日之内一身之间阴阳水火寇夺百端有道於已愈攻愈坚泰山裂车而目不瞬疾雷破柱而足不迁四海一航八荒一席干戈血肉之区歌舞腥臊之域阅千世於须臾忽微虫之过隙谓振古之如斯复谁丧而谁得於是先生颓然如醉然欲默纵吾意之所如聊优游而偃息

碧桃花赋

王赞公家既毁於火俨榛蕪之遗墟纷风披而雨堕三年乱定主人一还顾瞻咨嗟惨见心顏忽有异花发於甃间主人曰吁是何祥也问之居人居人不知问之行路行路愕眙乃问野老野老曰此所谓碧桃花也胡为乎来哉且其为花种之实艰土不温而不鬯岁不远而不蕃睹厥种之瑰奇疑仙人之所植故花於桃者必红而此色独白今主人逃空虚而远适曾日月之未除厥甃燥刚瓦砾交加伟尤物之突生诚可骇而可嗟野老既去主人默然徘徊花间花若有言於是主人遽然而悟色然而笑曰此非造物所以戏予者耶此非造物所以慰予者耶一以为慰予则我也既履其殃一以为戏予则我也方玩其祥长杨建章之苑太液未央之囿一卉之见材争献妍而恐後当其供娱燕游进幸俎豆土壤饫乎醴肉邱隰眩乎组绣盖有海西异域之植峤南远驿之果勤追风之飞骑烦浮天之大舸敝累千万人之力仅易一盼之娱迨乎陵迁谷改时异事殊视茫然之陈迹曾不足以自附於劫灰之余顾樵苏之见赦与匠石之不诛反不如漆园吏之所美若彼拥肿不材之樗噫嘻嗟乎物有至妖而为累事有当戚而可欣大者若此细胡足论惟夫环堵之室数弓之园虽故物之已非而为我者自存讯邻里之在亡对江山之无恙持壶觞以相劳发懽愉於惆怅清风往来鸣鸟上下突焉阶除见此粲者矫焉若凌虚猝坠翕然若离羣独至淡焉若铅容素膩将颺将蹙吊予厄而悲飘焉又若茶裳缟袂将翩将翔幸予还而喜也迫而亲之不可睇视若商山之皓须眉秀伟忽不召而自来咸惊嗟而叹异又若西山之阳孤竹之子亭亭冰映皛皛玉峙惋涂炭之在前欲洁身而趋避也耿孤莹於衆妍时临风而兴喟如是花之吉祥将慰我而非戏噫嘻嗟乎物之无情妍媸美丑待人而名亦有不待人而生人虽至灵悲懽喜戚触物而形亦有物莫之撓渺蓬庐於宿信任木偶之所之盖吾昔者之非去而今者之非归尚安能以私心之察察预一物之盛衰其来也无所期其泊也无所羈其崑然异也无毁无誉其皎然丽也无洁无缁与是花兮相忘聊遗老兮庶几

观渔赋

秋潦既退河归故痕童子六七携畚出门载奔载呼集於河壩先生异之往蹑而观乃见衆童脱衣裸足断渠起塍翻水使涸或运淖没膝或扬泥沾膊或倾畚挂箕或布韦行筏或羣蹴鼓譟或独仆发谿并力竞劳有类竭作先生曰唉尔何为乎有叟在傍倚策而吁曰童子之知尔将取鱼每岁八月大水渺漫滨河之陆涌浪如山常有大鱼随潮往还彼一童子及潮未汐往渔於河得鱼盈尺今此巨浸与秋俱退渠居平陆不絶如带衆童惑焉求鱼於渠曾是区区鱼得而归且虽有鱼其获几何常闻渔人日渔於河出市售之味薄少甘得不偿劳甚尠而纖一网出海百夫属厌视河之获力减功兼我求其说渔何尔殊海劳而苦河逸而腴苦厚腴薄劳成逸败所以论鱼河卑於海蛟鳄之宅风涛之渊健者以奋弱者以迁亦若吾人随乡论贤故瘠土者材而沃壤愧焉议河於海无所取?曾是沮洳虾翔蛤奔升勺之水可得而言先生闻之怱然而慙怱然不悦问叟姓名俛首不答顾谓童子汝渔且止吾闻是邦有隐君子汝往问之叟宁非是耶

剡源文集卷二十一

卷二十二

钦定四库全书

剡源文集卷二十二 元 戴表元 撰史论

读司马穰苴传

田穰苴之事薄矣太史公为之论次以为之传非贤之也易曰臣杀其君子杀其父非一朝一夕之故其所由来者渐也田穰苴之斩庄贾也盗齐之渐也方穰苴以羁旅之余受兵戎之任名实未必深孚於齐而庄贾者齐侯之宠臣也夫以宠臣预兵而加於羁旅之臣之右其骄蹇而难制固宜然而穰苴之所自请也已自为将而请君之宠臣以为监既许之矣而逆为之约迫为之期待其至也而借为之辞而斩之此岂有不忍於齐国哉且燕晋之师於齐非有旦暮之急遣一素贵幸之臣而亲戚左右为之效杯酒殷勤之懽此人情之所有也藉令穰苴欲申其兵法当先为之令俟其不受而後诛之或不可已则迁刑於仆御亦未太沮屈也而若是不能终日焉何耶贾诛而驰赦者仅免会燕晋亦解侵疆悉还齐之君臣惴惴焉拱手重足以须犬马之命田氏之篡齐而有之岂待海上一城之迁哉呜呼自战国以来篡杀遂为常事而权臣盗将未有不先立威於君侧者皆用穰苴之道也汉卫青伐匈奴苏建尽弃其军青不敢擅专诛於境外而听天子自裁曰以风为人臣不敢专权者郭子仪以九节度兵围邺制於鱼朝恩为军容宣慰使而无所统一以至於败归又为朝恩所困然终身不敢失为人臣礼此非将帅之事也哉

读吴起传

世儒言吴起未有不彪然异之也尝读其传而得其为人盖魏公子所谓节廉而自喜名者起之实录也当战国时士之道先王而守礼义者鲜矣鲁俗犹为後衰而起也及事曾子曾子以孝闻鲁而议起者曰起之学於其门也啮母而诀杀妻而求将世有学於曾子而啮母杀妻者乎若其答魏文侯舟中之问与夫逊田文辞尚主趣舍进退从容可观则犹曾子之教尔学不胜质溺於技勇後人循迹而议置其轻者推其重者名之为薄夫君子恶居下流其是之谓哉

读孙武传

或问戴子曰子於田穰苴之斩庄贾尝甚而非之於孙子之斩吴王美人也不尤甚乎曰其迹似其情非也穰苴之将兵苟恶人之监已不如勿请既请而从之不待令而诛之是欲借庄贾以威齐也吴王以美人试武武受而教之再三不从而後诛之则是欲售术於吴耳然儒者多言孙武治兵无验吾并疑试宫人非事实太史公録穰苴事以所闻适相类故牵联书之欤

孙臆附传

按太史公不为孙臆特立传而附於孙武盖其事微耳而世人称之尝过实夫臆以刑余之人而投齐俛俛然求得其当以报魏不啻却克笑鬻之讐范雎折脇之愤也故其从田忌也一举救齐再举救韩皆不以取救为急而急於乘梁之虚而残之者此其志无一饭不在梁也马陵之役耻幸仅伸而终臆之身不闻他业可纪就言兵者窥之尤浅之为丈夫哉

伍子胥列传

昔者尝怪孟子言君臣之义於齐而有国人寇讐之报曰孟子以义教人者也君有不礼於臣而臣不施讐於君今也教人讐君而得为义乎久之而得其说曰此乃古之君臣之所为义也夫国之有君非以其国私之也盖将有以为其国也故国得择君而治臣得择君而事而非使之傲然无畏以为上也当战国时士之仕者犹无常国故孟子以之警动齐宣王而着为骄君之戒若夫人臣之所自得为者则必使其君待之不至犬马草芥而後是也然自孟子之说行而世之悍臣有所不直於君则悻悻然欲甘心焉曰君固有可讐者也於乎此非伍员父子之於楚其君臣始之有不尽而终至於多伤其义者乎且以楚平王之无礼而伍奢傳其子建奢以正諫触死微员之逃则与其兄尚亦必俱死罪在平王无疑也为奢谋者欲忠於建则勉建无怨可也欲全於身则知不可諫而去之可也建以谗疎身以諫死由君子论之奢犹死於职也员为人子至於残宗国以为墟发君屍而行戮其不太甚乎哉公羊传曰父不受诛子复讐可也昌黎韩子尝驳其语以为不可施於今世此正伍员之比也後之论君臣者当择於韩孟之间也哉

孔子弟子传

某按古史考疑公伯寮为谗愬夫子之人夫子不责而委诸天命以为不当预弟子数而苏子由古史修孔子弟子传非太史公纪载多所纠正乃亦不遗公伯寮而尽録其语窃尝考之公伯寮者鲁人也夫子之居鲁鲁人虽不能尽知其道而凡为儒者则希不及夫子之门矣公伯寮固尝学於夫子者也鲁国之政在季氏以门人弟子服勤夫子之教而贤者委曲而从之而责一公伯寮之不溺於季氏哉当是时由孔氏则必贬季氏由季氏则必叛孔氏公伯寮学孔子而中叛之以市於季氏固势之所必有也太史公泛録夫子门人以其尝从游而不弃不然则子服景伯之言过也夫子本不深信其为愬而公伯寮亦遂卒业於夫子之门乎

苏秦传

苏秦战国倾危之士也世之人有称之者以其能以口舌摈却虎狼之秦令其说行天下不至坐受秦祸尝考之事或不然方苏秦自齐归周自周而之秦然後之赵之燕之韩之魏流离狼狽不胜儿童妇女之所讪笑苟得一言纳之利从则从利横则横其区区穷谋本不专有摈秦之心惟不得於秦而从事於诸侯耳岂得以鲁仲连虞卿之事比之哉如其所策诚能尽其形势之强士马之盛而用之秦人岂真不得以逞也君子之道内诚其身而後能诚诸人齐之管仲相其君九合诸侯其事伟矣而不免有叛之者泗滨之问至无以服楚六国伎忍之君视其亲戚骨肉有不能自托而能托唇吻之外交以待毙於秦乎从散国破而苏秦亦以谋死固理

之不足惜也昔者尝怪夫子数称东周苏秦之时周至於显王益不振矣先王之遗风犹或不坠故苏秦东学游说於齐而洛阳之兄弟嫂妹皆能非谓以为非其本俗当是之时得孔孟之佐外以礼乐交诸侯而内以农桑治其国东周之是辅尤贤於诸侯万万也苏秦初干显王显王既薄其诈不用而纵其说於诸侯诸侯之事如彼周又他无贤辅秦以夷狄卒并天下有之岂小小之故哉

张仪列传

六国与秦皆有并吞搏噬之心非为一君独贤也顾秦幸而成耳而世人罪秦不置者以秦戎狄而资之诈也以愚考之秦之行诈不信於诸侯莫如商鞅张仪二人之甚而鞅至自卫仪至自魏固非可专曰秦诈就二人考之鞅之不信又未若张仪之尤甚也当仪之时苏秦同学先以从约取贵仪後出不得不倚秦以为横迹其口舌反覆倾人十城然後利一邑?人数乡然後进一号本不当责之以仁义长者之事而仪之始末得幸於秦屡屡饵其父母之国以为已食此不特商鞅之所未为亦苏秦之所耻言也吾观张仪欺楚楚怨欺齐齐怨虽其终以计免犹皆觉而疑之独其欺魏魏人至死不能觉其为卖已也平时腰金结驷佯佯往来於关河之上梁地日削仪身日贵及其岁宴宠衰秦人以礼归之於魏使之坐速寇兵以倾所居之国而魏之父兄弟子方与之优游谈笑而终老焉有商鞅苏秦所无之毒而无苏秦商鞅所有之祸世之奸人如仪者可不谓行险侥幸哉

樗里子甘茂甘罗魏冉白起王翦列传

战国之世秦人以形势诈力颀颀诸侯故为秦者易为功而事诸侯者难为力樗里二甘魏冉之於当时固非有过人杰出之谋而白起王翦虽为善战然不过纵燎於顺风林果於垂熟而凡其尽锐以为取胜之道者皆其不可再用者也此非惟不当责以古良将之风其视同时廉颇李牧辈犹远媿之而得为贤乎盖当是时秦势八九成矣天方假毒其手以树君中原谋不必工所施而服战不必良所向而克彼诸侯之臣固有贤於樗里二甘魏冉之谋勇於白起王翦之战其君用之未必能专信之未必能决而又连栖争鸣佐寇自贼顛倒谬误卒俱坠於毂中而後已而数子乘时逐利各以能名见登於好事之齿舌彼诸国之臣其材实过之者国败身辱而名字因暧昧而不彰岂非所遇者幸不幸哉

孟子荀卿列传

古之君子其学为已也而不专乎为已盖其得之也有余则推以与人也不患於不足成之也劳则其事传之於久而无弊孔孟之道自尧舜禹汤文武周公以来莫之能尚也惟其抱尧舜禹汤文武周公之道而不着於用故郁勃湮积於当时而卒能徐出而大畅之以及於百千万世之远自其及门弟子既皆身被其传以立於世又自诸子各有所传然受之浅深而行之久近有不能以皆善而要其大归苟出自孔氏之传者至其极衰大坏犹贤於他事万万也何也孔氏之道可远可近可约可博非若他事淫污辨杂以为通诞神僻异以为高也学他氏者於已不必诚而常惧於无以徇人学孔氏者进可以及人而退亦不自辱其在已者也故学孔氏

者近劳而什有八九焉不失为君子学他氏者近佚而什有一焉不免?於小人孟子荀卿之於邹子淳于尸子长卢之属是也自夫孔氏既没世乱道微生民之命悬於谈兵说利之口者若干年而子思之学再传而为孟子子弓之学亦一传而得荀卿荀卿之学未知出於子弓何如也而孟子於子思有光矣夫当孔子之时诸子不弃其师之穷相与追随驰逐列国之郊羈愁困饿而不忍去一时能言之士与夫非诮孔氏而不为其学者声华气势计当十百过之讫无所据托而独孔氏师友一綫之传屹然不坠以为儒者折衷非止邹子淳于之徒不可度絜短长而已耳自是而降诸子愈散其荀卿之学亦一传而谬天下异端曲说愈炽於邹子淳于之徒而孟子之所着书遂与诸子之书之可传者共扶孔氏以至於今日由此言之孔氏之道世治则与之俱治世乱则不与之俱乱自古至今固未尝一日废而学何其劳而孤也世言太史公不知孔子吾读孟子荀卿列传亦灿然知所趣舍哉

范雎列传

范雎入秦意在於急得秦权以及时偿区区之私仇耳岂有奇计为秦哉夫欲得秦权则不容不急逐穰侯白起欲偿私仇则不容不以兵胁韩魏此如怒犬噬人伺便捷中图一决之快君子盖羞称之然而雎之所以言於秦者则未为非便秦之奇计也虽秦之强不专以雎而昭襄以後诸国於秦若附若离卒能藉必成之资以速得志於天下则雎之助也何也穰侯之在秦固有可议而越韩魏以攻齐者尤为非计也今夫欲有所图於天下而无一定之画先断於胸中或至缓其所先而急其所後则虽日屠一城月堕一都而无益於大计使秦人竟守穰侯之策近舍韩魏而远攻强齐则齐地未必可以即得韩魏亦且共起而谋之外讐日坚内力日分而秦事劳矣自雎为远交近攻之说秦人一如其教日夜转击於韩魏之郊瘵腹蠹食腹心垂尽而肤革不知卒之三晋先亡燕楚踵服而君王后之齐最远最亲最後亦徐取之若此者谓之雎谋非耶故曰逐穰侯攻韩魏虽出於范雎之私而未必非便秦奇计也呜呼雎以亡夫乞一生於万死之中出其困辱余智以报平生之仇意得欲行一闻蔡泽之言即纳印去本不切切於秦而秦人竟赖其谋以帝然则非雎之假权也尝观六国视秦初非强弱相絶之国而秦能独伯者六国有客不能用而秦能并六国之客用之也六国之客入秦者多矣而三人之策最为有功於秦其一商鞅以富强开业振於诸侯其次张仪大破诸侯之从以为横其後则雎所谓远交近攻者若此三人皆至自魏诸客入秦於其旧国不能保其不亡而此三人者必至大毒於魏焉而後为重张仪以奸商鞅以欺范雎以仇要之六国与秦皆无义客而魏士尤薄也哉

乐毅列传

战国之君臣未有能以义始终者也吾每读乐毅书为之惻然悲叹焉方燕昭不胜报齐之愤卑辞厚礼以招贤士而毅也往为之屈此其意气之相求也已非纳交要誉於游扬干谒之门者比矣五国之师百城之敌先构其谋而後从之卒功专事擅而诸侯不忌其成兵连役广而天下不议其非毅之言曰五伯以来功未有及先王者盖非虚语也昭王既没新王以一介之疑弃百年之烈毅於是不得不弃燕而走赵及惠王殷勤反复以义见邀则又幡然因赵以通燕进退去就之间犹庶几古烈丈夫之风哉世之论者谓惠王薄於待毅又疑毅不当遽舍燕

夫毅於是時不去燕燕未必能全之也毅誠能死死於昭王則可使死於惠王之隙則亦不為得所矣故謂能死於昭王者義也其不死於惠王而去之者亦義也若夫惠王之待毅則猶有禮矣古者人臣之於其國苟為有故而去出疆必為之道也所往必為之先也毅之去燕不可為小故也恩睽而辭不污身疏而家不絕自近古求之改君易將之交處讒疑怨衅而能相全者惟毅君臣而已哉或曰毅則義矣子知惠王之不能全毅而許之以有禮何也惠王之有禮毅為之也父有不慈而其子申生汲壽之孝非子之常也君有不仁而其臣為伍奢大夫種之直者非臣之愿也毅為自全而因全其君毅固常學於賢人君子之道也哉

藺相如列傳

世言藺相如持空言與秦爭璧璧還而終不免趙於璧何益哉余曰不然秦吞諸侯非皆以其能也詐脅之所得較於兵取者往往十居六七則夫今之視趙其意豈止於區區之璧哉秦計既然則相如之抗秦固有不在於區區之璧矣且國之以人為存亡無以異於人之以脈為生死也有一脈之不絕者人雖危而不即死有一賢之可奮者國雖敗而不即亡秦誠積強之國見諸國皆畏而有不畏者在焉則其不敢易者必其不畏者也豈為一璧之重輕乎吾觀相如蓋戰國豪俊有謀之士近古曹沫之徒也已故能橫軀授命而知秦刃之不敢加強辭臨盟而保趙駕之必可反不然秦昭王之無道叛神明欺骨肉何忌於趙何愛於相如哉蓋嘗考之相如之為趙不但外以口舌折秦蓋諸將之與趙始終而能為秦畏者有三人焉廉頗固相如之所遜趙奢晚而與之同位李牧知名進用計當亦在相如之時使相如但以空言為強而無待秦之實則秦之加於趙必不若是怨矣故曰相如者戰國豪俊有謀之士也獨怪趙以相如之賢所推將適皆一時名杰自不可為無人之國再傳之後相如未死已不救於長平之事奢以子敗頗廢牧誅然後昔之所恃以待秦者皆盡而趙亦亡雖曰廢興使然觀國者可不為寒心乎

田單列傳

齊於山東最為大國方湣王之亂樂毅奮區區之燕假天下全力而攻之一戰而破濟西再戰而沼臨淄湣王出奔齊之七十二城一日翻然為燕何其亡之暴也及田單起捕虜破殘城哨五千之卒以鑿百萬之師燕將授首所失七十二城復翻然為齊又何其興之易也儒者謂使樂毅不以讒逃則燕不敗田單不堅忍窮城以須持久之變則齊不興嗚呼此二者似矣而皆非全論也何也齊雖無道其君可誅而齊國未可即滅也燕起僻遠出擅中國兵革之盟賴天下方切齒於湣王而樂毅之賢智足以彌變故數歲而無他然其一人之身而居不世之烈既有忧其持之之難者矣當是之時齊亡而田氏子孫不能盡幸而田氏無良子弟耳齊之臣民含怒蓄怨之日久矣寧以千里之大而一人之能安乎故毅去燕而田單一匹雛之力遂得乘間抵隙而圖之此天下必至之勢非毅之道不得盡用而單之術果有余也且齊篡國也燕雖召公之後而其德見厭於天與諸國之君無大相過故五六十年之間六國迭興代仆而卒以同盡於秦秦一再傳與六國之余民又相屠戮而俱至於滅蓋多殺人以立國者其國之不可久而又欲兼人之國乎哉吾於燕齊之事不能為之數數然者以此故也然使徒以一日戰伐言之毅兵雖為近正而田單之術何預於此哉今人既夸其神師火牛等智往往又出於兵謀

之外单之为人诡谬而不足称者太史公亦复不载吾亦不暇详论焉

鲁仲连列传

鲁仲连可谓卓犖不羁之士矣当战国时士非媚秦则宦於诸国朝从暮横去来纷纷而仲连游不以禄说不以利洁身高视於喧污垢辱之外一言之出列侯倾风羣士折喙吾尝评其挫秦之锋几於仲尼春秋之义愿从御者执鞭焉独尝读燕将书而疑之夫君子之立言出於正而无惭处於人而无憾一时未见甚便而万世莫之能废者此天下之至言也故其居利害之中如是则生而存如是则死而仆迫於有为而言者战国之士皆能然矣而其然者仲连之所不为也不为有为而言则其不得已而有言天下後世固将於是观之矣且夫聊城燕将受其君之命而死守以拒齐之城没於燕者七十有余他皆反面复举为齐独此城之将外无援内无资而不爱一死焉虽非齐人之所乐而自为臣之道言之君子必许为燕也仲连奈何教之行叛以归齐乎曰仲连齐人也为齐谋之也则何待仲连之狭也仲连苟有父母之爱於齐齐尝亡矣仲连远不为楚申包胥近不为王蠋今齐地已复什九极齐之力何患不获而为妾妇之忠乎且为此说则与仲尼闻鲁乱而使子贡挠齐破吴者同一见也曰仲连天下士也非以齐人自为也申包胥王蠋亦非所以论之也直不忍孤城之兵岁余而不决欲全其民脱之白刃之下耳呜呼此又何言之拘哉战国之民无岁无战战国之兵无岁无杀其为聊城大矣仲连安得城城而仁之且仲连尝争帝秦率梁燕佐赵而鬪之所不恶於鬪其兵者全民之仁少而却秦之义大也全民之仁止於一时却秦之义重於万世也今乃欲仁一城之民而先教人背叛偷生以亏君臣之义何其得之於梁客而失之於燕将也然虽燕将既死何救於一城之屠哉进退思之无所於据赖其将自能以义引裁不昧於裂地定封之诱以隳期月之守不然则燕国有卖城之将仲连为说降之客矣曰仲连之为燕将谋但劝之束兵归燕而东游齐之二者举甚不可以决之非正言也故燕将得书而归燕不能降齐不可则择义以死也是其死也自仲连处之也於乎此非君子之言也君子之为人谋於其求决於已而忠告之燕将未尝求於仲连仲连逆为不正之言而强告之何也宋輕以利说秦楚之君罢其战孟子惊焉以为先生之号则不可故君子恶遁辞而大居正焉有劝人以死徇兵而姑为不正之言乎夫仲连之道君子也吾固详责而严求之在他人吾亦不咎之矣然仲连之言如是世终不以聊城之事累仲连者以聊城既屠而不利其爵故贤之耳是固可贤者也古称明乎齐音者见利能让而战国齐士始不让而趋於谄若仲连者士之能让者也

伯夷叔齐列传

某按上古国以万计其各国之所贤者则自推以为各国之君其衆国之所贤者则共推以为天下之君虽尧之唐舜之虞其初不过万国之一耳惟其德盛故衆国环而宗之宗之矣而有不宗者在焉则衆国环而攻之夏殷以来主於传子故天下之共君者不能世贤而分则略定矣孤竹之为国也不知其所从始相传云墨胎氏又云成汤所封则是古或有其国而成汤革命始更封之耳此於商人固无骨肉相连之亲与心诚悦服之旧也自成汤至纣凡几世自孤竹始封至於伯夷亦已久矣然泽足配天无以过周纣恶可诛不浮於桀而汤武之伐君伯仲之间也孤竹之始封不辞鸣条之爵而其子孙乃非牧野之师乎呜呼商之未亡也孤竹之事

吾不得而知其何如也然但云成汤所封则伯夷之先世已臣於商矣不特伯夷世臣之虽武王亦且世臣之夫君之不能世贤其乱犹小也纣虽天子与诸侯分国而治尽纣之身乱止其政令之所及而已诸国未大害也幸而纣死一中主代之虽国之所以自治者可以不乱以一君之恶而易天下之共主者汤一行之既以为世骇岂可数数然阶乱教叛使为羿浞者接迹於後來耶故其歌曰以暴易暴兮不知其非矣神农虞夏忽焉没兮我安适归矣此伯夷之志也若夫国存而为之君臣国亡而视之涂人不待其贤如伯夷而能羞之矣吾太史公表伯夷为列传首而怪世儒言伯夷皆过故详论之

孔子弟子传总论

某观太史公之为书务在推尊孔子而欲广其道则録其所尝从游之士为弟子传而发篇之言曰受业身通者七十有七人然异能之士以为此言夫子所自道呜呼是何尊夫子之至而浅之为知夫子也夫子之道自其知者言之而千万世受其赐自其不知者言之而当时之党里有不谕其为贤而此七十七人之云云者初复何所系於其道之重轻乎今夫一介之夫有以自立於乡曲同时之士或昵而交之或信而事之或知之深或礼之略纷纷去来尚不能以一槩夫子行圣人之道周流於天下其所历非一邦所接非一士而奈何欲从数千百载之後追定其从游之数乎就令不谬而七十七人者但如太史所记自不必皆为贤能之士皆出於受业之数则夫子又自夸其所教之至此乎大抵战国以来异书杂说载夫子事多失实其尤甚者汉儒遂谓夫子以布衣养三千士盖其舛妄至於智者而止吾择此篇之大者略为之辨其诸传中同异则有先儒之折衷此不敢尽僭焉

孟尝平原信陵春申四君列传

欲有所为於天下而无特起之士以为之佐虽汤武不能以得志而况战国区区君臣之间乎自学校井田俱废材士豪民高者为义侠卑者为游说士裂兵烦隐於农桑者不得逸焉则往往出一时之侥幸以求迎合之利此固当时俗尚之所同然也而孟尝平原信陵春申四君遂以好客闻於天下士亦忻然从之上下皇皇相求真若倾心赴义以相成其事者以吾观之四君之中惟信陵行事近於有礼惜其慤愿既以桓文之事为劝其客犹似可使者其余不过餽啜之资盗贼之道朝暮游说之徒耳何士之云哉何则四君之时秦虽已横犹有畏忌诸侯之心齐楚为大国而三晋自负劲兵皆未遽屈於秦黄歇虽以口舌缓祸迨其归相暗谬无足称者田文之客惟一冯驩终始不忍叛其豢养之恩为之忠计以求益封复爵意念不出齐疆之外赵胜虽有虞卿毛遂稍能叱咤挫秦然其兵退议功从成而德色固有不满足鲁仲连张孟谈之一噓者而能以强志奇计扼虎狼之秦而收其弊乎信陵之取士则有异於三人矣秦兵压邯郸而晋鄙受人之怵翱翔而不敢救挟计杀之自不失为忠於宗国未闻为姊弟骨肉之情也赴赵赵存归魏魏重终信陵之身秦人不敢肆力而噬而侯朱之义死毛薛之正谏就同时诸客求之亦所谓彼善於此者天方授秦愚智同弊中华冠带之区不数十年荡为虚莽而谈四君之事者至今徒脍炙其能好士亦不辨士之何如也其罔乎哉

剡源文集卷二十二

卷二十三

剡源文集卷二十三 元 戴表元 撰

杂著

读国语

国语有二十一篇用周公本及补音防校自有此书来最善本也当宋公时韦氏注已始行盖古注如贾唐诸君之善者韦氏悉择而牧之矣宋公又博洽大儒所定本信无憾余读之久时时见韦氏千百中有十一过当而注家縁名析义于文人澜趋阜拆之势导之多不得畅故此书所为与内传相出入者亦或病之以为难读窃不自胜慳慳之愚遇有所疑标识卷顔其可通者悉断为句岂独私诸家塾共学之士参其如彼决其如此亦将有以教我者焉此书不专载事遂称国语先儒竒太史公变编年为杂体有作古之材以余观之殆放于国语而为之也

读孔丛子

孔丛子六卷连丛子一卷通二十三篇嘉祐中有宋大夫咸为之注释今所传蜀本是矣乾道中王君藺稍又厘补其讹阙是为舒家本然取两家本阅之盖皆以为孔子八世孙鮒子鱼从聚成书而连丛续于汉太常孔臧其实不然子鱼生于战国之末一为陈涉出知难而退遗言隠行不传于世者必多安在猎取一二自暴其美侈然上附于先君之列而谓之著书耶张耳陈余二人者汉初谓之贤士又或以叔孙通为圣人今书数引其名此后人所推托若房元龄杜如晦之于文中子耳连丛亦非孔臧所为其四赋尤猥劣无西都人语气二书依傍故实仅仅不失余故读而疑之然诸子书自列御寇以下多非正文君子之于书为其可以正人心息邪说也则存之孔丛子者矫矫然守其经生之学试读而行之其心之于贫贱患难也不苟辞之矣此非孔氏子孙若其徒孰能为哉

读蔡氏独断

蔡氏独断二卷本传载伯喈尝着此书而世儒或疑今本非真出于后来者掇拾汉史余文以成之余攷之伯喈之学不止于此谓不出于伯喈亦非也当由本书散亡幸而存者仅此耳若车服诸志乃其所已创与范曄史文时相出入盖曄取伯喈非仿伯喈者取曄也古人作史咸有所本一史成而诸书皆废伯喈之书其以范曄史废哉然犹仅存则犹有不可尽废焉者矣伯喈才识数倍于曄继孟坚者当在伯喈天夺其成逸而归至于偃蹇取死二人之道虽絶不同而皆不得免其身士亦何贵于文哉读其编竟之三叹益增学道之慕云

读孔壁传

鲁共王所得孔子壁中古文虞夏商周之书及传论语孝经释文以传为春秋又以为周易十

翼按十翼之事不古陆氏既云非经谓之传则春秋不可以为传也班氏艺文志载共王壤孔子宅欲以广其宫而得古文尚书及礼记论语孝经凡数十篇然则孔安国所谓传则班氏所谓论语孝经也

佩韦辨

人性刚柔得于天宜若不可以矫焉者然有修之成德而为君子亦有防之失中而为小人则不可徒委之天矣德既成性既善我不病刚矣而以刚取祸我不病柔矣而以柔致咎是则又若出于天之所为而人力不得尽预其间吾读柳子厚佩韦赋感而悲之夫子厚谓纯柔纯弱者必削必薄纯刚纯强者必防必亡故取于韬义服利之君子以为之盟是行善矣吾独不释于取舍之指何其持心危择利审愴焉夺于其外将不暇执其素委躬而趋之也且泄冶之争其君而死义也安有义而可悲者义不可悲而不免于祸非泄冶之罪也而子厚罪之陈咸在昏上乱臣之间崛强自异病在犹未能尽诚直耳其触屏而拒教君子何讥焉而子厚讥之充子厚之意则拟之若何然后为刚耶如此而刚者在所恶则将出于如彼而柔者而后可耶泄冶之争非遇孔宁仪父其君固能容之陈咸不过不能久为要官当是时不为陈咸之直而以他过竟死者多矣然则二子亦偶不幸耳非谓其不能柔而刚也世有所谓真刚者加之以所不堪而不为之辞予之所以不当得而不为之受何者其自处者定也吾观子厚奇才盛气言论雄峭得君之浅未覩着立何如而平居与敌以下言视施于所畏者慙慙之义已少衰矣夫子曰枵也欲焉得刚欲之害刚不必已甚亦孰有大于利禄者乎子厚悼苦諫之败名惩直躬之失职逃刚太过逡巡不悟而堕于党人之穽也哀哉吾故重惜子厚贤而有识疎于刚柔之辨不及详而择之也王君希圣作佩韦辞自西门豹范丹柳子厚诸人至朱夫子凡取于韦者备矣徵仆为之铭仆不能有所发独谓子厚宜慕刚者师之不得尚愧不能执柔故为其辨且仆之资外狷急而内巽弱惧学之不勇遂为小人之趋也亦幸因希圣之言而觉焉希圣才敏倍于仆方谦谦好问其以不腆之言为何如哉时屠维摄提格余月巳卯表元书

自袁氏字说至佩韦辨五篇删去不存藁久矣盖巳卯岁前未居剡源时也庚子春有三衢王秀才从何处传写以讹缺见问余遂取而存诸篇中俯仰二十年文学志业一无所增益反若有愧于前如何如何

豢夸二氏诫

古有豢氏之国其俗喜搏有一人最善搏力既盖一国矣于其奋逆批控邀遏之术特殫其巧焉他善搏者虽趨健如堵墙跃其前肘交而仆由是人心服之尽国中无与为拏者然谋折之挫之百方乃相率奉之为燕游醴食声乐以惫其体其人亦以为吾搏已絕浸淫欲兼他技纵而及于戏弄博奕之事众奉之者外与之游而实耻搏之不如也心索而习之久之搏成度其人已不复可畏一少年众恚曰吾属所为奉子者以子能搏耳吾今与子搏明日搏于市其人振腕翔踵而赴之气喘然索矣故今言技之不终者以豢氏为戒夸氏之国有好德之士亦犹是也夸氏之国之士叩之其防靡不知投之其艺靡不习自炎黄以前茫昧无名之初沿而及于其身之所歷其间废置盛衰然否之迹靡不通其故自儒者之所当务以至九流百家六合

之外奇诡恍惚之说靡不能举其槩亦可谓辨博不常之士矣去而之一邑一邑敬之去而之一州一州异之去而之天下天下之士愧之曰吾见此人殆虚为士也则相与北面而事之愿为弟子出则安车居则函丈羣弟子往来聴其说而先生坐授之其说曰凡吾于学弗能物物而精之也吾有要学吾之要而诸所欲能者可举羣弟子得其说与书大喜不期年学皆成先生处之洋洋然其道有授而无受也其能有出而无入也心窃自幸吾既为天下师何能劳苦复事今然后惟游乐是图以毕其齿尔如是又几年羣弟子时造先生之居而究焉先生应之不逾其初稍稍厌而去之益老益昏师道益衰学者益离无所得食而归其国其国之人不为礼今人言为师者又相戒毋若夸氏子然也戴氏曰二氏子之取侮其终身者不可追矣抑所与从游者何太薄也吾观自古志怪之书不一其州国名号非人迹所经诞漫无所考信其事复非人世当有故君子多略而不稽兹二事有涉于教吾故表而録之以使偷近娱而安成名者警焉

猫议

防牛虎兔龙蛇马羊猴鸡犬猪皆得其类于人谓之十二属猫与人最近独不预客或疑之以为他物贵贱犹有可言顾不得比蛇防乎曰猫慕肥暖轻迁就不信无义又生子多自残贼其事蛇防所不为也

祭文

众祭徐子方丞防文

呜呼哀哉人之羣居各以其伦故生而达之不相遗也所以为义死而【缺】之不相污也所以为仁属者窃见求之于风气混合之防岂六合之广百岁之远而不知其人盖亦两不相值至于贵者吝权而忌善贱者徇势而忘身惟我徐公天性清真闻一言之中于道一材之适于用则夸张赞诩至自引其躬以为如不可及虽草茅侧陋江海阻絶内不度己之嫌疑外不顾人之愿欲而必将使之处屈而能伸位近三台仕逾五纪衣冠之所楷则中外之所警策而谦容雅度言笑恂恂辟之大川乔岳有来必容无门不纳人益见其浩荡而嶙峋彼斗筭之夫撞搪掉擲岂不欲驱羸攻坚扬秽溷洁卒之力不给而先蹶目既昧而徒瞠夫惟在宠知让居高能贫故其忘懷出处随时显晦白首一节愈久弥纯四海之士方期公之大用假使病惫已甚犹当如古法闭阁予告即家赐珍如之何遂弃斯人而长往若返闾阖而游氛氲攷公之平生本末终始至是则适可无憾惟私情之不释然者悼行志之未卒而为善之无隣凄焉薄奠于彼河漚而冀公神游恍惚之一遇也如畴昔之相亲尚享

祭张复山长文

古之君子孰不能刚刚而不黷所以为良我识张君晚在江乡盖穷年卒岁不羸五秉之入而严顔毅色能却千金之装何以言之其司防计备廉名于朋友其饬子弟捐近利于胥商而又退不苟衰老之禄进常守高蹈之方惟于当筵发辨臧否愤激敢者难当虽人情油然终归避

伏而灵台泰宇冲抱先伤此则君之自损若吾徒所为惨怛者病直谅之不作而老成之云亡
凄焉草奠语短情长魂兮有知尚酌兹觞尚享

祭赵丞文

呜呼哀哉人之居世患不能贤有贤于已或鲜其传贤且有传是可以死我之哀公则何可已
公昔燕居我为乡人晚而失仕亦同为民穷达之交死生之故人所不知我得详数势权之乡
细弱罢市公于此时懦如处子膏粱之门经荒史芜公于此时勤于襄儒世禄临民以律为戏
公于此时敏如法吏一镞穿城千夫防魄公于此时勇如侠客衣冠播越大蹶小颠公于此时
逸如散仙父畜于前子获于后浮沉里闾以尽耆寿一昨兵奔始奠南宅隳者五兴左侯右伯
神龙徙渊云物先尽山之将移兰枯玉陨堂堂大宗余一耄衰今其余者又不能遗人亦有言
公善其终我知公子甚于知公公居未成公许隣我公族有女公许姻我公笑公顰我无可
曷为去我令我无与虽公之子谁免其侮不侮在我我慕公熟惟如公存不敢自辱我老知此
非以自警且告公子公目其瞑北山苍苍南溟洋洋百年之情临此一觞

代千奴监司归祭祖考妣文

介邱出云雨流于田灵泉发源潞陂积焉维我大父造基险艰以身易宗忠不忍言嵬嵬太中
承徽裘美华 高扬良宝中毁施及孱孤遂享丰报未收再获鼎受既芼惟获之逸居之实劳
其何无惧而可终朝爰念莹域爰念封树魂飞万里有泪如雨属者天祸浚延祖妣得请于廷
归奔防机有严衣冠神灵是凭是举合葬是安是恒铭碑植植石仪闲闲匪以飭哀哀在肺肝

代祭王右军祠堂文

维某年月日遠孙某等谨以牲酒致祭于遠祖故晋右军王公维公清风懿范绘在史册俗情
传夸举一遗百造意成书纵言为文残珪断璧千古难羣小者且然况乎精微青山白云魂来
是非谷禽春吟涧卉晴秀庶几挥毫尚想舒啸树爱召伯綉存平原名贤之光被于遠昆某等
悬覩新像载祀山塾瓣香矢辞炯炯心目尚享

祭告榆林庙文

某流连之人自癸酉以家东行即有兵祸脱命生还颠危益甚六年之间奔走九郡十五县之
地二千里之遠心未尝一日宁而剡者固吾畴昔所卜以藏吾亲慕念所加非他处所比也不
自意转徙而来遂得一区居之畚鍤不劳 筮自协乡邻往来如素相识夫岂人力所能至斯
是敢以民礼谒告于神惟神不赐简薄于不肖躬惟先之泽未或陨坠俾世世承祝则其子孙
庶克用康将施福其孥以昌其家绥安惠和动罔不裕亦惟我子孙大厥族于斯世敬事神无
斁以伸其报焉敢告

祭张村千厨岙山神文

维年月日婺州路儒学教授戴表元谨致告张村千厨岙山之神维我祖考府君祖妣夫人实始托体长锡塋山不肖孙凭頼遗荫幸未成居积累岁年增遘拓表延袤滋广今将用闰月某日预卜寿藏于兹山瞻言长锡岙在东首祖孙相依礼惟其宜惟神尚安妥之勿震勿愆以康我不肖躬以慰安先亲之灵则幽明之间为惠侈矣是敢只告

迁奉祠堂文

维大德五年歲辛丑十二月丙寅朔越九日甲戌孝嗣孙戴表元谨以清酌时羞之荐昭告于戴氏初祖九府君以下列庙之灵古者将营宫室宗庙为先表元来居剡源余二十载而新寝未筑颇尝规购先祠奔驰之烦莫克就绪深惧迤邐愈兹不爰涓吉日祇迁神主宅兹上游位惟辰巳北上西向初祖以下在北室高祖六四府君在中室五祀诸神附南室惟土地之神在下室迁奉之后庶几妥灵阴阳隲相家用和康以延于子子孙孙无坠厥祀敢告

信学谒先圣文

维夫子之道大而无所不该故精粗内外皆诣其极今之为夫子之徒者未能尽已而但欲尽物多见其不知量也表元之区区诚不意复奉牲币以事夫子虽甚惰衰不敢不勉只役之初是用谒告

先儒祠

先王之学既散而无所宗扶而存之是在孔氏孔氏之学又散而莫知所宗然犹能绵延不即絶者则濂洛以来诸先儒之赐也故所在庙学亦得通祀惟谨只役之初是用谒告

乡贤祠

信为江东儒国异时诸老先生议论风指所以覃被吾徒逮矣爱其人者爱其甘棠况表元得以职事奉祠宇备扫除之役只事之初是用谒告

土地

惟神莅食兹学有年为官者故苟旦暮以充官簿不得如神之专且久也只役之初是用谒告惟神嘉相之

中丁迁先贤祠

惟兹学祀乡之先贤旧矣中更兵燹宇舍不周混处庙庑祭荐差迭有及有遗神人弗宁相攸西偏厥庑面阳爰议改奉适时中丁诸生将有事于释菜遂于新祠揭防妥灵尚歆飨之

祭徐母吴氏夫人文

呜呼人于父母谁不知亲然分别言之父当严而近义母或慈而为仁至于离脱襁褓熏渐简册则必待师友而成身其有闺门贞淑之节而能督飭孩稚家仪塾范与父师均此岂可但谓之贤母而求之旷世盖鲜其人英英徐门弋水之濱惟彼良子幼罹艰辛惟太夫人机杼箴纫却朱铅而不事惨独鹤于相晨顾中诚之所惜有掌握之奇珍则为招名工购美错朝追暮琢以使遠异乎凡氓比诸陶姬截髻孟嫠迁邻维风流之已遠实懿则之同伦天闵其劳与之康强燕乐冀得养寿于朱罌翠管防綬雕轮宜百年而未足胡庆吊之相因某愿托子列难同它賓既登堂之不早当薄奠之躬陈函辞絮酒终若有柅吾足者徒含愧而颯呻灵兮有知鉴此情真尚享

榆林瓦岭庙上梁文

天开地辟山川忽属于神灵岁改星回祠宇自闕于气运睠榆林之乐土时瓦岭之閼宫塋脉东来雄夸苍龙之背檐牙南指前占朱雀之躔精神数十里之趋迎生齿累百家之环拥祭则受福久无螟蝗水旱之灾过者下车真有社稷尸祝之爱逮于近岁尤着阴功间亦避兵驿候朝传而不至人方忧盗里门夜啓以无惊帡幪之赐既多崇饰之严未称遂恢新构益耸羣瞻良家输杞梓之材千章辐辏巧匠献般垂之技百堵朋兴日吉辰良人懽神悅修梁斯举善颂宜宣

儿郎伟抛梁东好把诗书变土风看取梨洲文笔样嵯峨高插万人中

儿郎伟抛梁西榆柳堤平马不嘶从此太平无閼讼村村化作好山溪

儿郎伟抛梁南积翠前峰手可探事少自然生富足宜耕宜畜又宜蚕

儿郎伟抛梁北匝匝连蔓如拱极人行书静少追呼犬卧清宵无盗贼

儿郎伟抛梁上吉善之人神所相欺心莫向庙中来且劝乡邻兴逊让

儿郎伟抛梁下此村今是平安社驱将虎豹不窥山护使牛羊长蔽野

剡源文集卷二十三

卷二十四

剡源文集卷二十四 元 戴表元 撰

书 启 疏 传 劄 子 说 谕

通谢张可与参政书

正月吉日剡源戴表元谨顿首再拜奉书参政相公阁下表元嘗闻之周公之相周也勤于求士天下之士执贄而见者十人还贄而见者三十人貌贄之士百有余人欲言而请毕事者千有余人后世文人墨客夸而张之以为美谈表元窃独以为不然当周公时诚多士安有千余人日扰扰焉于周公之门而不耻而受其谒者方疲精惫体有战国四豪吕不韦陈轸之所不暇曾是以以为周公乎盖理之必无者也故夫古之君子之求人也其道必有不劳而致之而君子之见求于人亦必有以自致贞女之行不出于乡闾知者详也鬻宝玉者不登门信者先也今有善匠将使之巨室问其材木之所产耳目之所经历口疏指画一日而办求马价于良御某优某劣某悍某驯虽千里之远举能言之何者考之熟而蓄之素也伏惟明公以清材敏识隆名雅度振撼于东南之日久矣东南之人情土俗时宜政理伸其乐而遏其所不堪者其事悉矣而况于士大夫之行藏名实进退俯仰容之以礼貌动之以意气其知之详而信之于先考之熟而蓄之有素无所不用其至矣而表元抱区区之贱愚譬之于物瘠女矿石樛木弩驹媒贾之所不亲匠御之所不议自其少时顾嘗以塲屋空虚猥鄙之文窃有司之科第以苟一日之禄而兵革以来心气昏耗虽童子之所能者亦皆废忘不可温习以是趑趄震栗守其常分积二十余年不敢以踪迹累明公之典谒去年秋有亲友自中都回则闻明公不鄙而讲其姓名于公卿将荐之公廷登诸天官之选而使食劳于下士之秩表元惊疑徬徨不知其何以得之者既而思之明公之心古君子之心也明公之道古君子之道也推明公之心之道天下之士岂必待求于我而后与之者乎推明公待天下之士之心之道其于天下一民一物之未尽得求者惟不知则已矣苟知之其忍有遗之者乎故因明公而前所疑于周公之事者愈决表元之所以得于明公则终非其人也明公知之过而取之泛也虽然明公非知之过而取之泛也明公意表元之或可知或可取而不忍遽遗之也表元之非其人以真或可知或可取也而犹不遗之天下之士诚有真可知真可取者明公其忍遗之乎故表元不敢独为愚贱之身惧而为天下之贤士喜也不独为天下贤士喜而直为天下之民物贺也道里修远贫乏未能参候面谢而先之咫尺之书以摅其惓惓渐老矣俟明公功成业就它日或能从文学诸生后作为歌诗以颂巍煌盛大之美而或幸而能附托不朽编摩纪载以补山碑野乘之遗阙以明明公之知人以侈东南门下士之遇未晚也

启

赵氏婚启

伏以叙杏园之年好久熟大门数榆社之文交莫逾贤从宜有丝萝之托以增金石之情伏承

亲家某官次令女玉雪自持闻早闲于妇事而某长男某缣缁不辍觉犹有于童心当干蛊之云初岂授姻之敢后夤缘高义邂逅成言之子既亟于有归吾宗遂从而获助讯三星之候庸币帛之是将开八世之祥倘衣冠之相映

回孙氏婚启

某宦学四方虽知名之已熟婚姻两姓愿投分以非宜出于盛心来此信绍伏承亲家提刑大监令侄封郡寺簿长孙男肖翁将仕温良之积必克世于诗书而某男某次女少奎寒薄之资惧未闲于礼法既揆量之自审何扳慕之敢高辱问愈勤愿辞不获吾闻命矣敢虚道义之风其自今兹共振衣冠之绪

回徐氏婚启

伏以中年涉歷苦婚宦之萦懷邻境扳缘喜亲贤之在望投我尺素重于兼珍伏承亲家学士令嗣宣教籍甚醇明定熟防稽初学之记而某第三女在娘肃然清窈真是东汉逸民之家草木之味偶同金石之盟遂叶相邀古道不较浮文两姓甥舅之欢足光吾党百年子孙之托昉自兹今其为忻愉防既敷寫

范氏婚启

伏以江海浮踪既屠羊之靡托山林余念惟防犊之难忘欲为诒后之谋爰择宜家之偶伏承亲家学士令女小娘子袭清门之礼训婉晚固宜而某男次纪守先世之儒瓊鑽研尚浅夤缘诸父之旧缔合两姓之欢庶无异图以永良好丝萝可托实昉自以兹今冰雪相看是所期于吾党扳缘之喜铺写奚殫

舒氏婚启

伏以吾州四姓之家久烦慕仰斯文一日之泽亦许扳缘防厚幸之如斯临嘉盟而甚喜伏承亲家学士令女小娘子早谙礼范如种玉于蓝田而某男后庚穷守儒瓊颇寻源于潢潦夤缘草木之味缔合金石之交菲然微仪辱在高义论财子女正吾党之不为邀福祖宗尚后昆之见相忻愉之至铺述奚殫

回弋阳赵教授启

伏以山林偃薄分絕望于青瓊江海游从喜论交于白首敢惜投 之报以鸣伐木之求敬惟教谕学士前辈东土俊流南宫旧物居楚客众劳之目加以能言留番君遗爱之乡久而成聚阅变化于浮云外物谨行藏于暮景修途乃迁九万里之图而从二三子之撰时方兴学必大修明堂辟雍之仪君若应徵岂多逊公孙晁董之对清华之选造次可湏某猥缘虚名莫返初服病顛蹙足居然弃物之逢时血指汗颜詎意良工之在侧既循墙之不敢惟倚席以增慙所

赖芳邻见分余映扁舟散髮固难礼法之疎斗酒同襟倘许谈谐之数

通燕右丞启

伏以江浙同风久劳于乡往云泥异路遂隔于瞻承蓋以初无先容之言益成后至之罪比闻台从将压鄙封此而不预謁于道周仆则自取疎于门下然古人之礼见必有賛而儒者之业职当修辞聊效蚓蛭之鸣以当鴈雉之执伏惟右丞相公三光五岳之气焰四海九州之胸襟文雅风流不在王茂谢安石之下渊源议论及游陈元方郑康成之间方蜀道岌乎难登乃庐山屹其独立单辞造膝而雷霆收霁轻车就道而风日清夷立谈亟拜于璧双坐对不知于席近径由棘列往间槐庭袞职以补躬絺绣加文而滋美医功以康国参苓解毒于无形遗民有今其庶几之謡同类发吾复何忧之叹脱干戈而安钱锬逃桎梏而还衣冠有年于兹伊谁之赐今者辍步紫防之府宣恩沧海之岷山君水妃收云霾而听令藩侯邦伯候道路以趋尘荣倍于防稽邸使之见章威迈于临邛邑令之负弩窃想明公之志非如俗士所窥必将措世唐虞无慙简册之载然后许身稷契尽酬韦布之言表元髮种种以欲华迹摇摇而靡止鼓三作而气絶已不记于前劳木再实者伤根矧敢萌于妄想家有逾七至八之老道遇满十除五之穷耕铁砚以诳饥絺絺衣而觊暖取数防于卜筮献伎穷于优伶何待何清始有相知之至颇惊星动乃传鼎贵之来凡公意气之交皆昔朋游之旧篋槩未满忍独弃于遗珠乌参方陈姑强羞于茹藿知我罪我进之退之一维门馆之所裁自分泥途而已矣属时炎暑祇役江郊谅岂弟之有凭宜兴居之胥吉尚祈谨嗇益保炽昌谨奉启事再拜以闻伏惟钧慈俯赐鉴念不备

通苏教授启

某防首再拜奉启伯清教授学士同舍执事某一别光尘九更岁籥虽游从甚遠莫知桃李之成蹊而润泽不忘常如珠玉之在侧比从乡论获采邮音谓将屈于范模来俯临于衿佩诸人动色知为文藻之故家我辈归心特有波流之砥柱惟此弦歌之国素无刀笔之风越自近年诱成恶党鱼鳞田籍化为子虚之归鹤髮儒宗侮以侯白之术计虑疎而自防危穽造詣拙而倒持太阿信萋斐之小言弃隄防之通例貂不足而狗尾续惊位置之何多蚤则绩而蟹有筐几主名之莫辨得者不以为感慢之反以有辞宜谤议之喧天致纪纲之扫地怒室色市遂疑善类为皆然延寇启闕因令外侮之得入体貌衰而谁顾门戸坠而不扶俨然冠盖之林凄其羈旅之色事已至此当取瑟而改调行或使之有弹冠而交庆兹蓋伏承伯清教授学土木假山之家世金华洞之精英方亿万计園桥门首预登瀛之选及七千里距要服踵克观国之賔清谈雅步而懷璧自如深潜屏处而推轂恐后居席之右载道以东洎教令之末施已观瞻之防改当使大官贵将知有师儒之宗自然新学小生复还礼逊之美某旧依童习老綴賔游尘土容顏顾消磨之已尽江湖名字犹记忆之未忘闻脂辖之在行喜同袍之有托川途孔阻凉燠靡常想悵悵之有凭凡兴居而胥吉未由面调先致手书更冀司存倍加珍眚爰茂乘于昌防以前迓于亭除不鄙委令敢辞弩钝伏惟垂慈鉴念不宣

回凌德庸诸公启

表元防首再拜德庸知事学士执事表元二纪荷鉏已都忘于旧学一寒弹铗敢过望于新交不虞防涉江海而来获接凌厉风云之彦盼之青眼投以赤心谓其可为童子之范模遂欲大率国人而馆谷既领订金之诺又来俚锦之笺陈谊甚高岂俗流之可及有言不食尚岁晚以为期惟是精力早衰渊源素浅使不深于谬误得无赖于高明诸丈先辈不一一奉记合并之间谢叙是幸谨此占报切几鉴融

回舒子燕送鷺酒启

某老而怜子欲分井臼之劳穷为择壻又得藿盐之赖政自安于险陋谁或达于高明乃行眷私逵致庆问爱鷺封酒虽感咏之难忘烹鱼得书惟报酬之弗称

代太学同舍内优成谢贾平章启

伏以公堂较艺守三尺之拘挛钩路怜材恢一陶之块圯使寒畯动速成之想为国家增乐育之仁趋恩如归洁已以谢若稽学制厥重舍优如缘宛陵之竿不能以足而为先后如主矍圃之射但听所命而为去留至若积累而升较然劳逸之判逾时歷月进以鎗铍坠地登天系于忽角铅槩者叹其不易而执刀笔者阻之无难自非遇寛大之朝何以成濶絶之选伏念某虫雕无益兔祸未陈进不得飞名誉以为高取仇览长裾之美退不敢聚朋曹而造累蹈子厚尺牍之嘲独于分寸之跻扳欲効寻常之驰逐诚非觊望之及动有侥幸之期洛阳年少之能言或轻初学阙党童子之居位躡见并行谓可满意以予齐更欲垂涎于望蜀乘机并进取数已多而乃雉采先成屡喝卢而未定马形皆具仅阙尾以不全傍观讶合穎之难相知惜亏策之浅徐紓防悃仰吁元台造化之笔方勤文法之议踵至天人曰可堪輿曰否自竒比之多端执友称信交游称仁辱公言之交上径采金同之请亟颁特达之俞器跃冶而钟镛材束薪而榱桷伏观褒袞尤重负芒盖度越常调之恩犹谓素怜于庠校若品题佳士之目实非易得于庙堂科塲之辞防轻慈闱之色为动所谓生我成我不知舞之蹈之兹盖恭遇太傅平章魏公别墅折冲翹材录用谓周官六典之法度必出闕睢麟趾之心谓洛水数世之源流可培菁莪采芑之用遂使鸞鱼之飞跃不强鳬鹤之短长居然数奇亦以等进某敢不激昂弱质报称隆知志乎上志乎下此亦倘来之别物优则学优则仕尚期无媿于前脩不出他门昉自今日

疏

观民阁营造疏

伏以名藩偃处实分灵鷺之南支古阁巍然尤据苍龙之左角非但尊严于郡治盖将观览于民风岁久日长霜摧雨剥工已成而壞之可惜力有限而葺之良难惟牧守为古诸侯居处不容于简陋如父母之役众子奔趋敢惮于烦劳各肩乃心共相斯举谨疏

石屏戴式之孙求刊诗板疏

伏以天台山高几万丈产人杰以何多石屏翁死未百年有诗名之故在思昔江湖半天下之迹定交真袁诸大老之间掀髯顾盼则轩盖成云握手笑谈而壶觞达曙故其吟篇朝出镂板暮传悬咸阳市上之金咄嗟众口通鸡林海外之舶贵重一时既遭遇之如斯何消磨之遽甚今欲访劫灰之残烬斲文梓之新编风雅运开定有闻名而乐助英贤气合何湏同世之相逢慷慨挥毫琳琅照目谨疏

抄题刊伤寒书机要疏

伏以医为书行世自岐黄有此用心人説证无方虽仓扁难于措手况伤寒之至切于疗病以易差自张仲景以来若庞安常诸老既阴阳虚实十能辨其八九何死生反覆百不将于二三盖缘用药之时多至临岐而惑今欲一准古贤之训明该治法所宜遇某岷则饮某汤传彼经则投彼剂大书标揭决无疑似杀人众力板行即是慈悲搃物笔下洒霏霏之薄润眉间观鬱鬱之阴功

防古崔教授求路费疏

伏以抱關击柝仕有为贫毀瓦画墁志将求食乃有北士来游东州通隸古前之书为科举外之学譊譊誦説欲尽变庄岳之音皇皇道途竟不赋侏儒之粟广文之曹司何在考功之岁月何多居然代者之栖凄其去客之役昔陈师道有外姻寄食故能辞处约之金范希文在邻郡解官犹时鬻代劳之马今并无于指擲欲遽办于賫将惟当路之诸公贵人若是邦之君子长者庶几兴念聚刮龜背之资万一知恩有啣珠蛇口之报

万戸府靳提控求仕疏

切以阳燧露处借隙日而生光辉神龙泥蟠得尺水而兴云雾岂有英雄之奋发不资气势之依凭伏承 道提控矮矩长身危涂缓步取毛锥子投地谅世家之岂然辞柳列君染衣幸岁年之已久今欲脱踪絳灌之伍谒选防臯之庭知己纷其如麻拾爵易于若芥千金之裘非一狐之腋湏众力之相成方寸之木俾岑楼之高看修程之立至请题氏某各助若干

赵道人北游疏

伏以阅世千万尘何处有建德国斋心三十日为子説逍遥游佩烟霞为賫粮指江湖吾传舍交梨火枣左右逢源金母木公先后御侮此自仙家之素有必湏人力以相成如龙藏芥中得水即化如雕离轂外待风即飞但举扬州绵纒与之径从洞庭剑渡行矣

翁舜咨疏

伏以挟策为仲尼之徒居然自异求食必伯夷之粟正尔良难窃见翁君舜咨家乏负郭之田躬希陋巷之节宁食三斗【缺】不肯随肥马以拜尘强持一寸胶乃欲遡下流而搃浊蕉间

之鹿久去釜中之鱼屡生今将裁鲁章甫之冠分唐广文之饭顾穷坑之莫塞何选海之可寻凡我同游岂无知已动色顾炙决非平生之心刮毛成彘是为众力之助片言白水双翮青云

代史承奉谢安醺疏

伏以上帝好生本哀矜而不忍下愚有过许悔艾而自新伏念某藐尔羸躯婴兹笃疾医师番进几百药之俱投役 顿劳积三旬而相守去死不能以寸得祸必有其端方当呻吟痛苦之中不胜忧危恐迫之至生身顺境则岂知夜食之艰难处事少年则宁免语言之凌忽或计虑再三而用以过当或经营什一而谋虑太深或乘已喜怒而有所伤或见人患难而莫之防或暗室屋漏自亏戒谨之恭或肥马轻裘不思卑近之福诸如此类可得而殫今尽悟夫前愆庸敬陈于真款伏愿惟皇孚佑有赫鉴观活臣蝼蚁之身使沉疴之防起延臣犬马之齿得警防于将来誓以余生力成善士

邓君疏

伏以为五斗米折腰有居贫而不免封万里侯食肉无委运以自求切见觉非学士邓君扬旆欧曾翰墨之乡挥犀朱陆讲辨之地膏肓泉石几欲携老子入名山欬唾珠玑聊复对离骚饮醇酒固天机之洒落亦要路之峥嵘今者铁砚已穿刻书将上大则绣衣乘传驱驾风霆小亦金銮代言剪裁云雾惟公意之所愿欲于事势初无留难为交道之光华增儒林之脍炙蝇翼附骥自皆致于盛心龟毛成彘想不遗于余力笔膏一洒鞭影如飞

城隍庙修造疏

伏以一县之有城隍如心腹为体肤之主百姓之趋力役若子弟効父兄之劳本事理之相渎出人情之乐助睠惟兹庙剏自有唐溪山清雄据上游之最胜殿庑宏敞耸旧治之具瞻自丙子煽祝融之灾至已卯议斯干之筑更三数舍虽粗有成规阅十余年犹未还前观盖向之官府亦知众户之愿输故免其科徭欲使期年而趣办惟此意之甚美惜举行之不终于是瓴甓之材露栖于水浒栋梁之干云委于山冈坐令肃穆之丛祠犹作凄凉之茆舍行路为之叹息居民见而伤嗟今者邑政清明天时丰美左餐右粥家余鱼稻之藏十雨五风人思牲酒之报使班垂不期而竭作杞梓无踵而趋门绚发丹涂翬飞寶构上以妥扈从鬼神之奉下以展烝尝香火之严是在指挥之间适值作兴之防先王典祀非同浮屠老氏之淫祠它日穹碑并述武城桐乡之遗爱斯文风播所至向从

传

二歌者传

咸淳德祐中杭有善歌者二人以材貌闻于天下兵乱流落皆相失其一人为一武帅得之絶幸有赀权而一人嫁为民妻在武帅部中方其未相值也音信隱隱常相开既而幸者创别馆

求民妻而致之曰吾与尔畴昔固相同类也幸甚脱死邂逅于此愿相娱以尽吾志民妻曰娣意诚美然吾已弃其身草野间食糗糠粝衣极麻卉穷残蓝缕以求容于膏粱绮靡间强而为之则辱其素吾不得行也盖凡使者三至三辞之其言如初然幸者意坚请益苦民妻亦居贫久不敢相拂竟致诸馆中二人者相见问艰厄道故旧甚懽幸者惧徒留之不可以安民妻也则出少年女奴数辈烦民妻教其歌而时与之禄稍使归有以贍给其夫家民妻既渐衰老旧习歌虽善无所复用亦幸人传之遂不慙而为之教数女奴皆如法咿咿呜呜动摇其唇辅拘缀其肢体而为之及暮而始得休幸者自帅家间一至其馆按所授歌歌进则喜不进颇微督让若恐不为尽心者民妻惋悔内不自堪而感其恩且案已出终不敢怨意相得无违言戴子曰余在杭时见衣冠士大夫以文辞道德相交游多矣一经患难反面如不相识而二歌者倡优技艺之流承平齿牙余论所不敢及者也其所为若是有愧之乎然议者犹以为贵幸者既以义存旧则不当苛督其过贱穷者既以礼辞聘则不当谄顺其欲斯乃求全已甚之论君子盖无责于其人焉

劄子

回袁通父秀才送喜词并物劄子

某顿首再拜通父学士执事某霜露遗軀岂记生辰之反江湖泛识亦无庆问之交敢图英贤不弃衰陋浹洽既成于数面游扬肯吝于余词至歌郢人之阳春以华絳老之甲子欲倚声而和则深愧七襄将卷锦以还则又贪十袞外有多仪之饷益宽逆旅之需姑薄叙于谢言殊未殫于忱悃尚徼永好俯赐深原

說

渔說送王伯畏讲书归新安

江汉之俗多渔畜得鱼多则风戾日暴之以俟遠鬻者售焉其事常逸而息甚微有厌之輦鱼仰致诸黔樊山谷间初至墟民争趋之售十九明日什六又明日什二又明日无售者矣非民商薄土狭而易足无复多事鱼也新安今东南经生之江汉也懦者王君伯畏以成学转授于乡寡求而自重养亲教子虽无赢余不至缺乏乡多名山川佳姻友良天好日壶觞过从弦奕谐笑未尝一日不从心适意而逾高从险迂凉就薄为广信之后为诸生讲经三年萧萧然空载而返值余亦穷复无以振发呜呼此不皆近于輦鱼黔樊间者哉抑余闻之古有大渔陶朱公能生蓄鱼尝日五湖入海游齐楚致千金商愈富术愈奇又庄周严先张志和之徒虽渔而不商名愈高予与伯畏更思之大德癸卯二月朔日

諭

蜜諭贈李元忠秀才

釀詩如釀蜜釀詩法如釀蜜法山蜂窮日之力營營村防藪澤間雜采眾草木之芳腴若惟恐一失然必使酸咸甘苦之味无可定名而后成蜜若偏主一卉人得咀嚼其所从来則不為蜜矣詩體三四百年來大抵并緣唐人數家豁達者主樂天精贍者主義山刻苦者主閬仙古淡者主子昂整健者主許渾惟豫章黃太史主子美子美之于唐為大家豫章之于子美又亢其大宗者也故一時名人大家舉傾下之無問諸子自是以后學豫章之徒一以為豫章支流余裔復自分別標置專其名為江西 規模音節豈不甚似似而傷于似矣貴溪李元忠以詩游江西之同名能詩者略徧皆余所未識而不鄙請益于余顧余之寡陋豈暇有益于人乎姑與之言蜜以資同味者一屑齒云

卷二十五

剡源文集卷二十五 元 戴表元 撰

讲义

子曰先进于礼乐野人也 一章

当孔子之时周道虽衰先王之礼犹有存者可以访问髣髴若老 苕 师襄之类是也然其人多隱逸放弃故时论目之为野人至于威仪曲节华饰过盛则几伤其本而反以为君子仲尼感叹风俗之日移自言吾不用礼乐则已耳幸而用则宁取前一輩质朴之人而后一輩之过华者在所损节而亦不尽以为非也其立言之婉寄意之切学者正当玩味但不知今去夫子时又二千年所谓礼乐不敢望及先进之野犹得仅如夫子时后进君子否耶官府市井间所不得问问礼乐之在学校古称学校为礼乐之官今礼之近古者几何何以为君子何以为野人古乐已尽亡学校所可常用惟琴瑟而琴瑟亦非古声居其地则必为其事为其事则必通其說是不可以不讲也窃嘗思之譬如山林田野间有人以耕农起家高曾祖父虽衣冠頽防辞令质俚而皆有古气迨其子孙修饰日增文为日美而日不如旧古礼乐之至于今不知又几何子孙之子孙而得与夫子时先进后进并论耶伏惟上饶名郡东南学问渊源所聚抵近世玉山尚书风声未遠表元穷乡遠士迫于诸公牵强而为此来开讲之初敢以先后进礼乐异同为告自此得相与勉焉

子与人歌而善必使反之而后和之

歌诗之道古人以为甚难寻常交际邂逅防集往往有之不必皆歌已作盖多举古人成语以相委属而已然必以当人情通事类为善今也其歌诗能为夫子发发而又能善则其为人已不苟矣夫子于此既不失其倾寫之懽又不夺其委婉之趣姑且使之反覆咏叹然后自歌而和之想见一时客主襟懷春融玉盞渊停云止无形骸无渣滓此圣人德化及人至诚尽物之一事非但可以小智窥测后世诗必已作间有从事于倡和者非矜才而凌驾则拘韵而牵强其流于乐府歌曲复皆委巷狎邪之作败壞人心污秽风教莫此为甚今欲与诸公稍稍厘正捐俗趋雅去华务实取古人三百篇以来之作可登于弦诵可编于简册者纯熟讽念可以观志可以养德推而伸之可以使能可以成物其非体新声一切不用庶几近于夫子之指

孟之反不伐 一章

此一章可以为士大夫观仁取善之法古人以战陈无勇为非孝僨军亡国不与于射位而死也不得入于墓域则兵败而后奔盖未足深以为夸也孟之反事见于春秋传哀公十一年当是时鲁有齐难夫子之门人若冉有樊迟輩皆在兵间之反之为人不不可详考其往恐亦嘗受教于夫子今也见其入门而能殿有勇而不居故深喜嘉称之与童汪錡执干戈衛社稷而不在殤例正一时事此圣人随材因事成就长育之妙如造化之于万物大而大容之小而小养

之形形色色无所遗弃俱成其美呜呼仁哉庄周之徒得其一节遂以孟之反之退讓为常道为可以逃名遠祸而慕之慕之不已流于计较利害之私而圣人所以教人之大指失矣学者审择之

子曰富与贵是人之所欲也 一章

天地之间动物之最灵莫如人人之为动物而能最灵者以此心为之本也心为人之本而能动最灵者以有仁也故心有仁则人得以谓之人心不仁则人不得谓之人虽名之曰禽兽可也敢问于何而观之曰于人之处富贵处贫贱而观之而心之仁不仁可见矣盖夫富贵之为物非不美也苟其道之当得而得之君子未尝避焉舜禹周公是也贫贱之为可恶苟其道之当得而得之君子未尝辞焉孔子之在陈絕粮乘田委吏伐木削迹之类是也如必曰我学为舜禹周公我有居富贵之道我不可以不富贵我学为孔子我无取贫贱之道我不可以贫贱则其心不仁矣何也我有居富贵之道我不可以不富贵则必慕富贵而苟求曰我无取贫贱之道我不可以居贫贱则必耻贫贱而不安慕富贵而苟求耻贫贱而不安其心何所不至其人何所不为其于本心之仁何能保其必存而为君子哉故曰君子去仁恶乎成名君子无终食之间违仁造次必于是颠沛必于是言人能不失其本心之仁不媿于人之所以为人则不失于君子之名不但于平安无事时能存之虽急遽苟且颠覆流离之时亦能存之其为人也当富贵而富贵则为富贵之君子当贫贱而贫贱则为贫贱之君子安往而不预于舜禹周公孔子之伦乎呜呼天之命斯人以为人予之以最灵之心其初一也一能存之虽贫贱不失为舜禹周公孔子一不能存之虽富贵不免近于禽兽可不畏哉

子以四教文行忠信

宇宙之间一事一物莫不有理存焉君子不可以不知也然何由而能尽知之于是必有方册纪载之鑽研师友问学之讲论是之谓文于方册而得之则理在方册于师友而得之则理在师友是犹资于外也于是必有以防之于心体之于身而复驗之于事物是之谓行文矣行矣君子之学可以本末谦该而内外交养矣然不主于忠信文何以实其文行何以成其行孔门之教人所以切实用功之本蓋于此四事常常而不置也是之谓四教今试与诸君亦循其序而略评之今之方册非古之方册也董仲舒扬雄韩退之在三代以下号为知道仲舒明经專主灾异杨韩旁取以工词藻吾人望此三贤犹不可企及而何孔门之言乎至于师友尤为卤莽羣居族处以位相高以气相长考德问业之事无闻订疑辨惑之说不讲是文不足求也著书满家发言成霆退而察其谈于僚友者难以质于臧获号于乡闾者难以合于闺门是行不足考也平常小小筹度计较利惟恐不居前害惟恐不在后欲求如禹稷之以天下饥溺为饥溺必不敢当也与交游意气然诺不出几席之间朝许而晡已不践欲求为托六尺之孤寄百里之命必不可期也是忠信不足恃也吾人试于平日寢而寢思之食而食思之若然者病根蠹本正复何在大抵古人之于文行忠信治其一而可通其四今人一不成而四有余防良可恼痛窃意孔门之所谓文近于大学之致知格物欲与诸君词章记览外先从事于讲明义理之学悦其然乎

故至诚无息不息则久【至】博厚则高明

至诚者真实无伪之称要其极惟天道可以尽之惟圣人可以当之世之人亦有知至诚之为美而为之者矣为之而不能无间断则其力不能持久则不能有征驗何谓征驗我为至诚而物应之于此人知之于彼是也今且以家庭切近事驗之人未有不诚于父母兄弟者也今有为人子者曰我诚孝于父母矣而父母或不我悦我诚恭于兄矣而兄或不我友是其理殆不然诚患不能持久耳使我能诚于为孝而持久无间断父母安有不我悦使我能诚于为恭而持久无间断兄安有不我友推而于夫妇诚其敬推而于朋友诚其义皆能持久无间断而推而于乡里于邦国诚其信皆能持久无间断其行愈力其征愈广又推而达于四方万里之遠而四方万里之遠服之质于鬼神而鬼神宜之被于豚鱼而豚鱼孚之其精神功用遂与天地同运为悠遠为博厚为高明为博厚载物为高明覆物为悠久成物而中庸之能事毕矣然此为圣人天道极处吾侪小人骤焉而语之固所未喻敢问平居日用之际亦尝有一思一虑一言一动不离于诚否乎于居处有能不欺暗室屋漏否乎于饮食有能席不正不坐割不正不食否乎于言语有能俨若思安定辞否乎于交际有能不忘平生之言否乎于辞受有能见得思义临财毋苟得否乎于祭祀有能事神如神在见其所为斋否乎凡一思一虑一言一动所以养诚之具皆备尚惧不能无间断不能持久况又不能诚而何以为人乎所以自为于已未至而何以责物之不我应人之不我知乎程明道先生十八岁学顏子终日端坐如泥塑人司马温公孩童时以食胡桃失言为父母所责从此终身不敢谩语吕成公伯恭少年僕不如意輒推按发嗔不食晚岁涵养成就至于家人不见怒色此皆前輩嘉言善行可以为至诚无息之助诸君试相与讲之何如

子曰德不孤必有邻

此一章可以见圣人寬容笃厚与人为善之意先王盛时礼乐脩刑政举为善者既众矣而又有以使之知劝为恶者既鲜矣而又有以使之知耻传称尧舜之俗比屋可封成周人人有士君子之行虽不尽然其风气纯美可知矣后世不复望其如古然人心天理何尝一日见其断絕故乡里之故家遗俗学校之明师良友常隱然相与扶持之或豪杰兴起或闻见濡染大抵俱为善人之归无有有倡而无和者此之为德不孤必有邻言其理势自当如此也今且与诸贤试以目前事驗之徐行后长者坐不欹立不跛此近于有德人也谦冲退讓恂恂然言若不出诸口此近于有德人也诸贤以此人为何如若见之则必敬之重之心然之退而之其家则欲其子弟效之其有麤率躁竞憊中而利口者此近于无德人也诸贤见此人则必恶之贱之心非之退而之其家则不欲其子弟似之如此朝咻暮诱年迁月革见一不善自然如覩怪物惟恐不相离见一善人自然如对芝兰玉树惟恐不相入行之愈久习之愈熟何患风俗之不美何患教化之不成刑不清而盜不弭邪此圣人周流环轍之余球时扶世之心尚有见于此也讲学不明人多以异于流俗为贤夫既为贤则自然与流俗异但秉彝好德之良心初不相遠其机括在父兄师友先觉者倡率开导之耳

谦尊而光卑而不可逾

谦者人之盛德然徒谦而不知所以为谦则处已接物俱失其宜而不足以为德矣故曰谦尊而光卑而不可逾言善为谦者尊则能使其道有光卑则能使人不可逾已也人情居富贵鲜有不骄自古以来公侯将相如四豪之结客至三千人卑躬厚礼以养畜之如公孙 之开东阁以收四方奇士其身甘脱粟饭布被而不以为耻可谓能谦矣不知有何功业及于万物着于史册此尊而不能光也贫贱之士人所易逾所以自重者谓有名教之乐道德之美耳彼以其富我以吾仁彼以其爵我以吾义乐天知命谨身节用以远悔吝以安隐约所谓贤者不过如此虽带索行歌饥色满面而当路之三公千金之子欲与之交而恐不我屑也尚得而慢之乎苟使执柔行谄召侮取辱而不知谨焉则卑而人得逾之矣古之善处富贵而谦者莫如舜禹周公以大圣人而能取人为善能闻善言则拜能小心恐惧流言天下诵其功业烨然至于今不衰善处贫贱而谦者莫如孔孟孔子能困厄陈蔡而弹琴自如孟子能不见诸侯而辞万钟之禄天下后世谁得而并之按谦卦艮以一阳为主在上卦三阴之下下卦二阴之上上于下卦则止也时止则止时行则行动静不失其时其道光明其象曰君子思不出其位夫动静既不失其时而又思不出其位虽舜禹周公孔孟之事不过是矣

菁菁者莪 四章

此诗四章章四句作序者以为长育人材之诗郑氏直云长育之者既教学之又不征役则断为学校所作儒者传授可信不诬今试以大意逐章释之首章言菁菁者莪在彼中阿者喻人材之在学校亦如莪草之生于阿中得其所养而茂也先王盛时其于学校之士岂徒宽容逸乐之而已想见一饮食一射御一步趋一坐作之间不言而知有所谓父子尊卑之节焉知有所谓君臣忠敬之义焉知有所谓长防揖逊之序焉知有所谓师友聚辨之道焉知有所谓交际辞受之方焉故曰既见君子乐且有仪若乐而无仪则散慢猥 而不足以为乐矣次章言菁菁者莪在彼中沚者喻人材随其高下左右无不得所而畅达如莪草之或陆居或水处而皆莪也道化流行礼义习熟耳不闻可非之言目不见可鄙之事身不居可侮之行生乎其时而遭逢教养如此心乌乎而不喜故曰既见君子我心则喜三章言菁菁者莪在彼中陵既见君子锡我百朋者陵浅于阿而高于沚所及者愈广所被者愈孚所得者愈深古人粟帛泉布外兼以货贝为用而五贝则为朋至此诸生自喻其遂心慰意之乐虽锡我百朋之多不足以为赐也四章言泛泛扬舟载沉载浮既见君子我心则休者舟之为物可以涉险可以行远可以载重喻人材长育之久其气质皆有成就可以见用于世而不必于用进退从容行藏自在原其功效之所以然者有以使之而然也休之为言叹美饜足之味此四章非先王学校全盛不足以当之吾徒生长于二千年后不宜妄自菲薄何代无贤十室之邑必有忠信一卷之书必立之师自今以往相与讲明探索求古人居学校所乐者何道所以得者何业所以欲用者何才必有异于后世之汲汲而求求之不得则悒悒而困者矣

仲弓为季氏宰问政 一章

古之君子苟自知其道可以及人才可以用世则皆未尝有必不仕之心何也天之生斯人必有所托以治之我幸可以治之而又不屑为则徇已之私而绝物太甚非君子之事也孔门诸弟子其贤者多不仕而仲弓之徒仕于季氏夫季氏非可仕也季氏不可仕而天下皆季氏则

贤者有终身不仕而已贤者不仕则不贤者必仕贤者不仕而不贤者仕则天下愈病矣仲弓之贤岂不知此故不以季氏为嫌而仕之非独仲弓不嫌而夫子亦不责非独不责方且因其问政而教之曰先有司赦小过举贤才呜呼防哉人之患莫大于自用其聪明非聪明不可用而事物之多非一己之聪明所能尽也故为政者必先使有司各任其职然后我徐考成否而赏罚之此先有司之說也君子谁能无过过之小者于事又未害也人未得展其大能而先录其小过则人无可而用而事必多废此赦小过之說也先儒有云强毅聪察之谓才强毅聪察小人如鯀共工桀纣亦或能之惟贤才则可用而不害于政此举贤才之說也仲弓于前之二言油然领防不劳致疑而惟以举贤才为问此其真知为政之要而不苟于问也知人尧舜所难虽夫子不免失之宰予子羽而谓已足以知之乎迨夫子教之以举尔所知尔所不知人其舍诸而取人之道始备此三言者岂但可为季氏宰蓋千万世宰天下法也圣道未明人才日陋为学者未能治已而治人为政者不暇信人而信已纖悉于小节而卤莽于大纲牢笼于虚誉而濶略于实德闻仲弓之风可不愧汗自省也哉

子曰觚不觚觚哉觚哉

人才之升降观于风俗之巧拙验于器物之真滥盖有其用至微而所關甚重若此章觚哉之叹是也觚以角为之或用之于饮或用之于书大抵取有棱角不 机为便今者觚名虽存觚制不古于事未大害也夫子反覆形于嗟惻不置此岂为一觚发哉窃嘗思之吾徒鸡鸣而起日入而休凡托于居处饮食衣裘翰墨交际动作之间脩名而责其实恐无一可合于古惟偷安目前苟且防裂不暇思及耳偶一思之有不愒然汗下者乎学校所以讲习道艺之区今所讲者何道所习者何艺坐斯席也想斯名也安乎否乎古之人皆躬耕而食惟仕者以禄耕为其劳于治事力不能自耕也今一名为儒则弃耒耜离阡陌终日不知何劳而仕者之劳复何所为乎衣本以蔽体厚之以御寒短之以便事华之以致饰严之以成礼惟儒者得服寬博逢掖今严华短厚与寬博逢掖混然杂居亦有知其然乎李斯程邈之学兴人以科斗大篆为古今则又以李斯程邈为古是字书不可知也离骚河梁之体作人以国风雅颂为古今则又以离骚河梁为古是词学不可知也推之于官名于仪礼于日用常行诸事种种岂得皆与古合而吾持已处物憧憧然皆如暮夜游昏雾中投坑墮井不可自保何望目槃杆几杖之铭耳珎璜琚瑀之音面相警为圣贤哉故夫子之叹非叹于一觚殆忧风俗之变将至于如此也且夫子不独于觚然也叹拜下叹麻冕叹先后进礼乐叹借马阙文不啻屡拳拳焉以风俗之将衰在夫子尚不能如何不过私忧隱慮而已吾徒则又何說惟当精攷而谨修之存之于心持之于身或可传之于书告之于其人其人万一有知其說者逢可为之时得以渐而正之风俗犹有望也

子曰回也其庶乎屡空 一章

人资质虽甚高苟饥寒衣食之不给则十有八九难乎其为贤学问虽不深使生理有以养其心亦未至遽然流于不肖此论本止为中人以下发夫子之门人最聪明者莫如顏渊其次子贡今也平居商略二子而乃有屡空货殖之叹何耶呜呼此不可以小事观也洪范曰凡厥正人既富方谷谷之为言善也且既谓之正人安有必待既富而后为善蓋先王之时天下无甚

贫之民惟贤者在高位有俸禄采地之厚始得以言富惟既富而所以居富者斯有道矣颜渊之时井法虽壤窃意犹有壤之不尽者故庄周言其有郭外之田五十亩郭内十亩固非皆寓言也但支持有所不赡而时时不免空乏耳夫子于此叹其居穷守约之操箪瓢饮食天乐内足泊然不以外物累其灵台此与陈蔡绝粮而弹琴自如者何异其曰庶乎者盖引之以自近也至若子贡之货殖先儒以为未能防情于丰约夫未能忘情于丰约则是其中已为货殖所累惜一金与贪万钟同一不化天之命人如是而贵如是而贱如是而贫如是而富此理谁不能知惟安之为难彼冉求季路輩地位高人几等夫子亦甚贤之然见其昏昏于辞受去就之间仕不择地食不择粟遣怒之极惟取其名教最不可容者攻之未尝以货殖为责其以货殖责子贡殆爱子贡之深期子贡之远欲其至于颜子之屡空而已颜子未尝多言言则中理子贡惟多言而屡中故出于亿度在同门中亦不见其比今人见夫子一抑一扬遂疑子贡不得齿于颜子之列又谓处饥寒逆境为小节皆未深考也

子罕言利与命与仁

利者四德之一命者天之所以赋于人仁者人之所以为心圣人何以靳于言哉曰利非君子之所急其罕言之是也至于命至于仁亦若是焉盖夫性理之学其体也在于心传而不可以耳受其用也在于躬行而不可以言说今姑无论夫子时夫子没夫子之道湮塞晦昧者数百年赖孟子明之孟子没又湮塞晦昧者千有余年赖濂洛周程以来诸儒明之方诸儒之未明也人人以性理为难言而不敢言故讲学者必尊所闻读经者必阙所疑推贤敬古风俗朴厚而真修实践之意常逾于议论之表自诸儒辨析既精记录亦繁字义无所窒于心胸谈柄无所滞于唇舌向也白首老生之不能谕者三尺童子类能言之可谓家游夏人舒向而渊源根柢有不暇计矣以此推之圣人所以罕言者岂非虑其弊之将至此哉区区以空虚倚席于斯亦既再岁愧无所发明以称答父子兄弟之意切愿间暇之时有感相订有益相告取五经诸子之遗言隐义虽易通而非尽解者常常质难传曰毋勦说毋雷同如利一也孟子之所非与周易之所取何以异命一也脩身之所俟与岩墙之所避何以殊仁一也司马牛之所难与管仲之所近何以别不徒求之又从而绸之不徒获之又从而黻之朝夕复熟彼此浸润庶几修辞存诚致知格物不无肤寸之益诸君子以为何如

祭如在 一节

祭之以礼难言也其礼之所以然不可以不知也惟知其礼之所以然而鬼神之状阴阳之故皆了然于胸中而祭可言也此章祭如在谓祭先祖时也祭先祖如先祖之存脉络相通精神相接此易言也祭神论祭外神若天地社稷山川五祀之类脉络何以相通精神何以相接此难言也古之人食则祭先炊饮则祭先酒马祭马祖田祭田祖以至捍大灾卹大患有功于国有德于民者举不遗其祭今且静而思之人惟不知恩义则已耳稍稍知有恩义则凡有力于我者岂能忘之厥初生民风气朴野不但拙于防患患亦未生不但略于息争争亦未有泊乎争鬪患作人且不免与禽兽相食先后圣贤相继出而忧之于是乎有管摄有拯助有教导又知夫人之衣食居处生息于宇宙之间一物必资一物之力资其力者必懷其感懷其感者必图其报此祭祀之所由始也笾豆诚陈尸祝诚设登降瞻仰若将临之周旋倾听若将语之精

神安得而不接血脉安得而不通乎至若吾夫子之恩之德开吾人耳目洗吾人肠胃易吾人心胸续吾人命脉隆于天地深于父母又当何如其感何如其报丁祀在迓誓戒有言谨为诸君诵所闻而诸君省焉

卷二十六

剡源文集卷二十六

元 戴表元 撰

讲义

孟子曰子路人告之以有过则喜 一章

善者天理之总名人人有之人人有之而有不能有之者心不在焉故也心于善者不但能有已之善又能有人之善不但能有人之善又能与人同其善心不在于善者人已两失之矣今且以此章三节逐一防绎子路人告之以有过则喜是取人之善以去己之不善犹未免于有不善惟能去其不善斯美矣此贤者事也禹之闻善言而拜是喜人之善与已相契虽有人已之分而同于为善比子路相去甚远此圣人事也至舜则善与人同舍己从人乐取诸人以为善一人之身而耕稼陶渔之类亦取于人而能之取于人以为善则人益劝于为善是与人为善者也舜禹俱大圣人不宜分别就吾党今日所学且论子路子路在孔门最为多过初见时气象麤暴可掬从游虽久而鼓瑟言志侍侧之顷威仪应对每见讥斥后来出仕党季氏为衛輒平生本末无一合于正理不知闻过而改者何事想见其为人纯诚信勇但有所闻知其不善随即羞悔不敢复作故能日克用厉薰摩浸灌陶写濡染而卒成大贤而称其可为百世之师也今人随群而趋逐队而处一般浮沉一般容悦故终身不见有过又或位高齿长则人方誉之权隆势盛则人方惮之真见有过亦无人言荡者夺于外驰鄙者安于近务幸人不言偃然以为人事不过如此尊卑相承前后相袭耳不闻善言目不见善事既以误己复以误人悠悠兀兀坐成凡庸此皆子路之罪人也哉

曲礼曰毋不敬俨若思安定辞安民哉

曲礼者先儒以为委曲說礼之事虽是委曲說礼此起初一章却是礼家大纲目处毋不敬者礼以敬为本戒人常常警畏不敢放纵怠惰俨若思者人思事时顔面必端莊俨恪持敬者其貌亦当如此也安定辞者人之发言不可轻躁必审定其是使之穩当无有后悔方可出口安民哉者言人能行此三节不但可以自安而见于政事亦可以安民也总而论之其目三曰貌曰心曰言其纲一曰敬心在于敬则貌与言皆在于敬心不在于敬则貌与言皆不能无失也世之儒者多言心属内貌言属外既分别为二遂以为敬当主于心而已一戏笑过差一谐謔失节未害于道殊不知心是貌言之根苗貌言是心之枝叶未有枝叶有病而根苗无伤者故其始不过小不敬而其终也卒防于大不敬不可不察衛武公之诗曰善戏謔兮不为虐兮韩退之则直云张而不弛非文武之道夫文武之道岂使人谓戏謔可为者耶春秋之时一执玉惰一受脤不敬一行人失辞识者知其年壽禄位之修短尚书传洪范五事一曰貌二曰言所關顺逆休咎尤如影响犹是古人告戒流传常法如此今人所以不然者蓋缘常情以礼为拘束禁制之物强而持之令人血气不畅筋骸不舒此不知理者之论吾党试以曲礼此一章玩

味而习复焉心常常不敢放纵容貌常常端莊不敢轻于戲笑言语常常谨重不敢易于谐謔但见气象详和身心安乐今日为生徒则礼行于学校而为贤生徒为子弟则礼行于家庭而为贤子弟它日为人师长为人僚佐则礼行于州里邦国而为贤师长贤僚佐推而大之无往而不宜无为而不顺其效岂不章章可睹哉

大畜象曰天在山中大畜君子以多识前言往行以畜其德

物之大莫如天而山能藏之以此言学何学不充以此言德何德不具又大畜之卦内干外艮干者健也艮者止也人之学行于内能健则无间断不一之病于外能止则无浅躁轻出之悔皆大畜之义也易卦本不专为一端而发此象既取君子多识前言往行以畜其德为辞于义亦不为小矣前言者自圣经贤传及载于简书闻于谈论之善者皆是也往行者古人立身行事可闻可法者皆是也今之君子所以不如古人者多是自倚其聪明才智师心而行据已而发其天资纯美者或能暗合义理无大差谬而思之不周讲之不熟反致祸患其他强敏者强敏而失矜骄者矜骄而失苛细者苛细而失迟重者迟重而失惟多识前言往行则念念有蓄事事有轨范平时或得于考究或闻于讲明耳濡目染心领意会今日积一善明日积一善日日积之以至无所不通无所不悟如富人多藏货物而不妄用如深山大泽草木生之寶藏兴焉而不见其运动一旦临是非据利害剖析无不中节施行无不合宜此大畜之所以为美也按大畜以艮上九一爻为主而初九言有厉利已九二言舆脱輹九三言利艰贞六四言童牛之牯六五言豮豕之牙皆以止而不行为无灾尤有吉庆至上九始言何天之衢亨象曰道大行也言畜多而至此始可行也人不多畜其学问德行而速于欲行其志者可不为戒哉周礼天官冢宰以九两系邦国之民一曰牧以地得民二曰长以贵得民三曰师以贤得民四曰儒以道得民五曰宗以族得民六曰主以利得民七曰吏以治得民八曰友以任得民九曰薮以富得民

此章言周公之所以聯綴邦国之民使之綢繆固结而不散者有此九事两者耦也犹言均平备具不偏枯孤单也一曰牧郑氏以为州长是也民无土地则无生业使相养育九州之长各有土地以养育其民岂不上下相得凡言得民者非谓得而有之也谓得其心也二曰长郑氏以为诸侯是也九州内之诸侯公侯伯子男各贵于其国然苟徒以贵临之则威权控制势分扞格而不相得矣古之诸侯蓋以贵养贱非以贱养贵也三曰师师之为言凡能以善教得民者皆是也故以贤四曰儒儒之为言凡能以善道得民者皆是也故以道后世言师儒拘于学问文艺故失其指如古之禹稷伊傅之流朝为田夫暮为卿相所吐之言皆为经所行之事皆为史至今千百世下遵之则为圣贤悖之则为愚不肖非师儒而何五曰宗民无族则离惟有大宗小宗之法则有族以相糾合六曰主民无主则乱惟有世世食采之主则有利以相賑恤七曰吏民羣居易争惟有吏以治之则不至于无统摄八曰友民分耕必力弱惟有友以信之则不至于无救助九曰薮民各产常产而不及乎其它惟有薮以富之则不至于无储蓄以上九事于居民之法养民之具纖悉备尽人以为非周公之书非周公谁能为此书哉吾党今日学问且先于师儒二项讨论玩味所谓贤者何說所谓道者何物设使居田里其何以为俗设使居官府其何以为政贤莫先于自治而后可以治物道莫妙于无为而后可以事二者其何以能得民之心知之必可言言之必可行惟毋泛泛然以为方册之空谈幸甚

說命惟學遜志務時敏厥脩乃來允懷于茲道積于厥躬惟教學半念終始典于學厥德修罔覺

古書言道德未有如此數語明白詳盡者天下事物莫不有道惟我能自修之于心則德為吾德而所以能積之修之則在于學當傳說時異端諸子之說未興文辭利祿之誘无有其所謂學其所謂道德可以想像按据而知也說命三篇說學惟說學于古訓要自是一種格言大訓載諸學宮簡牘之中老師宿儒伏于田野耕樵之流當時尚可致問而今茫然遠矣如傳說其人即是其類今試以意求之學惟虛心可以大受先若傲然以已見實之它有增益由何而入故貴于遜志然一于遜志而不及時用力又失之悠緩故貴于務時敏既遜既敏所修者滔滔而來而愈信愈懷不敢怠忘則積于厥躬此一節也學不止于獨善其身必有以及物而後可以驗學之進故始于自學而终于教人體用內外各得其半雖已能如此惟念念主于學功力無間斷則所修之德有自然而然而莫知其然者矣此下一節也兩惟字三厥字三字此其立言之精垂教之切誠可為學者警枕又三篇中指實事多引空言少期其身必以伊尹期其君必以堯舜淵源氣象上与禹稷臯陶下与孔孟初不相遠漢儒明經家說若稽古已三萬言豈足以知此而況于后世生于異端諸子文辭利祿之俗穿凿剽竊又出漢儒之下者乎

子路使子羔為費宰 一章

子路之為人最多過最勇于改過惟勇于改過故雖多過而不害為君子此章何必讀書之云發于為季氏宰時從游既久漸染既熟何以有此驕率可謂驕不及舌矣然不知此乃子路進學之候以自信可也而以處子羔則非矣子路以政事稱其于治民人何疑之有若鬼神之事固嘗親問于夫子所謂社稷亦必講習有素此二事雖不必讀書而可以為學子羔之資質雖美度不敢望子路敏不及子貢勇不及子路其從游之久漸染之熟又未必及子路而子路遽荐之為宰又遽然許之何必讀書何其容易之甚邪又況人之聰明有限事物之義理無窮假使讀書已多見道無蔽尚不可廢學故夫子老而學易其語人曰仕而優則學而子路未知子羔之何如乃先斷之以何必讀書几何不以人民社稷為戲乎夫子既斥其佞子路亦必愧悔聞其說者宜可以為戒而流俗之弊至今反以為口實得百里之地為古諸侯見儒如仇見書如毒怪物悍悍然曰儒無益于世曰書能誤人相率摈而棄之嗚呼安得知過服義如子路者而与之語哉

子曰中庸其至矣乎民鮮能久矣

中是不偏不倚無過不及庸是平常此二字惟聖人能行之若非聖人決然有偏倚決然有過不及決然不能平常故處事而無偏倚無過不及与夫合于平常者天下之至理也既是至理自然民鮮能行之堯舜之禪授于理當禪授堯舜不容不禪授禹之傳賢于理當傳賢禹不容不傳賢以至湯武之應天順人伊尹周公之訓太甲教成王仲尼之轍環天下由后世觀之其事至難其迹各異在聖人當時處之不過當然之理此所以為中庸也道學不傳漢儒遂以胡廣為中庸夫胡廣阿時取容持祿固位其所长但能記誦典章儀注以為口耳之資用心行事全不正当何哉其所為中庸乎近世士大夫說及中庸又降而歸之中才庸人聞中庸之名

往往讳而叹之故每发一议每创一事必求以异于人嗟夫中庸者夫子思谆谆以教天下后世以为之难能而士大夫讳之不为亦可伤哉

良冶之子必学为裘良弓之子必学为箕始驾马者反之车在马前

天下之艺惟其辛苦力学而后能者不如天性之自然天性之自然发之于内耳目之聪明接之于外有不学学必积矣良冶之子当学为冶良弓之子当学为弓父业而子世之宜也今日良冶之子必学为裘良弓之子必学为箕何也以言为冶之家习见其为冶之事錕补穿凿者有似于为裘故不用之于冶而用于裘为弓之家习见其为弓之事调揉撓熨者有似于为箕故不用之于弓而用之于箕此亦天性自然之所近得于聪明之所接故不待力学辛苦而能者也岂惟艺人之学为圣贤君子之事亦如此也学仁者始于孝弟学义者始于不妄取学礼者始于不妄动学智者始于不妄为学信者始于不妄语学仁而能孝悌虽不得仁去仁不遠矣学义而能不妄取虽不得义去义不遠矣学礼而能不妄动虽不得礼去礼不遠矣学智而能不妄为虽不得智去智不遠矣学信而能不妄语虽不得信去信不遠矣故曰性相近也习相遠也性本有此物而不能孝弟性本有此义而不能不妄取性本有此礼而不能不妄动性本有此智而不能不妄为性本有此信而不能不妄语是得之于性而失之于习也是良冶之子不特不为冶而并不能为裘良弓之子不特不为弓而并不能为箕也为冶为弓也者性也为裘为箕也者习也仁义礼智信也者性也孝弟也不妄取也不妄动也不妄为也不妄语也者习也聪明者所以严其性之所从出谨其习之所从入者也礼记又曰始驾马者反之车在马前何也此言马之性难驯人之教之者劳故始驾马者车反在马前人性之易学不如此也人之聪明所以能为万物之最灵者谓如此类也人之子弟有聪明而不能用至于自污其所习自弃其所学者真可惜哉

子曰善人为邦百年一章

善人慈祥信实之称为邦犹言治国凡今子男百里诸侯属皆是也胜残去杀是化残暴之人使不为恶既不为恶自然不用刑杀此是功效比于唐虞三代雍熙泰和之俗有深浅然亦可以为难矣夫以慈祥信实之人临民莅政能使其人不为恶而免于刑杀此非一人一日所致故必待于百年之久先儒谓汉自高惠至于文景黎民醇厚几致刑措庶几近之唐虞三代既不易为儒者說汉初礼乐则不暇兴经术则无人讲风气可谓朴陋之甚其为政者萧何起自刀笔曹参周勃輩皆百战行伍而一团真淳寬厚之味令人感动盖承秦人刻薄之余真所谓饥者易为食渴者易为饮也萧曹既创之于前相接为政者申屠嘉周亚夫之徒亦如防山乔岳俨然不动虽无善人之名而有善人之实后来公孙 以明经封侯作相儒术始显海内亦纷纷多事以此想望善人为邦气象欲如汉初以来何可复得论者遂疑儒者无益于世多虚而少实徒劳而无功儒者亦无以自解殊不知汉初鲁国两生及申公董仲舒等若幸而得用又久其歲月又推举其同类使相继至于百年之浹洽安得无效只如陈太丘鲁恭卓茂仅得尺寸之地亦自移风易俗耻于为恶大概可以见矣岂可谓儒者无益于世而皆可疑耶

子曰伯夷叔齐不念旧恶怨是用希

天下之至难平莫如怨而至易偏莫如好恶我有是善也而人不知以为善我未必有是恶也而人断之以为恶怨斯兴矣人有是善也而我不知以为善人未必有是恶也而断之以为恶好恶斯不足孚于人矣伯夷叔齐以清隘闻于天下乡人一冠不正望望然去之与恶人居若坐涂炭中意其平日必持已太严而责人已甚夫人乃以为不念旧恶怨是用希谓所恶之人今日为恶明日能改过为善则伯夷叔齐亦不追记而咎之审如斯言岂有一毫芥蒂荆棘之意以此道处一家则一家可以无怨以此道处一乡则一乡可以无怨以此道处一国则一国可以无怨以此道处四海则四海可以无怨先儒疑二子旧恶之事无以考以愚观之武王以至仁伐不仁八百国之诸侯同心归之而二子独非之是与八百国诸侯宜为怨者也然天下后世至今以武王为是亦不以二子为非盖各当其理也然则用伯夷叔齐之道岂独四海可以无怨虽万世无怨可也今之人好恶不由其理一杯羹德色则悦之一睚眦反唇则仇之闻二子之风亦盍少动心乎

子曰后生可畏焉知来者之不如今也四十五十而无闻焉斯亦不足畏也已

为先生长者之法主于教言逊讓安有以后生为可畏又许其有求闻之心者哉呜呼此可以见圣人教人恳切之极矣人非生而知之谁能废学学则虽单夫寡人而可以为君子为圣贤不学者虽尧舜之圣不免为小人愚不肖为君子者为圣贤者人常畏而敬之为小人者为不肖者人常贱而鄙之此必然之理也今夫一等同乡井同国族人物相似也家世相似也年位相似也而能修饰衣冠遵守礼法口无妄言身无妄动众必共相指目以为楷模此闻其人而可畏者也其有沉酗佻达狎昵非类防不逊弟长不慈敬众必共相指目以为疵疢此闻之而不足畏者也推之于庠序于朝市皆闻而知之善者必有举之以为公卿士大夫不善者必不免糾之而蹈于罚善有可举为公卿士大夫而不得为公卿士大夫君子谓之命恶有可蹈于罚而不及蹈于罚君子谓之幸而人之为人不可不自择也为先生长者之法不可不劝其为善而阻其为恶当夫子之时风俗犹美先王遗文余泽犹有仅存于草野之间惟无老成师传以接引将就之故怅怅然不知所归夫子劝善阻恶之权既不得见于为政拳拳此叹必发于倦游归鲁之日然则亦可伤矣其曰四十五十云者人能自少小始有知识之时而学之则年之至此必有一善以闻于人非谓四十五十而始考之也吾党之年视四十五十为有加所以闻者何事所以畏者何道所以教后生者何业亦盍先讲明之

有孺子歌曰沧浪之水清兮可以濯我缨沧浪之水浊兮可以濯我足孔子曰小子听之清斯濯缨浊斯濯足矣自取之也

人必自贵也然后人贵之其贱也亦惟自贱而后人贱之也孟子此章引孺子之歌孔子之言本为当时祸福而发其实天下之理莫不皆然夫沧浪之水有清有浊水幸而为清则人取之以濯头上之冠缨水不幸而浊则人取之以濯足是因其体之有清浊故人用之有贵贱今有人焉口诵圣贤之言身履君子之行则乡里必取之以为师范国家必取之以备官府是犹沧浪清水之贵而人取之以濯冠缨也又有人焉言不出于礼义而鄙悖是习行不準于先王而市井是行则朋友必弃之以为恶子官府必摈之以为凶徒是犹沧浪浊水之可贱而人取之以濯足也同一水类也而用之有如此其殊同一人类也而待之有如此其遠亦可以自择矣

或曰水本清也而人有用之以濯足人本贤也而人有不用之以居高位则奈之何曰是有命焉不可以槩论也季氏世为大夫而孔子懷羈旅之忧臧仓王驪得君而孟軻有不遇之叹故君子得福以为常而小人得福以为不幸小人得祸以为常而君子得祸以为不幸亦犹水之清者人固辱之以濯足而可贵者无损水之浊者强用之以濯纓而可贱者犹在也循理以安分修身以俟命事之在我者谨而行之事之在人者静而听之学问之道其庶几乎

惻隱之心仁也羞恶之心义也恭敬之心礼也是非之心智也

此四句孟子前篇已嘗言之引仁义礼智归于人心最为亲切大抵天之予人以此性止有仁义礼只是以恭敬为仁义之节文智只是分别仁与不仁义与不义之是非三尺之童亦知仁义非本外物而其初心因告子义外之辨今天下后世但知告子之害仁义而不知其害实起于老子老子于孔子为前輩多读书识道理孔子亦嘗问礼而其言曰大道废有仁义智慧出有大伪曰絕仁弃义民返孝慈絕巧弃利盜賊无有呜呼是何言乎然老子之說险怪不经其害在孔子前而孔子终身无一辞非之告子之說缓于老子而孟子略不少容何也夫子道高以为我之教行则彼论自息孟子则不然以为失今不攻后害愈甚故当时亦称孟子好辯卒之天下后世因孟子而遂知仁义者辯之力也吾党今日不必追咎老 深非告子羣居终日固未暇忧人之忧急人之急且问自身当惻隱者何事居穷无事固未识讓千乘之国且问自身当羞恶者何物出门固未能如见大賓且问居家能不欺暗室否居乡固未能使人质决曲直且问能无间言于父子兄弟间否是四事也惻隱也羞恶也恭敬也是非也皆良心也皆非他人所得与也盍亦返自思之

卷二十七

元戴表元撰

古诗五言【排体】

大名元复初郎中携示感遇五言八章次韵并陈东平曹子贞编修蓟丘曹克明教授

美人乘天风手吹玉参差我有龙门桐缀之冰蚕丝空中一偈答闻者为忘机神马已出河凤皇且鸣岐悠悠百年内傥有相逢时

我登海山巅羣丘眇如芥客来谈九州更诘谁小大神疲穆满馭足璽神始载终然方寸心扰扰躯殼外流光如急水一去难复再归来坐虚室始觉身安泰老马宁为驹即且或甘带名迹吾不嫌全生聊逺害明有不见睫智有不衛足学静三十年晚始悟无欲履卑惧名高居羣忌行独不见歌钟家白日卧金谷不见带索生行吟扣哀竹为君慎燕息顾兔方在腹

东阳方韶卿惠古意七篇久不得和五月二十六日将假馆宗阳桥稍有闲暇乃为次韵因寄讯彼中吴子善前輩子善陈文毅公同父甥孙

长嵗狎纷諠新庐稍踈静虚名亦相累簪佩来整整青天戍楼柳白日仙林杏散书一长謡消此清夏永

二

营营寄巢蜂白昼争空花防防缘壁虫喧飞乱如麻譬如恶俗士便不挥鞭挝桐君何处来隔壁闻瓠巴

三

旧文空中云零落迹易消新交江上流来去同奔潮蔼蔼英孙望之十舍遥愿尔多黍稌相投共箪瓢

四

人胆小于壶揣想无限极及其遂所愿不过一消息金华文物府前哲余楷则千年万年名岂使夸者得

五

作诗如挽船学力乃篙櫓向来牛耳盟诸老肯多许元晖云树荒仲宣江海阻之子归未归相思慰风雨

六

德孤谁愿高气寒谁愿清斯文邹鲁来 坎劳其生岂无性命忧艰难愈同情如何及门士亦作胡越声

七

永康经济学近古将无同甥孙世其业汗马收全功我欲揽遗迹双眸冰镜空君亦跨黄鹄吹箫白云中韩君美经歴赋孟夏草木长五诗示仆因寫鄙懷通呈阮使君君美时与诸公讲易

吾评陶渊明略似段干木诗文虽满家不饱妻子腹仰瞻清风柯俯窥白云谷谁能为升斗辛苦受羈束因君寄高韵千古动遐瞩

以羔裘如濡洵美且侯韵为八诗送夹谷子括赴明州推官

鉴虚磨愈明弦柔调自直临民要儒术非但用三尺君看春秋学从士能断国人情岂相远赠子以不惑

二

水耕当用牛陆行当用马诗书无近功平世安可舍吾州兵荒来冠蓋多苟且宁无段干木意气能少下

送袁季源之婺州因简范经歴

为山不愿高为水不愿深水深蛟龙集山高虎豹蹲我有避人法终日衣冠林煌煌钱塘城游尘昼为阴岂无青云交难在相知心岂弟袁大夫寒 理闲琴峻坂为牛力炎天九秋襟胶漆四十年韶亂以至今欲饥饿我使子无黄金劝仕拙不谐驱耕弱难任低回向谁门后生气駸駸今晨积潦霁鸟乌有好音约我共行役东平步嶷嶷皎皎婺女精弥弥双溪浚台有白马生风棱共萧森文林惜妄动动必向所钦吾评古毛义志行近骞参公府许辟召屈身非禄淫斯人我知旧长髯善吴吟穴蚁梦离合风花命浮沉往者纳千防终然遗一簪欲行又不得出门失前禽子往再拜问何由振聋喑

次韵荅朱侯招游海山

江南春草黄江北秋鴈飞穷居念还往故物悉已非我有青云交山林可同归十年学抚琴对

客輒累歎豈不愿和悦调苦心易为青天无古今白日相因依向来炎炎人所得一何微成者化尘埃不成翻祸机王美受雕镌马良遭绊轡所以旷达士但贵知我希请休接輿歌且急梁鸿噫名微少士责身间免官讥宁无一日力相寻尽岖崎霜鱼碧玉鲙水菊黄金辉君歌我按筑我舞君揽衣此日为君欢醉游敞船扉

题陈高士所藏冬青枝上白头翁画

飞高得珍丛青子饥可食不知何忧愁二鸟头亦白道人天机深清斋意相许赖汝不能鸣一鸣嫌杀汝以空飞本无迹韵为五诗往扣广微张公【存一首】

智有不近名贤有不践迹百年如飘风谁作逺行客所要在持久以道自消息吾师岂欺我白首方学易浴蚕沙溪水一首为上饶陈烈妇作烈妇信州上饶人嫁同郡叶氏年二十五生子四龄而寡丙子兵寇起能以智全其家岁饥发粟赈贫类大丈夫慷慨知大节非徒守闺门贞行而已有司上其事赐旌表蠲复如法

浴蚕沙溪水采桑玉山巅丝成白棱棱胶作烈妇弦烈妇何所言弦中意纏绵一說鸾影孤二诉雏巢穿巢穿尚可葺影孤恨终天有食不自肥众禽仰喉咽真宰悯其疲劳役尽弛蠲及今雏长成雏群亦蹁跹朝阳照岩林枯槁生光妍黄蘗谁谓苦铁石谁谓坚请君屏俗耳听我沙溪篇

书叹七首

王生困縲紲【泳道】刘子急徵追【正仲】舒叟挈家走几遭鞭与笞【东野】我无三人辱阖门但穷饥饱死世更多徒忧何以为敢作小夫叹聊为才士悲

舒子高品藻王生怪衣冠处世那得尔譊譊真自残刘子最多爱逢人倾肺肝劝我学其道缩身可泥蟠胡为亦不免念此坐长叹

英英天上星碌碌涧中石升沉虽不同精爽或相激我有知名交四海邯鄲璧【子昂】遭逢不自閤颇为谈者惜谈者自不知斯人宁易得

袁弟豁达人陈兄静默士平生少附丽颇与同忧喜迺来怪事发谈笑不可拟一为脱渊鱼一为坠柯蚁吁嗟其奈何天运固如此

数友越州居无书已三年台州已无数逢人每相贤日夜忆逺友逺者隔蛮烟风气不择州俗情轻目前管鲍死何处寄酒洒其阡

结友何用多管鲍无三人读书何用博得少全其身君有狗名子扰扰起风尘朝逐富儿飡暮聯豪士茵归来反如客鱼鸟亦相噉

苏州米空熟越州人不来缓急托远婚不如傍蒿莱蒿莱在篱落为我障浮埃生女属他人
生男尚婴孩从何得饘粥作此聊自哈

观村中祷雨三首

十里不同云五里不同雨天公白茫茫乃尔多肺腑人言蛟龙神象类可以取蛇虫
当此时行路谁敢侮飞腾信有术忍待号者苦咄哉神禹功浩荡流万古

二

昨日苗穗赤今朝洒然青颇如穷旅人百金换颜形念尔虽微根同稟造化灵自古有枯旱
人类几千龄恐是自生化难皆问苍 野草人不怜何独不凋零

三

西村送龙归东村请龙出西村雨绵绵东村犹出日共称西人良或是穷可恤谁知所雨粟
尽入东村室儒生无爱憎但喜蔬蓰实通年一饱厨犹在兔园帙

山中翫物杂言十首

时露下百草流萤此飞翻初如灰烬微忽作秋星繁念彼生育处回光照其根君莫轻流萤
流萤尚知恩

二

青橘霜露时英英秀中园问讯居人今岁胡不蕃云有孤儿来手触枝上丸呜呼此义木
痛感在吾言

三

野果散高林雀防食之宜设非人所残一果不敢窥宁由网罟防亦无神物司食道固当尔
雀防犹有知

四

见狗须不走见蛇须拱手不走尔非偷拱手亦相厚无欺物自信能胜谁肯负不见吴山虎郭
文探其口

五

鸟有反舌者自古比防人时气一朝迁此舌竟不伸众鸟莫不然更鸣以存身如何能言士聒聒无止辰

六

犁牛有土德体厚静绥绥岂无牝牡情不自求其雌终朝草栈间若忘渴与饥嗟彼位儿高乃尔难自持

七

精衛勇填海鷗旦苦求明明尚可得求填海何时成我观飞鸣族一一各有营但为口腹谋遂尔遗其名

八

燕是孝义鸟常栖孝义家堂檐白日暖上下静无哗以此托躯羽祸福审不差谁云知数历俗士义之夸

九

圃人忧孽虫为蔬畜鸡雏小鸡择虫啄大鸡遂啄蔬虫去蔬亦尽对之可歔歔昂昂高冠幘反不小鸡如

十

蚯蚓食土壤蚩蚩何所为蝓蟬饮风露蛻上高高枝卑者慕其仙飘飘安可追倘令智相及无美亦无悲自居剡源少遇乐歲辛巳之秋山田可拟上熟吾贫庶防得少安乎乃和渊明贫士七首与邻人歌而乐之

贫贱如故旧少壮即相依中心不敢厌但觉少光辉向来乘时士亦有能奋飞一朝权势歇欲退无所归不如行其素辛苦耐寒饥人生系天运何用发深悲

二

我居在穷巷来往无华轩辛勤衣食物出此二亩园薤松郁朝露桑柘浮春烟以兹乱心曲智计无他妍择胜不在奢兴至发清言相逢樵牧徒混混谁愚贤

三

松风四山来清宵响瑶琴听之不能寐中有怨叹音旦起绕其树碗何不计寻清音可敷席有酒谁与斟由来大度士不受流俗侵浩歌相倡荅慰此雪霜心

四

中年涉事熟欲学唾面委逡巡避少年起秽不敢酬旁人吁已甚自喜计虑周微劳消厚疚浅辱胜深忧从知为下安处上反无俦人生各有志勇懦从所求

五

古人重一亩有禄不待干德成禄自至释耒列王官不仕亦不贫本自足饗餐后世耻躬耕号呼脱饥寒我生千一后念此愧在颜为农倘可饱何用出柴关

六

村郊多父老面垢头如蓬我尝使之言辞语不待工古来名节士敢望彭城龚有叟谓其后更恨道不同鄙哉譊譊者为隘不为通低头拜野老负耒吾愿从

七

去年秋事荒贩余仰邻州健者道路间什伯成朋俦今年渐向熟庶几民不流书生自无田与众同喜忧作诗劳邻曲有唱谁与酬亦无采诗者此职何可修

丁氏厚德堂

贱士懷永忧一物常恐枯贵者止营私智或遗妻孥肉食从古鄙黄金使人愚我游四十年钱塘车马区但见插桃李谁曾种桑榆白头识丁子仪冠俨于予示我厚德编嘉名在塘隅谈之为踊跃喜气生眉须愿子富仓庾人人饱餐餽愿子多酒浆日月开樽壶行藏自有命不谒守钱奴

排律十七韵贺阮侯得子

芳城春树晚清海月初瑞出三神岛光纒五马车眼中新鸞鸞膝下小璠璣锦褓看争羨犀颅画不如试啼寘错愕献梦媪勤渠庭舞张公鹤门填孔氏鱼一时官府庆数世甲科储闻説衣冠里高增桀防间民随阮公姓邻禁宛溪渔东去一浮印南游雉绕车陰移棠芾芾骑拥竹舒舒政有儿童恋謡听父老余攢眉询赋额正色署刑书暗室天如镜心田老自畚看骑金驪裹待防王蟾蜍我欲歌三贾谁能説两徐先随汤饼祝聊当贺钱醪

傍家东北有山曰绍地余幸得之规以为素莊也

绍地吾所欣他时以藏我冈原见逾美松柏栽已伙双流交在右一几平连左忆惜初经营登高忘蹙跛年衰已渐怯步暂石频坐居然契券叶偶尔 策可心手之勤劳躯骸庶安妥况复近芳茨时能荐蔬果虽无刘伶锺略慕王孙骝

谢陈君祥宪使时郡家以余充岁贡陈侯颇怜之令无行

鸾鳳不鸞暴珪璧无锋铍评材容一切未觉世论严仆昔江东归二纪操鉏鎌闻山但庐霍慕水惟沲潜官车歲千两未省谒帷幃岂无赵张伦居突不得黔新年有吉语所在兴循防惟此沮洳氓生涯嗇而纖防营疲负挈陆取困涂霑赫赫金铺门风雨今无檐皎皎华裾生尘土今无檐分台得陈侯笑语脱烹爇仁贤所居国不言革顽憺侯家仲举峻何如太丘谦问侯何所为深坐静春帘问侯何所学净几飘风籤俨雅菑川公高节齐晋瞻横流滔天来挺身卧西崦何以赠陈侯孟光书满奩名曰事言补其辞清以恬岂但资稗官五经之韜铃从来名世士必有渊源渐侯识民蓄 侯材国梅盐诚令以德举遐陬讵能淹愚者理宜止容仆守穷櫬

往时王達盖尝与予评陶顏二公云鲁公乞米于李大夫者李大夫光弼也而怪渊明所乞食失其主人名氏以为恨余按渊明乞食诗云饥来驱我去不知竟何之行行至斯里叩门拙言辞则是渊明为饥所驱本不知为何人家而叩之亦可怜矣然渊明家有五男子传称翟氏志趣亦同能安苦节夫耕于前妻鉏于后又责子诗雍端俱年十三或当别有庶母渊明又尝助其薪水大约计之不翅百指之家而当饥饿单身竟行望屋求食不知其家何以为处乃不如鲁公阖门同饥共饱择英贤可与者通情焉不亦可乎余家与渊明畧相类不敢用渊明法壬辰春有感于故人之言遂和渊明诗韵将求如李大夫者而告之

今朝胡不乐取书一哦之饥穷古不免陶生良有辞骨肉同天伦僅仆緣食来如何长年中万事付酒杯脱身得一饱激烈成謔诗不如鲁侯仁借贷英雄材嗟余亦有作欲向谁同贻

君莫夸少年一首赠余光遠

君莫夸少年与我惫者疎我亦尝少年少年君不如谈谐今已忘犹有少年余东南山水国早得飞长裾春园虎丘树夏檻王泉鱼吴妍与楚艳过眼日千车当此秋风凄游子易歔歔我时未更事意气益发舒出门有佳侣遇胜不得虚惟忧日晷短当去亦踟躇官曹人所厌高士不肯居平生纵观处最在客南徐姻党四面集防衣攤安輿停觥待淮蟹醇甘逮僮胥道路无此愿此愿胜乡间自从秣陵归郁郁不再攄三间风雨屋僻其荒林墟非君好事者谁能至吾庐今来建溪上逢君屡相于行藏且勿问人世有乘除旧狂我已悔新銳君当祛男儿不用世资身在犁鉏临风赠君别劝君惜居诸劝君重桑梓劝君重名誉歲晚未相忘频寄山中书

老树

老树老且枯数柯枝綴之虫来食其叶藤来纏其皮幸然根本坚未至甚离披风霜既无损雨露犹见私如何乌鸟輩同巢自倾危鬪击翼似斧啄伤嘴如锥树色歲时減树力日夜衰回头

试一顾但可相扶持

伯收东冈麦

伯收东冈麦仲移西塍秧四季各有役糊口走皇皇岂不惜冠履兼营业缣緌怜尔衣食微及兹筋力强古来经术士什九起耕桑穷通自天命谨勿事胥商

邀陈氏子饭归似铜山珣老丁酉五月十五日也

饭子山下麦羹以山上笋笋坚烦齿牙麦粦哽喉吻相邀岂云厚竟去良不忍林园隐趣出鱼稻秋事近短歌讯而翁赠子以一哂

饥旱

旱风烁我肤饥火煎我肠春夏犹自可入秋始难当簪珥陡防尽衾裯纖细将夺从女奴手并入米客囊但冀喘息延敢忧生理妨山州古磽瘠岁计仰苏杭发地流玉粒浮天驾牙樯如何水后郡翻余浙东粮行路急促促人情沸皇皇焦枯望一雨禴禱愿千方云气亦偃蹇魃妖转炎扬浮生想有属沈忧聊暂忘

余居之西偏有小室名嗇庵诗以识之

嗇语养气海嗇食养脾土嗇虑养心神嗇劳养筋膂衰年百事祛寄息此环堵危如突围将钝似滞风贾顛仆冀賒延空羸待偿补夸虚道蠹贼逞获命斤斧收君论痴符佩我养生主

邻峰

霜严火炬青月淡两峰白堂堂夜行谁邻峰贩醴客贩醴事且止归农收又薄枝击习鞭挝鲜肥愤烹炙外虽刑宪拘内实饥困迫鹿穷有狂奔虎毙犹恐掷如何陇上豪坐作沟中瘠世无卓鲁化名在跼蹐籍感叹重徊徨羈危转惊赤

春日城南闻禽鸟声喧甚为赋二十二韵

今日春气至新禽各啁嘲岂无好唇舌入耳何恹恹雒 最多端能以巧自殒黄头亦翮给微吭和且调无计颇滑熟乌鸦与鷓鴣自余不知名喧呼杂竽箫黑衣猥雄黠昼动固非臬均为乐其性幸此风日朝城南六七曲荒园绕榛茅我来感物变何异在山郊惟闻黄鹂至不闻叫交交当由恋幽谷畏寒还避器群英盖壤内小大一逍遥得气不足悦触情遂相辽乘墉少年儿挟弹欲见邀所规不满掬翻令污厨庖鹰鹯势险薄爪长尤善捎同群自戕击此祸极无聊深藏务远晦尚惧形色招危机布平陆况乃纵轻僇悲怜复譬释当鸣诤为妖但懷道傍树信美非其巢

林贵父投老谒铨有赠

天寒道路长行子难为容况复迫衰暮视近步憧憧千世悔古学费时慙惰农谁知冻雪巷忽视防髯翁防有排闷书谈如发矍铄听之不能竭浩气生奇胸从来庠序师专以处龙钟才高得教诱禄休尚遭逢此职今不少有求岂难从去去善自爱春禽语晴壙

陈晦父赴铨十三韵

古人取逵士得一以为豪江左贡千百选抡今始劳占对混童厮趋踰偕吏曹以兹寓绳準弃髓索皮毛遂乃考卷业成文喧诵号其次严保举虚牒相笼叨富儒坐可得贫儒走滔滔有司见其然厌贱如蓬蒿谁知真儒者百黜宁不遭陈生青紫门佐书越江臯秩满在选中家寒无所操虞翻显凭易买臣进缘骚吴士例则然且毋衒名高

次韵荅盐官傅秀才

欲有险于弃千金身陡沉争名急饥渴对面九關深谁知海城畔山水发清音蟾蜍泄喜愠籛籛阅晴阴意到得所指不作寒鸢吟斯人定不恶我輩许同襟去去复去去白鸥未遐心

南岩留宿分韵落字

游欢值暄秋饮狎得嘉客嵌岩复在眼徘徊忘还郭欵欵坐向疲喧喧笑多谑短檐近见出窠乳时闻落防闇燎蒸薪惊虚摇鼓铎僮憨榻露防僧驯茗频淪竟隱凉未能美彼高栖雀

朱使君家诸郎将别十一韵

东南典藩材朱戸贤第一天生好儿郎玉笋森六七俱能弄文翰那教逾戸室伯也秀英英瑚映初日翁仲最似古鼎鼐熊彪质叔季相和鸣笙入钟磬出人言有阴德我爱少权术公退亦见容老衰时自失官期忽在眼别语常促膝江湖芥舟小岁月翎箭疾善保清明心临岐莫轻怵

掩篋

十客久不解一解值吾仇譬如巧蛾眉同镜见之羞结交恨不广难在相绸缪掩篋谢年少所藏非所求

次和焦治中云洞纪游十四韵

是身虚空中如云本无有游行又其寄纵乐安得久嵌岩大硯质鑱削竒鬼手栋宇起何年名称出谁口忆昔扳藤蔓凌空讶鸡狗疎疎石生罅剡剡室悬斗乘峻开栈梯缘明挂窓牖岂无

题壁堂多逢斫畚叟贤侯韦平家雅韵王谢友骊珠百四十模寫已八九坐我南楼床浇我北海酒人生主客意如此岂云偶风花命浮沉木鴈天可否悠然付一噓山灵倘回首

信府同知黄侯名其读书之室曰广居

隘夫防藩畛得少便有余达士心旷然清明如太虚海岳陈鼎俎羲驾走轩车唯诺无不行尚懷豚与鱼嗟兹山城氓憎长逮其胥好语朝索茅怒攻昼攘裾侯来未数月眉头笑舒舒退食扫一室焚香展群书举头窓檻间有榜揭广居力行守仁义邹公不欺余

丙午二月十五日以府檄出宿了岩

衰年慕栖息役役殊未休天明发东郭日晏泊西州岂其千金躯为此一飡谋宿麦青已郁穉桑黄亦稠欣然一防意所愧非吾丘悔日諒不遠誓言良未酬挥手谢还往伊嚶自伊嚶

送官归作

生世悔识字祝身如野农勤劳养尊老膳味日可重晨刍熟新黍耕林有过从行吟聆松籁此乐逾歌钟

七阳字

鴈鴈西北来亦复东南翔动物各有时吾党谨行藏厚【缺】违严风密袂御凜霜陶然茅檐下一簞生春阳

班溪

我爱班溪班班班为谁好于时九秋晚霜叶红不扫石摇未归云水映欲衰草累累牛羊队洒洒鱼龙道崇丘尚多莱残村几经潦故物一若斯今我胡不老过从幸相狎聊坐暢懷抱

宿福海寺

斷岩苍龙角汲流紫云根道人不絕俗自然无耳喧屋脊挂修岭一日过千辕此日但高卧松风有清言听之亦无有风定松在门炊成我欲去独鹤鸣朝暾

六月十三日壽陈子徽太博十首以无官一身轻有子万事足为韵

一无字

骄云散飞雨随风为有无老农终岁日望施在湏防平生官田粟长此礼义躯置之且勿戚一

饱任妻孥

二官字

青青泽中蒲九夏气凄寒翩翩翠碧羽照影苍溪间巢由薄天下俗士营一官小大各有适自全良独难

三一字

穷居无公忧私此长夏日蛟蝇如俗子正尔相妬嫉麾驱非吾任遁避亦无术惟当俟其定静坐万虑一

四身字

流萤出草莽空飞乱星辰蜻蜓水虫质一变能轻身物情羨速化过眼异新陈嗟嗟白屋士吾方保吾真

五轻字

当暑苦炎暵日【缺】秋风生穷忧在衣褐霜露亦可惊徘徊念年少岁月去已轻岁月可奈何学道恐无成

六有字

自古皆有隐陶生隐于酒炎氛四面集一窟在北牖世人羨桃源桃源复何有惟容醉乡徒百世得相友

七子字

永日岂无饥盗粟非所拟喝行岂无劳恶木非所止君家碧梧轩莲荷泛芳沚我来息凉阴嘉賓荐君子

八万字

幽虫聒午枕掩抑声千万风前以虚鸣蟋蟀最多怨我静乃得闻一一来自献憧憧道傍子与尔故相远

九事字

炎方有朱鸟璀璨颜色异土人目为凤信尔可安致生雏固当奇千歲防一至纷纷鸿燕期寂寂非我事

十足字

朝游剡山巔暮戲剡山足英英丹霞洞不受尘土辱飞仙复何许诸子如立鹄酌君沧浪泉和君紫芝曲

陈茂阳书监赴史氏塾

青天碎浮云飘落随长风当年江海心聚散岂谓同我髮春霰白君顏秋树红各将飞騰具坐受穷困功懷书更何罪暴客歲不容数夕稍振发共语凉天中天明換顏色囊瓢赴群童此事本下策改道无所从犹胜古侠士佺牛市廛东

春风

春风吹愁端散漫不可收不如古溪水祇望乡江流新花红烁烁旧花满山白昔日金张门狼藉余废宅回头语春风莫向新花丛我见朱顏人多金亦成翁多金不足惜丹砂亦无益更种明年花春风多相识

八月十五夜雨中微有月色

雨色今夜别映门白鲜鲜險知万古月自在最高天天高无阴晴月亦无亏圆中间隔云雾顷刻变态千惟当自作乐上界岂我怜接竹风撼郭倒尊水号川狂歌眺渺莽恐有浮槎仙

九日与儿輩游中溪

悠悠循涧行磊磊据石坐林垂短长云山缀丹碧颗蓼花最无数照水娇婀娜何知是节序风日自清妥群童竞时新藕果间蔬蓴欣然为之醉乌帽危不堕此日山中懷孟翁不如我

阆风舒先生客居棠溪袁仲素家见示竹帘诗戏作问答二首

剡竹吾问君斑斑为谁设一登君子堂迴与凡界絕陂龙鳞故鲜湘娥泪犹热既能露文章匠手安得辍所怜无可娱如伴枯禅防千金散红裙一镜垂白髮定非夏侯衣高堂挂秋月

其荅

何物非可怜聿向翁戶设翁好诗更佳萧然得三絕他家少年丛徒尔歌舞热正如阅优場未久意先辍翁今一室老高卧百念防汤炉松林风纸帐梅花雪时时有佳客文字送日月

古诗十五韵送胡天放西游【名侨淳安人】

有铁莫妄镕镕作侠士惟有帛莫妄缝缝作山人衣君看天放翁气貌絶清羸濩落七尺身仁义充肤肌无家救人穷无田恤人饥江湖三十秋白头转岖崎余情尚洒洒不吐酸寒辞事慕古豪杰诸儿那得知或云有仙骨深中愈难窥趨腾华佗戏偃蹇梁鸿噫世态贵反覆口语澜翻飞夫子顾之笑百触不发机宁当待沟壑西山古谁悲佩君 瑚钩酌以玻璃卮相知岂云无去去勿复疑

舟中望紫岩

近山如画墙遠山如帚长我从云中来回头白茫茫惜去乃尔觉常时自相忘相忘岂不佳遣此春懷伤飘洒从何来衣巾径微凉初疑雨风集冉冉游尘黄无归亦自可信美非吾乡登舟望东云犹向防端翔

次韵荅二袁

相逢何草草不念别日长别我我在山别君海茫茫慰别有难易我老不易忘今此春云篇来别已悲伤春云虽多态与世无炎凉朝出山路白暮归海天黄人生不免别与君非异乡我思不如云春云解飞翔

感物二首

騷鬣今失群亦自矜趨腾俛仰岁时久帖然困蛟蝇豪鲸逸其穴天水成沧溟岂无鱼鼈交望望为所憎物理有翕张达人同废兴幸无忧迫忧聊复曲吾肱

其二

鱼目出泥沙空村百金珍豫章值拥辔细细供蒸薪论材何必多适用即能神托交何必深寡求永相亲鲍叔拙羈鲁张生穷厄陈茫然扳援际岂意出风尘

八月十六张园翫月得一字

明河荡残云清海收晚日婆娑林端月为我良久出洗杯问劳苦天女笑肸肸月行虚空中万古无损失且可娱今宵勿复思昨日歌情天水遥坐影入树密嗔醒有微酒微诗或呼笔仲容欢入林懷祖娇在膝初犹整裘褐久乃忘冠带趨锵翻奕盘笑傲惊帐室宁来共喧呶不许私暇逸蚩蚩复扰扰醉态不可一情知此月下此乐世无匹月光本天性清莹本其质动定极淳涵声沈转萧瑟忽忙寄醉语悟迟已难述

送乡友林耕道往信州因寄李明通余与林李皆游故中书卢公威仲之门

卢公全盛时桃李何纷纷冠蓋蔽白日谈笑起青云林翁我乡曲同业又同门如何三十年白头始相闻全家作楚鬼只影穷江源起手问曲折口涩不肯言宁非衣食牵犹赖齿颊存叹此皆有数吾书已云云下尽浮世尘上通先天根事来即顺受不得劳悲欣我老耕破砚百钱混人羣听之如饮醇油油至微醺所恨各有役东帆复西辕平生李元礼归为致寒暄

鹿顶山朝晖轩为东玉师赋

金鸡警神开烛龙转严车陰防欲销散岩谷开嘘呀急然苍萝颠涌出红莲华天晖初照烁六合无藏遮而我灵台中善根始萌芽珍重慎消息外物如尘沙

邻友陈养直请赋山心楼【楼乃入剡旧寓也】

诸峰何盘盘四起如帷墙试问客主谁兹楼山中央面势既环合结构欲飞翔我来名山心一笑借绳床左手南风弦右手北斗浆山灵亦我笑夜梦车两箱一坐三十秋林篁鬱相望花鸟天语默烟云野行藏开通勿障蔽百世敢遗忘

刈园诗为竺秀才作【越霸冢人】

朝从园中去暮从园中归园中何所有杂草青离离刈少犹未觉刈多还渐稀岂忧筐筥频要使牛羊肥但放刈手缓勿伤兰与葵葵高叶难防兰弱根易萎惟彼恶草种刈尽转蕃滋此理不可诘此语令人思

送陈养晦赴松阳校官

书生不用世什九隱儒官抱璞岂不佳居贫良独难陈子剡中秀盛年早弹冠嘗搢丹丘云亦窥沧海澜仙真愿喜笑鱼龙从盘桓天风一吹激却步赤松關谅子太宇定悠然置悲欢但令懷居輩极目劳追扳

秋虫叹

夏虫声渐微秋虫声渐繁微物何所知时至不得间嗟我镜中髮亦复就凋残凄然 忧患霜风埽茅菅反不如彼虫自得草莽间所以达生士逃名在空山客居虽云乐不如早知还

卷二十八

元 戴表元 撰

古诗七言

聽琴行贈沈秀才

君不見江南琴師海與聰誰與傳者夢溪公又不見醉翁詩中沈夫子聽水作琴琴譜起祇今
人間何處無琴師問渠端由渠未知錢塘東風萬人里沈家還見奇男兒沈家家住芑湖曲夜
理漁絲朝采菊菊苦難餐魚又寒彈出歌聲寄淒獨近來携琴東海行清音應滑如流芑湖園
日暖百花嘆彈徹滿樹春風生我不識琴識琴理為君悲酸為君喜相逢正值酒錢空佯狂攘
臂紅塵市琵琶阮咸休羨渠相知豈須頻曳裾醉酖死从髯徐去洗手空山修樂書

赤泥嶺行

種桑三年寒得衣養犢作牛堪挽犁生男祇解戀鄉土五日溪船催父歸行前倉庚后杜宇去
家漸近聞剡語恨身不作田舍兒騎竹挾沙繞牆戶人生衣飯取裁足阿奴碌碌猶類福獻書
覓舉直下防年少奔馳頭已白君不見燕山萬里客更难赤泥嶺上春風寒

建溪精舍得本字

四山翛翛風日暖白髮防花惜春晚當時衰草牧羊坡今日池台紅霧滿最憐幽篁手所植兒
戲成業亦千本旧游聚散萬事拙客夢悲歡百年短荒涼處處經戰馬寒食家家澆祭盃險知
地下不識醉祇合生前尋酒伴蒼苔白石堪枕藉野鳥清溪自弦管同游飄揚正防步老我摧
頽甘青眼風床溽暑新 洙江樹飛云故人遠出城少事幸縱恣賭令爭歡君莫懶

夜寒行

昨日天寒不成醉今日天寒不成寐醉得酒可強歡寐少愁多頻發喟紫竿葦炬鬧荒城役
夫遙作鸛鴨鳴拥衾高枕未云苦熟聽但覺令人驚烏孫黃鵠飛不返辽城白骨填未滿朔風
蕭蕭吹成旗居人何如去人遠丈夫無成霜滿湏沙場萬里星河踈南牆詩翁窮据爐北窗少
年猶讀書

騎馬行荅贈吳中張子潛鄉貢

君不見天上續弦膠又不見海外切玉刀傍人錯愕心自快痕迹過眼無秋毫吳江先生淮海
客長篇大章歌落托白袍只作東土音黑頭曾射南宮防霜清水落芙蓉開酒酣獨上吳王台
緘書右望寄飛鳥乘風忽擬穿蓬萊人生相逢不在早賈生太早顏生老興來亦欲向西游約

君骑马阊门道

自信上归游石门访故人毛仪卿镇卿兄弟作长句赠之【丙午冬】

山开未开白云梯人行不行青麦溪五年清梦隔蚁穴千里飞尘深马蹄重来交游亦笑乐但觉几杖烦提携门闲霜叶无数积风定水禽时一啼药草春暄夜更长木兰花下聴天鸡

昨日行

种树莫种垂杨枝结交莫结轻薄儿杨枝不耐秋风吹薄交易结还易离君不见昨日书来两相忆今日相逢不相识不如杨柳犹可久一度春风一回首

招子昂饮歌

与君相逢难草草与君相逢苦不早人生何处小泥涂此日飘零武林道武林城中马如云闭屋狂歌人不闻狂歌自笑君亦笑依然狂絶不如君君歌岂是真狂者青衫少日春潇洒至今俊笔五花纹最惜青眸十步下虚名何用等灰尘不如世上蓬蒿人黄金偏趋不贫室白髮难老无愁身风雨无情亦如此凄凄但聒穷人耳不见朱楼高到天凤箫龙管连朝起连朝笙管可奈何我歌且止湏君歌青天白雪望不极坐见緑水生层波我生胡为被狂恼江头鱼肥新酒好从今作乐 醉倒与君相逢难草草

鴈南飞

鴈南飞飞且鸣我不爱尔絶汉排云之健翼爱尔秋来意气各有适江湖万里同风声风声万里秋萧索山乡田荒水乡薄不应専为稻粱来得饱自住今亦乐羣飞嘹唳奈尔何青天茫茫无网罗谁知世有苦心者夜半闻声悲转多鴈南飞劝尔飞时莫近征妇舍手触邊衣添泪下更莫飞近贫士屋弦絶樽空怨凄独鴈南飞飞且止世事惊人例如此我昔扁舟五湖水年年见尔秋风里如今未断少年情一度鴈来心一惊今年鴈来明年去明年去去江南路欲将书寄去邊人明年认作书回处

剡氏饥

剡氏饥山前山后寻蕨蕨斷蕨得粉不满掬皮肤皴裂十指秃皮皴指秃不敢辞阿翁三日不供糲不如抛家去作挽船士却得家人请官米

俞光遠父子归马岙兼托问讯故旧

君不见深山野马生龙驹又不見荒林老鷹鳩作雏男儿似种世所少俞郎三世成清儒祗今道路满尘土大袖已觉妨奔趋提携逐食何足羨羨子有防宁亲軀蠲符昼行鸡犬静餐钱下

歲鮭魚湏机神有余自静重蔚蔚老气生眉须高堂百客森冠裾四座指防看明珠谁能对此心不动归来转觉群儿愚峡南云深山气冷今歲亦闻愁早枯但怜四壁愈憔悴傍人解笑吾人迂书来隔宿发梦寐便买舴艋随僮奴山篱语喧聒柳栗晚阁妆罢悬蜘蛛暂违相见喜定剧胜似朝夕趋庭隅因子此去传区区先从贤翁到吾徒刘郎癯絕今更癯香岩老人安稳无

采藤行

君不见四明山下寒无粮九月种麦五月尝一春辛苦无别业日日采藤行遠冈山深无虎行不畏老少分山若相避忽然遇藤随意斫手触藤花落如猬藤多力困一顰伸对面闻声不见人日旻将来各休息妻儿懒拂灶中尘湏防叩门来海贾大藤换粮论斛数小藤输市亦值钱采得官粳甜胜乳明朝满意作晨炊饱饭入山湏晚归南村种麦空早熟逐日扃门忍饥哭

杖锡虎

杖锡山中深与世絕往还从来称是仙圣窟虎暴不得奸其间今年山神大失职虎来山前搏人食传闻此义我亦怪歷问更为居者惜杖锡山中民犷健疎农耕老稚为樵壮为猎朝朝暮暮山中行山獐野雉收当粮天寒果熟霜狸香腰弓度垅矢插房黄茅覆溪机半张鸟啼犬奔风箭急机鸣未发且前立平生闻虎不识面顛倒穷途忽相及惊呼顿迅声渐防妻儿骇呀不即归循踪走至设机处但有血渍斓斑衣呜呼哀哉乎此民良足悲呜呼嗟哉乎此事不足疑吾闻以毒殃物者物亦以毒殃其身我不敢以尔为仁以饵钩物者物亦钩尔以为饵我不敢以尔为智杖锡山山絕深无虎不必古有虎不必今天生此物居山林有虎无虎视尔心但令尔心无干戈虎居深山奈尔何

少年行赠袁養直

我昔如君初冠时见君垂角儿童嬉君今长大一如我但少头上斑斑丝诵书如流日千纸更出清言洗纨绮明珠在侧真自失挟册茫洋吾老矣人言四十当著书春风半负黄公垆僮奴哂笑妻子骂一字不给饥寒躯儒学无成农已惰履穷始悔知无奈人生少年还易过请君努力无如我

义蜂行

山翁爱蜂如爱花山蜂营蜜如营家蜂营蜜成蜂自食翁亦借蜜裨生涯每当山蜂采花出翁为守关司徼遮朝朝暮暮与蜂狎颇识蜂羣分等差一蜂最大正中处千百以次分来衙丛屯杂聚本无筭势若有制不敢哗东园春晴草木媚漫天蔽野飞横斜湏臾骈翼致隼永戢戢不翅输牛车似闻蜜成有所献俦类不得先摩牙重防覆卫自严密虽有毒螫何由加一朝大蜂出不戒春容靓饰脩且娉蜻蜓忽来伺其怠搏击少坠遭虾蟇羣蜂仓皇迷所适谒走欲死声呀呀求之不得从乃定复结一聚犹如麻我来访翁亲目睹搏髀不觉长咨嗟翁言蜂种幸蕃盛众以义聚犹堪嘉乌衣槐安传自古蛰触分据两角蜗虽云彷彿存国族徒以纪异其辞夸

博劳舅妇恨翼短螫灵异姓争荒遐岂如此蜂互推举一体同气无疵瑕我怜翁言私诮责扶
伤蚤愧隋侯虵况伊二毒俱下类 细不足劳鞭撻前尤往悔俱勿论事防倚仗来尚賒新房
才成蜂未壮旧房委弃坠泥沙

雪后况湖歌【为阮使君作】

君不见明州城中日月湖萦蓝繚白如画图良时乐游古亦有何人破雪浮官厨金猊暖压红
氍毹紫貂醉拂青 瑚麈尾高悬前唾壶使君霜髯双脸朱同时僚客总豪秀陆池阆苑罗仙
儒名谈锋凑初不恶安得玉人歌缕珠似闻州民喜公出终日绕岸狂驩呼淫丝浊管何足道
入耳得此成真娱城尖数峰大模糊山谷何路通樵苏年年腊前得三白乐岁仍然多饿夫定
知新年稍安乐风流使君江左无

山茗行

茗花如云色如雪万垅千溪防不絕风吹日炙自鲜明弃在空云谁爱悅遭逢偶入山人手防
作蓬鬆扫尘帚髯疎髮落已萧然时对西风一回首人间贵贱不湏论此物古来从至尊犹胜
长抛霜露里秋虫野燐愁枯根

啄木行赠净瑀上人

东园嘹嘹还剥剥有鸟晨饥啄霜木天寒虫豸得防何爪觜披猖良为腹华堂蝙蝠添毛衣飞
蚊净尽何处归海山野鹤亦有饥饥絕不向人前飞

又坐隐辞

坐隐字出顏黄门家训而其义非也余虽移家棠岿居犹未定每往城南寓舍城中无所营交
遊益疎或至坚坐逾旬不出遂取二字榜其室而作坐隐辞以傲之

快马疾驰不如徒步多金善贾不如躬耕日食八珍不如强饭封侯万里不如还乡我观古来
丈夫子何用桑弧蓬矢射四方苏秦生为六印役主父死愿五鼎烹不如诸葛草间谈管乐陶
潜醉里傲羲皇南面之尊何如于据梧之贱环辙之智无预于荷蓀之狂高冈峻谷从亦变青
天白日昼夜行茫茫胡为忧愁浪自苦百年齿髮谁得长坚强不如揜关埽迹成坐隐清斋永
日一炉香

赋意未畅复拾前韵之余者作广坐隐辞

我作坐隐辞客来问我坐隐方开门进客还复坐为客歷落言其详隐朝市我不能冲尘冒暑
走遑遑隐江湖我不能披蓑戴笠操舟航隐山林山林白昼行虎狼隐田里田里赤立无资粮
穷观六合内投隐几无乡是以古来人失路多猖狂或隐伶官侠客或隐药肆僧房或为君平

隱卖卜或称陶朱隱行商虽能逃世网于事未为良况我难携一身隱二亲白髮垂高堂神仙防宅古亦有无羽不得高飞扬不然少自屈归去隱耕桑随佣竭作既无一夫力买田筑室又乏千金装童奴擲揄亲友弃往往人厄非天殃悲来俯仰寻隱处欲亲书册依杯觴引酒未一酌狂气鬱律冲肝肠读书未一卷噫呜感慨泪浪浪酒能触人生愤激书能览古知兴亡非徒不足充隱具反緣二物来自戕覆杯掩卷且默坐气定始觉如平常因思世上百千事是非荣辱俱可防杨朱墨翟悲泣雨无益伯夷叔齐浪死埋首阳不如随緣委运秣块坐防心径往游黄唐不论辨不忧弹射相摧伤不还往不忧风露沾衣裳人生衣食分已定登途役役空自忙不见啄木鸟终朝一饱如不偿不见守耆 穷年引息泥中藏月前伸屈君莫问此鸟孰与年长坐叹自笑客亦叹烟【缺】暗室生天光

行妇怨次李编校韵【丙子台州作】

赤城岩邑今穷邊路傍死者相枕眠惟余妇女收不杀马上娉婷多少年蓬头垢面谁氏子放声独哭哀闻天传闻门閭多辉赫谁家避匿山南巔苍黄失身遭恶辱鸟畜羊縻驱入燕平居隣墙不识面岂料万里从征鞭酸风吹蒿白日短天地濶遠谁当怜君不见居延塞下明妃曲惆悵令人三过读又不见蔡琰十八胡笳词慚几千年有余戮偷生何必妇人身男儿无成同碌碌

飞花行赠马衢州时马在建岙别业

山上风花山下飞花飞欲尽山翁归归来亦自防行迹但觉满地红依依余花更惜随春去溪上游人山下路恋家渔父断来踪难老刘郎记前度花开花落春风前我昔与翁同少年祇今鹤去但华表何处鸟啼悲杜鹃游人自游春自暮从翁问花花不语且当向花日日醉醉倒花前学花舞

织锦廻文苻坚时秦州刺史窦滔妻苏蕙若兰为其夫徙流沙作

君不见秦州城中双蒂花春风吹散着流沙流沙千营复万转织入防机歌不断歌不断可奈何人生富贵忧患多不如穷山馐田妇白头不识迁移苦

石湖范至能嘗作姑恶辞以为妇怨非天下之为妇者所愿闻故作续姑恶辞以广之

姑恶姑不恶人言姑恶人岂知为姑作妇百不辞妇在姑尚可妇死姑方悲恐伤姑意不敢违化作异物鸣无时姑不恶姑不恶怨姑还当被姑责但愿生身复作妇死别不如生见乐

余博士家猫相乳歌

上饶余宗钟鼎家孙枝十世犹清华南昌博士最贤者膝下熠熠开排牙我行其庭值供顿食指半千声不哗女悅男鞶况脩谨冠立童趋知等差江南族聚盛亦有如此礼法嘻可嘉长公

公退忽语我瑞猫之篇题满车二雌同时各生子一雌病僵如卧 一雌端来代其乳顾睨悬
惻呼嚶哑子众身疲乳亦竭病母起将新乳加天寒绣褥更枕藉日暖花砖羣戲拏我怜二猫
有至性欲脱毛尾升笄珈北平将门梁肉窟此事尚得昌黎夸公家儒化郁积久义感宜可驯
豚猥愿公尽力持阩范弥补始终无阙瑕不见古来歌舞地祇余猿鹤与虫沙

赠天台潘山人【号秋崖】

老潘双眸如绀珠带以秋阳朝露之清腴山形水态出没千百变经君指顾不得藏镞铖我昔
少年好狂走风餐雨沐逐逐忘朝晡至今卧游想其处但觉云涛烟瘴千里行湏臾匡庐春风
钟阜云彭浪之矶大小飞来孤秦淮震泽洞庭野戟眉缥缈南接五岭东苍梧归来把鉏剡山
下有时一竿钓月贺家湖笼鹰枥马困羈束每逢风鸣草惊动号呼闻君谈诊到骨髓褰衣振
迅恨不六翩生形躯寻牛卜龙古所有君家祖孙三叶传青乌人言河流可移山可凿秦皇汉
武已类愚公愚相留徘徊山南山北一百里胜处忽然开酒壶问渠刘伶一童一锄欲何用且
可从我日日醉倒黄公垆

范文正公黄素小楷昌黎伯夷颂盖宋皇祐三年十一月在青社所书以遗京西转运使苏公
舜元者也后二百四十年大兴李侯戡得此本于燕及南来守吴乃文正公乡里即访公子孙
以畀之范氏喜而索诗为赠

有耳不聽下里巴人有手不寫剧秦美新天生灵物寄我体可惜稊弃同埃尘清风百世希文
老一字流传今是寶谁知堂堂伯夷颂曾借春晖发枯槁韩子也复英雄姿冰寒斗峻余文辞
吹嘘自起北海隐脰炙聊慰西山饥天荒地老精灵在处处江湖红散彩青离孔氏忽自归今
遇龚侯如有待世情爱古兼爱奇书奴满眼非吾师请君焚香盥手拜此帖归洗人间儿女痴

送程敬叔教谕赴建平

尔之王父东诸侯朱门行马高修修严君家学又继美年少乡书推上游我生苦晚百无益犹
及步趋陈太丘飘零不死见三世尔复预此能言流风神清羸谈炙穀生理萧条书汗牛今年
别我忽遠役天马放靶难停留问渠何官县博士横山之西江东阨此邦固是吴楚防风淳土
朴衣冠稠亦闻岩谷多古迹最喜道途稀使驹公堂讲罢看山坐香鼎茶档相劝酬热官千骑
岂不好白日公庭愁督邮饮水茹药善自爱歲晚相期钓沧洲

题陈贵白畚耜

海山作农农较苦累级开畚烧宿莽畚成得粟不偿劳歲晚空瓶误饥防不如陈郎腹果然日
日闭门耕纸田余粮尚许饷遠客植来时和南风篇

余既题畚耜有闻纸田之说而笑者复作长篇

学农无年尤可待学儒无成祗益馁
美君终岁作书痴聚室罄嗷穷不悔
客来问计何所出一饱自悬饕粥外
平生据案 畝心汗简为犁笔为耒
蘖芽百氏草避耨膏泽群经泉赴浚
日高洛诵乌鸟悦夜半吴吟风雨防
世间梁谷何足道开卷穰穰心欲醉
旅熏辟蠹防雀防更缮巾箱筑仓廩
古言乐岁生礼义先见儒门消鄙悖
租符且免里正索子本时容书客佺
东邻有田多牛翁日执牙筹亲细碎
困粮竟作谁腹饱骑吏惊惶汗流背
此时畚耜谈无事戟冠正与周孔对
礼义适口即为味牛心菊苗皆可脍
我诗君意两自知且勿譊譊语儿辈

剡笈送任叔实

剡溪春水碧鳞鳞剡水野藤如乱云
剡人伐藤就溪洗匠出素笈黄土纹
大笈敷腴便竿牒小笈轻盈日千束
我昔少年贪着纂累简连箱输不足
年来弃置百事休引腕就书如畏囚
有时得笈不自爱杜曲蛮歌相献酬
世人贵贱随人好西家弃物东家寶
退笔成山何足道为我攻修太 草

次韵和郭祐之双桔堂赵母寿诗

严亲不待高官秩一刻欢娱胜千日
赵郎宦薄母八旬自采芳甘充俎实
堂前酣酣双桔红童儿见客笑满容
有田得耕我亦去绣衣御史语生风

醉歌赠袁茂才

君休咕嗫语我欲颠狂歌君语虽工不可多
我歌颠狂如我何君不见蘓季子腰横六印车如水
奇祸一朝生口齿又不见朱买臣朱绶煌煌不庇身
不如防稽喑哑人南山山头北山下亦有骑牛唱歌者
行人不诃官不问歌罢牛归卧牛舍我歌属君君为歌
桃花醉面春风和君歌不成春亦老虚客江城车马道
明日酒醒应絶倒剡源溪上防芳草

题范道士来鹤亭

仙客已骑黄鹤去道人自爱白鸥闲
白鸥万里犹可狎黄鹤已去何由还
借君刚风七龙辔返此灵物三神山
天空海濶望不极回首正落樊笼间

题李伯时画五马图

呜呼良马不世出今人但寻李侯笔
五龙忽堕白云乡海角孤臣防自失
太平天子开明堂前驱麒麟后鸾凰
当时此马来万里想见顾盼生风霜
龙眼老仙亦如此挥毫谈笑群公里
官闲禄饱少尘埃雾阁云窗天上起
风流转眼余山河人间荆棘何其多
临风卷图三太息此马今存知奈何

孙使君飞蓬亭

江南泽国多烟水年少轻身作游子适来衰懒畏奔驰忽见飞蓬平地起飞蓬主人人中仙曾乘千斛凌风船船头昼鼓催行酒船尾红妆歌采莲收篙卷纶今尚乐却悔从前风浪恶青云裘褐一鸥身白髮山林五湖客我来花雾红霏霏此蓬如山何处飞但当共坐索酩酊溪塘过雨春鱼肥君不见防夷名成沧海去富贵畏人如脱兔又不見羊裘钓客桐江上一出张皇动星象何如飞蓬主人亭上饮醒与客论酣即寢寢酣忽作江湖梦风雨漂摇蓬不动

题岷山图

山头种石悬苍云山下急流风卷纹何年荒碑当岭立 跌圭首犹鳞皴神龙驱毫鬼输墨羊公精神荆楚色想当意匠经营初已尽东南烟雾迹从来登览非真游襄人正乐吴人愁尊前邹湛亦不恶江山千古同悠悠君不見征南后来人姓杜自喜作碑心更苦祇留陈迹笑痴迷行客何曾泪如雨

防花曲

种花郎君爱花好看花儿女笑花老墙东花开闹喧喧马蹄蹴醉墙西草遊人贱草只看花明日重来还可嗟但见萋迷青覆地千红万紫成泥沙君不闻明妃当年辞汉宫黄云塞下白杨风一朝邊亭静烽火诏书自议麒麟功又不闻马嵬山前玉环血歲歲春风吹不灭词人正赏浯溪碑千秋妖恨无人說红颜误人何足怜花开花谢春风前犹胜凄凉后庭树离歌未断江南暮东门行二首【时鄞城火第宅遭燬故有此作】

春风颠狂卷地起吹动江城寒劫灰江城千家丹碧窟过眼不复余楼台九辮烛龙竟为尔六尺海鷗安在哉平原无人金谷散惆悵东门归去来

其二

松枝可餐不可久蕨萁可舂难入手书生身业值无年翰墨千困不充口烟洲何客钓寒鱼江郭谁门倚残柳琴台歌管无处寻惆悵东风防回首

江行杂书

荒城日落秋江长防防野熟秋风香青天茫茫不知处扁舟卧入菰蒲乡波深浪静鱼鸭乐遥林堕影同飞扬平生见画无此本便欲默寫悬高堂湏臾雷雨涨深墨渔户悉闭收牛羊篙人软语似怜我拘篷盖头编蒿牀此时残怒尚什七潇洒幸为清蚊蟲无人静觉物性出蚯蚓草虫歌晚凉铜山乳窦青最遠羞缩不似来时妆但余田鸟如匹练双双飞防暗烟黄山川一日防变态人事百年安可常停舟起问鱼酒户此地防年成战場虹梁羽化新起废白骨无数埋前冈惆悵令人百忧起饮客正酣歌发狂坐中悲乐谁竟是归来玉兔摇沧浪

吴姬曲五首

吴姬来吴船荡漾湖花开隔堤迎笑欲飞举不用少年多浆催问君青春得防许看取架上红玫瑰

其二

吴姬歌歌声宛宛歌情多当尊一阕且呼酒酒遍余声无奈何春风颠狂亦如我坐见花外摇湖波

其三

吴姬舞朝防成云暮防雨偶然欲笑一回眸锦段金钱落如土谁家学取野鸳鸯终日痴迷弄沙浦

其四

吴姬醉浓花烂蕊春憔悴当筵赌令讳空拳忘却拈三并数四坐中痴客尽偷防翠骀云翹歌不坠

其五

吴姬归潮光烛影红辉辉中心有语不敢吐安得作月生汝衣明朝花下更湏醉放取后园莺燕飞

達观亭歌为建康徐氏作

天风飒爽岩曦开云溪萦环芳树来林栖岛处眼未识何人择胜诛荒莱仙迹着人清辟易徐郎襟怀赵郎笔经营湏通山鬼意开凿曾烦祖龙力高亭一区尤絶尘沧浪捧足芙蓉云凭危醉歌敞花气九衢尘土何纷纷客来问名名達观对此心情转萧防想见千秋争战塲只把云霞眼中换浮名绊人兹可怜飞鸦落日钓窗前何时真脱尘纓去我自网鱼君刺船

春愁曲次刘正仲韵

山翁隱居鴈苍谷春树年年为翁綠耕休坐树作劳歌山光水影相徵逐歌成无人祇自娱行人颇怪歌声殊循踪歷歷见井舍恐是避秦来此居花烟溟蒙乱晴雨山前仓庚后杜宇客来不喜亦不惊但道寒暄无俗语山中今歲是何年黄旗征树装楼船浅村已尽到深谷逢人未說先凄然忧来宛转歌不已我树非材端后死【刘号樗园】五陵当日翥如云如今何处悲风起山南老农亦不忧机浅不为妻子谋日高饭饱牛背坐日晚放牛溪上遊人生逐名被名误十年车马长安路长安路絶云雾昏归来弃笔寻农具旧遊年少难与随梦境一笑难重追惟有剡源穷掌固相思望断西天垂

正仲复有倒和春愁曲之作依次奉答

渐老之日来垂垂已去之日不可追伤春畏老两作恶世事尝与愁人随忽得君家遣愁具行歌日日春溪路不知愁绪逐诗来更惜芳颜被春误王孙草暗谁重游曲江痛哭穷叅谋燕骑琵琶渭城酒居人不觉行人愁行人欲归痿念起白发逢春心未死水流花落无处寻燕去鸿来何日已溪村此日更萧然强笑为君呼酒 黄鸡唤日不待晓蟠桃一熟三千年草间管乐真浪语鸟雀应门蓬挂宇祇余平世畎畝心夜半吴吟泣风雨高人与虎能同居壮士断蛇应不殊年高渐欲置忧患每赖君语相调娱昔日刘郎悲放逐防花惆怅春无绿何如今日春愁曲烂醉徉狂白云谷

题赵子昂画马

赵子奇才似天马顷刻飞龙生笔下画成抚卷复长歌坐客喧喧不停写蹄势经鞭秋跌荡鬃毛出跣风潇洒似嫌文绣减天真尽脱鞍韉轡轻把青袍洗足巧眉睫防坐奚官亦闲雅我来一见惊欲拜曾识鸾和趋庙社千金朽骨古犹昔况此难分毛色假瑶池路断伯乐尽日暮嘶鸣气喑哑为君昂首一慰意犹胜无逢老岩野

南山下行

南山高北山高行人山下闻叫号旁山死者何姓氏累累骸骨横林皋鸟喧犬噪沙草白酸风十里吹腥臊中有一人称甲族蔽膝尚着长襦袍不知婴触为何罪但惜贵贱同所遭妻求抱尸诸子哭防气防没埋蓬蒿人言损身由货賈山村岂得皆权豪一言不酬兵在颈性命转眼轻鸿毛龙争虎鬪尚未决六合一弃何所逃振衣坐石望太白寒林夜籁声溔溔

相逢行赠文伯纯同年

昔日相逢面如雪今日相逢面如铁人生年少得防时动作风尘十年别十年别久未为恶频见亦无年少乐寒栖夜雨金 夢故园春风白袍客雕鞍骏马纷纷来西城乱花春渐开与君追逐觉老丑一笑且醉高阳杯相逢得醉今日好醉眼相思还易老只图留君日日醉醉里忘却江南道

寿陈贵白

祝君以陆地千蹄牛君言不如扁舟江海狎浮鸥祝君以通侯尺二组君言不如草屋三间卧风雨富贵何人不解颐君视二物如儿戲我今赠君亦无物但有 牙佶偃村田诗我歌诗君进酒客主謹哗起相壽寻常此日费千金京洛奔驰今白首江风飒飒吹黄尘对面楼台不见人与君漂泊为何事一笑幸是山林身寡语薄味足以养气少求简出足以养体奇章钟乳本斧斤胡广菊潭堪唾涕君不见南方魮𩚑五色 穷年引息不嫌饥又不見曲辕拥肿百围木匠石捐弃反为福蜗封蚁壤何足论归来未废蓬蒿园我更搜诗君酿酒通家德公有贤妇

春溪恶寄孙常州【孙有约不至】

春溪恶日日春风吹过客千车万辙不相嫌一客歌来吹倒却旁人借问客为谁咸淳朝士今布衣声名欲隐人自知君不闻孙兴公逃乱走入黎洲峰子孙百世居峰下往往翰墨余仙风鹑衣藿食何足耻头白河清吾亦俟向来南面五马车只饮西山一盂水青牛处处迷行踪白鹤归来余故宫道逢樵客知去远迟君不来三日晚溪水犹能作吴语似续君家遂初赋

碧桃花歌为王丞作丞名子兼字达善丙子家燬于火瓦砾中自产此桃

君不见孔家藏书屋屋坏犹闻起丝竹又不见郑家注书老书带后来垂作草如今王家万卷文字林桃花一树春沈沈花成不劳主人种花落更同山客吟从来春花重萼不缀实此花可玩实可食我拟天公出奇物来寿主人并饷客春前待花花下狂春后待实林下尝定知此桃不作寻常草木味只作旧时文字香王夫子多酿酒春风亭馆何处无天锡名花祗翁有从翁乞醉三万日仍令醉后花从笔间出

王丞分惠碧桃树再赋奉谢

水星之精天上游春风岁岁苍龙头偶然根叶着下土散作人间百花树莫疑君家此花无种生定是天上苍龙精白玉之趺青玉簇开花既奇成又速三年方骇大如林五年已见高逾屋我来吟作书林花烟尘万卷重抽芽君家原有孝义种自来青州丞相家为君出芝草芝草那能千日好为君结琥珀琥珀恐为贪者获不如此花混在春花丛岁岁与君同春风春风同赏复同吟愿与主人同好心更令此花分作千百本处处种成君子林

赠赵子实

北风吹沙溪倒飞白日未落山中归千邀万覓不相就谁信有人穿翠微幅巾大带长襦袍韦篋锦囊鲜防毫名门发身合燕颌一经传家真凤毛坐车侯嬴吾不让白社寒林气清放骖麟翳鹤谁不能要识神光牛背上蓬莱山丹霞谷天仙留书三万轴闻君暂去还复来许君细和沧浪曲

积雨小霁喜袁太初舒叔恭两生至

春山日日寒风雨一日天晴花欲舞林暄洞屋散窑烟水活溪岩落冰乳嗟余郁郁无所适方对青山一开户苍袍紫帽两少年健足齐扳气如虎名区入眼疑未快忽肯扪萝到兹土霜蔬处处稀尚摘腊酒家家寒未煮相防气味太村野自喜谈谐少城府舒郎十八白眉长四海龙门有明父袁郎皎洁巧步趋出语珠圆吾所许人言风骨湏晚秀早慧譊譊天漫与吾评此论殊未公峻诋曾经孔文举歌成高轩已年倍赋解鸣蝉容客覩吾山虽穷有灵迹雪瀑丹崖相媚妩留君待作大雷吟莫学痴儿生吴语

谢李仲寘墨竹

君不见李侯笔端如渭川顷刻匹纸生琅玕霜柯雪干铁石色忽作小山 雨寒问君何处得此本湖州嫌浓眉州软风轩月檻一相逢妙处不与人意远人言学画先学影此君风骨青云并林深有路鸟声真日高无人山气静平生见此我不踈逢侯得画两有余从今洗眼空山底更读人间潇洒书

题王敬仲野亭【宣城】

王家野亭苍翠遶秋山万叠相钩连披衣晓霁伴云坐散髮夜凉须月眠主人清豪亦好客常有车盖来翩翩门闲无烦鹤通谒酒散有时风埽筵问君生涯防何许笑指 漠沧洲烟朱门千础扃婵娟豪弦急管争喧妍何曾一日能免俗稍来对谈心爽然古人去远吾不识今日汨没难为贤长公高谈少公和鲁山伯鸾相后先名成但恐累隐趣莫遣妙语人间传

赠弹琴衡山萧道士

寂寂歷歷不足听听久亦复难为情名嗔势忿大如屋袖手对此湏防平一拊再拊 鹤舞三四拊之凄风生天寒歲晚行路远湘水日夜东南倾

登新岭

莘莘确确白石溪绵绵茫茫青草蹊四山陰雪湿灰色六月杜鹃深树啼田庐经漂有高下麻豆满坞无东西隔岩飞流送人语对面喧风吹马啼祗今莫辞榔栗杖与子更上防岨梯登高意远防有极回首烟海令人迷

送叶伯防赴奉化录【杭州作】

君不见东海狞龙子学飞便逐风云起又不见西域豪马驹堕地一日能驰驱叶家翁季亦如此一经接武成师儒毛锥如风腹如笥快书疾读三千字颇闻曾下仲举榻不为频通襴衡刺台书翩翩江上来吾州自古多贤才裴琴携砚速相就为子归埽山中菜

歲晚次韵答李在明

墨乡守墨不作恶歲晚左就醉乡公何人吾伊惊夜半大雪北 歌国风

仇山图【为仇近仁作】

仇山山下仇山人白头宦学走风尘问渠家在山何处云气漫漫不知路诗人作事例多痴逢山且画且题诗不如隣翁不识诗与画一生耕钓仇山下

卷二十九

剡源文集卷二十九

元 戴表元 撰

律诗五言

三次韵寄戴祖禹

同分剡溪派自喜小王书野服调骝马浓香薰蠹鱼
岁时趋阙里早晚上公车与我真兄弟风流但不如

茗溪

六月茗溪路人看似若耶渔罾挂棕树酒舫出荷花
碧水千塍共青山一道斜人间无限事不厌是桑麻

道桐川欲访梅右司不知其处

桐川潇洒处面面碧芙蓉峻塔当关独清溪抱郭重
市多呉客语祠有汉时封欲覓梅仙去知藏第几峰

故总干潘伯可从大挽词二首

落落知难久堂堂竟不还江湖官七品风雨屋三间
已矣乌头白嘻乎豹管斑儿曹莫轻脱英爽在空山
得死何须哭偷生正可疑仓皇归印日慷慨却金时
规矩诸郎有襟懷我輩知平生郭有道消得蔡公碑

和邓善之秋兴二首

鬓髮日夜老神仙那可求扬雄识字苦 晏著书愁碧
酒红莲夜朱弦白鴈秋论心得少暇同上最高楼鹤化
城犹在龙移井未枯百年吾道半六合此身孤西土栽花
屋东风卖酒垆徉狂覓耆旧处处土音殊

渡长柳投小蒸邵教授宿

清晓浮双桨黄昏值一飧风鸣长柳浪云揜小蒸村
馋极知鲈美惊还觉鴈喧同袍恩有爱灯火细温存

客游

客游吳楚地最好是秋天三泖团脐蟹双溪缩项鳊桂林云顶寺芦荡月中船酒醒【原缺】
鴈犹胜听杜鹃

自宣州至湖州风雪中十日始達

江湖老未休十日走三州南雪马没耳北风船打头穷犹携笔砚寒欲贯衣裘渐喜家乡近儿
童浙语稠十二月二十三日华亭小泊华亭近方通潮

一一歌遊处今年又寂寥鸡声生坞树蜃气杂江潮斑白寻遗老丹青詫丽譙衰懷緣子女不
憚往来遥

次韵荅应德茂雪后遠寄

山中不来久何处度残年人闷如中酒村荒似禁烟将茶冰箸煮移枕雪篷眠更肯狂歌否春
风双玉船

赠上饶道云仲

江上青云客天边白马生百年文物似一席笑谈倾问旧能枚举论财比芥轻徘徊亦自好可
便濯尘缨

送乡同舍黄君赏謁陈提学

六馆赋声在五陵游伴稀如何趋仕版犹自着儒衣春晚莺羞语城寒花慢飞江湖陈仲举相
见肯空归六月朔日再防再次韵与胡氏谦避暑

台屋深难暑湖林近易风高歌送长日醉眼睨凉空雀舌纖纖碧鸡头淡淡红行藏数子别谈
笑一樽同

次韵蔚上人见寄

流落谁相忆山林蔚讲师 机魂夢接诗力鬓毛知舟去湏寻处书来不记时君看东海月今
夜亦追随

道衡书寄求诗

烈士蹈东海公仍归白云龙藏谁顾蜕鹤去不随羣道貌青难写香风遠自闻人间尘垢子羞

读径山文

次韵蔚讲师新春之赠

每见辄自失春风双鬓斑诗囊贫里富药市闾中闲
登路通湖寺敞楼当郡山清緣事事足听此屡开顏

史昭甫招陈宗鲁之长兴

之子沧浪去三吳西更西白盐莼菜脰红酒稻花鸡
地少惊云满天空见日低锦囊看烂漫佳客醉留题

风雨行湖山村

风雨湖山暮屠村又鲍村鸟巡渔退艇犬认猎归门
天作蛩云暗溪凭剡涨喧十年灯火伴草次共鱼殮

咏蚕

物亦有仁者蚕功不可量将身甘鼎鑊与世作衣裳
过栈苍云湿登山白雪香未知龙种似犹与马羣妨

柏坑

西去疑无路谁知是剡津行多收柏客住有掘苓人
寺隱山前古村经水后贫时时百里外来此祭田神

证道寺

弯环青径斜自是野僧家满涧浮岩液挿天排石牙
炉寒余栢子架静落藤花记得逖兵日门多贵客车

喜王丞病较

途穷已难忍那许病经时学到自无鬼命强客有医
饭为扶寿本书是解烦资便作天台约山行未觉衰

丁亥歲除前二日书事

索索寒搜客沉沉雨洗年残林生猎迹归鸟避窑烟节物杯浆外溪山鬓影前行藏都未定笔砚底能捐

寄雪窦同長老嘗許畫蘭不至

高高山頂寺更有最高人定起松鳴屋吟圓月上身云藏三伏熱水散百溪津曾乞蘭花供無書又過春

鄞城火後見光遠

火後丘墟市兵前風雨春那知攜手地俱是皺眉人海柳吟猶弱山鶯聽未真明朝各分路何處避風塵

客言劉棹翁事

俗薄名難盛人窮迹易危從來天下士不計里中兒隱玉看虹氣堅松任蠹枝相知不相識況又不相知

蔣堯仁監簿挽詩

家祿宣和後官名德祐前不圖諸老盡竟得一身全月旦懸虛鑑巾箱有祕篇堂堂何可得誰乞畫圖傳照席須眉古傾筵咳唾清緋魚前進士刀筆老儒生政熟元無譜書高別有評百年茲士少諸彥自編名

四十

四十不解事真成無用人交游青草盡途路白雲新漸覺名妨靜難將學濟貧堂堂楚龔傳猶有隱流嘖

夜坐

愁鬢丁年白寒燈丙夜青不眠驚戍鼓久客厭郵鈴泏泏城噴海疎疎屋滿星十年窮父子相守慰飄零

晦亭

東海窮詩客西風古驛亭髮從殘歲白山入故鄉青世事徒三窟兒童且一經丁寧速賒酒煮栗試沙瓶

孙常州挽诗

白髮何人在青山此老归殉携贫日砚斂着赐余衣文物鸥兴灭园林鹤是非诸公莫惆悵英爽世间稀

严提举挽诗

判得身煨烬歌铭尚尔为可怜蝉脱蛻还许豹留皮剡水归来棹柯山看断碁平生触心处临卷费相思

霪雨溪涨抵郭可畏

黑雨连三日黄流迸一川尽漫骑马路祇有钓鱼船城郭功如此江湖兴岂然儿曹却轻捷来往似飞鸢

夷齐

夷齐弃封国虞芮讓闲田如何后世士尺寸事争喧邻居有愧耻况复兄弟间揜卷三叹息古风何时还

赠针医范秀才

不但针经熟言谈语语真链形如铁佛信手合铜人秘摄鱼千里空飞鹤当轮功成倘相挟平地脱风尘

遊登袋寺寺出茶笋甚佳独无杜鹃

苦雨忽相貸名山难久孤春泉新雀舌野苑嫩龙须土宇钱王日风烟释氏徒行人逢不问松吹自传呼

其二

路絕犹人迹山空惟水声如何芳树里不着杜鹃鸣笋市层层出苗田寸寸耕緇流太清朴亭榭不标名

偶得巾樣问老匠云正古漉酒巾也

漉酒陶元亮名传尚有巾方成执鞭志更着捧心人待菊湏簪髮临流拟祓尘乃翁真处士吾党祇闲民

又作散愁

说穷人不信欲说更何为日永书肠觉霜浓病骨知【缺】家兵溃后交絶廩空时头白风尘境消磨尚有诗太学冬至日同斋朋友先以兄弟叙拜讫遍诣诸斋行礼出遂置酒湖上衣冠谈笑之乐至今栩栩在念间也因至日去近二十九和为正仲道之

画阁东炉早黄帘晓烛迟名函僮仆满齿拜弟兄疑歌酒神仙舫衣冠宰相碑如今穷海上逆旅话襟期

旧里火后多有筑宅者太平客户也

人说离乡贱归乡更莫论许询家莫干杜甫客东屯废井微踪出新隣杂语喧平生江海意歲晚白榆村

食淡

世乱谋生拙村深食淡能沙蔬羹白煮山稻饭红蒸暑豉方传友寒糟共学僧庖厨尚如此未叹室生冰

寄谢王侍御

云气蓬莱阁霜威獬豸冠耽书真柱下执法更台端步骤三台近声名七郡寒谁知阶级礼许为腐儒寬

久客且归留别郭于昭宪掾

久客令人厌初春乍许寒飞蓬妨览镜脱粟愧加餐坐有夸年酪门谁住马鞍重来防相见老性忍悲欢

赵寿父游杭

东浙饥难住西湖遠不多好辞松叶麪来听竹枝歌水屋花千绕岩林锦一窠秋深道途好老子亦婆娑

隣友疫

歲恶灾妖炽人穷性命轻如何赤髮鬼亦及白眉生忍楚尝亲药停哀写子旌乡隣拘俗忌哭吊并无声

老态

老态谁能脱中年子自知丹胎三转 卦气一周时倦动身如客单眠力胜医看书亦渐懒意到或成诗

顿寒懷单祥卿教谕时新开酒禁

霜花一夜白风叶满村黄欲出歲华老相思江水长留枝遮鹊户存蜜补蜂粮想见山行处开窓新酒香苏伯清席中领张仲實所寄二诗兼闻陈无逸已从湘南官满归养喜而有荅仍次来韵

我爱张公子清言气不低湖沟随市转亭树与城齐杯酒方花下扁舟又水西祇愁骑马滑难惜锦障泥

次韵苏教授立春书事

病老空山客寒纡积雪春麦苗青有主桃板粉成神短防陶元亮轻舟贺季真征徭幸不及游眺杂闲民

读闾风题林隐诗追和赠汪秀才

山林一迹地尘土二毛年避世书为屋谋生药当田卉衣从俗制疏供学僧煎渺 沧溟去今谁鲁仲连

送谢教谕

闻说龙泉县儒风最可人墨池千润缩石室四山隣北学中连剡南音渐带闽峩冠作賓客罄折不须频

蝗来

不晓苍苍者生渠意若何移踪青穗尽眩眼黑花多害惨陰机蜮殃逾蛊毒蛾秋霖幸痛快一卷向沧波

丁丑歲初归鄞城

城郭三年别风霜两鬓新穷多违意事拙作背时人雁迹沙场信龙腥瀚海尘独歌心未已笔砚且相亲

夜坐示友

夜久烛花落凄声生逵林有懷嫌防浅无事又秋深黄叶归山夢白头行路吟山中亦可乐不似此同襟

宿永固寺

小寺如山艇坐来风雨宵榻分防树影饌带菊花苗亲近谈难防狐驯听不妖许由浑欠達嫌到野中瓢

孙太监挽诗【余姚人】

禹穴收云气沧江亦断流真成扫地尽同作上天遊铭誄看遗史衣冠入隱丘空余平世眼曾望李膺舟

其二

穆祖收英俊斯人晚更成白头真老监褐服旧诸生仕国余波遠儒乡巨栋倾苍苍无处问西望累吞声

风雨游小大浦

海坞秋风里无惊眼亦开潮冲乌屿长雨过象山来畚父收牛种渔丁拾麤胎乘桴吾岂敢人说近蓬莱

方处士挽诗二首

不谓高名下终全玉雪身交犹及前輩吾不似今人别号行鸣雁遗编感获麟敛仪应自定只着古衣巾

其二

不比他人死何诗可挽君渊明元嬾仕东野别攻文沧海诸公泪青山处士坟相看莫浪哭私谥有前闻

宿赵 丞家

溪山兵后县风雪旅中人迫夜愁严鼓冲寒托软巾摧藏名自在疏率饌穀真今代徐元直高风自可亲

社日城南山作

社日年年雨江花处处春渐成垂白老不见踏青人榆柳边声杂龙蛇歳事新端来近城郭犹自厌风尘

赵君理约同途不至

待子不来久烟山看树青为吟天外句更立水边亭雨暖催科斗云深长茯苓隣居亦有约休待鬓星星送双溪汪和仲往象山见周使君兄弟

五马天边外双鳧海上翁白头真避地黄卷旧趋风歳月搜诗老山林把酒同漂零谁得去美子逐飞鸿

闻应德茂先离棠溪有作

落日芦花雨行人谷树村青山时问路红叶自知门苜蓿穷诗味芭蕉醉墨痕端知弃城市经席许频温

交秋不雨

淤水飞成雨焦田灌作秋江潮双趺底伏腊两肩头鰕防知何罪蛟龙自不忧呉儿有高廩正荡采菱舟

晓行

渐渐路可识纷纷山转多数鸡啼逺坞一鸟起沧波藤杖湿云石笋鞋浓露莎何人尚高卧层构着烟萝

同诸子行上畝山

白石秋更洁清溪寒自鸣牛羊争道路鸟雀聚柴荆野果高低熟山田早晚耕吾归任衰懒儿輩托平生

晚投韩采岩

冬日寒难暝岩溪浅易冰猿飞红果嶂人度白云层望屋多依竹逢樵半采藤艰难吾甚厌何处学孙登

下郝长塘小憇示陈养晦

野水通田白村山贴县青兵荒犹古道暑暍且长亭稻地晴耕犊 田昼扑萤吾诗不寂寞细
讽与君听

此地

又说风尘起人来似水流饥穷余此地啸聚是何州野白荒荒阔云横莽莽浮相逢问田父未
可卖耕牛

送徐生仁荣侍亲游山

蚤识梁松拜居成潘岳游一年归雁雨四月落花秋溪味凉供酒山声昼入舟归来停新语莫
但作呉讴

简王元刚并寄意王理得君玉

见说频相忆新年已两书雪肥秦望草春动镜湖鱼茧纸堆成屋乌蓬走当车诸公有游事少
待意何如

紫溪邬义翁挽诗

先君老友最 是后凋人开馆日千屨藏书山四隣门迎新印绶圻掩古衣巾防哭皆英俊哀
风暗海尘

题陈秀才溪山佳趣

城郭寻寻尽溪山宛宛来同谁迁蜡屐为子破苍苔书欲斓斑设花须烂漫开赵郎题墨妙烟
雾眼中开

东离湖州泊南浔

张帆出东郭沽酒问南浔画屋芦花净红桥柳树深鱼艘寒满巷橘市昼成林吾道真迂阔浮
家尚越吟

次韵荅寄闾风舒先生

闻说芟岩老风情不减前菊盘秋熟蟹竹枕晚凉蝉碑碣僧频谒诗囊客自编梅花紫溪路一
别又三年

送陈养晦教谕之象山

闻说横经处潭潭坐翠微开窗见日出拂席有云飞药市山山古鱼餐水水肥新篇应烂漫休遣逋筒稀

赵孟 脩职挽诗

辨得从容死知渠磊落人风云数世泽玉雪百年身谱牒图经旧园林墓道新不知沧海上更费几沾巾

送罗学正赴歙

文公汤沐邑子去作儒官马首千峰秀莺声二月寒山禽攢俸纳溪友借书看近日科名阔青云上不难杜子问赴建康南轩祠长【祠前花木可爱】

一席清溪上深衣雪鬓翁挥犀谈孔氏释菜礼宣公堂饌淮鲜白賓筵楚醴红花台无恙否回首几春风

巳亥歲归过泉口紫芝山伤谨讲师

行路夢犹在入门人已非山青古佛顶云墨祖师衣赌奕曾同拙看真似欠肥百年谁免此只合早忘机

三山郑君挽诗

近日常师少人中又哭君遗编空白屋同列尽青云尘土千金产湖山数尺坟纷纷梁肉种谁得致斯文

送穹上人还里

但得扁舟便春风处处行定中三竺月禪外五【原缺】海角雕胡饭山畦玉版羹清緣倘相就谈笑解尘纓

褚叔豪赴山陰和靖祠长

此老真迂阔白头方出山一灯河洛后千础剡湖间讲鼓惊云动书船载月闲可无容席地容我了躋攀

逢翁舜咨

相逢浑不觉祇似宛陵贫裊裊花骄客潇潇雨净春借书消茗困索句写梅真此去青云上知

君有几人

舟过严州

溪石茸茸出水泉
滟滟悬街杯仙洞
顶挂席客星边
古防鱼为市穷乡
蠹当田生涯着处
有奔走愧华颠

招王奕世

闻说铜山下书屏
四面开就僧煮紫
笋共客席青苔铁
画年俱长霜根顶
未栽何当端午暇
一别剡乡来

再招奕世

雷晚还多雨山寒
只似春野榴开向
客篱笋长过人一
寸书看懒三义路
走频王郎肯来否
谈笑共南隣

山中

野水晴犹涨春雷
晚始鸣地闲无埃
迳山远有蚕耕身
世通寒暑交游半
死生方知一杯酒
真胜百年名

七月初五夜养正堂示诸友

客里犹多事秋来
又一旬青天星斗
净白露稻粱新留
落空存节炎凉莫
问人儒堂得佳伴
吟讽动比隣

袁提干挽诗二首

短世谁无死深山
独有归送车晴起
雾埋碣夜生辉晦
朔鸡鸣在江山鹤
夢非刚言仁者寿
近事例多违

其二

我昔携家走君曾
埽榻招乱离心易
感生死义难消雅
魄归泉壤潜光出
市朝平生五字苦
寒泪洒山瓢

单漕贡君范挽诗

竟抱遗经死斯人亦可哀传家一防足涉世万牛回白屋身空脱青山手自开樵苏且莫近玉
树炯泉台

久客鹿顶承张景山寄诗次韵奉荅

但得无拘束身轻处处仙清谈煨芋夜陈夢种花年水窦羊肠折山篱麕眼编诗来正清絕松
下忽闻鹃

梅山

梅尉功成后安知不此来路逢耕者问山寺化人开樵陇低通海茶村暖待雷谈 亦可隐不
用垦蒿莱

律诗七言

乙亥歲毘陵道中【清明】

百年只有百清明狼狽今年又避兵烟火谁家寒食禁簪裾那复丽人行禾麻地废生边气草
木春寒起战声 飞鸦天断处古来还是閩庐城

丙子除夜

富贵如今似骇机漂流未遣壮心违乡隣有酒贫能醉村落无医病亦稀客任低头从狗窦妻
休掩面对牛衣十年涉世浑如此除却躬耕事事非

杭城风雨中简子昂

五月钱塘风雨秋懷人频倚面山楼云收树色遥成海水学江声暗入沟一斗尽输无事饮千
金不买辟寒裘自怜寂寞无 学车马门前过似流

东湖第三溪上皆史氏故第

日晏霜浓十二月林疎石瘦第三溪云沙有径紫寒烧松屋无人鸣昼鸡几聚衣冠块作土当
年歌舞醉如泥早知涉世真成夢不弃山田春雨犁

史亨父挽诗

玉食婣娟非寿资清懷犹胜几男儿壶觴竹寺寻秋月灯火荷斋听雨时补衲有衣曾礼佛吞
舟无诀莫凭医平生潇洒王文学地下相逢且说诗

吳允文叅议同登金陵鳳皇台醉作

百年访古此徘徊更上山椒扫草莱一段地腴奔马瞰数围天险化龙开时闻营籍传謡曲谁见禪宫离劫灰李白不生王谢歇西风日落鳳皇台

越城待旦

防防虚楼竹隔明悲来辗转向谁倾天寒衡雁出万里月落越鸡啼四更为底朱顏成老色看人青史上新名清溪白石村村有五尺乌犍托此生

林村寒食

出门杨柳碧依依木笔花开客未归市遠无饒供熟食村深有纓试生衣寒沙犬逐游鞍吠落日鸦啣祭肉飞闻说旧时春赛罢家家鼓笛醉成围

寄天台舒阆风先生【初丙子同避兵台之硃石】

岭云尽处是台州有个诗翁住下头不寄一书春又晚相思百里水空流新踪冻合莺雏谷旧夢花迷燕子楼闻说道旁烽燧急定应重作峡中游

火后

当年歌酒留连处火后来看一惘然傍水几家初饮马入春三月未闻鹃炎凉世事残城树歌哭人声去客船不是危肠拚醉得颠狂无处着诗篇

过应浩然先生墓

人间万卷厖眉老眼见堂堂入草莱行客须当下马过故交谁复裹鸡来山花不语如听讲溪水无情自荐哀犹胜黄金买碑碣百年名字已烟埃

刘正仲至寶山不值主人而去次韵奉寄

日日松间过【原缺】诗成忽在水云西何人夜榻愁听雨无数春船倒上溪燕笋出时斑豹美鳳花开处杜鹃啼东归更踏来时路醉笔山廬取次题

游阳明一洞天呈王理得诸君

禹穴苍茫不可探人传灵笈鎖烟岚初晴鹤防青边嶂欲雨龙移黑处潭北斗斋坛天寂寂东风仙洞草毵毵堪怜尹叟非关吏犹向江南逐老

送防上人西湖并寄邓善之

闻说西湖也自怜君游更傍早春天六桥水暖初杨柳三竺山深未杜鹃旧壁草生寻旧刻新岩茶熟试新泉城中新友须相覓西蜀遗儒解草

辛卯除夜

腊月今年只今夕春风明日是明年狂歌把酒屠苏地醉眼看梅雾淞天碧玉千壶喧坐次红牙六博鬪飞钱头颅雪白心情在听说承平一惘然

拜袁越公墓因游定水寺有懷源老

乃翁已作飞仙去犹得潭潭好墓田老树背风深拓地野云依海细分天青峰晓接鸣钟寺玉井秋澄试茗泉我与源公旧相识遗言潇洒有人传

陪阮使君游玉几

花满车茵酒满船乱云堆里访枯禅林深何处无芳草人静有时闻杜鹃神屋画飞青防磧灵潭陰罩赤蛇蜒居然悟得松风夢回首庐山二十年

雪窦飞雪亭和孙使君

匡庐亦有千寻瀑无此陵虚翠玉台身倚老松天上立眼看飞鸟雪中来山神禁肃难投唾木落魄清得浣埃见说下岩堪对望道人临壑剪蒿莱

邑中滯雨示陈贵白

犹及相逢鬓未华故乡春尽不须嗟园林处处生新草风雨年年送落花高树昼寒归有鸟小溪湍急走如蛇方知傲世不在隐高枕北窗闻打衙

十月朔旦寄贵白兄弟

黄牛村前秋叶飞青螺峰外海云归故人相思雪满鬓客子独行风举衣乌鹄定占谁屋喜鲈鱼知比去年肥当时歌酒江湖上百里音书今亦稀

次韵任起潜谋隐之作

江边秋日逢任子大醉索诗吾欲狂为问山资何次第祇余丹诀转凄凉黄金范蠡曾辞禄白首虞翻未信方千古浮云共归意晓风城郭水花香

晚秋游中溪四首【戊子】

淡竹冈前沙雁飞小花尖下柘丸肥山云不见雨自薄天气欲寒人正归招伴祇须新稻酒临风犹有旧苔矶风流鬓髮荳荳在怪石老松今是非

其二

经秋溪水碧洄洄无数晓山如镜台红叶流从龙奥出白云飞向石门来亦逢纸户曾相识尚有樵踪且莫回端为何人作风物漫山漫谷野花开

其三

休折山中松桂枝溪鱼亦小莫垂丝沙田翻白收杭后霜树着红尝柿时日落牛羊归径熟天寒鸟鸟向人慈出云数里成官路问事如何总不知

其四

树淡云浓又一坡招邀处处是行窝梯岩危似蚁縁木架屋高如鹊结窠水味野栽茭白瘦山毛人摘芋红多行年四十不称意更欲客游知奈何

春夜喜陈汝晦见过

乃翁治狱多陰德之子论文有古风尊俎祇容吾党共衣冠能得几家同书林有业何妨隐徭籍无名莫怨穷百歲相期今夕意赖君咳唾起诸童

乡君子肯堂董君分教贵溪作诗奉寄

舟车赤日千余里笔砚清风二百年开口人知宗洛派举头身欲近闽天絺袍凉拥松皮几桂酒春浮药玉船犹有英髦卧空谷闲将名字访华颠

次韵荅陈叔高

蚤种青蒲已滿沟暮栽黄菊亦成邱不辞西日射牛背尚胜北风吹马头新雨客疎尘鎖几故山秋淡树藏楼艰难终竟乡情耐準拟行窝处处留

次韵寄陈达观少府兼简叔高

懷人路絕云归海避俗门深草蔽邱万事渐消闲客夢一生虚白少年头山蜚叫缓从除架淮雁来多莫上楼近日隣家有新釀每逢诗伴得淹留

过清凉寺王叅预墓下

江左风流廊庙人荒坟抛与梵宫隣多年羊虎犹眠石败壁貂蝉祇贮尘
万古云山同白骨一庭花木自青春永思陵下犹凄切废屋酸风吹野薪

送僧无等游华亭

华亭是我曾游处记忆端然不作疎地带三吴犹壮丽人经二陆自诗书
轻身羡尔能随鹤薄味从来不为鱼未卜西游时远近道成相问定何如

送陈彦恂北上兼简李奇卿学士

天末翛翛起画舸骊歌清切也堪听十年夜雨头垂白万里春风草又青
莫恋皋比专鲁席终须豸角瑞尧庭平生短李江南杰今作文昌第几星

于杭州九月送袁太初赴宁海教官

怜君防涉走风沙九月江城飞雪花黄蝶终归穿砚手青藜曾【缺】聚书家
吟圆坐石题山叶讲退登楼看海槎年少交游浑好在何时相伴访烟霞

次韵王监簿春前对雪之作

情懷未厌日如年幻境先看海变田梁苑贵游图画里山陰风致酒尊前
虾须帘湿闲春晓猊舌香浓凝午烟肯信高人有高卧矶头新泊钓鱼船

陈秀才问诗于余次韵赠之【叔壹】

秋半说诗秋又防覓从忘处更哦看不妨味熟心自悟祇恐业成身转寒
穷木野风天倡和崩溪怪石鬼镌刊扳君更上最高顶莫羡千金游子鞍

次韵荅胡山甫兼简汪日賓

白髮诗翁南峡居肯来与子不相疎久知诸老难折简端为此家多贮书
谈吐清无涉俗处容颜衰似避兵初溪梁一别还经歲接得新诗锦不如

其二

乱后交朋星散居如君那得易亲疎耐多但有客满座忙絶不令儿废书
万里山河蓬鬓底一春风雨杏花初闲身共逊耽诗老野服枯藤得自如

寄袁季厚

莫笑衰顏老剡翁凶年过彻賸顽穷坐窗渐爱日南至行路不愁天北风清话客多无酒欸白头交在有书通闻知别野林泉美一防一簷吾欲东

挽舒君实【名祿号亦山】

玉比清癯鹤比羸相看中路忽相遗诗才万斛难供歉药论千箱不起衰定有意游轻竹杖犹余手剪碎松枝南山山下徘徊处曾指佳城示阿宜

感事

死生契濶强兄弟南北分张好友朋战国几人成汉鬼劫灰今日信胡僧翰林身后诗千首工部邱前米五升山路陰寒鱼雁絕旧游何处寄槭藤

夢觉

夢觉依然一草寮浮踪已惯任飘摇虚檐晴气生朝露远树寒声过夜潮白骨又惊山下满朱顏刚向客中消时平不爱通侯印且愿深林作老樵

黎州山下有坡曰响地平黎州自孙兴公经始至今有祠其上

苍茫一片莓苔地随意触来还有声定是战坑余箭防不然琴屋贮瓶罍名真过客多能记迹古居人不敢畊孙叟有灵应索笑赋成留此试鏖争

寄赵子昂济南

济南官府最风流闻是山东第一州户版自多无讼狱儒冠相应有賓游秋风鱼酒黄梁市夜月笙歌画舫舟行乐使君诗笔俊一篇肯寄剡溪头

陈无逸张仲实皆授徒城中相望遣闷小诗往问

闲身不用苦咨嗟随分风流阅歲华白日垂帘同卖卜清流岸帻胜趋衙飞书漆槩诗无草夹注高檠眼未花更喜芳隣连二妙时时衿佩问东家

蔚讲师见示方使君唱酬诗次韵

长汀江上别多时白髮闲身天所遗避俗如仇翻好客知穷为祟却耽诗乡山云淡龙移久湖市春寒鹤下迟过尽榴梅与甜笋高侯还许放侯知

次韵如晦木犀因寄其从父性之老同舍

诗力如弓不易张
烦襟且觉对花凉
玲珑南雪晴秋树
淅窅西风夜月香
消得玉人歌古淡
许谁金屋鬪清狂
风流更忆同袍老
一坞闲云傍水乡

徐都目之官奉化

小垒飞书定不难
十年清苦旧儒冠
黄帘日转山衙静
彩笔春消海驿寒
坂马易劳湏缓骋
潮鱼虽美莫多餐
人来肯寄平安不
茅屋三闲伴剡滩

次韵和蔚师鉴师春懷

愁是云陰喜是晴
春游何处不关情
黄鸡亭馆琴三弄
青果杯盘酒数行
满砌雨添新笋密
隔墙风送落花轻
鉴湖湖上樵山老
破帽枯藜过一生

次韵王景旻寄轩

江湖犹觉气横行
羽褐藤冠学养生
掣肘累轻天与福
欺心戒重鬼司盟
行收耕稼闲勲业
别有吟哦好性情
祇恐蹊成似桃李
人来先识隐居名

卷三十元

剡源文集卷三十元

戴表元 撰

律诗七言

送柯以善自杭遊鄂

江汉天风日夜清君游何处濯尘缨云从鹦鹉洲前出月在鳳皇山上明已羨经羸吴士艳行
防词笔楚人惊残荻艭芷将何用归日分张与后生

读福建廉访辅大使弼字正匡遗事

臬官难称是闽中遗爱堂堂得比公姓字丹青太史笔岁时筮豆素王宫一生姜桂那时辣百
死江湖必向东从古仁贤有家世名郎台阁已生风

客京口

酒醪花秬鼓聒天百年成此好山川黄烟暮接淮南火白米秋攢浙右船碑古犹多埋鹤寺田
高耕遍卧牛阡陈踪兴废何由问只忆风流老米颠

金陵赠友

虎变龙阡此一时春风得似旧城池宫闲军卖偷来果寺废僧寻断去碑水水鱼肥供白鲈家
家蚕熟衣红丝太平尚属穷诗客酒贱如泥醉不知

湖山村

老去生涯学钓鱼溪山忽忆似湘湖风林四畔动竿瑟烟雨一篙行画图小市篝明沽郭索平
园栅树偃于菟偶然得住何妨住是处人间足畏途

己卯歲初葺剡居

休言声迹转沉沦百折江湖乱后身穷未卖书留教子饥宁食粥省求人坐来齿避樵苏长往
处踪迷木石邻翻笑古来逃世者标名先制隐衣巾

耕桑

耕桑本是闲居事学得耕桑事转多
失晒麦丛忧出蝶迟缫蚕茧怕生蛾
调停寒暖春移苾蒨陰晴夏插禾
衣饭为谁忙不彻醉来乘兴作劳歌

秋尽

秋尽空山无处寻西风吹入鬓华深
十年世事同纨扇一夜交情到楮衾
骨警如医知冷热诗多当历记晴陰
无聊最苦梧桐树搅动江湖万里心

王丞自鄞城归又许入剡

江城醉别太匆匆风雪家园一笑同
尽健不妨天予老絕清那许鬼欺穷
简书异日关谁事灯火寒乡頼此翁
几度丁宁鸡黍约扫关拂榻误儿童

壬午清明

节序愁中都忘却见人插柳是清明
登陴戍出吹弹乐上塚船归语笑声
解事浊醪相料理当权团扇正施行
悲欢寒暑君休问花鸟年年管送迎

寒食

寒食清明却过了故乡风物祗依然
穷中有客分青饭乱后谁坟挂白钱
落魄暖春为麦地陰沉溽雨近梅天
闲情正尔无归宿石鼎新芽手自煎

无题

板屋骤喧飞白蚁纸窗欲雨暗苍蝇
长劳井臼慚妻子近絕音书惜友朋
夜半苦吟堪泣鬼日高甘寝祗输僧
意衰俗物何难败才薄天公却未憎

奉题孙使君池馆

白髮使君经世材尽闲犹解畅池台
杂花屏障四时有明月镜奁三面开
各坐山随人意看正吟风通鸟声来
当年时雨堂前梦得似从容此一杯
【常州有时雨堂】家西十里外茅洋
小山中土塚累然初不封树乡先生
舒文靖公墓也

莫轻数尺黄泥壤埋却斯人后更无
山上自难生毒草树间长见聚慈乌
樵耕可免憑乡俗洒埽能来是学徒
后有宣尼湏痛惜待将墓额写呜呼

戊子岁晚赠应德茂

江海悠悠雪欲飞抱书空出又空归沙头人满鸥应笑船上酒香鱼正肥尘土竟成谁计是山林又悔一年非平生万卷应夫子两世知名穷布衣

寶山寺寒食次韵和闾翁

綠陰啼鸟春将老古寺垂杨日未西客子欲归风满袖桃花无语水流溪有人蔬笋忘饥渴何处松楸杂笑啼準拟一时僧榻畔诗翁题后更谁题

戊子清明前陪王丞度新岭

一百五日熟食节七十一曲下山坡寒暄相逢旧人少风雨欲尽新林多青岩不辞挂春霭白鸟何处生沧波途泥同兴不同调我懒且休君更歌

同陈养晦兵后过邑

搜山马退余春草避世人归起夏蚕破屋烟沙飞飒飒遗民须鬓雪毵毵青山几处杨梅坞白酒谁家桺柳潭休学丁仙返辽左聊同庾老赋江南

送人遊霞屿

霞屿风烟接 溟老仙万锺敞林扃峰前雁起湖云净池面龙来海雨腥阅世僧闲头黑白遊山客爽句丹青何緣飞去清源国雨夜翛翛着翅翎

己丑正月六日袁季源家遭燬次韵书闷

邨侯家 书千架杜老尊前屋万间此事吾堪慰流落迺来天亦妬穷闲反风待祷真虚语喫雨无方自厚颜间挈残家过西坞风流还许几生还

正仲今年鄞城之约不就因次韵慰悅之

莫怪诗翁不出山诗多那得是山间清溪欲暖莺啼树白日无人犬卧关不惜野花簪素髮时憑春酒转朱顏当年阮籍何曾达直到途穷始哭还

送于知州

居官难得是全名于守年多政转清身为素王扶坠户手提赤子出饥坑使来公馆文书简吏退私斋几砚横似此雍容好风度天邊看着绣衣行

壬午六月八日书懷

懷人故国鱗鴻絕避地春园草樹長四壁空存医俗具千金難售賣默方共兒生誦修吳語有
客行歌街楚裝昨夜見花頻作夢南風吹海白茫茫

杖錫寺

仙草漫漫路不分鐘魚那許外間聞涼天九月已飛雪晴日西山猶帶雲火後客夸新屋樣兵
前僧惜旧碑文藤湖只去招提頂見說漉田可種耘

四明山中逢晴

一岡一澗一縈隈新歲新晴始此迴莎坂南風寅蛤出茅檐西日一禽來人迷白路羊羣石水
卷青天雪里雷猶是深山有寒食梨花無數繞岩開

魏文節公墓

萬騎南來駐不留衣冠客此鎮林丘寒岩碎裂從中起亂水喧鳴竟獨流故物今惟存寓馬當
年誰為指眠牛坟傍小寺終村俗畫柱紗籠護冕旒

辛亥歲七夕醉陪諸公登西湖竹閣

畫鷁凌風汗漫游雨聲飛出萬山頭江湖望闊邊城起吳越音多客思柔野樹有枝猶系馬官
荷無葉不藏鷗十年浪走紅塵道今日臨城始識秋

蔡岙食藕

地逢平處亦縈迴不是逃兵底肯來坡上一祠猶姓蔡山前當路盡通台高岩童去收桐子鄰
縣人過問藕栽忽見深衣老儒者清時不信少遺材

辛巳歲六月三日書事

急報傳來又不真迎門翁稚笑聲頻情懷經苦思平世顏貌緣愁似老人兵後尚多難料事山
中誰是自由身沙瓶酒醺鮭蔬有領取燈花一樹春

耕休

耕休何處散煩勞東隸西梁信所遭溪水清清照魚影山風細細落松毛無名野草疑皆藥有
韻村謠例近騷稽古祇堪衣園用莫將車馬誤兒曹

畚齋次韻

贫贱知心老弟兄祇疑相得似前生避穷无地犹贪学负谤如天防用名兵后脱身宜共惜书中薄业尚堪耕殷勤预约频频见未见亦须频寄声

保福寺

漫天萝蔓断追寻犹有人嫌未苦深屋古渗当风雨气僧驯化得虎狼心松花昼暖蜂科蜜梅子春残鸟恋陰不应初来便忘去身闲处处是山林

张景忠学正之平江

江南最好說苏州傍得闲官也自由市舍酒香春四坐湖田租熟雪千舟歌成烂漫乌丝寫意到紫紵画鹢游我亦少年心性在经从準拟作遨头

鲜于伯机家钓台石

人间岩石乱纷纷严子台名最喜闻何术缩渠千里脉有人分得两峰云天边路遠星还动江上潮回日又曛解道泥途等轩冕东西更有范希文

辛丑岁十一月二十六日东归舟中示三子

节物悠悠不负公江行三日雪花风云侵贺监山亭白日在徐仙海岛红自笑得雏如病鹤也思结伴附归鸿何时办得村田活粳饭鱼羹百指同

归自西关有作简余率公钞使

白髮微官小祝同也随年少踏春风鄉心几夜马生角世味一时脱筒红旆戍楼花整整綠莎溪路水茸茸归来健美余公子卷帙如山一覽空

贵溪董教谕回里

八月暄暄似小春鄞江归客楚江濱梦中鲈膾紫莼菜画里纁袍乌角巾不枉夸张别风土有时吟啸杂仙真年高官满身轻健聊复婆娑亦可人

陈无逸教谕赴攸州

白露西风湘水清苍霞南岳晚天明离家休說三千里行道新看第一程橘味熟来思母遗草名疑处教儿评人生谁是安居者早拾貂蝉映父兄

周东乡载酒水溪上因游岳祠醉作

葫芦城下草平沙狼牙峰前溪吐花晴日路尘清野马空林人语乱神鸦馋思火瓮生烧笋渴
爱山炉熟煮茶投老远游何所惜为君欢坐岸乌纱

次韵东鲁省游石 山

一舸悠悠醉又醒溪山无语意分明 身何日化苍石鹤背有人游紫清百榼颁空看少俊千
金难买是春晴筵端宋玉尤骚絶游戲长歌复短行

寄赵子昂

溪上轻云去若飞花间密石静相依迟行自爱欵段马杂坐谁嗔短后衣江海于人元不薄风
流如此欲安归集贤学士吾兄弟近日音书亦较稀

亡友内翰赵公晦叔哀诗

振鹭庭中订坐身行藏空寄輶蒲轮上来鬼泣荆山璞猎罢人惊鲁外麟死肯扣阍排贵幸贫
犹倾橐施乡亲平生一一明经术隽永依然世泽新

次韵荅贵白

斗粟千钱不易酬海风吹断寄诗邮谁家盛设蟹黄饼有客翻披狐白裘春树自随冬树老官
河长挟野河流隔生兄弟何须説来作城南十日遊

清华堂

人生随分有清华万竹冈头第一家甃堦水温初荇叶粉墙风细欲梨花衣冠苍皓迎如画缙
素朱黄积满车从此儒林添脍炙老夫先借小诗夸

陆君采都目入闽

趋闽渐近解闽吟公子来时夏欲深卷地翠棚榕树驿漫天红锦荔枝林官庖隽永多 脍野
语啁嘲有怪禽风物自佳难逗遛浙江归棹待相寻

亚尹黄侯虑囚温处婺三州

金华瓊秀抵仙都雁宕石门天下无眼见朱幡出云雾手提丹笔洗焦枯海鱼味爽休多食岭
马程艰合缓驱定有车前投贄者幅巾麻褐是真儒

简汤及翁

六十三翁尚美髯今年添尽白髭髭心如晚路思家马身似春筐欲茧蚕无事官曹容岸帻有时书帙当清谈风情最苦汤公子家世衣冠旧汝南

舒子俊见过

来往通家不厌频青山心性白云身陰林石溜风传语霜月溪梁水寫真岁险鱼鲑难猝致天寒乌鸟自相亲燎炉薪暖糟床响随分欢留作好春

以家事付诸儿惟不得姑苏陆氏女子消息

祗怜地僻少过从更许年衰養惰慵行健有时寻近局起迟尝日到高舂鹿皮冠野频频戴防顶蔬粗欸欸供儿女团栾俱在眼独怜无信过吴松

江海

江海三秋古鄞城山林百拙剡溪生归来乡国方为客絕尽交游更畏名白防管宁形态丑黄金季布语言轻荒斋竟日无人事自作长歌寄好声

兵后复还白岩山所舍作

脱命归来意恍然余生堪喜亦堪怜财逢乱世真如土人到穷途始信天问讯比邻晡爨后呻吟儿女夜灯前明朝又作安西计饭后谁家沁雪田

鄞塘田家

经秋心事转衰颓客舍山村病眼开识路牛羊缘坂过通家燕雀下檐来饥从野槥分蔬饭渴指邻帘贯黍醅世事百年谁较是髯公鼻息昼如雷

江村遇九日

去年九月江城角尚得临风把一杯今岁并无黄菊看谁家更遣白衣来身犹是雁飞难泊时不如潮去解回还有南山防人意晚舟相对碧崔嵬

再寄曹居士

江海悠悠不为名年深识尽世间情于人有信惟潮候去处无嗔是鹊声新欲收书添累重旧曾学剑向财轻如何此日投闲迹又结精庐傍古城

兵后见三江口木芙蓉盛开

江上秋花无数生红红白白照江明当年茂苑看曾厌今日荒村望急惊泣雨羈臣愁去阙歌
风艳女惜倾城萧条欲别那得移向东篱配菊英

游西峯余儿时读书其旁

山回水抱西峯寺二十年前日日来一出居然负丘壑深藏还此遠风埃农樵识面逢多问鱼
鸟知心见不猜家世剡人须住剡相寻未识百千回

鮚埼唐乡贡大置酒悟空寺见欸

南宫通籍唐先辈白发天寒海上洲五鼎已推华屋梦一尊犹及少年游桃源有吏今安避铜
雀何人死亦休祗羨龙钟老禅伯倚栏无语看沙鸥

调贵白

客里光陰取次休嫩寒一夜袭衣裘不须多畏赵盾日正好深悲宋玉秋红叶旧题犹在手黄
梁新梦又从头余粮栖畝犹围坐此事输君第几筹

白岩山

漠漠溪风吹路尘白岩山下几穷身秋深竹色老于树昼静鸟羣喧胜人何处人家藏剡録有
时行客裹唐巾平生笑杀朱翁子刚为乘车弃负薪

絕句五言【杂体附】

班婕妤题扇图

时情任销歇闺思转慙懃也胜山陰媼挥毫托右军

子昂秋林行客图

石棱棱而白出树悄悄以红披嗟縞衣之嘉客方策蹇以何之

五杂俎

五杂俎金花绦往复来官路程不获已始归耕

五杂俎斑斓衣往复来反哺儿不获已为人师

絕句七言

张骞乘槎图

数尺枯槎底易骑海风吹浪白弥弥如今市上君平少曾到天河也不知

吕氏六桂堂

年少奔驰有底忙棘闱兰署梦茫茫白头鞍马风沙里听说燕山六桂堂

周秀才惠猫

狸儿轻捷豹儿斑作势擒生也不难渐觉形神欲相贺青奴黄妳夜平安

汪济秀才饭牛稿

冰雪玲珑汪太中吟诗十叶有家风天寒日暮江东道逢此顰伸牛口翁

苏李图

塞北中郎雪满头陇西壮士泪沾裘人生百歲能多少直至如今说未休

庙二道士俱以酒死

张髯好客月千壶余吃清贫逐斗沽二子若逢仙防防化成一对酒葫芦

湖州

山从天目成羣出水傍太湖分港流行遍江南清丽地人生只合住湖州

其二

一饱悬天不待求几人干白少年头君看滚滚东流水到海成渊始懒流

百鹭图【题陈汝朝】

苇折荷枯可奈何西风吹影净婆娑防君作此超摇趣一个江天也厌多

因营张村蛮窝并书所见

老子来无一把茅居然得此好洼防开塘谨避蛟龙窟伐树须存乌鹊巢

其二

头白西来不买田时时却费买山钱一丘一壑吾归矣待得田多是几年

其三

男儿三十气吞牛漏尽钟鸣走未休不问征西并处士山中一样土馒头

百鴈图

近看分明远欲无水天空阔好江湖幸然不入虞人眼又被闲中画作图

题番阳徐氏双头牡丹图

天公幻化不经意双萼忽然枝叶同一似人间好兄弟朱鞍锦辔踏春风

陈公哲梅花百咏

梅下故人呼不应石桥溪寺水泠泠回头听得陈惊坐一似春风吹梦醒

其二

雪后西湖空碧波酒徒消散也无多白头醒眼春风里奈此梅花百咏何

张道士求桤林诗

地移淮橘多成枳人说江梅竟是桤蜀木似桤成底用盛时名字落江南

酬陈秀才

一春一百二十日日日开眉得几人直与破除风雨去今年浑似不添春

赋董氏双岐竹

山庄一对青青玉潇洒天然同榦生说与人间好兄弟时来林下听风声

读书有感

鲁女悲嗟起夜深当年枉却泪沾襟如今已免邻人笑老大知无欲嫁心

其二

最爱徐生欲避秦海天东去不通津絶知胜似桃源境男女同行五百人

题子昂照夜白

风前新解锦鞍韉雪色模糊雾色寒此物人间无处着千金祇得畫图看

题苏李泣别图二首

弓疲矢尽三千里节弊衣穿十九年流落天涯有离别当时谁拟畫图传

其二

沙云如雪雪如尘握手相看语语真多少世间无泪面一生错笑陇西人

马浩秀才携秋日海棠诗见过

山城八月有春风一树嫣红淡又浓纵使失时无态度也胜茉莉与芙蓉

奉化城西三溪口

青林白石三溪口斑笋黄梅四月头正好清游谁懒得幸无公事且归休

题赵子昂叠岫图

百折云颠路尽通无名怪木淡书空相逢无问秋江客不是巴中是剡中

其二

白石青林底处无侵云亦有小屠苏桔花飞尽不归去挥汗江城看画图

九月西城无涧同陈道士衡上人

仙翁面带江海色释子口融冰雪浆同是西风未归客烧香煮茗作重阳

其二

巾衣三客不须同泉石相看我亦翁最惜一轩秋烂漫芙蓉池上木犀风
西兴马上

去时风雨客匆匆归路霜晴水树红一抹淡山天上下马蹄新出浪花中
赠屋西小陈秀才【名公凯余字以无过】

年少饥寒不足忧笑谈有味自风流等闲辍赠两兔颡待看修成五凤楼
其三

毛锥自是今无用铁砚还知古可穿不惜日抄三万字胜储百亩剡中田
蝴蝶

春山处处客思家淡日村烟酒旆斜蝴蝶不知人事别绕廨闲弄紫藤花
梦中作

晴霞冠岭朝红洁新涨连空晚绿酣惆怅春风倦游梦木兰亭上望淮南
入杭

曾江白酒樊江饭处处当年客似家垂老重来旧相识春风只有野桃花
题东玉师府所藏潇湘图

少年防梦底曾闲多在江湖烟水间今日精蓝方丈地倚窓眠看洞庭山
灼艾戏呈阮使君

鬓毛秋后转漂零愁坐穷檐展灸经得似画堂歌吹里疏黄钟乳按娉婷
水墨梅花

江海归来见似人离披犹自少风尘何如淡月山庄夜百幅清溪乱写真
赠陆相师

江南江北路漫漫七十九翁能往还今代贵人容易识卧龙不在草庐间

题伏生授书图

白头不死见时清子女相依解授经何用生男作鼃错乃翁一语不曾听

题江干初雪图

断树寒云古岸隈渔翁初拨小船开看渠风雪忙如许还有鱼儿上钓来

铜山寺口初见梅花书寄何则顔二首

吴歌楚舞送年华忆着终还不似家今日春风吹梦醒铜山寺口见梅花

其二

沙疎石瘦水涓涓折得梅花费两年更与何人说潇洒香中行坐水中眠

戊戌清明杭邸坐雪

思乡处处只愁生正好春游又不晴雪是梨花云是柳马婆巷口过清明

四明山中十絶

鴈飞不断楚天长云路霜林级级黄何处人烟有墟落北风高垅散牛羊 右枫树坑

山深不见焙茶人霜日清妍树树春最有风情是岩水味甘如乳色如银 右茶焙

小横欲尽大横来万壑千岩汹涌开闻道洞天深防许紫云深处有楼台 右大小横山

乱云穿尽得平芜一段冰寒碧玉壶犹是春风未相弃山前吹长万龙须 右北溪

洞深烟树碧氤氲只采灵苗不采薪闻着踪由多懒说相逢莫有姓韩人 右韩采岩

怪石惊湍吼不休时时岩客饮寒牛谁知此水明州去浸作琉璃万顷秋 右莽广溪

七里黄泥红树冈西风果熟一村香居人只道山深好三百年来是战塲 右木兰

仙在人间不易寻当时已道是山深可怜华表标题处夜夜猿啼枫树林 右仙山

两颊棱棱额下分更无防处可藏云西风怕夺行人眼荞麦满山铺锦云 右羊额岭

刘郎一去杳无踪水白山青只故宫欲问岩前老松树人间禁得几秋风 右白水

题赵大年芦鴈

寒更索索警霜丛兄弟当年意自同犹是江湖太平处未妨沈着卧秋风

谢隣友陈仲学秀才惠玉芎苗二首

坊州杜若自堪羞沛国青粘亦懒求那似一丛苍凤尾等闲收味古甕瓠

其二

君家自有头风药种在青青竹素园此物但堪供暑啜肯来相就发清言

瑞上人求诗

寶叶山中源悟师布衲百结面如痴十年相忆忽在眼谈笑甚似仍耽诗

其二

源公作诗可怜生亦有谡谡山林声见说丰姿委缣素霜颊黛顶照人明

茅斋

红杏园林雨过花遶陂深草乱鸣蛙春风不问茅斋小自向阶前长笋芽

感旧歌者

牡丹红豆艳春天檀板朱丝锦色笺头白江南一尊酒无人知是李 年

萧照春江烟雨图

波痕如树树如烟更是春陰小雨天何处得鱼何处醉笋皮蓬底解蓑眠

西塞山图

空中生业寄鱼蓑云是亲情水是家便有踪由无处覓春风岸岸野桃花

李元中秀才歲晚游诸公间

愁中待醉何曾醉梦里还家不是家输与山行穷学究一筇一笠看梅花

丙午清明日青塘道中

三里五里沙路平一番两番溪雨声无奈春风动人处紫荆青李满林生

桃花寺石台

台前藤蘚碧交加台下清流直又斜待得丹成知几日春风随分野桃花

有人示山水画卷以为元晖作求诗

砚山山下小于菟文彩斓斑今亦无一坞乱云浓似漆春风吹梦过西湖

题孟浩然霜晓吟行图

霜风飒飒搅吟鞍童怖驴愁作许难便使玉堂遭遇去朝参更是五更寒

荀陈聚星图

州里相过未厌频居然踪迹动星辰当时多少辉煌者不画诸公画此人

梁楷画雪塞游骑图

耸脰攒蹄一驻鞍氍毹衣韦帽白漫漫祗应田舍骑牛者无此风沙踏雪寒

过姑苏

水天弥望接青芜云气漫漫近又无一色好风三百里挂帆安坐过姑苏

五云山图【子昂为戚氏作】

林庐深插紫髯颜一防渔舟带暝还但得身闲无俯仰人间处处五云山

雨中过泉教张子开名先遇

平生剡梦十八九短策还经静者居一曲好溪山起处数声疎雨雪来初

其二

衣冠颠倒君休怪筋力过从我有余却笑秋风洛阳掾得归犹望食鲈鱼

次韵荅隣友近况六首

十百琅玕接屋山麦花淡白菜花斑村园富贵谁消得更看溪南墨牡丹

其二

炊成日影三竿直睡起溪流一尺高懵懂不知何歲月山风吹白镜中毛

其三

祝鸡归后放牛初小立溪梁看打鱼渐喜村邻尽相识向来朋旧却无书

其四

剡源田舍谁能识只此桃源有路通草长岸漫渔塍北月明人语纸槽东

其五

三间瓦屋数弓园旋学桑麻又一年村酒沾唇频得酒山歌出口即成篇

其六

舍南舍北种田郎唱得田歌曲曲长莫学傍村游侠辈茜红抹额臂擎苍

送陈养晦谒阆风舒先生四首

嚼雪餐冰二十年空山日月自风烟从君识尽搜诗法不透芎岩不是仙【芎岩山名】

其二

大篇无法须自悟小语有益最难寻祗今人嫌此老谯后来追忆直千金

其三

大冠檐袂走纷纷对面可容三斗尘便令眼识天下士此子已胜寻常人

其四

无诗莫入阊风里到却阊风那有诗拾取松风作新曲归来时向梦中吹

同曹泰宇赋寶化凤花二首【曹名说字习之】

花开难得年年看住近须还日日来古壁危阑自顏色不烦高筑凤皇台

凤皇不出几何年莫怪山花惜杜鹃一樣春风好毛羽回头曾管蜀山川【凤以杜鹃花为之】

过鄮山祠塾作

沧江城阔三义口白日 歌数亩宫犹有祠官旧杨柳向人离立管春风